

51776/6

2 vol

90

(76)

TORTI, F.
c

THERAPEUTICE

SPECIALIS

AD

FEBRES PERIODICAS PERNICIOSAS.

LEODII,

APUD J. F. JALHEAU, BIBLIOPOLAM, IN VICINIA UNIVERSITATIS.

PARISIIS,

APUD J. B. BAILLIÈRE, BIBLIOPOLAM, IN VIA SCHOLÆ MEDICÆ.

BONNÆ,

APUD ADOLPHUM MARCUS, BIBLIOPOLAM.

GENEVÆ,

APUD PASCHOUD, BIBLIOPOLAM.

TAURINI,

APUD BOCCA, BIBLIOPOLAM.

F. TORTI

PHILOSOPH. ET MEDIC. DOCT. MUTINENS. IN PATR.
LYCÆO PROF. PRIM. SEREN. REYNALDI I, MUTINÆ,
REGII, MIRANDULÆ, ETC. DUCIS MEDICI, A CONSILIIS
QUATUORVIR. PUBLIC. VALETUD. ET SOCIET. LOND.
SODALIS,

THERAPEUTICE
SPECIALIS

AD FEBRES PERIODICAS PERNICIOSAS.

NOVA EDITIO,

AUCTIOR, ACCURATIOR, CUI SUBNECTUNTUR EJUSDEM
AUCTORIS RESPONSIONES IATRO-APOLOGETICÆ AD CLAR.
B. RAMAZZINI; ADDITIS AUCTORIS VITA A L. A. MURA-
TORIO CONSCRIPTA, ET NOTIS EDITORUM.

EDENTIBUS ET CURANTIBUS

C. C. J. TOMBEUR ET O. BRIKHE, M. D.

TOMUS PRIMUS.

LEODII,

EX TYPIS C. A. BASSOMPIERRE,

MDCCCXXI.



318332



MANIBUS

EXCELLENTISSIMI, DOCTISSIMIQUE
VIRI, NOSTRATIS ET AMICI,

P. H. NYSTEN,

MEDICINÆ DOCTORIS, MATERIÆ MEDICÆ PROFESSORIS PARI-
SIIS, INFANTUM NOSOCOMII, DISPENSARIORUMQUE EJUSDEM
URBIS MEDICI, SOCIETATIS MEDICÆ FACULTATIS, ATHENÆI
PARISIENSIS, SOCIETATIS PHILOMATHICÆ, ACADEMIÆ SCIEN-
TIARUM TAURINENSIS, SOCIETATIS MEDICÆ BARCINONENSIS,
SOCIETATIS ÆMULATIONIS LEODIENSIS, SOCI,

SACRUM ESSE JUBENT

EDITORES.



Digitized by the Internet Archive
in 2018 with funding from
Wellcome Library

https://archive.org/details/b29336740_0001

LECTORIBUS EDITORES.

LITTERATURÆ medicæ inservire credidimus, hac Torti editione: operis præstantia, successus antecedentium editionum, eruditorum comprobatio, difficultas operis acquirendi, sive inopiâ sive enormi pretio, hæc cuncta in ejus gratiam militant, undè laudibus non indiget. His omnibus innixi, opus, de novo, typis mandavimus; ex eo defluunt cuncta quæ à Torti temporibus de febribus perniciosis vulgata sunt. Missis divisionibus febrium, et Torti opinionibus tum de naturâ febrium intermittantium, tum de Chinæ Chinæ modo agendi, quæ cuncta physiologicis sententiis hujus temporis nituntur, quæcumquē de his stupendis affectionibus prolata sunt, in Torti opere reperiuntur.

Ratiocinia, hodiè futilia, tum necessaria fuere, cum medicina speculativa unice existeret; nam etsi experienciâ comprobata, fidem non sibi vindicabant, nisi ratiocinio suffulta, quod abundè probatur difficultatibus quas expertus est Torti, ut usus Chinæ Chinæ febrium intermittantium curationi adaptaretur. At auctor de necessitate remedii certior factus, chaos febrium intermittantium omnibus modis extricare tentavit, et etiamsi experienciæ magis quàm hypothesibus crederet, meras observationes absque ratiocinio effectui carere censuit, et sæculi sui ingenium et na-

turam nactus, logicam arctissimam in subsidium advocavit, et eâ apprimè usus est.

Auctoris textum sanctè intactum reliquimus, mendis typographicis quibus scatent variæ editiones sedulò deletis, et etiamsi quædam in nostrâ editione sine dubio irreperint, hæc tamen correctior apparebit quàm Lipsiana et Francofurtiana anni 1756, quæ aliis antepositur.

Torti opus subsequentibus ideas præbuisse jam diximus, attamen nuperrimi observatores multa invenerunt quoad varietates, et ex nostrâ sententiâ, extendi adhuc possunt, nam sine dubio, modificationes pathologicae proprietatibus vitalibus organorum numero referuntur.

Notas addidimus ut opus ac quisitis ditesceret quoad historiam naturalem et medicam Chinæ Chinæ, ad modum agendi et administrandi Herculeum remedium; quàm brevissimas effecimus, tum è scriptis, tum è variis auctorum sententiis inter se collatis excerptas, et si quandoquè opinionem propriam proferimus, ex collisione opinionum exsurgit.

Quoad curam febrium intermittentium sive perniciosarum, sive benignioris naturæ, ad Chinam Chinam unicè respeximus, ut textus scriptoris integer remaneret. Plura idèò medicamenta quibus virtutes anti-periodicas tribuunt; uti coffeæ non torrefactæ pulverem, ab auctore Meglin prædicatam, arsenicum, à pluribus medicis, etc., silentio prætermisimus.

Quid multa! Utilitati publicæ unicè consulimus, felices, si metam attigimus.

FRANCISCI TORTI

MEDICI MUTINENSIS

VITA.

NON ea fortassè postrema laus fuit regionis illius, cui dominantur serenissimi Duces Atestini, egregios nostris potissimùm temporibus procreâsse viros, qui medicam artem editis libris aut illustrârunt, aut novis subsidiis juvârunt. In chirurgicis præcipuè versatus est D. A. SANCASSANIUS Scandianensis, MAGADI viri celebris discipulus; in anatomicis A. PACCHIONUS Regiensis. Præter alia ad praxim medicam, ac regimen sanitatis spectantia, adversus pharmacopœæ imposturas scripsit F. GHERLIUS Mutinensis. Utilem insupèr tractatulum de potu vini calidi, aliaque opuscula nobis reliquit J. B. DAVINIUS Garfaniensis, Raynaldi Ducis medicus. Prætereà ad curandas febres malignas et contagiosas methodum habemus traditam à vivente J. B. MONREALI medico Saxolensi, quæ utinàm aliorum quoque experièntiâ probetur; nihil enim moror theoriam, sinè quâ remediorum utilitas consistere potest. Neque reticendus eximius vir A. LEPROTUS medicus Corrigiensis, cujus curæ antea Clementis XII Pontificis Maximi, nunc Benedicti XIV, valetudinem (utinàm diutissimè felicissimam) commendatam novimus. Suâ quoque laude minimè fraudandus H. VAN-

DELLIUS medicus Mutinensis, nunc in academiâ Patavinâ cathedram chirurgicam tenens, et longè latèque ob felicissimam chirurgiæ praxim expetitus. Sed qui præcipuè magnam sibi celebritatem nominis in physicæ et medicinæ studio ubiquè conquisierunt, fuère B. RAMAZZINUS Carpensis in lyceo Mutinensi, ac demum in Patavino primarius medicinæ practicæ Professor, cujus vitam B. RAMAZZINUS medicus ex fratre nepos concinnavit; et deindè A. VALLISNERIUS Regiensis eques, in eâdem Patavinâ academiâ nunquàm delendæ memoriæ professor, cujus vitam litteris consignavit, atque universa opera collegit A. VALLISNERIUS junior ejus filius et eques, publicus et ipse in eâdem academiâ philosophiæ professor. Tertius accedat nunc F. TORTUS medicus Mutinensis, cujus vitam mihi delineandam proposui tum ad præstantissimi viri, patri æquè decus, tum ad excitandos in æmulationem ejusmodi exemplo medicinæ tirones.

Inter antiquos ac nobiles Mutinensis urbis cives TORTORUM familia recensetur, et vel ipso seculo XV et duobus subsequentibus quosdam ex eâ illustres nostræ Urbis conservatores reperio. Parentibus autem F. TORTO, Tribuno militum (nunc *Colonello*) et Columba Marchesia, natus et Mutinæ F. TORTUS, de quo nunc agimus, pridie kal : decembris anno 1658 et in S. Johannis Evangelistæ sacro fonte regeneratus, paterno nomine donatus fuit. Latinæ linguæ, atque humanioribus litteris in patriâ operam dedit. Philosophiam quoque aggressus, abso-

luto curriculo, ejus theses publicè proposuit, ac pro iisdem propugnavit anno Ch. 1675. Ad jurisprudentiæ studium deindè se contulit; at quùm in illius agro nihil amænitatis conspiceret, plurimùm tœdii sentiret, ad medicorum castra convolavit, exemplo etiàm ductus Alexandri Torti doctoris medici, cujus nomen occurrit in veteri matriculâ adjectâ statuto collegii medicorum Mutinensium. Desiderabatur tunc publica medicinæ cathedra in hâc Urbe. Quarè editi medicinæ libri in præsidium adsciti fuerunt, eorumque ope factus sibiimèt ipsi magister TORTUS, theoricam indè sibi parabat. Neque diù pòst se in disciplinam tradidit Antonio FRASSONIO magni nominis eo tempore apud Mutinenses medico, ut practicæ medicinæ compos fieret. Erat TORTO elegans vividumque ingenium, tenax memoria, perspicacia judicii suprâ ætatem. Proindè tantæ spei discipulo delectatus FRASSONIUS, eum sine morâ ad scrutandum ægrotorum pulsum admisit. Nequè pluribus opus fuit, ut TORTUS sententiis ac præceptis medicinæ jam non levitèr imbutus, in Bononiensi gymnasio lauream doctoralem philosophiæ et medicinæ anno 1678 consequeretur. In patriam regressus, dùm non segnis plura artis suæ documenta sibi procurat, ad eandem aliis tradendam repentè adigitur, vix annos XXIII natus. Iisdem nempè temporibus FRANCISCUS II. Dux, utpotè litterarum amantissimus, et patrii decoris avidus, Mutinense gymnasium restaurandum curavit, delectis scientiarum et artium magistris, ne quid

doctrinæ superesset, quod in posterum alienis in urbibus studiosæ juventuti conquirendum foret. Geminae cathedræ ad tradendam medicinam, præter alias institutæ fuerunt; altera B. RAMAZZINO viro doctissimo, nupèr mihi memorato, commendata, altera F. TORTO; et uterquè frequenti auditorum concursu, multâque cum laude suo munere fungi cœpit. Amborum quoque studio et curâ factum est, ut abrogatâ dominante à tot annis Galenistarum methodo, tutior medendi ratio in Urbe nostrâ succederet, indignantibus frustrâ antiquioribus medicis, et pharmacopolis, quorum plerisque pixidibus exitium grandè inlatum fuit. Parùm prosperâ valetudine intereâ conflictabatur FRANCISCUS Dux, quàmquàm in juvenili ætate constitutus: proptereaque TORTUS, ac deindè RAMAZZINUS, ordinariis illius medicis tamquàm subsidiari; adjuncti fuerunt, ut inito simul consilio concorditè, quùm opus foret, illius morbis mederentur. Angebatur interdum præmaturâ prodagrâ optimus Princeps; nullum ei tunc erat præsentius levamen, quàm litteratorum virorum lecto suo adsidentium colloquio frui, inter quos potissimum emicabat RAMAZZINI multiplex eruditio, et F. TORTI festivitas, qui non minùs ad seria, quàm ad leporem compositus, ingenii sui alacritate omnibus præstabat. Is prætereâ in amorem poeseos ab ineunte ætate ferebatur, et in latinâ æquè atquè in Italicâ elegantibus sæpè versibus ludebat, idcirco in aliquot academicorum cætuum catalogum inlatus. Quùm verò Atestinus

Princeps suavitate musices in primis oblectaretur, quam in rem selectissimos omnium cantores ex Italiâ conquisitos alebat, aliquot sacra dramata (nos *oratori* appellamus) TORTUS juvenis composuit, quæ typis tunc tradita, et musicis modis illigata, non mediocrem eidem plausum peperêre.

De mercurii motibus in barometro difficilis quæstio tunc inter philosophos fervebat. RAMAZZINI in mentem venit, ejusmodi motuum ephemerides contexere, suamque sententiam de illorum occultis hactenus causis publici juris facere. Ad eandem quoque spartam exornandam invitavit ille J. B. BOCCADATUM mathematicum Ducalem, et F. TORTUM, invenitque obsequentem utrumque. Nemini vel ex ipso vulgo nunc ignotum est, sub nebuloso cælo mercurium in barometro deprimi, sub sereno ascendere. Contrarium fortè visum fuerat J. A. BORELLIO philosopho clarissimo, reluctantem tamen omnium experienciâ, et præsertim RAMAZZINI, qui per complures menses singulis diebus mercurii varios motus diligentissimè spectatos in commentarium suum retulerat. Nihilo seciùs desperatam rem ingenii exercendi causâ TORTUS suscepit, videlicet ostendere, posse excusari, imò et quodammodo defendi errorem facti, in quem BORELLIUS prolapsus fuerat, et rationationem ab eo adhibitam consistere posse. Paradoxa hæc dissertatio locum habuit inter *Ephemerides barometricas mutinenses* RAMAZZINI, anno 1694, typis Capponii editas. Quo anno quum FRANCISCO II. Mutinæ Duci à morte sinè

liberis sublato successisset RAYNALDUS S. R. E. Cardinalis ejus patruus, delectus est F. TORTUS novi Ducis medicus pari honoris gradu cum DAVINIO mihi nupèr memorato, quo ad tuendam valetudinem suam idem Princeps uti priùs cœperat. Intèr laudanda sui regiminis primodia, hortante potissimùm et instante TORTO, curavit Dux ipse RAYNALDUS, ut Mutinensis Respublica theatrum anatomicum in publico palatio excitaret, ac decenti honorario doctum quempiam virum conduceret cujus esset medicinæ tirones ad perfectam anatomes cognitionem perducere. Ad id muneris advocatus TORTUS, anno 1698, nulli diligentiae pepercit, ut civium desiderio et expectationi responderet, tum publicis lectionibus, tum universi corporis humani sectione membratim identidem expositâ. Antea verò, hoc est anno 1695. Mutinæ prodierat institutio physico-astronomica auctore P. D. CAJETANO FONTANA, clerico regulari Mutinensi, in quâ is obiter insurrexerat adversus RAMAZZINI et TORTI sententias de variis mercurii motibus in barometro. Simili conatu contrà easdem pugnavit J. CAMERARIUS Gottingensis. Verùm quia neuter ex iis adversariis hypothesim aliquam statuerat de hujusmodi abstruso philosophiæ arcano, et dumtaxat impugnando Mutinensium systemate tota res steterat; nihil eis repositum fuit. Majoribus animis deindè in controversiam istam invasit G. C. SCHELHAMERUS Kiloniensis Dissertatione editâ, in quâ post multa in Mutinensium opiniones congesta, solutionem demonstrati-

vam, ut is aiebat, sibi que persuadebat, problematis barometrici exposuit. Calamum tunc rursus arripuit RAMAZZINUS, nulloque negotio ostendit, SCHELHAMERII demonstrationem in leves auras resolvi, quippe quæ immani æquivocatione laborabat, et certissimis hydrostatices regulis apertè adversabatur. Quâ occasione TORTUS quoque scholastico stylo non solùm ad dejicienda malè jacta SCHELHAMERI fundamenta se contulit, sed etiàm propositis à P. FONTANA et CAMERARIO difficultatibus viriliter occurrit. Idcirco unâ cum RAMAZZINI novâ lucubratione anno 1698, edita fuit TORTI *Dissertatio epistolaris altera triceps circa mercurii motiones in barometro.*

Italicis Poetis parùm æquum se præbuerat P. BOUHOURSUS è soc. Jesu Gallicus scriptor. Istorum autem tutelam susceperat J. J. URSIUS Marchio clarissimus Anno 1703 edito libro, cui titulus *Considerationi* etc. Pugnam postea redintegrâsse visi sunt Trevoltienses PP. soc. Jesu. Quamobrèm URSIUS altero libro Gallicorum insultum repressit, et pro communi causâ commilitones etiàm habere decrevit quosdam ex amicis suis. Tunc TORTUS quoque expetitus in aciem descendit, et quemdam TORQUATI TASSI insignis epici poetæ locum à Gallicâ censurâ vindicavit, eum simul ostendens cum honestâ poetarum licentiâ rectè componi, et philosophicis placitis Aristotelis, Cartesii, et Gassendi omninò respondere. Legitur etiàm in Tomo II pag. 175. operum ejusdem URSII à B. SOLIANO Mutinæ typis traditorum epistola latina sub nomine L. A. COTTÆ

Ejus auctor TORTUS fuit, ut ex autographo adhuc existente, et ex præfatione ad URSII Opera, constat. Verum levia hæc fuerunt, ne dicam nulla, experimenta doctrinæ, quâ TORTUS pollebat. Quod ei famam deinde comparavit, eamque grandem ac perennem, uti sperandum est, fuit illius *Therapeuticæ specialis*, opus videlicet, cujus pretium si ex utilitate metiaris, vix estimare possis. Febres quasdam periodicas jamdiu animadverterat vir solertissimus, et in medicam praxim intensissimus, miti aspectu primò procedere, tum repente per teterrimum dolum in malignas converti, ac postremam ægris perniciem adferre. Tunc aut nullum ex Chinæ Chinæ usu præsidium petebant stupentes ac delusi medici, aut ministratæ hæc vulgari methodo, viribus destituta deprehendebatur ad subigendum lethale venenum. Ineluctabilis proinde mors consequencebatur. Verum TORTO in mentem venit, ex quo ejusmodi febris intermittentium typum primo acceperant, etiâmsi in perniciosarum pomœria erumperent, Peruviani corticis virtute posse expugnari, dum tamèn inopinato febrilis maligni fermenti augmento uberior vis et copia corticis ejusdem opponeretur. Egregii viri consilium è vestigio felix probavit eventus. Complures deinde sublimis atque infimi subselli homines certæ mortis faucibus hæc methodo erepti fuerunt; eoque res perducta est, ut TORTUS tot exemplis fretus pronunciare potuerit; quemcumque hominem à periodicis febribus in malignas delapsis correptum, dummodò

XXIV horæ vitæ ægrotanti supersint, oblatione Chinæ Chinæ nupèr memoratâ methodo, etiâmsi frigidus, anhelosus, ac ferè cadaverosus appareat, periculum omne evasurum, et brevi etiâ pristinæ sanati restitutum iri. Vulgata jam erat, Civibus nostris gratulantibus, utilissima hæc methodus; sed minimè fines ipsius Urbis excedebat. Quamobrèm TORTUS, ut benè de omnium salute mereretur, eandem litteris consignare, illustrare, publicique juris facere in animum tandèm induxit. Prodiit annò 1709 libri ipsius *Synopsis*, tum anno 1712 typis B. SOLIANI liber ipse cum hocce titulo: F. TORTI Mutinensi, etc. *Therapeutice specialis ad febres quasdam perniciosas, inopinatò ac repentè lethales, unâ verò Chinâ Chinâ peculiari methodo ministratâ, sanabiles* etc. Multa ibi de corticis Peruviani usu, multa de naturâ ac varietate febrium periodicarum, quæ hominem produnt theorices non minùs, quàm praxeos medicæ scientissimum; sed hæ disputationibus abnoxia. Non illud certè, quod potissimùm libro originem dedit, hoc est lethaliùm febrium felicissima ac certa curatio. Hoc autèm beneficium in universam Rempublicam collatum tanti ponderis reputabat interdùm TORTUS, ut in litteris (1) ad me datis, quas post hanc vitam lector accepturus est pluris faciendum suum librum diceret, quàm innumeros alios de re medicâ tractantes. Quod sanè

(1) Litteras de quibus hic fit mentio impressioni non tradimus quia italiano ideomate sunt vulgatæ.

ille aiebat non ad ostentationem ingenii sui, non cœco sui amore præreptus, quippè modestissimus homo semper fuit, et de se nunquam gloriabundus loquebatur; sed quia rem, uti erat, contemplatus plus utilitatis è libro suo agnoscebat emanaturum, quam ex tot aliis Jatrophiæ libris de morborum qualitate, et curâ, multa tradentibus, sed nihil certi remedii adferentibus. Quid enim aliud medicorum ars præcipuum sibi scopum finemque statuit, nisi læsam hominis sanitatem reparare, atque ægros, quantum fieri potest, ab interitu arcere? An id præstent tot systemata, tot disputationes, tot de rebus medicis atque remediis commentarii, probè ii norunt, qui medicinam intimè nôrunt. Atque utinàm nemo unquam periret medicorum et medicinæ ipsius vitio, qui sinè medicis, naturâ ipsâ curante, fortassè convaluisset. Chirurgiæ propterea major aliquâ ex parte laus est, quòd homines certè morituros vitæ non rarò restituat; hoc autèm de medicis tot lethales morbos curantibus vix affirmes, si sapis. Hinc habes quanti faciendus sit TORTI liber.

Atque is profectò omnium plausu non in Italiâ tantùm exceptus fuit, sed per Germaniam quoque, Galliam, Hispaniam, atque Britanniam. In Galliis celeberrimus HECQUETUS, viso, libro sibi amicitiam TORTI conciliavit, illiusque nomen non semel in suis libris commendavit; eum Regia academia Londinensis suum socium adlegit: sunt etiàm nobis litteræ clarissimi LANCISII; sunt cele-

berrimi in Germaniâ medici F. HOFFMANNI: sunt medicorum in Valentinâ Hispaniæ academiâ degentium, qui TORTO tamquàm HIPPOCRATI MUTINENSI gratulantur. Atque ut multos præteream, qui in editis suis operibus honorificam TORTI mentionem fecerunt, hoc eodem anno 1741 doctissimus vir P. VALCARENGUS Medicus, Cremonensis, eidem Observationes suas *de Aortæ Aneurismate* dicavit, qui liber Mutinam delatus TORTUM jam postremo fato sublatum invenit. Repetitæ insuper editiones THERAPEUTICES ipsius tum Mutinæ, tum Venetiis ejus utilitatem luculentiùs confirmarunt. Attamen, quod sæpe inter litteras usuvenit, non defuit, qui ad versus laudes à TORTO contributas cortici Peruviano in arenam descendit. Atque is fuit cl. RAMAZZINUS, antea non semel à me laudatus, qui tunc in Lyceo Patavino cathedram primariam medicinæ practicæ suo nomine illustrabat, et anno 1714 (quo etiam vivere dessiit) dissertationem edidit *de abusu Chinæ Chinæ ad B. RAMAZZINUM nepotem*. Ità verò in remedium hoc tanti usus, tantæ celebritatis apud medicos, vires ingenii sui exercuit vir ille doctissimus, ut majora inde incommoda, quàm beneficia, effluere indè contenderet, ac pænè videretur prorsùs ejus usum à praxi medicâ proscribere. TORTI nomen in eâ lucubratione minimè legebatur: ille tamen præsertim se ibi impetiturum ab amico viro facilè intellexit. Ægrè autem ferens ejusmodi remedium, quo nihil præstantiùs habemus inter pauca, imò paucissima, quæ hactenùs

ad expugnandas febres periodicas medicina, seu ut melius loquar, divina beneficentia, suppeditavit, tanto conatu deprimi, tantâ invidiâ onerari, ejusque abusum unis fermè Mutinensibus medicis probro dari: sibi silentium imperare nequivit. Jam in suâ therapeuticâ satis ipse eos improbârat, qui feбри correptis immaturè nimis Chinam Chinam ministrant, naturæ industriam prævertentes, intentam nempè ad noxios humani corporis humores febrili æstu expurgandòs; tum qui sine ullâ februm distinctione corticem quoque offerunt, quùm febres ab exordio suo continentes et acutæ ejus indolis sint, ut numquàm ab illo sese edomari ac sisti patiantur. Cæterùm non semel inculcârat, febrifugum hoc ex diuturnâ experienciâ sibi notissimum, suapte naturâ innoxium esse, et tunc etiam quùm non prodest, minimè nocere. Hæc latius exponere, hæc novis rationibus atque experimentis uberius confirmare, suum duxis TORTUS, prælo traditis Mutinæ, anno 1715, *Responsionibus iatro-apologeticis suis ad criticam dissertationem RAMAZZINI*. Certamini finis jam factus videbatur, quùm ex vitâ ejusdem RAMAZZINI 1717, publicis typis evulgatâ, et ex J. J. MANGETI v. cl. RAMAZZINO patrocinantis sinistro de medicis Mutinensibus judicio, sopiti ignis scintillæ aliquot eruperunt. Hisce primò nonnullis volantibus foliis occursum fuit; deindè libro edito, cui titulus; *Mutinensium medicorum methodus antipyretica, vindicata, sive ad nonnullorum scriptiones eidem methodo succen-*

sentes, etc. Notæ ferrantis Ferrarii Mutinensis medici, collegarum jussu exaratae: Mutinæ, anno 1719. Nullus deinde hiscere est ausus. Ipse etiam Mangetus, anno 1720, litteras ad TORTUM dedit excusatorias et summi erga ipsum obsequii testes.

Porro optandum erat, ut aliis etiam scriptis medicinam juvandam TORTUS susciperet; quid enim expectandum non foret ab homine acerrimi ingenii, incomparabilis judicii, et per tot annos in praxi medicâ exercitato? Ad hoc idem ego ipsemet amicum virum non semel sollicitaveram; et quum ille infirmitatem artis, et abstrusas morborum causas, et medicamentorum ineptiam identidem objiceret: reponebam ego, bene etiam mereri posse de medicinâ, qui eosdem defectus prodatur, viamque tradat, quâ medicus si non sanare ægrum suis pharmacis certò potest, ei saltem opituletur, et minimè obsit. Et ille quidem pollicitus mihi fuerat tractatum *de febribus continuis acuti generis*, earumque methodica cura principiis simplicibus naturæ et diuturnæ praxis observationibus innixa: cujus etiam fragmenta quædam post ejus mortem deprehensa fuerunt. Sed sive negotiis et curâ ægrotantium præpeditus, sive rei difficultate, atque adversâ valetudine territus, spem ille meam fraudavit. Fateri quippe non pudet, TORTO in more fuisse (quod et aliis eximiis medicis familiare est, imò ne verus quidem medicus esse quisquam potest, qui secus sentiat) artis suæ incertitudinem atque impotentiam præcipuè in

gravibus plerisque morbis arguere, et nonnumquam etiam ridere. Agnoscebat et ille circulatorii aliquid inesse cuivis medici munere fungenti, dum ad morbos curandos accitur, quorum vim et pericula fortassè novit, remedia non novit; et fingere intereà cogitur, se naturæ periclitanti succurrere, quum tamen ab ipsâ unâ naturâ, si vires adsint, non à suis medicamentis, medicus vitæ necisque incertus, ægrotantis levamen expectet. Prætereà quàm parùm fidendum sit tot pharmacis, quibus integra volumina saturantur, et ægrorum crumenæ, fortassis etiam saluti, interdum officitur, omnium maximè is intelligebat. Temperare mihi non possum, quin huc inferam TORTI ipsius carmen in cuiusdam equi sui mortem.

Il mio cavallo è morto. Il poverino

Per soverchia bravura è alfin crepato :

E sol nel suo morir m' ha sconsolato

La perdita di lui, non il quattrino.

Egli era bravo come un paladino,

Spiritoso, galante, e ben formato,

Veloce, agile, docile, garbato,

Che pareva giustamente un barbarino.

Un doler gli si mosse. Il mariscalco.

Gli diede un beverone, allor diss' io :

In sedia io più non vò, ne più cavalco.

Ipsa facto crepo. Gridai : per Dio :

Le medicine alfin (col suo diffalco)

Fanno nel tuo mestier, come nel mio.

Hæc TORTUS ludens ; vix enim alium inter medicos reperisses, qui ipsum æquaret, nedum supe-

raret, doctrinâ, perspicaciâ, et circumspectione præsertim in præscribendis medicaminibus, ne incautus unquàm perimeret, quos juvare vellet. Proptereà Mutinenses medicos sigillatim describens, de se lapide ajebat;

Lancetta, e Chinà China,

O almen poc' altro. Il suo più forte sta.

Nella gran panacea del *passerà*.

Neque hoc obstitit, quominus in praxi medicâ apud nos præsertim excellentissimus haberetur. Nam quamvis quid sua ars possit, et non possit, probè teneret, ejusque imbecillitatem rotundis verbis non rarò fateretur: attamen ad ægros accitus, tam accuratâ consideratione pulsum, symptomata, habitum corporis, oculorum, vocis, et vel minutissimas præsentis rei circumstantias metiebatur, ut ferè semper indolem morbi detegeret, et in præsagiendo vix falleretur; et si qua erat ratio sanandi, hanc impigrè adhiberet. Quâ in re præsto ei semper fuit admiranda ingenii ac memoriæ velocitas; nam ubi perspexerat, quali morbo decumbens premeretur, et quæque ad propositum casum spectantia animadverterat, singulari agilitate mentis illicò recolebat, quid in paribus ægrotorum casibus aut secundi aut sinistri legisset; aut sibi vel antè annos plures successisset, ut quid in præsentia agendum videretur, decerneret. Hinc TORTO fama ingens parta non in Urbe nostrâ tantum, sed et in aliis regionibus: eaque.

latius aucta, ex quo illius therapeutice apud externos quoque rari viri meritum virtutemque celebriorem effecit. Vacabat ab aliquot annis primaria medicinæ practicæ cathedra in Patavino lyceo. Ad eam, anno 1720, per B. ZENDRINUM v. cl. à sapientissimis illius moderatoribus invitatus est TORTUS, nihilque præmiorum omissum, ut ad consensum illius animus traheretur. Hæc sane speciosa; sed longe majora oblata ei fuerant, anno 1717, et subsequentibus à Taurinensi aulâ. Erat in eâ Urbe perquam illustre TORTI nomen, amici non pauci, inter quos potissimum eminebant aut ex editis libris, aut ex multâ doctrinâ BLANCUS, FANTONUS, GAGNA, RICHA, CICOGNINUS. Quùm verò Victorius Amedeus Sardiniae Rex, immortalis nominis Princeps, nobilem academiam illam à se excitatam celebri aliquo viro primario medicinæ practicæ professore ornare vellet, conjectis in TORTUM oculis, cujus tum in theoricâ, tum in praxi medicâ satis perspectam habebat peritiam, per F. SIMONIUM, medicum Bononiensem præstantissimum curavit, ut eundem ad cathedram hujusmodi adduceret. Neque tantummodo offerebatur magnificum exedræ illi adnexum emolumentum, sed et præclarum protophysici munus, cujus longè lucrosior auctoritas per universam ditionem Subalpini Regis excurrit, et cujus est Regis ipsius valetudini præesse. Sed hic tantus lucri et honoris prospectus, uti nequaquam prælaudatum SIMONIUM à Bononiâ, ita neque TORTUM à Mutinâ distrahere potuit.

Patriam

Patriam iste suam amabat, in quâ non minùs quàm ruri commodas ædes et fortunas possidebat. Carus erat Duci Raynaldo, Benedictæ viduæ Ducissæ Brunsvicensi heic degenti, amplissimo collegio nobilium juvenum, et præcipuis religiosorum civiumque familiis, quibus omnibus multo cum honore medicinam faciebat. Major profectò alibi captandi lucri spes; sed heic major quies. Proindè TORTUS nutantem valetudinem suam aliaque impedimenta causatus, oblata munera recusavit, patriumque cælum hilaris Patavino ac Taurinensi prætulit. Et is quidem ne ejusmodi tentamenta resuscitentur, sollicitè caverat, veritus indignationem Principis, ac civium querelas. Sed quùm ne sic quidem impedire potuerit quominùs res vulgaretur, ejus constantiæ fideique ergà patriam nemo fuit qui non plauderet, gratique animi signa præberet. Tunc ei serenissimus Dux nobile immunitatis privilegium spontè concessit, tunc ipsum Mutinensis Respublica in medicum consultorem magistratûs sanitati publicæ præfecti, delegit, decenti salario eidem constituto. Tunc ejus cathedræ duplicatum honorarium fuit; atque is emeritus professor pronuntiatus cum facultate substituendi; substituitque *Ferrantem Ferrarium* medicum, inter discipulos suos ingenii et doctrinæ laude florentem.

Tanto publicæ beneficentiæ favore recreatus TORTUS, quùm non uni valetudinis incommodo jam obnoxius foret, tremulæque præsertim manus exactam, dùm ad ægrotantes accederet, pulsum

sensationem impedire sibi viderentur : sermè dimisso quotidianæ practicæ exercitio , honestum otium reliquæ vitæ destinavit. Erat illi in villâ Curli ampla domus , aer saluberrimus. Ibi per aliquot anni menses considebat , otiosam tamen vitam numquàm passus. Venatione plurimùm vel ab adolescentiâ delectabatur , corporis etiam exercendi causâ. Hanc in senectute quoque continuavit , mirantibus interdùm sociis , quia tremante manu is lepores et coturnices exploso tormento conficere posset. Sed quod potissimùm tam in Urbe , quàm ruri, TORTUM occupabat , copia fuit consulentium de variis hominum morbis. Per universam nempe Italiam vulgata insignis viri peritia in rebus medicis effecerat , ut ad eum undiquè veluti ad nostri temporis Æsculapium ægrorum et medicorum quæsita confluerent. Complures hinc natæ TORTO medicæ consultationes, pars latinis, pars italicis litteris consignatæ. Instabam ego , ut saltèm hasce in omnium utilitatem publici juris faceret. Quibus de causis morem mihi minimè gerendum arbitratus fuerit , imò heredibus , ne ederentur , in mandatis reliquerit , ex litteris ad me datis , quas subjiciam lector accipiet. Anno 1731 , quum ex multis laboribus atque itineribus jussu principis Parmam susceptis , ut Henrichettæ Estensi, Ducissæ Parmensi viduæ assisteret , gravem contraxisset æstum , improvisâ paralysi correptus fuit in templo Mutinensium servorum Deiparæ. Delatus in ædes suas , quamquam subtracta vox esset , et offuscata nimium mentis

vires, tantum tamen sibi cognitionis relictum fuit, ut oblatum à medicis speciale illud medicamentum, quod *Gocchie d'Inghilterra* appellant, nutibus rejecerit. Convaluit deindè, et quoniam relictum nervorum torporem in dexterâ corporis parte, Saxo-lensis luto disiecit, vegetus ut antea apparuit. Æquè ac Raynaldo Duci, acceptissimus postea fuit Francisco III. Duci ejus filio et successorì, atque ab eo insignitus est titulo et munete *protomedici, et præsidis collegii medicorum*. Eo tamen duntaxat est usus ad tollendos cum sociorum consensu abusus quosdam ab adolescentibus medicis et pharmacopolis invectos.

Jam suprâ monui, TORTUM à naturâ compositum fuisse ad poesim. Magna vis in illo ingenii, mira phanthasiæ vivacitas. Juvenis multis carminibus lusit, in postremis etiam vitæ annis, quàm otio frueretur, in musarum contubernium rediit, usque adeò ut vel postremo morbo decumbens, vigore mentis numquàm interrupto, versus, eosque laudabiles, effunderet. In seriis nihil ex eo vidi, quod mediocritatem superet. At in satyrico lepidoque stylo cum celebrioribus quibusvis certare poterat. Multa ego id genus vel ab eo audivi, vel scripta legi, in quibus peregrina inventio, crebri sales, et invidenda versuum et rhythmorum facilitas. Verum ex his nonnulla vivens ipse flammis dedit. Reliqua carmina, et quædam latinæ lucubrationes, aut epistolæ in satyram inclinantes, qualis inter cæteras fuit scripta adversus librum quemdam

risu planè dignum, quod sanguinis circulationem in meridie positam inficiaretur, minimè quidem perierunt, sed causæ sunt, cur suis relinquenda sint tenebris.

Annum octogesimum tertium vitæ suæ jam attigerat TORTUS, quùm ad reliqua valetudinarii ac debilitati corporis incommoda accessit hydropisis. Imperterritus ille in lecto jacens mortem intuebatur lentis gradibus ad se accedentem, imò advenientes amicos festivo, uti semper consuevit, vultu excipiens lepida cum iis colloquia miscebat. Sed nihil interim prætermittebat ex iis, quæ ad animæ suæ curam apud Deum pertinebant. Is enim (latendum est) religionis et pietatis christianæ observantissimus semper fuit; neque eorum philosophorum insaniam sibi imitandam censuit, qui illa tantùm speculantur, quæ ad nihil credendum perducere possint, sed eorum sapientiam, qui speculationes suas ad altius in se stabiliendam religionis venerationem sollicitè convertunt. Propterea à sanctissimo Pontifice BENEDICTO XIV, cui perspectissimum erat TORTI meritum, ex singulari gratiâ impetravit, ut sibi adspicienti, sed vix præ surditate audienti, quotidie sacrum in proximo conclavi celebraretur. Denique sacramentis non semel anxie experitis, et ritè ac devotè perceptis, tandem die XV Kal. Martias, anni 1741, finem vivendi fecit. Erat Franciscus TORTUS liberali vultu à naturâ exornatus, omnibus comis, benignus, humanus. Ejus consuetudine nihil jucundius, quippè qui gravis,

quum res poscebat, hilaris in reliquis, promptus et acutus in respondendo, sermonem suum crebris jocis et leporibus, amœnis narrationibus, cavillator etiam festivus condiebat. Ejus aspectu et verbis mirum quantum recrearentur ægri. Gloriam et laudes spontè oblatas amavit; nullâ arte, nullo studio venatus fuit, aut emendicavit. Pecuniæ numquàm avidus imò penè contemptor, proptereà quòd liberis careret, nullam aut exiguam rei augendæ operam dabat, in suum et amicorum commodum proventibus suis serè semper effusis. Ergà quemvis in beneficia proclivis, amicos potissimum omni officiorum genere prosequabatur; acerrimus contra in controversis sive litterariis, sive *alterius* speciei, nisi victor numquàm quiescebat. Duas uxores habuit, ex quibus nullam prolem suscepit, scilicet Ersiliam Rubeam anno 1721 è vivis sublatam, tum Blancam Quatrofratri, quam viduam, et postremis tabulis heredem usufructuariam reliquit. Pauperes verò (hoc est *il desco de' poveri*) patrimonii sui hæredes proprietarios decrevit. Tertiam quoque medicinæ cathedram in patrio liceo institutam suo ære dotavit. Elatum est ejus cadaver ad eremitarum S. Augustini *templum*, in quo illius majores quietis locum invenerant; sepulturæ tamen traditum extrà proprium sepulcrum eo in loco, ubi subsequens inscriptio, marmoreæ tabulæ commendata à geminis illius amantissimis discipulis legitur.

FRANCISCO. TORTO.
 IN. PATRIO. MUTIN. LYCÆO.
 PRIMARIO. MEDIC. PROFESSORI.
 OB. ADINVENTAM. METHODUM. PROFLIGANDI.
 PERNICIOSAS. FEBRES. PERIODICAS.
 BENE DE. OMNIUM. SALUTE. MERITO.
 PROTOMEDICO. AULICO.
 COLLEGII. MEDICOR. PRÆSIDI.
 A. CONSILIIS. IV. VIRUM. PUBLIC. VALETUD.
 REGIÆ. SOC. LONDIN. SODALI.
 EX. MEDICA. PRAXI. EDITISQ. LIBRIS.
 VIRO. CELEBERRIMO.
 QUEM ANNOS. LXXXIII. NATUM.
 MORS. SUSTULIT. ANNO. CH. MDCCXLI.
 XV. KAL. MART.
 PRÆCEPTORI.
 ET. BENEFACTORI. AMANTISS.
 JACOBUS JATTICI.
 SERENISS. FRANCISCI III. DUCIS.
 PROTOMEDICUS.
 ET. CAJETANUS. ARALDI.
 IN MUTINEN. UNIVERS. MEDIC. PROFESSOR.
 MOERENIES. POSUERE.

Ejus autem solemne funus ibidem est habitum
 trigesimâ post ejus mortem die, magno populi
 Mutinensis concursu. Honoris causâ interfuerunt
 serenissimi Ducis sorores Principissæ, Benedicta,
 et Amalia; hinc assidebant professores publici aca-
 demię Mutinensis, inde medicorum collegium.
 Sacris operatus est illustrissimus Julianus Sabatinus
 Apolloniensis Episcopus; et funebri oratione laudes
 celeberrimi viri prosequutus Bartholomæus Sassa-
 rinus, congregationis S. Caroli, ejusdemque aca-
 demię et collegii nobilium rector, communem

mœrorem ob tantam jacturam in auditorum animis renovavit. Deniquè idem Sassarinus, et Ferrarius mihi suprà laudatus, ne in publico Gymnasio tanti viri memoria desideraretur, elogium hoc marmore incisum ibi collocârunt.

D. O. M.

FRANCISCO. TORTI.

FRANCISCI. TRIBUNI. MILITUM. FILIO.

PATRICIO. MUTINENSI.

IN HOC. GYMNASIO. ANNOS. LX. PRIMARIO. MEDICINÆ LECTORI.

ARCHIATRO. AULICO. COLLEGII. MEDICORUM. PRÆSIDI.

A CONSIDIIS. IV. VIRUM PUBLICÆ. VALETUDINIS.

SOCIETATIS. REGIÆ. LONDINENSIS. SODALI.

ET MEDICORUM. SUA. ÆTATE. FACILE. PRINCIPI.

QUOD. MUTINENSEM. SCHOLAM

INVENTA MAXIME. PROFLIGANDI. PERNICIOSAS. PERIODICAS.

FEBRES. METHODO. CELEBRIOREM.

ET. TOTATA. MEDICARUM. LECTIONUM. CATHEDRA. TERTIA.

AMPLIOREM. FECERIT.

BARTHOLOMÆUS. SASSARINIUS. GYMNASII. RECTOR.

ET. FERRANTES. FERRARIUS. PRIMARIUS. MEDICINÆ. LECTOR.

GRATI. ANIMI. MONUMENTUM. POSUERUNT.

OBIIT. XV. KALEN. MART. ANN. MDCCXLI.

NATUS. ANNOS. LXXXII. M. II. D. XV.

A U C T O R

L E C T O R I S U O.

HABE iterùm, ac ea denuò, quâ primo usus es, excipe humanitate *Specialem* hanc *therapeuticam* meam, Lector benevole. Cùm suum de illâ rursùs edendâ consilium mihi aperiret bibliopola, eidem mox sciscitanti, num quicquam haberem, quod adderem; me plura potuis habere quæ delerem respondi: quippè qui supervacanea prænoscebam, tædioque posthoc futura legentibus tot, quæ ad vendicandam ab effætis humoristarum oppositionibus febrifugam, innoxiamque virtutem *Peruviani corticis* modo nemini suspectam, aut dubiam, prolixius olim sum persecutus: neque meliorem sortem probabiliter obventuram theoreticis quoque meis, quotquot sunt, ibidem aggestis, mihi que ipsi (ut sum fassus vel tùm cùm protuli) parùm acceptis; quorum supellex versicolor, et ruditer consarcinata, merx quædam est jam obolescere incipiens, ut proindè in recentioris, ac speciosioris concursu paucos hodiè apta sit ad se licitatores allicere, ac fermè nullos emptores. His de causis, atque ut simul qui severiorem oculis, non minùs quàm humaniorum rursum exponendus est liber, non superinductâ quidem ullâ venustatis, sed quâdam saltèm depositâ vetustatis specie in novam lucem

prodiret, quicquid in eo extrà nudæ praxeos pomeria vagatur, videturque quodammodò superfluere, illud omne resecare optassem, ac penitùs amovere. Ast tantùm inde molis sine pari ad pondus supplemento detrahi minimè passus est idem bibliopola, librum, ut aiebat, mutilum iisdem typis detrectans recudere quibus olìm cuderat integrum, maximè cùm memetipsum æquè detrectantem audiret nova condere, quæ veteribus substituerem, selectioris ordinis succedanea. Qualem ergò *Scriptionem meam*, quantacunque illa fuit, antea tulisti, talem et modò, quin et nonnullis hìc illic apposis additamentis paulò actiorem, æquum est ut paritèr feras. Sed et aliud quippiàm tibi ultrà ferendum superest: exigit siquidem abs te condecens institutio tua quisquis indiges plenius institui, omnemque tùm usum admittendum, tùm abusum vitandum *Peruviani febrifugi* perfectè callere, exigit inquam, non modò ut tractatum hunc, etsi sublimibus meditationibus cassum, vel ex asse integro, vel saltèm quatenùs circà praxim, (versatur autem et sparsim ubi agit aliud) non renuas attentè pervolvere; sed et insuper exigit, ut meas quoque non graveris expendere *Responsiones jatro-apologeticas* ad criticam, quæ illis membratim inserta visitur, *dissertationem cl. Ramazzini* de usu recto Chinæ Chinæ nimis strictè, de abusu nimis latè sentientis. Neque verò laborem istiusmodi te pigeat suscipere, cujus postmodum suscepti te, ut reor, non pœnitebit. Haud equidem vana ulla me tangit elati animi affec-

tio , cujus stimulis actus mea perlegi tam sollicitè inculcem , quasi hucùsque idem hoc opus , minùs forte quàm par fuerit , minùsve saltèm quàm mea tulissent vota , de medicâ republicâ benemerens fuerit habitum , vel reipsâ neglectum ; cum potius ex adverso suprâ expectationem quoque meam illud noverim plenis statim ulnis ab ingenuis exceptum humanitèr , viderimque subindè ad metam universalis approbationis feliciter vela faciens , etsi ventis tunc undiquè adversis medico pelago recens commissum ; sed tantùm me movet rationalis metus , ne quanta forsitàn opus erat ad circumspectam methodum capessendam , habita fuerit à plurimis illius ratio. Arrisit quippè magis , fervidæ præsertim juventuti (cujus ausis nequivit sæpè non respondere , saltèm primâ fronte , felix eventus) arrisit , inquam , magis ea pars quæ admirandam , et ex se innocuam Chinæ Chinæ virtutem latè complectitur , quàm ea , quæ animadversiones , et cautiones omnes pro usu illius recto , tempestivo , et tuto particulatim indigitat , simulque noxas , quas pharmacum hoc , suapte cæteroqui naturâ saluberrimum , et innocens , inconsultè verò , ac intempestivè adhibitum , nonnunquàm valet inferre. Ædepol putassem nunquàm , id me vivente eventurum , quod seris tantùm nepotibus *libro tertio ad calcem .cap. 5* fueram vaticinatus : nempè , remedio huic olim rejecto , atque proscripto , mox verò cunctis sensim placituro , suam ipsam tandèm obfuturam esse , deprehensa cùm fuerit , efficaciam , atque in despec-

tionem abiturum usum illius, quippè promiscuum nimis, et ultrà leges artis intemperantem. Sanè quicumque incedit hâc viâ, non plùs sapit; quàm sapiat quævis è trivio lippiens anicula, emergitque interîm à tumultuariâ, et inconsultâ hujusmodi, praxi, modò præproperè, modò præposterè, adeò-que sæpè inutilitèr, aut præter rem, nonnunquàm et damnosæ exercitâ, egregii remedii immane pro-lavium, cui posthâc, ni malè conjicio, vix suffec-tura est tota Quitensis regio. Ut huic dispendio parùm laudabili, atque in dies crescenti sufflumen aliquod, priusquàm ultima fâta subeam, pro viribus coner imponere, te monitum velim, prudens lec-tor, ut postquàm methodum ad sanandas copiosâ et celeri *Peruviani corticis* oblatione febres perio-dicas verè *perniciosas*, et planè lethales, etiàm cùm mors præ foribus est (dummodò postridiè tantùm ægri cubiculum ingressura) postquàm, inquam, methodum illam exactè perspexeris, et curationem illarum dignaveris in iis circumstantiis, ut loqui mos est, omninò *coactam*, ad ea etiàm, quæ de administratione ejusdem remedii in aliis quoque febribus toto tractatu abundè prostant, animum diligentèr advertas, et præcipuè ad cau-tiones, quibus eodem utendum pluries indicavi ad istarum quoque rationale, ac prudens regimen; quod sanè secundùm varia præsertim illarum tem-pora, et secundùm variam ipsarum naturam, diver-sasque habitudines, variè admodùm debet institui. Harum porrò cautionem non paucò specimina me

prodidisse scio, tùm olim *Lib. 1, cap. 3, 8 et 10, et Lib. 4, cap. 5*, tùm nupèr in hâc postremâ editione *Lib. 5, cap. ult.* Verùm hæc omnia incassum, amice lector, nisi simul naturam, species, et differentias febrium curandarum probè dignoscas, et ab invicem per sua signa discrimines : itèm nisi particularia earum tempora, in nonnullis breviora, in aliis longiora futura prænoscas, et ad normam præexistentis fluidorum apparatus per sua stadia metiaris : tandemque nisi symptomatum pondus æquâ lance, justâ videlicèt, ac prudenti estimatione perpendas. In hoc studio tibi primus impendendus labor; tùm verò rectam, et rationalem, non merè empiricam, *Peruviani corticis* administrationem ex hujus operis lectione percipies; sin minùs de tuo profectu actum est. Vale.

LECTORI BENEVOLO.

QUISQUIS hujusce tractatûs molem cum præmissâ illius synopsi, potiozemve tituli partem cum annexis, comparas additamentis, vereor, ne lusu in oppositum verso Horatianum illud obtrudas,

— *Amphora cæpit*

Institui, currente rotâ cur Urceus exit?

Mihi namque Urceus, quem cœperam instituere, currente rotâ excrevit in amphoram; nec tantùm fortuitò quidem, sed et consultò, ut inde scilicèt commodiùs imbui possent, quibus præcipuè

ac fermè unicè scribo, artis medicæ candidati. Neque enim ut latear, reſectam hanc à ſuo toto adhuc indigeſto, et informi, univerſalis theraputices partem, pyretologicâ ſimplicioris ordinis immixtâ ſuppellectile, connexâque hſtoriarum congerie (utinàm non ſuprà modum) pingueſactam, ſtyloque humili, ac plano, in morem ſchoſtaſticum exarata, auſim exponere niſi tyronibus. Stetiſſem autèm promiſſis, illamque antè biennium circitè edidiſſem, prout exigere videbatur, quæ anno 1709 præceſſit, ejusdem ſynopſis, in Italicis non modo, verum et in Trevolſiensibus, ac Lipſiensibus ephemeridibus ſubindè evulgatâ, niſi typographi morâ, operis jamdudùm inchoati complementum, interpoſita non ſemel plurium, ac plurium menſium interſtitione, in hanc uſque diem protraxiſſet : quo ſanè temporis tractu, quantum veritatis, à crebriore experimento petitiæ, in dies accēſſit eidem operi, tantundem novitatis dēmp-tum videtur.

Ideam hujusmodi condendi tractatus indidis quondam menti meæ, præter publicam utilitatem fidentèr præſumptam, monitum quoque ſapien-tiſſimi Baconi 4 de augm. ſcient. cap. 2, dicentis, *plurimum referre, ſi medici aliqui* (loquebatur ille quidem de aliis à me) *opus aliquod conficiant de medicinis probatis, et experimentalibus ad morbos particulares* ; cenſebat enim vir magnus, the-rapeuticem hanc particularem, et deſiderari adhuc in arte medicâ, et ipſi arti fore perutilem :

quandoquidem, aiebat ille, *medici hujusce ætatis particulares medicinas, quæ ad curationem morborum proprietate quoddam spectant, aut non benè norunt, aut non religiosè observant, experientiæ scilicèt non satis tribuentes, judicio plùs nimis.* Cùm itaque nostris quoque temporibus, quibus sanè plurimus est, cùm luxus inopinando, tùm cultus in scribendo, aliquis tamen, si fas est dicere, sit rerum practicarum neglectus, intantùm, ut earum tractandarum ratio in quamdam velutì desuetudinem abire cœperit, ipse, declinatis plerumque abditioris doctrinæ theoreticæ, ac penitioris eruditionis recessibus posthabitoque simul omni, qui materiam minimè deceret, verborum fuco, hanc medicinæ partem quadantenùs, et pro modo virium, illustrandam, ac promovendam suscepì, selectâque ad id dogmaticâ, vulgari, et fusâ, quæ tyrones erudire valeat, scribendi formâ, malui utilitate elegantiam, quàm elegantia utilitatem supplere. Quod si quid incomptum morosis censoribus carpendum occurrat, omnem rudioris culturæ notam æquo animo feram; ubi ex hujus, etsi minimè perpoliti, tractatûs evulgatione vel unum tantùm hominem, cæteroqui periturum, aliquandò servatum sciam, qui plurimos jam pereuntes, vixque alia, quàm quæ hic prostat, methodo sanabiles, favente Deo servatos novi: id, quod suo loco fidelitèr descriptæ, luculentèr patefacient historiæ.

Impulit quoque animum meum ad hanc ipsam

minùs tritam methodum aperiendam (quam pro summâ operis reputo, et quæ circà specialem Peruviani corticis oblationem in perniciosis quibusdam febribus versatur) firma credulitas, me rem prolaturum, ut plerisque non antè obviam, ità scitu necessariam, rei que idcirco publicæ non parùm proficuam. Quamvis enim ea collegiis quoque meis, saltèm nonnullis, quibus pluries vel in consultationibus proposui, vel in colloquiis communicavi, vel in praxi oculis subjeci, nota sit, et usu jam capta; cùm tamen illorum non paucos etiamnùm lateat, imò forsitàn sit quibusdam, alio sensu præoccupatis, minùs accepta, quibusdam aliis, haud satis appositè utentibus suspecta, illam ideò publici juris facere libentè decrevi, ut sic concivibus saltèm meis, si non alienigenis, prosim: eo scilicèt animi candore, eaque boni exitûs securitate pandens, quæ sum centies, ac centies expertus, ut nullus sanè hinc mihi sit metus subeundi notam fædissimam, quam sui ævi medicis Plinius inussit, eos nempè *famam novitate aliquâ aucupantes, animas statim nostras negociari.*

Sed quoniàm ægrè poterat methodus hæc, pro variâ casuum exigentiâ, secundùm circumstantias omnes congruentèr tradi, nisi febrium, eâ mediante curandarum, graphica præmittebatur descriptio, hoc ideò quoque pensum pro virili parte absolvendum suscepi. Quâ tamen in re, si perniciosarum intermittentium descriptionem respicia-

mus , cùm unus eminuerit *Ludovicus Mercatus* , practicus sui ævi celeberrimus : si verò respiciamus earum curationem , ope Chinæ Chinæ institutam , excelluerit *Richardus Morton* , professor Londinensis experientissimus , primi proindè auctoris *tractatulum* integrum , secundi verò singulare quoddam *caput* , ab eorum scriptis excerpta , ac recusa , et scholiis quibusdam meis interpositis explanata , huic ipsi tractatui libuit inserere : mox , utroque lumine prævio , propriam quoque earundem febrium , ad peculiare species redactarum , descriptionem aggredi , simulque curationem , mediâ Chinâ Chinâ absolvendam , tradere : ac tandem methodum ipsam specialem exponere , strenuum istud febrifugum aptè , ac utilitèr in iisdem administrandi.

Paritèr , cùm non desint adhuc mediculosi quidam , vel præjudiciis imbuti (pauci sint licèt) quibus , generalitèr loquendo , suspectus redditur usus Chinæ Chinæ vel in ipsis benignis ; diuturnisque intermittentibus , non abs re censui , medicaminis ipsius innocentiam , operandi modum , et proportionem illius cum febrium quarumlibet intermittentium causis , tam secundum veterum , quàm secundum recentiorum principia consideratis , examinare , illiusque , in iisdem benignioribus intermittentibus tempestivè exhibendi , tum cautiones opportunas , tum formulas vulgatiores præmittere , priusquàm peculiarem illius usum in perniciosis , non modò intermittentibus , sed et subcontinuis , describere aggrederer.

Denique ,

Deniquè , 'cùm nimia sit ex adverso apud alios ejusdem medicaminis æstimatio , tantaque interdum , ut illud cæteris quoque indiscriminatim febrium generibus , plurimisque aliis morbis , præsertim periodicè recurrentibus , insignitèr proficuum censeant : proptereà his quoque , in proprio sensu nimium abundantibus , post statutam in perniciosis methodum , occurrendum censui. Quamobrem , quasi corollarii loco , singulas seorsim febrium cujusque generis species , aliosque insuper , sed compendiosius , morbos libuit perpendere , et quibus China China rationabiliter conveniat , vel non conveniat , prælucente simul experientiâ , decernere , ne scilicèt tyronibus erudiendis ulla desit circà remediï hujus rectam administrationem notitia.

Febrifugum equidem istud , quantum ex se , vulgatissimum est , usitatissimum , simplicissimum , et in primâ inventionem suâ merè empiricum , arboris nempe cujusdam Indicæ , *Gannaperide* nuncupatæ liber , seu cortex , quem *Chinam Chinam* dicimus ; ejus tamen *peculiarem* in *peculiaribus* casuum planè deploratorum *circumstantiis* administrationem , neque simpliciter empiricam censeo neque vulgarem , sed selectiora inter artis præsidia reponendam , quam scilicèt ratio quondam dictavit , suasit analogismus , et constans experientia feliciter confirmavit ; atque ita quidem , ut vi illius intrâ paucas horas datum sit , ægrota-
ntes non paucos ab orci faucibus facillè eripere , et pristinae , dictum factum , incolumitati restituere ,

Gloriosiore forsitan, quam par sit, vocabulo uti videar, methodum istam identidem *meam* appellans, sed haud indecenter hoc me mihi tribuisse crediderim, probè gnarus, me, praeunte nemine, illam in recensitis *casibus*, ac *circumstantiis* propriâ tantum observatione ac experienciâ comperisse, eamque non semel, favente Deo, vel minùs credulis suspiciendam praestitisse. Hinc, veritate rei palàm cogente, factum est, ut ipse qui caeteroquì remediis plurimis communiter receptis (quibus nihilominùs utor) sæpè non multum tribuere consuevi, usu tamen istius certo *loco*, *modo*, et *tempore* adhibiti, plurimos constanter credam absolutè servatos, mortique imminenti subtractos, per curationem scilicèt huic remedio sic administrato, non verò soli naturæ, aut prægressis auxiliis, ut in morbis tardioris motûs, et lentioris periculi frequenter assolet, adscribendam.

Quid in hujusmodi casibus extrà civitatem nostram agatur, præcisè non novi. In finitimis certè urbibus, iis etiam, quibus plurimi usûs est China China, methodum hanc exerceri, saltèm ut eam fama circumferat; etsi quæsierim, non audio: an quisquam privatim teneat, ignoro. Cum longinquo-ribus haud satis intercedit commercii, ut probè exploratum hoc habeam. Non me quidem latet, scripta quamplurima eruditissima circà actionem, usumque Peruviani corticis, et à remotis, et à propinquis provinciis, ac urbibus (inter quas et nostra) etiam dùm hæc scriberem, imò post editam

synopsim tractatûs mei, in lucem prodîisse, ut si-
 leam, antè paucos quoque dies me subaudisse,
 hujusce ordinis quidpiam fuisse recentè editum
 à Transalpino quodam viro celebri; cujus tamen
 rei nullam usquè adhuc, sive in 'exteris, sive in
 nostratibus diariis, mentionem reperi. Hæ autem
 illustrium virorum lucubrationes omnes, vel earum
 plurimæ, saltèm quas mihi videre contigit, in id
 præcipuè collineant, ut corticem ipsum, et vulga-
 tiores illum exhibendi formulas ad omne indiscri-
 minatim febrium genus, præter intermittentes,
 absque peculiari specierum earumdem, vel methodis
 in illis usurpandæ delectu, ampliare contentur. Præ-
 omnibus stat febrifugi Anglici antè annos 32 circitèr
 promulgatio in Galliâ, cujus remedii usus hodiè
 ibidem est ferè promiscuus in quibusvis febribus,
 et cujus tota vis in uno cortice Peruviano, larvâ
 quondâm impositâ nunc spoliato, planè consistit.
 Sed ut verum fatear, plura, quæ de ipso à pluribus
 prædicantur febrium continuarum continentium,
 acutarum, inflammatoriarum, et malignarum à pri-
 moridiis, aliorumque insuper morborum longè dis-
 paratorum, curationem, nisi magnâ cum limitatione
 intelligantur, partim apertè falsa in usu practico, par-
 tim dubia admodum deprehendi. Et proptereâ, ut
 suprâ monui ne quis error obrepat in hac non levi
 materiâ, ad complementum tractatûs, singulas etiam
 aliarum febrium species (præter perniciosas pro scopo
 primario constitutas) placuit examinare, et quibus
 utilis sit, quibusque frustraueus cortex innuere.

Quòd autem scriptorès febribus quoque malignis remedium istud *genericè*, nec proindè semper cum utilitate, accommodantes, minimè loquantur, aut possint intelligi de febribus illis malignis, de quibus impræsentiarum ego, vel exindè constare videtur; quòd illorum methodus lenta nimium, enervis ac languida, vel per solam corticis percolatam infusionem, vel per illius quidem substantiam, sed non satis largâ dosi, nec satis aptâ distributione oblatam, par non sit, teste experientiâ, extinguendis *illicò*, prout sæpè necessitas exigit, hujusmodi febribus: adeòque, vel de his verè locuti non sunt, vel adæquatam curationem earum non omninò calluerunt, vel si calluère, haud satis perspicuè docuerunt.

Unus, quod sciam, rem propè attigit, meque, inscium licèt, quodque nondùm promulgatum erat sciendi incapacem, in hac materiâ præcivit, citatus *Morton*, nunquàm satis laudatus. Hujus auctoris scripta, quorum non pauca est cum meis circà hoc symboleitas, licèt antè duodecim circitèr annos ad manus meas pervenerint, non priùs tamen quàm antè triennium attentè pervolvi, eo nimirùm tractatu, ubi methodum videtur indicare, à meâ non longè dissimilem. Neque alio nomine pyretologiam illius percurrere sum aggressus, nisi ut, priusquàm hæc, quæ tunc scriptabam, publicè luci exponerem, omnes, quotquot possem, hac de re scriptores, consulerem. Cùm autem viri istius accuratissimi opera (saltèm, quæ apud me extant) impressa fuerint Genevæ ann. 1696., ego autem methodum

meam in febribus perniciosis anno 1695. plurimâ cum notione exercuerim, nullus, apud nos saltêm, suspicioni locus esse potest, quod actorum meorum regulam à *Mortono* (quamvis id mihi non indecorum foret) vel ab ullo alio scriptorum desumpserim. Sed quorsùm hæc? Neque enim gloriosam inventionis hujusce, quantulacumque illa sit, aucupor apud universam rempublicam medicam, eique sponte nunciùm remitto, quam assequi datum foret apud nostrates. Tantùm mihi metipsi gratulor, quòd cogitatis aut inventis meis, viri famigeratissimi auctoritas robur adjungat, et gratulor eidem quòd illius inventa et cogitata, nimiùm fortè hucusquè neglecta, mea (qualiscumque ego sim) fidelis experientia confirmet.

Hanc ergò febres hujusmodi perniciosas curandi methodum (sive mea tantùm dicatur, sive alteri cuipiam communis) hanc, inquam, tyrones doceo, eosque omnes, qui doceri apti sunt: infulatis verò professoribus per transennam indigito paratus ego cæteroquè doceri ob omnibus. Id unum interim stat, quòd, omni et quolibet, sive *Mortoni*, sive aliorum scriptorum præeunte lumine, qualecumque illud sit, adhuc in tenebris non exigua pars medicorum versatur; quodque magis dolendum, prope modum inermis visitur, pro repellendo, cùm maximè oporteret, præcipiti hujusmodi febrium perniciosarum periculo: et egomet video passim, nimiùmque video, dùm ægrotantes methodo mox declarandâ curati (*ignoscas mihi, lector, de me*

ipso aliquid prædicanti, aiebat *Tullius*) alacres surgunt, video, inquam, alios iisdem planè correptos morbis, sed eodem remedio, eâdemve methodo destitutos, pretiosiore licèt, aut etiam sæviore medicamentorum apparatu instructos; inevitabili fato succumbere. Sanè istiusmodi comparatio haud minimo mihi incitamento fuit, ut hunc faciliè tractatum ederem seorsùm à reliquâ, rudi quidem, atque confusâ, cæterorum, quos condere tunc meditabar, nunc abs me seponere cogor, materiâ: præcipuè cùm plura in dies de hoc remedio, modò nimis elata et expansa, ad modulum scilicèt scribentium ideæ, impetûsve illorum ingenii, minimè verò ad normam solidæ praxeos constituta, non sine veritatis, et publicæ utilitatis detrimento, videam promulgari.

An ipse pro vòto scopum attigerim, et an meus hic labor omnibus acceptus futurus sit, adhuc ignoro; hoc ipsum tamen, quod ignoro juvat sperare. Etenim, si penès medicam rempublicam non malè meruit *Talbotius*, tumultuariam ut sic dicam, licèt non prorsùs inutilem, methodum exhibendi Peruvianum corticem, callidâ quâdam, ac mercenariâ olim liberalitate tradens, cur mihi longè utilioris, ut reor, magisque ingenuæ methodi oblatori gratuito, gratia quædam non erit ineunda? Id verò si apud omnes non liceat assequi, liceat saltèm apud te, lector amice, quem à cæteris fortè segregat comitas major. Tu ergò, quem præ aliis mihi benevolum spondeo, pro tuâ ergà bonarum

artium cultores, promotoresve facilitate, hosce conatus meos, qualescumque, fore ut humanitèr excipias, confido, si non alio titulo, saltèm, ne ulteriora molienti (si quandò manum, quam plura interim retrahunt, operi rursùs admoveere datum sit) quam indidisti fidentiam, eripias. Vale.



THERAPEUTICES

SPECIALIS

LIBER PRIMUS.

*PRÆSTANTIAM, AC VIM PERUVIANI
CORTICIS adversus febres intermittentes, et
earum causas, illius pariter tutelam; usumque
methodicum in iisdem intermittentibus, saltèm
vulgatioribus, aliaque hujusmodi comprehendens.*

CAPUT PRIMUM.

Historia primùm inveci apud Mutinenses *Chinae Chinae* usûs, innocuum illa præstansque febrifugum, recursus febrium post eam parciùs assumptam contingens, ex adverso perperam allegatus. Pro usu illius, præter experientiam, et rationem, auctoritas multiplex.

QUAM olim spontè impolitam edidi, talem etiam-
nùm recudi sum passus, nonnullis tantùm hìc illic
additamentis apposis, peculiarem methodum à
septem jam lustris mihi perspectam, exhibendi Pe-
ruvianum corticem, vulgò *China China*, vel *China
Chinae*, aliis Gallico more *Quinquina*, seu *Kinkina*
appellatum, pro curandis malignis quibusdam febri-
bus subdolis æquè ac exitialibus, adversus quas,
postquam etiàm hominis vitam in extremum dis-
crimen adduxerint, eximiis illum pollere viribus,
animadversum antea non fuerat apud nostrates.

Priusquàm tamèn rem propiùs aggrediar, operæ pretium me facturum puto, si ad sternendam mihi planiorem viam, nonnulla communiorem febrifugi hujus usum in *benignis* tantùm, et diuturnis intermittentibus respicientia præmittam. Licèt autem hæc, et plura istiusmodi, quæ toto fermè hoc primo libro persequi lubet, supervacanea fortè cui-piam videri possint, ea tamèn, si probè spectentur, ad intentum facere, atque ad innuendam congruam, ut decet, completamque egregii hujusce medicamini administrationem non parùm conducere, poterit, ut reor, haud difficultè dignosci. Etenim, vindicato ab oppositionibus fieri solitis tam salubri remedio, nec non inquisitâ proportionem, quam potest habere cum febrium expugnandarum causis multifariam consideratis, sensim ducentur ad tutam. et rationalem methodum eodem utendi in iisdem intermittentibus, saltèm *benignioribus* (quod gradum faciet ad methodum quoque, quam pro *malignarum* curatione spopondi, suo loco pandendam) et ad seligendas è vulgatoribus utiliores ipsum præscribendi formulas, dignoscendamque insimul opportunitatem tempestivæ oblationis illius.

Non tamen ideò hîc est in animo historiam sive originis, sive inventionis, sive translationis Chinæ Chinæ in Europam à primordio repetere; id enim cùm solertissimus vir S. BADUS jam luculentè præstiterit peculiari libro anno 1663. Genuæ impresso, genesim universam remèdii, tunc orbi nostro nascentis, legere potest curiosus quilibet, tùm apud

eundem, tùm apud alios, qui vel mediâtè postmodùm, vel immediâtè facti seriem decerpserunt à Bado. Neque paritèr mihi mens est ineffabilem saluberrimi hujusce pharmaci virtutem febrifugam, ac operandi modum, sicut nec abditas febrium intermittentium causas, per eandem depressas, ex professo, atque intimiùs ad unguem usque rimari; arduum siquidem opus hoc cùm omnes hactenùs incassum tentârint, non minùs inanitèr et ipse tentarem. Sat fuerit suo loco, ubi nodus iste planè intactus relinqui non poterit, tenuia quædam abstrusæ utriusque rei specimina, sive generaliores quasdam considerationes tantùm non oscitantèr proferre. Impræsentiarum verò liceat historiam omnem Chinæ Chinæ ab ingressu, atque progressu illius intrâ Urbem duntaxat nostram, pro exercitâ à me in rebus medicis praxi, obitèr auspicari, ne vel à notione intrâ spatium temporis valdè modicum acquisitâ, vel à parciore, quàm par sit, successuum numero animadversiones meas sumpsisse credat.

Ex quo innotuit Europæ cortex Peruvianus (cujus planta integra propè *Loxam*, seu *Lojam* humili proceritate abundè succrescens, ab incolis *Ganapride*, seu *Guananepide*, *Chinanepide*, vel *Guananegide* dicitur) (1) ex quo, inquam, *liber* istius arboris

(1) Tempore quo huic operi lucem dedit TORTI unica species Chinæ Chinæ anno 1638 in Europam vecta, tantùm dignoscebatur. De hujus characteribus dissident botanici : ad spe-

innotuit Europæis regionibus, Hispaniæ videlicet primùm, mox Italiæ, opera quidèm, et pietate emin.

ciem *Cinchona lancifoliæ* (*C. aurantiæ*) à celeberrimis MUTIS et ZEA; *C. nitidæ* à RUIZ et PAVON refertur; hi autores, celeberrimi quidem, invicèm in errorem inciderunt, propterea quòd in regionibus ubi nascitur huic studere nequiverunt, et sic diversarum specierum comparatione destituti fuerunt. Hunc errorem eluerunt HUMBOLD et BOMPLAND qui in regione natali huic speciei studuere, illamque *condamineam* vocarunt à celeberrimo viatore DE LA CONDAMINE, qui illius accuratam descriptionem primus edidit; ipsi vulgò *China China grisea*, (*C. officinalis* LINNÆI) nomen est sacratum.

Hac specie inventa multæ aliæ quarum historia apud D. ALIBERT, *Traité de Thérapeutique et Dict. des sciences méd.* refertur, à naturæ investigatoribus repertæ fuerunt; de ipsis tantùm quibus utitur therapia, secundùm inventionis ordinem nunc agitur, sunt :

Cinchona aurantia, *C. tunita*, LOPEZ; *C. lancifolia* MUTIS; *nitida*, RUIZ et PAVON.

Cinchona rubra; *C. oblongifolia*, MUTIS; *C. magnifolia*, RUIZ et PAVON.

Cinchona lutea; *C. cordifolia*, MUTIS; *C. pubescens*, VALH; *C. micracantha* RUIZ et PAVON. Hac specie ab anno 1740 utitur therapia.

Cinchona alba; *C. ovalifolia*, MUTIS; *C. macrocarpa*, VALH.

Cùm nostro non sit in animo *China China* edere historiam quæ apud ALIBERT *Op. citat. et Dict. des Sciences Méd.* locuples legi potest, auctorum opiniones de specie hujus medicaminis in curandis febribus intermittentibus anteponenda breviter investigare conabimur.

Prima opinio de specierum *China China* præeminentia à DESBOIS de ROCHEFORT emissa videtur.

Card. de Lugo, aliorumque patrum inclytæ soc. Jesu, de utroque orbe plurimis certè nominibus,

Hic auctor *rubram* omnibus aliis anteponit; *griseam* tamen *luteæ* atque *albæ* pluris facit.

CULLEN nullam præ cæteris anteponit, quia, si ipsi creditur, medicamen quodcumque, virtutibus amarâ insimul stipticâ præditum optimè febrem intermittentem curat, hæc opinione nixus febres illas curari propter virtutem tonicam à Chinâ Chinâ ventriculo impressam; hæc opinio experientiâ quotidianâ refellitur.

SWUIGUE omnes species æquè conducere censet, dummodò quidem dosis ad qualitatem accommodetur.

ALIBERT cum MUTIS præ cæteris *aurantiam* anteponit *Chinam*, quoàd febrium intermittantium essentialium, periodicarumque quarundam nevrosarum curationem, principici aromatici ipsâ coherentis gratiâ; dùm *rubra* febribus adynamicis, scorbuto, gangrænæ præcipuè opponitur, ob virtutem stipticam. Auctor nullum de virtute *luteæ* ac *albæ* verbum facit, nec minùs *griseæ*, quam præ cæteris in intermittantium curationem anteponebat NYSTEN; vir illustris in doctis lectionibus de materiâ medicâ publicè proferebat se mediante *Chinâ griseâ* sæpè intermittentes debellasse quæ cæteris speciebus obstinatè obsteterant.

LAURENT et MERAT (*Dict. des sciences médicales*) *griseam Chinam* cæteris speciebus multò pluris faciunt, persuasi quidè illam majore virtutis febrifugæ copiâ prælitam principiis heterogeneis meliùs esse exutam, ceteroquin præferentiam uni potiùs quàm alteri concessam ab arbitrariis idæis sæpiùs quàm sanâ experientiâ pendere fatebitur.

Quamvis ad febres intermittentes pertinaces debellandas *griseam Chinam* præferamus, omnes species æquè conducere arbitramur, dùm dosis ad speciem accommodetur, cautè opportunoque tempore medicamen ministretur; hanc opinionem suo loco evolvemus.

sed insupèr ob hoc ipsum de nostro optimè meritæ, statim excellentia novi febrifugi, certo, ac multiplici apud exteros experimento comprobata, sedulitatem allexit præstantissimi viri A. FRASSONI, præceptoris quondam mei dilectissimi, ut illud pro bono publico, et pro breviori, certiorique ægrorum curatione in usum deduceret. Et sanè recensendus ille inter primos corticis receptores, cujus rei testimonium exhibet idem C. BADUS in citato libro, cui titulus — *Anastasis corticis Peruviae*, ubi epist. FRASSONI ipsius inserit sibi inscriptam sub anno 1656, in quâ idem FRASSONUS refert, se antè annos aliquot de cortice felix periculum fecisse in pluribus, ac signatè in splendido viro D. Comite Alexandro eminent. Card. Facchenetri fratre. Cum ergò circa annum 1649 translatum fuerit è regione *Quitensi* in Hesperiam remedium, nemo neget, quin inter primos, qui illud admiserint, verè sit connumerandus FRASSONUS.

Cæpit ille uti Chinâ Chinâ (quam etiam *Gen-tianam Indicam*, *Antiquarium Peruvianum*, *pulverem Comitissæ*, *pulverem Card. de Lugo*, vel *Jesuiticum pulverem* vocitârunt nonnulli) post administrata præsidia universalia, et particularia, in quartanis ultrà provectis, quo tempore tùm ægri,

An cortex juniorum, cortici crassiorum ramorum vel trunci sit anteponenda, an recens vetustiori aeri quidem humiditatie obnoxie sit præferenda? C. MUTIS his duabus ultimis assentire videtur opinionibus.

tùm medici tædio affecti ad remedia quælibet empirica, atque etiam anilia solent confugere. Cùmque illi curationes ex voto succederent, ad tertianas quoque spurias, ut aiunt, tùm simplices, tùm duplices, benignas tamen, seu saltèm non perniciales, nec non ad alias quascumque febres intermittentes (diuturniores scilicet) curandas, pari successu transitum fecit, fretus auctoritate *Badi* antè memorati, aliorumque ævi sui illustrium medicorum, quorum testimoniis quamplurimis, iisque gravissimis, *Badus* ipse opus suum pro tutelâ Peruviani corticis roboravit. Reluctabantur interim, et, quoad vixit idem *Frassonus*, semper obstrepuère omnes ferè civitatis medici, adeò ut ad evitandum severum eorundem tribunal, profugus, et exul cortex non ausus fuerit in pharmacopœas introire, sed quasi clàm intrâ claustra quarumdam monialium fuerit coactus sese recipere undè postea illum petebat vir solertissimus, ut ægris sibi commissis subministraret.

Dabat autèm adultis initio paroxysmī, quemadmodum tunc solemne erat, ex præscripto Romanæ schedulæ, *drachmas duas* corticis in subtilissimum pulverem redacti, dosim verò exiliorem natu minoribus, habitâ ætatis ratione, sive deindè in formâ haustûs, ut plurimùm quidem in vino, modo tenuiore, modo generosiore, ad *uncias quinque*, plùs minùs factâ, vel etiam omissâ præviâ infusione (quod perindè est) sive in formâ boli, sive alio consimili artis ritu, superepoto paritèr vini

momento. Hâc methodo à primo adventu corticis, ut dictum est, in Italiam, usque ad annum 1677. (quo tempore ad praxim sub ipso addiscendam me contuli) febres omnes intermittentes longiusculas supprimebat, iisdemque non rarò, ut mos est, redivivis, repetito semel, aut bis febrifugo, finem imponebat. Quod millies ac millies sine ullo unquàm sinistro eventu sibi contigisse, mihi pluries asseruit vir ille fide dignissimus, ac omni exceptione major. Et egomet postmodùm, testis de visu, id ipsum illi perpetuò accidisse deprehendi usque ad annum 1680. (nec enim quispiam, nisi planè vitilitigator, adversetur ob singularem casum, de quo infra *cap. x. hist.. XIII.*) quo nempè anno diem suum obiit, lacrymabili sanè jacturâ, vir experientissimus, ac de Urbe nostrâ admodùm benemeritus, qui vel moriens et in hoc profuit, quòd eo extincto, extinctæ cum eodem, vel saltèm sopitæ fuerint nostratium ferè omnium, qui tunc aderant, medicorum in corticem inimiciæ, pluries enim ex iis Chinæ Chinæ antea osores, ac hostes, eâdem paulo post, semotis cavillationibus, uti cœperunt. Quæ sors nonnullis quoque aliis peculiaribus obtigit post ejus obitum. FRASSONI remediis, dùm viveret, improbatis; eâ namque communibus sensim suffragiis fuère subindè adeò recepta, ut ipso etiamnum FRASSONI nomine insignita circumferantur. Atque hisce incidentèr occurrentibus liceat amantissimi Præceptoris manibus parentâsse.

Ab eo autem tempore cœpit adeò clarescere in

dies hujusce fama febrifugi, ut jam nostro ævo nil notius sit in medicinâ, nil certius, quàm febres intermittentes Chinâ Chinâ depelli. Communis iste mos est omnibus fermè Europæ nationibus, quod innumera undique scripta luculentè testantur. Hinc est, quòd ex tam liberali illius impendio detur ansa pravis hominibus, iniquum de corio humano lucrum facientibus, eamdem adulterandi, de quo passim jure merito (quandoquidem verum sit) conqueruntur auctores, ut proindè alicubi in publicis nosocomiis in locum genuini corticis jam propè deficientis, suffectus fuerit pulvis ex nucibus, aut ex corticibus Cupressi, et malorum aureorum dulcium, item ex radicibus arboris Persicæ, Fraxini, Gentianæ, et hujusmodi, referente præ aliis eruditissimo *Lucâ Tozzi* : quibus remediis ter exhibitis, ait quandoque tolli febres, quæ cæteroqui unicâ tantùm oblatione cortici Peruviano semper cedere consueverunt.

Enimverò succedanea quævis, sive naturalia illa sint, sive artificialia, nimium distant viribus {ab hoc cortice, ut qui inter omnia hucusque nota, febrifugum præstantissimum est, ac summè innocens. (1) Præstans equidem præ omnibus, quia præ omnibus infallibilitèr, et celerrimè febres omnes intermittentes abigit, dommodò nulla partis alicu-

(1) Hæc Torti opinio nimis extensa nobis videtur; reipsa quidem febres intermittentes securè aliquoties aliis medicaminibus debellantur, dum Chinæ Chinæ diù repugnarunt.

jus solidæ læsio organica sit morbi fomes. (1) Indefit, ut propinatis semel cuilibet quartanario, aut tertianario *drachmis duabus* corticis, more maximè vulgari, in principio, vel declinatione febrilis accessûs, possit medicus absque ullâ hæsitazione spondere, ultimum fore paroxysmum illum, nec rediturum alterum. Quid citius? Quid certius? Veritatem hujus asserti, si quis, cui notum non sit quod notum est omnibus, habeat suspectam, provoco ad experimentum; nec alium testem, aut judicem, volo, nisi qui contrà hucusque senserit. Ad me quod attinet, testari possum de experienciâ quinquaginta circitèr annorum, quo temporis tractu semel tantùm, vel bis, quod memor sim, in casu febris quartanæ (absque ullo tamen ægri detrimento) expectationem meam fefellit cortex, siquidem ille genuinus fuerit, quod nihilominus credere non recuso. Sed quid tum? Quandoque per accidens materiam combustibilem non comburit ignis: numquid propterea non erit idoneus ad comburendam, cum millies combusserit? Quòd verò innocuus, et insons ille sit, experientia paritèr mihi satis demonstrasse videtur. Quidquid enim aliis contigerit, cum non tenear de facto alieno, loquor de proprio, testorque coràm Deo, et ho-

(1) Febres intermittentes, irritatione viscerum præcipuè tollendâ ante Chinæ Chinæ administrationem vel complicatas, vel ab eâ productas esse nemo nunc nescit; tempus Chinæ ministrationis ad hujus irritationis intensitatem perpendatur.

minibus (quod et plures testantur de suis ægrotis gravissimi scriptores) nullum unquàm ex meis ægrotantibus periisse, quod sciam, ob usum corticis, neque in morbum graviolem, sed in leviolem farè semper, etiam cùm reciderit, incidisse; idque paritèr mecum perpetuò animadverterunt quot quot sub me praxim medicam exercuère, et propriâ dein experienciâ sejunctim noverunt. Si quid verò unquàm incommodi accidisse fortuitò visum sit, ut in nonnullis historiis referam; id certè non culpâ remedii tunc contigit, suâpte naturâ insontis; sed ob intempestivam suppressionem (1) febrium planè salubrium, et depurativarum, culpâ videlicèt medici, remedium febri-fugum, ubi progressus febrium stabat remedii loco, incautè offerentis. Quod de substantiâ corticis semper innoxia à me deprehensâ tam fidentèr assero, haud ita facilè proferre possem de ullo alio medicamento usitatore, præsertim in lineâ solventium, quorum tamen tanta esse solet apud osores corticis æstimatio.

Si quâ nihilominus alicundè quærenda sit, ac opponenda cortici criminatio, ea petenda est à *recidivis* (utor hoc vocabulo ad sensum artis, aliis-

(1) Sæpissimè diathesi inflammatoriâ datâ, medicus, sive, ignorantia sive imprudentiâ, febre intermittente laborantibus Chinam Chinam præbet; hujus medicaminis ope gignitur inflammatio; irritantur viscera; generalique irritatione mecatur æger.

que utar in progressu minùs excultis) post fugatas ab eodem febres identidem recurrentibus. Neque hic ego inficias ibo, ut inficiantur quamplurimi, omnem culpam in errata convalescentium, nec semper immeritò, refundentes, quin ultrò fatebor, exhibito semel, ac unicâ tantum dosi, Peruviano cortice, febrem sæpesæpiùs redire. Nisi hoc unum obstaret, arborem vitæ in Chinâ Chinâ superstitem divinâ clementiâ crediderim. Adhuc tamen fidentèr respondeo (plura circà hoc alibi prolaturus) primò, quòd non semper recidunt ægri ab assumpto cortice, ut experienciâ constat, si præsertim ritè, ac per repetitas justo ordine vices exhibeatur. Secundò, quòd ex opposito sæpissimè recidunt ter, quater, et quinquies, etsi corticem nunquàm assumpserint, sed aliâ methodo medicâ fuerint curati, undè posset contrà talem methodum retorqueri eadem censura. Sed reverà solutis etiam spontè, nullius omninò remedii interventu, sed solius naturæ ope, quandoque febribus, in easdem denuò, citrà ullius culpam, relabuntur ægri. Quid tunc dicendum? Loquamur ingenuè. Recidunt ægri, sumpto, et non sumpto cortice, frequentèr autumnò (1), quâ tempestate contuma-

(1) Hâc quidem anni tempestate febres intermittentes per-
vicacissimæ sunt, usumque corticis Peruviani potissimùm poscunt.

Quandò rarum magnique pretii erat hoc medicamen, huic
cel. SEGUIN mediante *gelatinâ* supplere tentavit; et reipsâ
febres intermittentes vernaes ab eâ satis facillè debellabantur

ciores sunt febres. Recidunt rarò sumpto et non sumpto cortice, tempore veris, et in principio æstatis, quibus tempestatibus quælibet methodus felix est, cùm febres tunc temporis etiam suo Marte citò solvantur. *Non igitur medicamentum* (inquit egregiè MORTONUS hæc omnia complexus in responsione suâ ad objectionem à recidivis petitam) *sed febris indoles in culpâ est, si à perenni humorum fonte enutriatur, nec non ab aere, aut alio accidente externo. Sive enim naturâ, sive arte quævis sanetur, ad revirescentiam valdè proclivis est. Multâ enim experientiâ fretus* (perpendantur quæso verba hæc digna consideratione practicorum, imò et eorum assensu) *fidentèr affirmare audeo, febrem à corticis usu fugatam, et demùm recidivantem, licet quâcumque aliâ methodo, vel febrifugo, vel viribus naturæ subacta fuisset, nihilo seciùs redituram fuisse.* Neque minùs nervosè similia protulerat antè Mortonum RESTAURANDUS in præfatione tractatûs sui, cui titulus — HIPPOCRATES *de usu Chinæ Chinæ.* — *Quid enim iniquius* (inquit ille) *quàm à Chinâ Chinâ extorquere, ut nequaquam ab eâ assumptâ revertantur febres? Numne sæpesæpiùs animadvertitur illarum reditus, postquàm fuerint curatæ, ab*

sed, stupente auctore! autumnales febres novo remedio omninò reluctabantur.

De cæterò, cap. 7 recidivarum post mediorum ministratiōnem, investigabimus rationem.

assumptis catharticis, (1) aliisque remediis? Prætereà, an China China tenetur prohibere, ne qui reduce fruitur valetudine, errata in diætâ committat, ne causæ externæ et animi pathemata febrim exulem revocent? etc. Nonne quid simile accidere videmus ab efficaciâ solstitii hybernî, si quandò eo tempore febris aliqua remissit: namque unus, vel alter paroxysmus in vere redivivus est, nisi priùs revocata fuerit, præsertim per cathartica? Sed interim in medium prodeat remedium pari efficaciâ febres profligans; quâ China China. Nullum certè suppetit. Dico tertio, quòd quandò contingit ab assumpto febrifugo recidiva, non semper accidit vitio ipsius febrifugi, fermentum febrile imbecillitèr, aut imperfecti subigentis, sed sæpè etiam, si non semper; culpâ convalescentium sibi nimis fidentium. Quarto, quòd quoties recidunt, etsi febris nonnunquàm de simplici possit fieri duplex, semper debilior illa est: idque serè perpetuum observavi, ut idcirco raro vocetur medicus pro tali curandâ recidivâ, adeò levis illa est, et spontè evanescens. Quintò denique, quòd per repetitam, et opportunam corticis oblationem potest eadem recidivâ non modo semper curari cùm venerit, sed, quod magis est (dummodo congruum id censeatur) etiam priusquàm

(1) Purgantium fortiorum usus inter causas recidivarum validissimas adnumerari meretur: ad hoc meritò animadvertendum, quia in quibusdam casibus recidivâ opportuna sæpè consideratur.

adveniat, penitus, ut in progressu videbimus, præcaveri. Propterea cum sit ut plurimum in potestate nostrâ malum istud pro libito avertere, ferè non-nisi volentes afficere potest hujusmodi objectio. (1)

Solutâ, ut reor, hisce responsionibus potiore difficultate, cui et alibi validè occurram, non est cur hîc inutilitèr tempus teram in refellendo, quod nebulones quidam scurrilitèr blaterant, ad territandum popellum, nempè quòd corticem potantes, intrâ annum, vel, quòd magis ridiculum est, intrâ septem annos moriantur, sopito videlicet, et postea ferociùs recrudescente eodem, vel alio pejore morbo: itèm quod China China pinguibus obsit, et tantùm graciles sanet, aliaque hujusmodi prorsùs exhibilanda. Nam præterquamquod nullus medicus, quod sciam, quibuslibet adhibitis in curatione remediis, cuiquam per annum, multoque minùs per septennium, sanationem ratam facit (quasi teneatur ad tempus de manutenendâ ægri salute, ut faber murarius de consistentiâ domûs constructæ) facilimum insupèr est, experièntiâ ipsâ impostores istos mendacii convincere. Plures etenim (quos ob digniorem causam aliàs sum relaturus) ac prætereà plus centum alios, et pingues, et macilentos, per corticem curatos à decem, et quindecim retrò an-

(1) Inter multas alias recidivarum causas, primum locum vomitorii usus obtinet: in nosocomio quodam Parisiensi quartanam Chinâ Chinâ quater sublatam, quater etiàm post vomitorii exhibitionem recrudesce observavimus.

nis, hucusque tamen incolumes, possem adducere: quin memetipsum, qui anno 1696, epotis uno haustu sex drachmis illius, à morte imminente illicò evasi, et etiamnum vivo, et etiamnum scribo. Ast hanc zizaniâ nullius ponderis ab ullo, qui medici nomen mereatur, satam, vix adducor, ut credam.

Sed præter experientiam, quæ sola sufficit ad ostendendum corticis usum prorsùs innocuum, id ipsum etiam, vel nudâ ratione spectatâ, evincitur ex eo, quòd nullam verè, quâ possit nocere, vim in se contineat cortex, sive de primis illius, ut aiunt, qualitatibus, sive de secundis, sive etiam de occultis sit sermo. *Calidus* enim *ex. gr.* et *siccus* est? *Calidiora* sunt, atque *sicciora* Zinziber, Piper, semen Sinapi, Mithridatium, Theriaca etc. *Amarus* est? *Amariora* sunt Absynthium, Ruta, Gentiana, Chamedrys, Fumaria, Centaurium minus etc. *Stipticus* nonnihil est? *Stipticiora* sunt nucum putamina, nuces, Cupressus, Verbena, Aurantiorum cortices etc. quæ sunt usitatiora, nec prorsùs contemnenda febrifuga, intercedente tamen inter illâ, et corticem hoc uno discrimine, quòd illa, etsi ut plurimùm calidiora, ac proindè magis suspecta, febrim vix unquàm tollant et cortex semper. Quoàd occultas verò facultates, nullam in eo reperiri datum est, nisi antifebrilem. Neque enim ullam *narcosim* præsert, cùm nullum soporem, quin potius vigilantiam, et mentis alacritatem, etiam copiosè assumptus, inducat: undè, secundùm plurimos, Opii consortium

consortium facile admittit, quod secùs fieri deberet, si cortex ipse eâdem polleret narcoticâ facultate, quâ Opium; rationabilis quippè subesset de nimio sopore incutiendo suspicio. Insuper si China China (ut clarè demonstrabimus in historiis) soporosas febres, atque *lethargicas* momento temporis solvit, et cum illis submovet soporem adjunctum, satis patentèr constat, illam yi potius pollere contrariâ : tantùm abest, ut causam febrilem hýpnótico veluti vinculo obstringat, præsertim ad tot hebdomadas, quot sunt induciæ inter morbum et recidivam, quotiescumque ista contingat, cùm, ne per horam quidem, nodum hujusmodi narcoticum injiciat spiritibus. Quod si contendatur, illam exercere narcosim, et quidem diuturniorem, adversùs solum fermentum febrile, hæc, ut patet, dici nequit vera narcosis, sed potius absorptio, illaqueatio aut retusio fermenti, vel quid his analogum, in quo facilè conveniemus, quippè in re semper innocuâ. Ad hæc nullas cortex intrà viscera, vel intrà fluida excitat turbas, nullum cit vomitum, (1) secessum nullum (quod illi perperàm vitio vertitur) non sudores

(1) Omnes fere auctores chinam chinam, uti cætera amara, intempestivè aut largâ manu exhibitam, vomitum cire fatuitur. Irritatio gastrica ferè semper febres intermittentes comitatur; tunc hujus medicaminis ingestio sensibilitatem ventriculi ultrà modum excitat, ægerque vomitu levatur. In hoc casu, Chinâ Chinâ vomitum citum se vidisse asserit VANSWIETEN. Hoc principium evolvemus, quandò de febrium intermittentium naturâ loquemur.

prolicit per vim expressos, non urinas immodicas, non ullam aliam sensibilem, saltèm ut plurimùm, promovet evacuationem, quarum tamen aliquam si quandò (quod haud infrequentèr accidit) habeat adjunctam, placida illa est, modica, ægro facilis ac saluberrima. Uno verbo, China China citrà omnem molestiam, excepto deglutionis incommodo, materiam febrilem, quæcumque illa sit, undecumque procedat, quocumque tendat, aut ubicumque moretur, materiam inquam febrilem (1) directè petit, corripit, intercipit, aut subigit, eodemque temporis momento celebrem illam, ut aiunt, humorum coctionem, diù, sæpè tamen frustrà, quæsitam, et à plurimis pro dextero usu cujuscumque febrifugi requiri creditam, quotiescumque non præextiterit, ipsa facit, vel saltèm ut fiat efficit, correcto fermento febrili, vel sublato illius affluxu, quæ concoctio statim in urinis alterâ ipsâ die ab illius assumptione

(1) Omnia sæcula de materiâ febrili dictâ diversimodo sentiunt: sectatores Galeni (qui humorum doctrinæ honorem sibi vindicavit, quamvis in libro *Hippocrat. de naturâ hominis* accuratè descripta reperiatur) quatuor humoribus, vel vitiosâ plurium mistione, qualitate quidem vel quantitate peccantium, omnes febres pendere arbitrabantur, ergò, sanguine febres ardentes, bile tertianæ, atrabile quartanæ, petuità lentæ gignebantur. *Fixes, Chirac, Barbeirac* Galeni discipuli in *primis viis* omnium febrium causas collocabant, et indè immodicè purgantibus abutebantur. Hæc opinio hoc usque sæculum superstedit; nunc autem, plerasque febres ab irritatione organicâ pendere nemo negat.

manifestatur, estque phænomenon perpetuum, sicuti summâ dignum observatione, ita et facillimè observabile; ut propterea in hâc re, quæ non de *conjecturâ*, sed de *facto* est, et cuilibet obvia, diutius immorari non liceat.

Quòd si quispiam de arcanâ istâ corticis facultate, de quâ tamen plura in progressu, adhuc ulteriora quærat, ut eâ fidentiùs utatur, is quærat potius ab expertis, quid illa præstare consueverit, quemadmodum de febrifugis, sive alexipyretis hujusmodi faciendum monet doctissimus *Mercurialis*: *de præsidiis*, inquit, *operantibus arcanâ qualitate minimè loquendum est; siquidem, ut scribit Galenus, medicamenta hæc cum solâ experienciâ sint inventa, cogimur fidem iis adhibere, qui longâ et debitâ experienciâ testantur, sese ipsa cum fructu usurpasse.* Quid autem dicant, qui millies usurpârunt, jam proximè disquirendum. Sex idcirco in medium prodeant, universalem totius Reipublicæ medicæ approbationem secum trahentes, testes eximii, experti, ac omni exceptione majores, videlicet laudatus *Badus*, *Restaurandus*, *Monginot*, *d'Acquin*, *Sydenham*, et *Morton*, qui omnes præ cæteris mihi dehinc in hâc materiâ semper erunt antesignani.

Badus corticis innocentiam testatus: *sanctè*, inquit, *id juro coràm Deo meo; nec nisi aliundè damna resciscam, profectò ego nescio quid unquam, uspiamve attulerit detrimenti: scio immò semper egregiam operam navasse, et reportatis trophæis in-*

clytum, et manubiis admirandum fuisse et gloriosum. Hæc ille non minùs ingenuè, quàm cùm ibidem fatetur corticem *ter, quaterve illum fefellisse, in quibusdam scilicèt tertianariis, quibus tamen copulati alii morbi, Gallicis potissimùm, et tabidis,* quòd est extrà activitatem illius. Auctoritas unius *Badi* fœcunda est insuper plurimis celeberrimorum virorum testimoniis ab eodem adductis, quos inter eminet doctissimus *Conygius*, sive *Honoratus Fabri*. Hic auctor, paulò post primum corticis adventum in Europam, peculiari libro suo testatus est, *Romæ*, ubi moram trahebat; *intrà annum aliquot hominum millia pulverem Peruvianum adhibuisse, et non modo innoxium, sed saluberrimum quoque fuisse probatum.* Nostris temporibus, eadem orbis jam penè universi assertio est.

Restaurandus post plurima enucleata Peruviani corticis præclara facinora : *id verò*, inquit, *addidero, me nunquàm hoc remedium citrà successum exhibuisse, hoc est ejus ope semper curatas fuisse febres : ac maximam partem me ad ejus usum confugisse in illarum pertinaciâ, aut cùm symptomata verenda comitarentur.* Clariùs verò ipsam securitatem remedii antecedentèr testatus : *ad illud auxilium*, dixerat, *citrà ullum periculi metum confugiendum est, nec permittendum ut vivi comburantur ægri, ac discerpantur.*

Primarius paritèr regis christianissimi medicus cl. *D'Acquin* de remedio Anglico, cujus basis China China est, sic scriptum reliquit : *Nulli unquàm reme-*

dio potiori jure specifici remedii nomen, quàm prædicto adscriptum est; nec enim hactenùs ullum nobis innotuit, quòd febres pari celeritate, et securitate profligaverit. Reverà Quinquina, quæ illiùs est basis etc. Et inferiùs ad ostendendam innocuam operationem remedii. — Locus non est, subdit, ut credam ab illius usu imminere discrimen aliquod: æconomice naturali nullam vim infert, cùm, non secùs ac cætera remedia amara temperata, nihil noxium corpori humano inurere valeat.

Monginotius quoque de præstantiâ corticis verba faciens, remedium hoc talis esse indolis asseverat, ut; Nullum hactenùs, sunt ejus verba, præstantius fuerit à naturâ productum; ac de eodem in aliis quoque morbis; in quibus nondum usurpatum est; periculum esse faciendum incunctantèr insinuat. — Quandoquidem, ait, extrà omnem damni aleam usurpari potest medicamentum qualitatis noxiæ omninò expers.

Sydenham autèm hæc habet de cortice: Verè affirmare possum, non obstante tam vulgi, quàm perpaucorum è doctis præjudicio, me nihil mali ægris accidisse ab ejus usu vidisse unquàm, vel cum ratione suspicari potuisse. Paulò verò post: Et profectò, si tam effectorum durationem quàm corticis hujus innocentiam, exploratam haberem, principem illi locum inter omnia, quotquot sunt remedia, deferre nullus debitarè, cùm non tantum in hoc morbo insignium esse virium deprehendatur, sed et in uteri, et ventriculi etiam affectibus: tantùm abest, ut de

ejus insalubritate meritò quis conqueratur. Addamus et acrem hujusce magni viri querelam in *dissertatione epistolari* ad *Cole* petentem eos præcipuè (si qui tunc fuerint in eâ regione) qui cortice pro se, et domesticis suis utebantur, et interim eos pigebat (quod et per extensum confirmat *Mortonus* testis de auditu) eos, inquam, pigebat idem remedium aliis ægrotantibus præscribere, quin et ipsum corticem ibidem innotescere. Quam querimoniam prodit his verbis vir iste clarissimus : *Quamvis verò in febrium intermittentium curatione egregiâ præstet, ne dicam miraculâ, dictus cortex, atque eodem tùm ipsi nos libentè utamur, tùm uxoribus, liberisque usurpandum imperemus, quoties res postulet (en testimonium innocentiae remedii) sunt tamen quibus haud minùs jam displicet, quòd tam certò, subitoque morbos expugnet, quàm olim displicebat, quod non nisi nuper his terrarum oris innotuerat.*

Mortonus deniquè : *Me quod attinet, inquit, ego fidentè dico, idque postquàm jam ad 25 annos quotidiano usu ejus vires explorando expertus sum, me nunquàm novisse aliquid mali ab usu corticis cuiquam evenisse, præter surditatem aliqualem (quod tamen ego, hisce nostris in regionibus saltèm, non sum expertus) quam spontè illicò à morbo evicto, vel pulveris omissione cessare semper observari. Me hujus remedii nunquàm pœnituit, nunquàm aliquem cachecticum, tabidum, aut quocumque alio morbo affectum, multò minùs quasi toxico interfectum novi. Atque ter tantùm (ut olim*

innui) optato eventu, in febre intermittente ope ejus sananda, destitutus sum. Alibi quoque hæc eadem nervosius repetit his verbis : *Ego sanè, qui jam ad quatuor lustra, et quod excurrit, hoc polychrestum remediis ferè quotidie præscripsi, vix aliquid incommodi ægrotantibus ortum indè observavi (quidquid clamosè, atque falsò oggerant malè feriat quidam, atque ignorantes) quin etiàm non nisi ter, uti sincero animo priùs asserui, in febribus intermittentibus spem meam frustatus est. Utinàm idem dicere licuisset de quoquam alio, quantumvis celebri remedio, in cæteris humani corporis affectibus debellandis decantato. Quibus assertionibus nondum contentus, sed universali insuper approbatione munitus, in hæc alibi tandem prorumpit : Suffragio jam professorum penè universali in censum medicaminum salubrium, et maximè efficacium adoptatus est cortex. Nec de suo jure apud doctos, et probos viros decedet antè consummationem sæculorum, ut ut ex astutiâ, malitiâ, temeritate, aut ignorantia non desinant aliqui hucusque obstrepere, et oggannire.*

Demonstratâ jam satis secundùm experientiam, rationem, et auctoritatem præstantiâ Peruvianæ corticis, nocendi nesciæ, superesset adhuc ex mente citati *Mercurialis* hanc ipsam experientiam ulterioribus, præter adducta, gravissimorum auctorum Chinâ Chinâ utentium testimoniis confirmare. Sed cum ex unâ parte plusquàm quinquaginta illustrium medicorum attestations, ut dictum

est, circa hoc olim protulerit *Badus*, quibus modo universa subscribit Respublica medica, sive Italiam respicias, sive Galliam, sive Angliam, sive Germaniam, sive Hispaniam, sive aliam quamvis (ut verbo tandem dicam) mundi, saltèm polioris, regionem: ex aliâ verò parte, cùm ego tractatum hunc, animadversiones tantummodo meas, præsertim practicas, continentem, quovis tùm Philologico, tùm affectatæ auctoritatis ornatu destitutum, ut et toto semper margine lævigatum velim, ideò ab enumeratione scriptorum Chinam Chinam totis ulnis amplexantium (quorum series numerosa latè ultrà plurimum existimationem extenderetur) lubens abstineo, eosdem doctis viris satis superque notos jàm sciens, aliis verò, si velint, inventu faciles. Non enim apud *Garamantas*, et *Indos* hujusmodi notitiam quærere est opus, quandoquidem nullus ab inventione remedii fuit hucusque, qui de febribus scribens, siluerit de cortice. Sed et eandem notitiam, si non integram, saltèm luculentam, atque præcipuam colligere quisque poteris ex notis clarissimi *Nigrisoti* professoris Ferrariensis in editione per eundem repetitâ opusculorum *De Blegny*, *Monginot*, *Restaurandi*, et *Sponii*, ex zodiaco *Medi Gallico* excerptorum, et ab eo in unum congestorum in libro, cui titulus: *febris Chinâ Chinâ expugnata*, ubi, præter non vulgarem ipsius eruditionem, solidam insuper praxim in usu talis remedii, et observationes summè veras, ac utiles, meisque

(experientiâ utrinque teste) omninò consonas, deprehendere est : ut propterea virum istum inter saniores, et magis expertos hujusce remedii patronos jure merito lubeat referre.

Id unum monitos velim osores corticis, ut priusquam eundem damnent, quid de ipso scriptum sit, quid ab expertis assertum legere non recusent : neque enim æqui judicis munere fungi potest, qui antequam judicium ferat, integram rei causam, aut defensionem renuit audire. Huic, quæso, quem facilè pro tribunali sedentes exercere queunt, ne parcant labori, ut labori crurum non parcunt ad supervacuè palpandos ægros, quibus sæpenumerò acceptior est sanatione blandimentis cassa, officiosa jugulatio.

Liberum hunc loquendi modum, quem in decursu quoque identidem offendit lector, et à quo cæteroqui cavere mihi religio est, ne quis mihi vitio planè vertat, is attendat velim, procedere hoc ipsum, non ex dicacitate, aut malitiâ, sed ex ipsius necessitate materiæ, ad apologeticam non-nihil vergentis ; quippè crimen istud (si vera hæc pandere crimen reputatur) familiare est auctoribus omnibus, quotquot sunt, qui de hoc remedio scripserunt experti, et non tantummodò per conjecturas, aut ex aliorum relatu : ii namque, ut obvium est cernere, temperare nequeunt à ludibus, neque à tutelâ servidiore tanti medicaminis, sicut nec ab amarâ, et acri querelâ, neminem tamen specialitè impetente, quod ei tot futes objectiones, tot

somnia totque figmenta frequentèr opponantur : signum evidens, quod hujusmodi scriptores referentes ex intimâ conscientiâ, quæ vera sunt, et experta sibi, sine querimoniâ, et indignatione quâdam ferre nequeunt vanas, et apertè falsas hujusmodi hominum inexpertorum, fallacique ideâ præoccupatorum cavillationes, dato etiâ quod nonnulli corticis patroni, in illius usu minùs temperantes, abundant aliquo excessu credulitatis, orto nihilominùs ex admirabili et innocuâ, quam pluries deprehenderunt, illius virtute.

Ob eamdem causam, veniam aliquam me assecuturum facilè credam, etsi trita nimis interdum inculcem circâ usum hujusce remedii, quæ ceteroqui puderet efferre in doctorum conspectu, quorum oculis vulgaria quædam fortassè vilescent; sed qui lustrabit historias meas, in iisque, nonmodo inexpertorum incredulitatem, et tergiversantium diffidentiam, sed et identidem adversantium animositatem, mucidarumque rationum, ac doctrinarum oppositionem animadvertet, parcet insimul impugnationi minùs conquisitæ, triviali, et Minervæ repugnantium accommodatæ. Quo pacto enim, quæso, dabitur mihi usum validum, et liberalem Chinæ Chinæ in febribus quibusdam exitialibus suadere iis, qui vel in benignis illam abdicant, atque proscribunt, ex indelebili inanium principiorum præventionem, nisi illis, datâ etiâ eorundem rancidorum principiorum positione (quæ refellere nimis tædiosum foret, ac tandè inutile) ostendam

innocentiam remedii junctam infaillibilitati felicitis eventus?

Sunt namque et hodiè (pudet serè hoc in propatulo ponere, licèt ità sentientes nec pudeat, nec pigeat palàm profiteri) sunt, inquam, vel apud nos, qui contrà totius orbis experientiam, atque consensum, damnant Peruvianum corticem; æquè ac si arsenicum foret, aut sublimatum; neque usque adhuc sibi suadere possunt, illum febres intermittentes fugare, vel id innoxie saltèm præstare, neque norunt (etsi plura norint altioris indaginis) quâ dosi præcisè ad ipsas abigendas vulgò usurpetur: adeò scilicèt exosum illis est nomen corticis, et gravis ipsa cogitatio de eodem; crescitque in dies illorum aversatio eâ proportionè, quâ crescit ex præclaris operibus fama remedii. Quod autem in hâc regione contigit, viris cæteroqui doctissimis, eruditissimis, et ingenuis professoribus abundè referta, puto rationabiliter contingere posse et in aliis. Liceat itaque minùs doctos ad modulum captus eorum erudire, salvâ integrâ eruditorum existimatione; etenim (ut aliàs sum protestatus) tyronibus scribo, iisque tantùm, qui tyronibus æquiparari merentur, non maturis, doctisque professoribus, quibus peculiarem tantummodò Chinæ Chinæ administrationem in arduis quibusdam casibus, meamque simul experientiam in historiis expressam, fidentè exhibeo, ut eam fugaci saltèm, humanoque intuitu, donare non dedignentur. Cætera, si lubet, ad lusum percurrant, et jocum.

CAPUT II.

Pervicax antipathia, quâ nonnulli abhorrent ab usu *Peruviani corticis*, illumque proscribunt; ratio recursui febrium tempestivè occurrendi.

SUNT igitur hodiè nonnulli (perpauci licèt) præjudiciis vetustioris pathologiæ nondum exuti, qui reluctantibus insimul experimento, ratione, atque orbe toto, adhuc malè sentiunt de cortice, et, quod turpius est, crimen istud tangit præcipuè nos Italos, cum tamen omnem fermè quam intrà totius Europæ confinia nactus est famam, ab Italis scriptoribus primùm traxerit cortex; ut proinde stupidus exclamet auctor quidam anonymus (*Helvetius* creditur) in libello gallicè conscripto, cui titulus : *Les admirables qualités du Quinquina*, nobisque exprobrat, quod in Italiâ, unde antiquiorem melioremque deduxit China China nominis sui propagationem, ibi pauciores, quàm alibi, inveniat patronos, cum in Galliâ, ubi seriùs apparuit, tantam existimationem etiàm propter Italorum testimonia, sit assecuta. Illius ideò verba huc referre non piget : *C'est une chose assez surprenante, que le Quinquina, qui fait aujourd'hui tant de bruit en France, par la guérison d'un nombre infini de personnes, auxquelles il a rendu la santé, trouve si peu de partisans en Italie, où il commença à paroître, il y a près de quarante ans, sous le nom de la poudre du cardinal de Lugo es-*

*pagnol, et qu'on n'y peut encore croire qu'il soit un remède spécifique pour toutes sortes de fièvres. Quæ quidem querela justissima est, dummodò plurimum restringatur, neque credulitatem nostram extensam velit ad omnes æqualitèr febrium, etiàm continuarum, species, in quam exceptionem alibi consentire videtur idem auctor; quandoquidem, febres intermittentes (et quæcumque, subdo ego, ab initio tales fuère, necdum omninò à suâ naturâ desciverunt) esse verum objectum actionis Peruvianæ corticis, asseverat dùm inquit : *les plus admirables effets de ce fébrifuge paroissent dans toutes les fièvres intermittentes qui en sont le véritable objet.* Quod verò etiàm in istis perpetuò ablegetur à quibusdam idem remedium sanè, si non in fatum quoddam, non in aliud, quàm in ingenitam quandam eorum antipathiam potest refundi; sed et hanc ipsam satis mirari nequeo quoties hæc, quæ cogitanti occurrunt sæpiùs, mecum ipse revolve.*

A primâ medicinæ origine ad hæc usquè tempora, maxima fuit medicorum sollicitudo, longo sæculorum tractu incessantèr exulta, ut febrifugum aliquod invenirent, ad sistendos febrium intermittentium paroxysmos. Nil intentatum reliquit illorum solertia, triplex regnum naturæ animale scilicèt, vegetabile, ac minerale, susquedeque volventium, ut vel aliquid naturale ad hoc aptum detegerent, vel artis adminiculo redderent tale. Usquè eò devenit artis tentamen audax, ut ad dracones, ut vocant, mitigatos, hoc est ad ipsa

venena præparata, et nonnihil retusa, experiunda confugerit. Hinc Antimonium et Mercurius (quæ, ut notum est, nocentiora sæpius sunt præparata, quàm cruda) Arsenicum ipsum, (1) Vitriolum, Scammonium, Colocynthis, et hujusce farinæ sexcenta alia, paulò antè accessionem exhibita, crebro in usu fuère. Ex his, et similibus fabrefacta sunt febrifuga *Riverii*, *Muscochii*, et *de Clos*, *Hercules Bovii*, Arcanum duplicatum *Mynsichti*, pulvis *Algorethi*, *Cornacchini*, et id genus alia, nomen veri febrifugi nequaquàm merentia, quorum omnium valdè periculosorum, ut et aliorum mitioris ordinis, sed planè inutilium, si vellem catalogum texere, tractatus iste in amplum volumen excresceret.

De prioribus ergò tantùm, scilicèt de energeticis loquendo, si ea bis, ter, vel quater fuissent exhi-

(1) Pharmacum illud calamitosum volentissimumque manu prudenti expertâque exhibitum, in nonnullis casibus, vel deficiente, vel incassum adhibitâ Chinâ Chinâ, quasi potens febrifugum feliciter administrari potest. Vide *journal complémentaire du Dictionnaire des sciences médicales*.

Expertissimus vir *J. M. Calès*, medicinæ Doctor nobis familiarissimus, hoc medicamento, peractis jam 35 annis, ad quartanam perniciosam profligandam, apud matronam 83 annis natam, usus fuerat, cujus adeò violentes erant paroxysmi ut ægrotans vitâ valdè fuerit periclitata. Chinâ Chinâ frustrâ exhibitâ ad Arsenicum album in spiritu vini solutum confugit. Quo parvissimis dosibus in vehiculo proprio propinato, à primâ accessione febris sublata fuit, matronaque sanitati restituta est.

bita, fama erat, quòd periodus febrilis tandem inhibebatur. Interim vomitus immanes, enormes secessus, tormina, cruciatus, anxietates ægrum torquebant, quandoque non sine vitæ discrimine, et, quod pejùs est, sæpesæpiùs (dato quod nonnunquàm res ex voto cesserit) febris pari passu, si non etiàm pejore, progrediebatur, cum insigni interim virium jacturâ, et vitalis œconomiae detrimento. Proponebantur nihilominùs, atque ultrò propinabantur, etsi spem pluries fefellerint, constantèr, et absque ullâ trepidatione aliis ægrotantibus, quibus postmodùm si febris de more inexpugnata, processisset, sat erat dixisse, eos saltèm à pravis humoribus esse purgatos (verius dictum foret melioribus destitutos) quos nisi febrifugum illud adeò strenuè, licèt cum aliquo incommodo, evacuasset, maligna, lethalisque illis ægritudo imminebat. Sed tandem à medicis sanioribus, ac ingenuis, imò vel ab ægrotantibus cognitâ proprio sumptu fallaciâ, ab hujusmodi remediis ferriari cœperunt.

Cum verò hanc ipsam auxiliorum penuriam malè ferrent utrique, clinici verò eamdem supplere pro virili contenderent, idcirco, incassùm licèt, *In variis abièrè vias*, quas inter peculiari mentione digna videtur methodus propinandi paucis antè accessiones horis medicamentum conflatum ex diaphoreticis calidioribus, sudore insimul externis adminiculis provocato, mox offerendi horâ paroxysmi catharticum, misturâ quâdam spirituosâ, et diaphoreticâ solutum, vi quorum remediorum, in medio

febris impetu, omnes illæ oppositæ simul coincide-
rent operationes, ut nimirum æger jam algens
sudare, et è lecto surgere ad alvum deponendam
cogeretur; sicque paroxysmi progressus confun-
deretur, atque interturbaretur. Cujus animosæ
methodi, quæ paucos habuit sequaces, auctor fuit
celeberrimus practicus Londinensis *Thomas Syden-
ham* ad curandas tertianas intermittentes, prius-
quàm in iisdem vires corticis, quas in quartanâ
tantum noverat, experiretur. Perspectâ namque
paulò post integrâ illius virtute, de eodem tam
benè sensit, ut purgationibus, cæterisque evacua-
tionibus planè posthabitis, nullum aliud remedium
illi æquiparandum, duxerit, quoàd tutum usum,
ac effectûs promptitudinem, ut nupèr vidimus.

Irreparabili itaque deprehenso utilium febrifu-
gorum, vel methodi cujuspiam certæ, tutæque
defectu, factum est, ut magna pars medicorum,
arti consuetæ, plus quàm par sit, fortassè fidentium,
quartanas febres et tertianas diuturniores, crebris,
ac usualibus purgationibus, sanguinis missionibus
pluries repetitis, julapiis, jusculis, pulveribus ad
nihilum, nisi ad ægri nauseam, tædiumque facien-
tibus, pertinaci usu curare tentaverit; quibus de-
mum nil proficientibus, ad simplicia vegetabilia,
febrifuga reputata, ut *Centaurium minus*, *Came-
drym*, *Gentianam* etc. itèm ad alia specifica, sic
dicta, carpis apposita, vel digitis alligata, ad amu-
leta de collo suspensa, tandemque ad puerilia, et
planè ridicula confugere cogeatur. Quòd si bene-
ficio

ficio temporis in horum remediorum administratione inaniter consumpti, spontè naturæ non convalescebat æger, ad aeris, tempestatis, vel regionis mutationem relegabatur. Altera verò pars medicorum magis sincera, et arti fidens tantummodò quantum decet, vel febres contumaciores nullo pacto attingebat, vel administratis potioribus remediis, et tentatis rationabilioribus, præscriptoque congruo victûs regimine, easdem aliquantulum enervatas solæ demùm naturæ curandas, præmisso tantùm ingenuo de diuturnitate prognostico, relinquebat.

Affulsit interea beneficum lumen cæcutientibus, detecto Peruviano cortice, in quo vis illa febrifuga, tot diù quæsita laboribus, eminentèr emicuit. Sed (mirum dictu) reperitur ex voto remedium omnis omninò pravitatis expers, febres momento temporis fugans, nullos in corpore tumultus excitans, nullam penitùs molestiam pariens, ac si nihil sumpsisset æger, et statim repertum rejicitur, imò cæteris jamdudùm rejectis, noxiis, ac inutilibus, quasi deterius foret, postponitur. Numquid fortè illud audax quidam chymiater ex Antimonio, vel ex Mercurio sublimatis eleganti periculo fabrefecit? minimè gentium. Non alium opificem habuit China China, quàm Deum, et à solo Deo omnem, quam nacta est febrifugam virtutem recepit. Anne ergò Deus illâ utitur in humanum genus, specie juvaminis in ultionem peccatorum? Cur illi tantam vim indidit, ut eâ demùm deluderemur, ut ea

nos perderet? Absit hæc à nobis ingrati animi blasphemia. Si reliquis plantis, et earum cuilibet injunxit creator virtutem suam, quâ postmodum à nobis detectâ, si salubris appareat, fidentèr utimur, quare virtute corticis febrifugâ eidem impressâ, et à nobis evidentèr detectâ, pari fiduciâ non erit utendum? Ast quid dixi, medicos fidentèr uti consuetos, herbis et rebus, quarum virtutem perspectam habeant? Quin iis utuntur ut plurimum in fide parentum, de quarum naturâ, et viribus, nullam, nisi confusam incertamque habent notitiam. Illis tantummodò velut egregiis utuntur, quia semper utuntur inutilitèr; cortice verò, cujus virtus perspicua est, et incomparabilis, quandoquidem cum fructu adhibetur, uti piaculum est.

Viguit perpetuò (liceat paululum digredi, et seriò ridere, siquidem quandoquè

—— *ridentem dicere verum*

Quid vetat?) ——

viguit, inquam, perpetuò immortalis, et cavillosa garrulitas inter pharmacopolas non modò, verum et inter medicos quosdam pharmacopolarum more philosophantes, acriterque disputantes, an res quamplurimæ refrigerent, an calefaciant. Vetus theorema est, acida omnia refrigerare, amara calefacere. Dubitatur tamen, an acetum, aut spiritus vitrioli in lineâ acidorum refrigeret, et an cichorium, in lineâ licèt amarorum, ullo pacto calefaciat. Recentior modò dissensus est inter neotericos, an voluptuosæ quædam nuper in orbem nostrum,

mox et in usum medicum invectæ potiones, quicquam sanitati, generalitèr loquendo, conferant, an detrahant, ut potus Chocolatæ, Thè, Coffeæ, similiave.

Pocula, ab Odrisio multùm laudata tyranno.

Laudant promiscuè inter medicos ii, quorum palato nova hæc, et exotica arrident: improbant, qui iisdem minimè oblectantur, *juris* antiqui sequaces. Laudo ego, quia saltèm sorbillantibus antea vini spiritum (1), potiones hujusmodi in illius locum suffectæ, gravius delinquendi ansam præciunt. Pariter divisa sunt vota; an camphora, ut semen extinguere credita, frigefaciat intensè, an, ut facillimè inflammabilis, impensè calefaciat. Idem pari contentione quæri solet de opio, de viperâ, ac de mille aliis rebus maximi ponderis in praxi, quarum scilicèt usus præposterus insignitèr potest obesse, ut oblatio v. g. purgantium in principio, aut sine morborum, præsertim acutorum, nunquam satis damnata, sed nondùm satis ab usu seposita, et hujusmodi. Medicus ergò quilibet, pro captu ingenii sui, prædictis omnibus utitur, unus quidem ad calefaciendum, alter verò ad refrige-

(1) Quod ad usum moderatum harum pertinet, nostri auctoris opinioni lubentèr assentimus, quemadmodùm et auctores art. *Nourriture*, *Dictionnaire des sciences médicales*, qui medici Mutinensis opinionem summoperè explicaverunt. Jamque ab usu quotidiano coffeæ infusi in quasdam regiones invecti, plebem magis ab ebriositate temperare, animadvertere juvat.

randum etc. Sed veritas una est. cichorium, acetum, spiritus vitrioli, camphora, opium, vipera, vel refrigerant, vel non refrigerant (2). Alter de duobus medicis infaillibiliter errat, æger verò pœnas luit.

Delirant reges, plectuntur Achivi;

Neuter tamen culpatur, etiamsi error, qui in alterutro est certus, sit in materiâ quandoquæ gravi, ut in opio stupefaciente (neque enim semper in solo calore, vel frigore, vel in solo cichorio, aut aceto consistit, quod parùm referret) neuter, inquam, culpatur, quia in materiâ incertâ, suâ quisque ductus ratione, et suâ fultus auctoritate, conscius licet de oppositâ opinione, et de errandi probabilitate, operatur. Culpabitur fortè tanquàm de

(1) Hasce duas opiniones etsi diversas conciliare licet; nullum enim medicamentum specificum esse propriè, roborantiaque inopportunè adhibita ægrum sæpè potiùs debilitare, et vice versâ, hoc nunc nemini ignotum credimus. Etenim exempli gratiâ, in casu affectionum istarum quibus *febris biliosa, putrida, atacta*, etc. nomina adscribuntur et in quibus ventriculus persæpè et intestina inflammatione laborant, si medicus fallaci symptomate *adynamia* dicto deceptus, corticem Peruvianum exhibet, antequàm inflammationem primarum viarum priùs paccaverit, tunc vires vitales in iis congestæ, aliis remotis partibus desertis, violentissimam inflammationem excitant, indè virium prostratio seu *adynamia* et brevè mors ægri sequitur. Ideoque de præscriptione alicujus medicamenti ex omnibus quæ ad ætatem, sexum, temperamentum ægrotantis, attingunt, medico solerti cantoque auspicandum est.

crimine, si Chinam Chinæ offerat, quia virtus illius certissima est, et indubia, nec potest controverti, an febrem tollat, nec ne. Dixi, errorem sæpè contingere in materiâ gravi, quia sæpè in materiâ gravi gravissimæ sunt controversiæ, et nihilominus lubricæ determinationes. Quænam, quæso, non vigent quæstiones circa generalem usum *phlebotomiæ*, quæ à pluribus doctis medicis, nostri etiam sæculi, ferè perpetuò ablegatur? Quænam non leguntur dissidia circa usum illius particularem in variolis, morbillis, peticulis et hujusmodi? Quænam lites non sunt, ut nuper aiebam, circa usum *purgantium* in acutis, et in illorum principiis? Hoc non obstante, quotidie præscribitur fidentèr utrumque, aut alterutrum, cum scientiâ contrariæ sententiæ (quæ, si vera foret, proh quantum noxia foret, nostra præscriptio!) licèt pro alterutrâ parte, quantumvis probabiliore, nulla constans stet, aut indubia experientia, ut in usu corticis certo febrifugi, et nihilominus adhuc pro suspecto habiti.

Procedamus ulterius. Non modò in rebus incertis hallucinantur aliquot saltèm medici, sed ultrò errant (donetur veritati hæc libertas, parùm fortassè cauta, quippè nimis ingenua) errant, inquam, etiam scientèr, si modò velint animadvertere, se nonnullis uti rebus, quibus vel invalidam, vel nullam inesse virtutem, pro obtinendo fine, in quem usurpantur, mille antea experimentis (quidquid in contrarium scripserint vafri quidam, vel nimium creduli) luce clarius deprehenderunt. An

gravitèr peccent, sive ob imperitiam id fiat, sive ob socordiam, palatum simul, et crumenam ægrorum, quandoquè pauperum, malè multando, videant theologi. Ego sanè remedium, quòd pro me ipso non usurparem, alteri numquàm præscribam. Non hic præcisè loquor de tot confectionibus cardiacis, de tot pretiosis medicamentis inutilibus, quibus abutuntur nonnulli fortassè corticem improbantes, ac illiusmodi medicamenta inertia cortici activo perperàm, et frustranea impensa anteponentes, quos proindè incurrere in legem *repetundarum* autumat *Badus*. Neque sermo mihi est de celeberrimo lapide Bezoartico à medicis potius ægrorum sudores frustrà expectantibus, quàm ab ægris ipsis sudores eliciente; cujus nihilominus (etsi spem millies frustraverit tam creber, tamque inanis est usus, absque eo quòd, illo etiam nil operante; quidquam metuant, qui præscripserint; sed de abusu loquor magis vulgari, minùs forsàn notato, et maximè universali.

Atque, ut cum assumptâ hactenùs comparatione procedam, nonne illi iidem medici, quibus tantum est curæ, ne tractu temporis noceat cortex, quem cæteroqui vident statim prodesse, præbent pro curandâ *v. g.* Scabie, post repetitas supervacaneas purgationes, et phlebotomias, tantum succi cicchorii crudi, quantum vix uter caperet, tantum seri lactis, quantum vix labrum, tantum pulveris ex testaceis, quantum vix admitteret bulga, licèt post longam experientiam certò didicerint, hujus-

modi remediis vix umquàm scabiem sanari, quam cæteroqui sanant. Viperata intùs, et sulphur extùs, tempore idoneo, et cum regimine adhibita? Neque tamen, ex tam copiosâ succi illius ingurgitatione, ullam metuunt cruditatem in stomacho; cùm ex adverso illud idem cichorium in acetariis, oleo, sale, et modico aceto correctum, ac conditum, à pastibus religiosè proscribant: neque ullam à tantâ seri acescibilis, aut corruptibilis illuvie læsionem, ullamve à tot pulveribus terreis, crustâ (1) quâdam ventriculum, ac intestina obducentibus, obstructionem reformidant, cùm cæteroqui sciant terrea hujusmodi ingesta chlorosim, et malum habitum inducere, præbeantque incunctantèr, licèt de non curandâ intrà annum hisce remediis scabie moralem habeant certitudinem. Non est tamen,

(1) Usus immodicus diùque prorogatus, medicaminum à *Torti* hìc relatorum gastricam sæpissimè procreat colluviem; sed quæso, an membranam mucosam *crustâ* obducendo hanc affectionem medicamina gignunt; an illa, uti causæ phænomenorum physiologicorum in ipsis membranis productorum, sint considerandæ? Hanc colluviem gastricam uti corpus alienum, æconomiæ exitiale, citòque tollendum ab antiquis et plerisque recentibus habitam esse non ignoramus; sed medicus in physiologiâ anatomeque pathologicâ versatus, hæc phenomena pro certâ viscerum irritatione habet. Celeb. *Bichat* à cryptorum mucosorum irritatione et clar. vir *Broussais* ab irritatâ ipsâ membranâ mucosâ illa pendere censent. Nos verò alterutrius opinioni, individue quidem susceptibilitati accommodandæ assentimus.

quod planè improbem enarrata remedia, quibus, defectu meliorum, utor et ipse, moderamine tamen, atque fiduciâ viribus eorum satis perspectis correspondente; sed dico, ridiculum esse, quòd illis tam fidentèr utamur, Chinâ Chinâ verò tam trepidantèr, cùm illinc irritus ut plurimùm, hinc faustus semper succedat eventus.

Dicam amplius. Nedum remediis, quorum virtus incerta est, et iis, de quibus certum est, quòd non sanant, utuntur medici, corticem tanto horrore metuentes, sed et insuper aliis, quorum noxa præsens certissima est, incertissimum verò futurum levamen. Exemplo sint cucurbitulæ, (1) remedium pro rusticis, ac bajulis ob assuetudinem, et vessicantia (2) pro capucinis ob amorem crucis, quemad-

(1) Sæculo quo vitam degebat *Torti* veterum medicinæ principum præcepta negligebantur, qui ab irritatione viscerum omnes febres pendere arbitrabant; imò *Erasistratus*, (utî apud *Celsum* reperitur) *H. Screta*, *L. Riverus*, *Baglivi*, etc., hoc perspicacissimum habebant. Non ergò mirum est quin auctor noster cucurbitulis palàm adversetur, quibus tam felici cum successu *Hyrudinum* ope suppletur, ex quo anatome pathologica harum affectionum naturam patefecit.

(2) Vesicantia in febribus continuis sunt perniciosa, etenim irritationem internæ externis irritationibus semper exasperantur; imò verò, proferre non timemus, membranas mucosas nonnumquam irritantur irritatione quâdam externâ, dùm hæc motum febrilem excitare valeat. Vesicantia tamen therapiâ non removeamus, exemplo *Torti* qui de his tam malè sentiebat, quia immodicè inopportunèque ab Italis applicabantur, con-

modum dicere consueverat, cum viveret, nostræ numquam memoriæ moriturus *Malpighius* : quorum epispasticorum acrimonia dolorifica ex cantharidibus, euphorbio, etc. præter partes externas, ad internas usque, dysuriâ teste, progreditur; et tamen de illorum juvamine res adeo controversa est, ut ab innumeris auctoribus, tum antiquis, tum recentioribus, velut absolutè, ac perpetuò noxia damnentur. Hæc, inquam, quæ sanis febrem inducere apta sunt, febricitantibus graviter decumbentibus affiguntur ab iis identidem medicis (quos tamen non ob id semper damno) qui levitè febricitantibus renuunt præscribere corticem, cujus juvamen præsens certum est; incommodum verò, quod ex febrium suppressione ominantur, somnium, et ab expertis millies nunquam deprehensum.

Hujusmodi equidem terriculamenta imaginaria circa usum corticis, facilè condonarim, *Chisletio*, *Plempio*, *Serponto*, *Magneno*, *Paravicino*, *Casato*, etc. sicuti nimiam fortè circumspectionem suam censeo condonandam *Jo. Forti*, suam, ut levissimam, cunctationem *Villisio*, suam cautelam *Malpighio*, omnemque tandem trepidationem aliis

tempto præcellenti tractatulo *Baglivi*, *De usu et abusu vesicantium*; quin etiam eorum usus prodest sæpissimè adversus chronicas quorundam viscerum inflammationes, quas mirum in modum sedant; nec non adversus membranarum serosarum thoracis, et præsertim pericardii inflammationes, præmissis quidem sanguinis missionibus necessariis.

quibuscumque magnis viris, qui vel tempore tantum primi adventus, et nascentis usus hujusce febrifugi floruerunt, vel saltem nondum plenam experimentorum illius notionem habuere. Æquum enim tunc erat novitatem remedii examinare, discutere, ac de inusitato eventu, fausto licet, non-nihil dubitare: nec ipse quidem tunc egissem aliter, donec prima paucorum experimenta longior tandem usus comprobasset. At postquam diuturna, et crebra medentum experientia, votoque unanimi recepta est, ceu utilis, ac innocens illius operatio, nec consensu minus universali rejecta est scholarum humoristarum doctrina, cui præcipuè innitebantur quotquot inventa fuere contra corticem machinamenta, nullus profecto amplius trepidationi, aut hæsitantiæ locus potest superesse, nisi larvatâ sub specie panici timoris lateat pervicacia.

Atque his positis equidem fateor, me intelligere non posse, cur China Chinæ improbetur, nisi fortè eo solum nomine improbetur, quod prosit; reliqua verò approbentur, eo quod non prosint. Memet explico. Adeo assueti sunt medici uti remediis, quorum virtus creditur potius, atque supponitur, quàm dignoscitur, ut de hoc, cujus virtutem in omni sexu, ætate, temperamento, ac climate sensibilitèr tangunt, præ admiratione metuant (quasi foret aliquid in naturâ præstigiosum) ne quid mali, vel doli subsit. Reverà qui Chinam Chinæ pro fugandis febribus intermittentibus respuunt, utuntur constantèr, etsi semper frustrà, Absyn-

thio (1), Centaurio, Chamædryo, Gentianâ, Fraxini cortice, et hujusmodi, quærentes sanationem à plantis, quæ nequeunt illam præstare, et ab eâ, quæ præstare valet, nancisci nolentes. At bone Deus! cortex Fraxini pro febrifugo proponitur ab antiquis, à quibus Peruvianus cortex proponi nequibat, utpotè nondùm notus. Cortex Peruvianus, detectus postmodùm, proponitur à neotericis. Uterque est *liber* arboris à Deo datæ; uterque dicitur febres fugare, et quidem uterque sine ullâ sensibili evacuatione. Cortex tamen Fraxini, dùm exhibetur, semper, aut ferè semper, exhibetur incassum; cortex verò Peruvianus numquàm, aut ferè numquàm. Quid? ille laudatur adhuc, et usurpatur; iste damnatur adhuc, atque rejicitur. Quænam quæso cæcitas est isthæc? forsitan si in Fraxini cortice parem medentes virtuti nostri corticis reperirent virtutem, illam paritèr haberent suspectam, adeòque fallant eos remedia necesse est, ut illis adhibeant fidem.

Si verò Chinæ Chinæ eandem denegent, quia illius assumptio, febre depulsâ, relinquat homines in recidivam pronos, præter ea, quæ superius dixi, addo fidentèr, quòd etiamsi soli Chinæ Chinæ imputare velimus recidivas, quæ à tot aliis occasionibus pendere possunt, et frequentèr pendent,

(1) His tamen substantiis mediantibus, febres intermittentes persæpè debellatæ fuerunt et præsertim vernaes quæ Chinæ Chinæ repugnaverunt.

adhuc tamen non posset eadem culpari, nisi ob imperfectam morbi judicationem, nequaquam verò ob noxam; quod equidem incommodum, quacumque aliâ etiam methodo sanentur ægri, sæpissimè solet contingere, imò etiamsi sanentur spontè, nulloque remedio prorsus adhibito. Duplici autem modo possumus his recidivis occurrere, ut aliàs tetigi, scilicèt vel eas ocyssimè iterùm curando, quoties redierint, (quemadmodùm in omnibus aliis recidivis independentè à cortice contingentibus conamur facere) vel easdem in totum, si velimus, præcavendo, quorum tamen neutrum tam facile vulgari medendi methodo valemus assequi. Apposui conditionem — *Si velimus* : tam levis enim, est sæpesæpiùs accessionum recursus, ut nonnumquam expediat febrilis fermenti reliquias ipsi effervescentiæ febrili duobus, vel tribus accessibus dissipandas relinquere, quò demùm non ritè succedente, ad artis ministerium fas est denuò confugere.

Pro curandâ itaque febre iterùm recurrente, quemadmodùm cortice non utentibus mos est iterùm atque iterùm easdem phlebotomias, et purgationes, eosdem syrupos, et pulveres, cum quibus morbus antea fuerat imperfectè judicatus, repetere, cum eventûs etiam diuturnioris incertitudine, cur non poterit eadem de causâ, præmissâ etiam, quotiescumquè redierit febris, si cui lubeat, aliquâ ventris expiatione, iterùm atque iterùm repeti oblatio corticis, usquè ad perfectam judicationem, cum certitudine et promptitudine eventûs? Sanè in

pluribus morbis, ut dysenteriâ, colicâ, nephritide, aliisque doloribus, præscribuntur remedia narcotica, eaque identidem repetuntur, ad impetrandas tantum inducias, cum certitudine recrudescentiæ fortioris, causâque morbi non modò superstitæ, sed et sæpiùs ob id ipsum contumaciore redditâ; cur ergò tutiùs non poterit adhiberi cortex in eundem, vel potiozem finem, eodem jure, quo cum discrimine in aliis morbis usurpantur narcotica?

Pro inhibendo autem etiam penitùs, priusquàm ingruat, febris recursu, in promptu est modus, isque tutissimus, facillimus, atque ut plurimum certus, repetendo scilicèt, febre statim fugatâ, et per plures postmodum dies continuando, imò, post aliquod temporis intervallum, iterum ad aliquot dies renovando lentum usum ejusdem corticis, sive magis extracti illius, juxtà præparationem, quam *Charas* instituit, per quam spoliato (si auctori sit adhibenda fides) partibus inutilibus, et febrifugarum activitatem remorantibus, aut infringentibus, remedio, adeò efficax illud redditur, ut, eo congruentè assumpto, omnis omninò recidivæ tollatur occasio; quâ de re idem, si placet, consulatur auctor. Potest ne levioze incommodo, minore impendio redimi hoc infortunium? Qui cortice non utuntur in febribus, nonne præscribunt syropos ad septimanas, et menses, ut sensim per viam alterationis, ut aiunt, morbum expugnent? Nonne passim in febre quavis periodicâ lentioze, apoze-

matris per epicrasim purgantibus per hebdomadas pariter ægrum fatigant; et sæpiùs incassum? Nonne in aliis casibus extrà febres usurpant decocta aliorum lignorum et corticum, eamdemque protrahunt ad quadraginta, et sexaginta dies, imò illa quotannis repetunt, ut in curatione luis venereæ, post plures prophylaxes iterùm atque iterùm facile reviviscentis? Cur ergò cortex Peruvianus, qui tam strenuum alterans, tamve specificum absorbens est, ut quàm citò febrile fermentum componat, ac tandèm domet, non debet aut poterit, pro totali febris eradicatione, ad aliquot dies, ut alia omnia alterantia, repetitis vicibus usurpari? Sanè *judicio nostro*, inquit egregiè *Baconus*, *opinio fuerit magis blanda, quàm vera, si quis existimet, medicamentum aliquod tam potens, aut felix fieri posse, ut usus ejus simplex curationi alicui grandiori sufficiat*, subditque paulò post: *Quæ in naturâ eximiè possunt, ac pollent, sunt ordo, prosecutio, series, et vicissitudo artificiosa*. Quâ igitur ratione cortex debet sanare perpetuò, dùm semel tantum offerretur? Anne cætera febriluga vegetabilia offeruntur semel? Offeratur ut reliqua, et sanabit longè certius, ac reliqua. Numquid id illi onus incumbit, unâ, vel alterâ oblatione tollendi febres, et inhibendi recidivas, cùm aliis remediis concessum sit per menses ægrum torquere, angere, et expectationem deludere? Discant ergò priùs corticem exhibere qui damnant; ritè experiantur, et damnent.

CAPUT III.

Princeps oppositio in *Chinæ Chinæ* usum, ex carentiâ sensibilis evacuationis post eandem assumptam petitâ, diluitur: Experimenta quædam tentata ad explorandam illius vim febrifugam exponuntur.

UNA superest tollenda difficultas plurimi habita, et obtrudi solita contrâ usum Peruvianæ corticis, in cujus objectionis examine paulisper immorari necesse est. Id autem duplici ratione, quia nempè hujusmodi objectio multa, et varia simul complectitur, et quia omnia, quæ ex illius solutione resultant, ac facere possunt pro usu innocuo *Chinæ Chinæ*, generalitèr loquendo, multò magis facere poterunt pro eodem, loquendo in particulari, nempè in casibus, in quibus nullam aliud asylum suppetit, quod est intentum meum, in cujus gratiam cuncta, quæ dicta sunt, et plura, quæ mox dicentur, placet præmittere.

Opponitur itaque, quòd ab assumpto cortice nulla sequatur sensibilis evacuatio, adeòque causa febris, illiusve fermentum figatur, et intùs detineatur pro recidivâ, vel alio pejore morbo indè imminente.

Vulgatissima hæc oppositio gratis supponens ab usu *Chinæ Chinæ* intùs coercitas jugulatarum intermittentium causas, æquè gratis supponit, eas pro curatione semper indicare evacuationem, non verò solam absorptionem, aut correctionem sui.

Fundatur insuper illa in absonâ satis illatione, quandoquidem ab incertissimis febrium causis (de quibus nil certius habemus, quàm quòd sunt incertæ) ad impugnandam certissimam corticis operationem procedit: oppositis enim planè gressibus est incedendum, ab infaillibili videlicèt, ac uniformi ejusdem actione, in varias febrium species sine manifestis evacuationibus exercitâ, ad rimandam occultam, et molissæpiùs inconspicuæ, earumdem causam, semper æqualitèr expugnatam; ne scilicèt ab ignoto ad confundendum notum, sed ut à noto ad detegendum ignotum ordinatâ methodo convertamur. Hanc methodum philosophandi, in hac speciatim re, discere nos non pudeat à celeb. *Jo. Alphonso Borello* Mathèseos professore, qui de febris, et de fermenti, seu causæ febrilis extinctione verba faciens, et ab hoc opere sensibiliores evacuationes excludens, suum assertum ex actione Peruviani corticis confirmat his verbis: — *Hinc deduci posse videtur quòd febres numquàm, aut rarò curari queunt ob copiosas humorum purgationes, et ejectiones, cùm fermentum exiguæ molis esse soleat; quòd evincitur ex curatione febrium cum rigore advenientium à cortice febrifugâ, ab Indiâ nuper advectâ, quæ absque ullâ ejectione, aut per alvum, aut per sudores, vel per urinas, febrem tollit.*

Non tamen universalitèr certum est quod *Borellus* primis hujusce remedii temporibus facillè concessit, et quod nimium supponitur ab opponentibus, nempe quòd nulla unquàm post epotam Chinam Chinæ sequatur

sequatur evacuatio sensibilis , cùm nonnunquàm aliquæ per sudores , per urinas , et per secessum observentur , ut indicabo in historiis , insignes evacuationes , licèt (quod ingenuè fateor) ut plurimùm non succedant. Sed si non succedunt insignes , nonne adsunt evacuationes consuetæ , post debellatas per corticem febres insignitèr mutatae , quæ possunt sufficere ? Nonne alvi fæces sunt manifestâ corticis tincturâ infectæ ? Nonne urina semper copiosior nonnihil redditur , croceo ut plurimùm , vel alio quovis morbo color in citrinum converso , et crassâ , vel tenui consistentiâ in mediocrem , cum signis coctionis , statim mutatâ ? Numquid sub istis solis evacuationibus , etsi consuetis , latere non poterit fermentum febrile , vel portio saltèm illius activior à cortice absorpta , vel quomodolibet secreta , ac inde cum reliquis quotidie excernilibus more solito foràs detrusa ? De evacuatione , seu dissipatione insensibili , quæ haud improbabilitèr cum cl. *d'Acquin* et aliis , posset in medium afferri , ne verbum quidem hîc facio , ne videar latibula quærere , ac diverticula. Istam tamen non adesse , vix ullus impugnator probare posset.

Sed demus , quòd uti sæpè non adest sensibilis copiosa , ità nunquàm adsit ulla , vel sensibilis , vel insensibilis evacuatio. Demus insuper , quòd causa febrium debilitata tantummodò , non debellata intùs remaneat , sitque veluti portio fermenti restitans quasi sopita , ut iterùm reviviscat. Quid tum ? Anne semina peponum asservata gignent cu-

curbitas? (1) Sic et semina tertianæ, vel quartanæ residua, si per incuriam, dimisso curationis progressu, sibi sinantur, ad summum tertianam iterum, vel quartanam reproducent. Neque enim, si res examinetur, quicquam deterius succedere consuevisse demonstrant ipsæ, quæ nonnunquam subsequi solent, recidivæ consimiles, ut hydropes, cachexias, apoplexias, et mille alia infortunia, post seculum adventura, inde præsagiant, reclamante licèt quotidianâ experientiâ, nonnulli vaniloqui.

Vaniloquos appello hujusmodi homines, qui hæc, et similia effutiunt de cortice, tamquàm de re ab intrinseco noxiâ, nec nisi pravos effectus postquàm febriles paroxysmos inhibuit, producere aptâ. Non tamen ideò planè negaverim, ex illius quoque (non secùs ac ex cujusvis alterius selecti medicaminis, cibive ipsius) incongruâ, aut intempestivâ oblatione, inopportunâque inde secuta febrium suppressione, suboriri forsitàn nonnunquam posse quidpiam incommodi, ut *Cap. 8 et 10 hujusce libri, et Cap. 5, lib. 4*, seriò perpendemus. Neque enim semper hoc remedio, quantumvis egregio, indiscriminatim, et absque methodo, seu cæcâ quâdam libidine febres illicò quomodolibet supprimendi; quovis earum tempore, et in quâvis circumstantiâ forsitàn uti licet: sed tantummodò ad certas leges, et regulas toto hoc tractatu in hunc finem descriptas.

(1) Faceta comparatio seminum peponum cum seminibus tertianæ febris vel quartanæ residuis!

extrà quas, si illud prorsùs empiricè præscriptum, videlicèt præter tempus, et ordinem sibi debitum, optàto et bono careat successu, id illi minimè vitio vertendum, sed inconsultæ, aut intempestivæ oblationi, ut suis locis peculiaritèr adnotabimus.

Cæterùm, ut redeamus in viam, per hoc etiam quòd depulsà tempore idoneo per usum corticis febre, aliquod forsàn illius semen intùs remaneat, nil aliud tandem probatur, etsi totum, quòd opponitur, concedatur, nisi quòd, vel antè oblationem corticis debeat priùs corpus exactè purgari, quòd fidentibus purgationi permittitur, vel ad summum, quòd à cortice semel tantùm exhibito, nec satìs priùs purgato corpore, immineat ejusdem morbi recidiva, quod nequaquàm negatur. Hæc ipsa verò quàm levis in tali casu regularitèr esse soleat, et suâ radice mitior, quàm citò iterùm curari valeat, impetratis interim languenti robori induciis, quàm facilè deniquè possit etiam penitùs præcaveri, et portio reliqua fermenti febrilis, seu causæ morbificæ radicitùs averruncari, jam satìs, ut reor, præcedenti capite demonstravimus.

Quoniàm verò de causâ istâ febrium intermittentium eliminandâ tanta est anxietas, liceat de eâdem, quæcumque illa sit (de quo fusiùs infrà) generalitèr quærere, an sermo sit de causâ, ut aiunt, conjunctâ, quæ scilicèt paroxysmum præsentem actu producit, an de antecedente, quæ futuros est productura, et, vel secundùm paucos universæ massæ sanguineæ intimè confusa est, vel secundùm plu-

res alicubi latet in corpore veluti in suâ sodinâ, ut statis periodis affundatur sanguini, illumque in motum effervescentiæ febrilis ad tempus cieat, ut ab eo postmodum mediâ tali effervescentiâ illum despumante segregetur, et hâc ipsâ arte foràs per consequens eliminetur. Si itaque de causâ conjunctâ protrudendâ sit sermo, cùm accessio quælibet sit particularis judicatio, cui regularitèr sponte naturæ subsequitur particularis aliqua, sive insensibilis, sive sensibilis evacuatio, aut crisis, per sudores ut plurimum vel per urinas, (undè paroxysmus actu solvitur) non est cur à Chinâ Chinâ id optemus, quòd jam nobis naturâ ipsâ fermentationis, aut ebullitionis ministerio spontè largitur. Si verò loquamur de causâ antecedente, cùm ista, ut verbo antiquorum utar, nec sit, nec possit esse in suo foco concocta, (sive dicatur minùs probabiliter in sanguine dispersa, illique citrà tumultum confusa, sive probabiliùs in alio loco distincto congesta, conclusa, nec adhuc excarcerationi, aut excretioni matura) cùm, inquam, non sit concocta intrâ quamcumque, ut aiunt, mineram, nec queat concoqui, usquequò non subjacet fermentationi sanguinis; itèr cùm non lædat, nisi quatenùs cum illo ebullit, aut effervescit, nec, nisi quatenùs ebullit, aut effervescit, queat segregari, hinc est, quòd nulla utilis exigi possit citrà fermentationem, aut effervescentiam febrilem ejusdem evacuatio.

Porro ea ipsa medicamenta arte parata, evacuantia per secessum, per vomitum, aut etiàm per

sudores, quæ, perperam licèt, febrifugi nomine solent audire, paulò antè paroxysmum exhibita, si plùs expellant, quàm sit pro illo paroxysmo congestum, atque excretioni jam sponte dispositum, tantùm abest, ut prosint, quin potiùs absolutè nocent, et morbum augeant (sintque hodiè idcirco ferè obsoleta) agitando videlicèt, confundendo, irritando ac perturbando quod quiescens adhùc et inconspicuum, ut verbo *Hippocratis* utar, nondùm lædebat. Id ipsum, quòd à medicamentis materiæ incoctæ vim inferentibus dictum est fieri, quotidie paritèr observamus (quæ nobis est regula infallibilis à naturâ constituta, ne crudos adhùc succos exagitemus) in spontaneis illis excretionibus, quæ per vomitum, et per secessum in accessionum principio, et per sudorem, vel per urinam in fine, copiâ nonnihil exuberante contingunt. Ab illis namque profusis evacuationibus, non modò in principio, sed in ipso etiam paroxysmorum fine subortis, nonnisi longos morbos, aut difficulter solubiles, omnes quotquot sunt practici experientiâ ducti ominantur.

Cum ergò qui febres intermittentes curare aggredditur, nil aliud possit intendere, nisi submovere paroxysmos, et ad coctionem, (verbo iterùm usitato sit venia) causam perducere; et cùm postremum istud per viam evacuationis, ut notum est, nequeat obtineri, reliquum est tantummodò, ut, sublatis per Chinam Chinæ accessionibus, ipsa demùm antecedens causa, quæcumque sit, ad intes-

tinam secretionem, et inde secuturam spontaneam excretionem paulatim disponatur, per viam alterationis, in ipsâ quoque minerâ, ut aiunt, vel loco suo, ne lædat, cum sanguini advenerit; quod ab eâdem Chinâ Chinâ diutius usurpata hæud infirmè præstari, dummodò congrua servetur proportio inter vim, aut copiam peccantis materiæ et remedii dosim, cuilibet in hâc palæstrâ, vel mediocritèr exercitato quotidie fit obvium.

Si ergò febrifugum, sive alexipyretum istud de genere alterantium est, vel, si mavis, medicamento-
rum agentium, ut aiebant antiqui, à totâ substantiâ, et ex specificâ proprietate, cur ab eo quærimus evacuationem, quam à nullo alio quærimus aut quærere possumus alterante, à nullo alio specifico, à nullo deniquè alio simplici febrifugo etiâ imper-
fectiùs agente? Quid, quæso, evacuant celeberrima illa febrifuga unanimi tot sæculorum consensu ex classe vegetabilium petita, et aliàs memorata, Centaurium nempè, Imperatoria, Camædrys, Pentaphyllus, Gentiana etc. quid earumdem plantarum sales, quid Theriaca antè accessiones exhibita, quid cor leporis comestum, quid animalcula de collo suspensa, quid tot alia carpis apposita, à quibus nihilominus citrà ullam evacuationem subita paroxysmorum fascinatio, fustrâ licèt, speratur? Cûr igitur uni cortici Peruvianæ imputatur febrilium accessionum supressio cum nullâ sensibili evacuatione conjunctâ, quandò cætera quoque febrifuga non modò solventia non sunt, aut ullo pacto sen-

sibilitèr vacuantia, sed maximâ etiâ ex parte adstrictoria, et stiptica, ut vidimus?

Minus inverisimilitèr forsitan nonnulli, censes cum *Frider. Hoffmanno* fieri à Chinâ Chinâ præcipationem quamdam materiæ febrilis, objiciunt postea carentiam successivæ evacuationis illius: qui equidem operandi modus, scilicèt per præcipationem, ab ipsis antiquis fuit tributus febrifugis quoque suis specificis, inter quæ numerabatur *pulvis è cochlearum testis à Crollio* descriptus, *è conchis margaritifera, seu matre perlarum calcinatâ, ex oculis cancrorum etc.* Quæ medicamenta præcipatione quâdam vim illam effervescendi, et paroxysmum excitandi ab humoribus tollere posse (ut *cerevisiæ acscenti cretâ injectâ adimitur aciditas*) vel ipse explicare conatus est verbis modò relatis suo tempore, *Daniel Sennertus*, quem nec latuit, *effervescencia acidi, et alcali, nec fermenti febrilis* nomenclatura.

Sed neque ista fortassè præcipitatio (quæ physicè explicata, ut absorptioni succedanea, contemnenda non est) neque, inquam, ipsa inducit necessitatem insignis atque conspicuæ evacuationis. Etenim, si hujusmodi præcipitatio supponatur fieri intrâ sanguinem, ea non poterit attingere materiam antecedentem, quæ probabiliter nondum sanguini confusa est, nec cum eo effervescit, sed solummodò illam portiunculam, quæ eidem pro uno tantùm paroxysmo est mixta, siquidem partis tantùm vicibus censenda est fieri hæc qualiscumque affusio

novi fermenti, et sic non alia requiritur evacuatio, præter illam ordinariam, quam accessio quælibet, dùm solvitur, secum ferre solet, et quæ reverà contingit. Si verò talis præcipitatio, ad hoc ut tollere possit materiam plurium paroxysmorum qui per Chinam Chinæ inhibentur, supponatur contingere in ipsâ (ut vocant) minerâ, seu foco extrâ sanguinem, quatenùs materia febrilis ibidem velut congesta, ob immediatum remedii illuc pertinentis contactum, cum eodem remedio effervescat, inde uniatur, ac postmodùm præcipitetur, quando-cumque etiam hoc fieret, quod non absolutè negatur, id ipsum absque aliâ tunc factâ sensibili evacuatione, saltèm suprâ consuetas (intrâ quas, ut vidimus, latere potest hostis depulsus) id ipsum, inquam, planè sufficeret. Neque enim quidquam ampliùs ab arte, vel à naturâ extorquemus per viam alterationis atque coctionis in succis febriliter effervescentibus, (imò et in non effervescentibus, ut in acido venereo per usitatas decoctiones absorpto, et successivè præcipitato) dùm defæcationem eorum promovemus, mediâ secretionem particularum subsidentium, et præcipitatarum, quæ respectu totius fluidi sunt molis admodùm exiguæ, illarum postea excretionem seriùs nonnihil, sed tutiùs à naturâ, expectantes, quàm arte tentantes, sæpesæpiùs quo natura ipsa vergat incerti. Quod idem prorsùs faciendum est, curatis per Chinam Chinæ febribus, ne materia febrilis (si ità etiam lubeat) præcipitata, nec adhuc excreta, intempestivè iterùm commota exal-

tetur potius, quàm educatur, ut luculentè testatur experientiâ.

Multò minùs (ut et hoc obiter tangam) assentiri possum censentibus, quòd eadem China China febrilem causam, in totâ suâ latitudine sumptam, præcisè figendo, succos nempe effervescentes unà cum Fermento febrili, ipsumque simul cruorem constipando, vel ex opposito eosdem nimium strictos, aut ad stagnandum dispositos præcisè rarefaciendo, vel dilatando suum munus absolvat, in quo nobiscum quoque sentit *Villisius* clarè inquiens : *annotetur, quòd hoc remedium, non quemadmodum vulgaria febrifuga sanguinem figendo, aut etiam fundendo, accessiones febriles sistit.* Nam, præterquàm quod non est cur China China dicatur causam febris potius figere, quàm solvere cum *Conygio*, vel eamdem retuntendo tantum, aut aliter subigendo, enervare, ac tandem devincere, malè insuper infertur ex eo, quòd illa fermentum febrile absorbeat aut præcipitet, et hoc nomine, si sic lubeat, etiam figat (quod in hoc sensu est totum id, quod exquiritur ab arte) malè, inquam, infertur, quòd alios etiàm figat, aut vitiosè constipet humores, ipsumque cruorem, qui ejusdem extranei fermenti accidentale et insons subjectum est. Novi etenim per experientiam, quòd, si uni febricitanti pulsus sit magnus et plurimum elatus, ac effervescencia febrilis æqualitèr expansa, cum vaporoso undiquè calore, alteri verò sit parvus atque omninò depressus in ipso etiam febris vigore, quæ proinde se-

pultam habeat effervescentiam, et calorem absconditum, utrique nihilominus propinata China China pulsum in naturalem mediocritatem, fugatâ æqualitèr febre, illicò restituit (1), illi quidem arteriam nimis elatam veluti deprimendo, ac fluidum contentum constipando; isti verò illam nimis depressam elevando, contentumque cruorem veluti rarefaciendo: ut sileam, quòd illa tam febres (uti videbimus suo loco) quæ sunt de genere colliquativo, quàm quæ sunt de genere coagulativo, indiscriminatim sanat. Qui duo effectus oppositi nequeunt directè præstari ab unâ, et eâdem Chinâ Chinæ uniformitèr agente, nisi quatenus illa absorbendo causam febrilem, quæ pro diversâ fluidorum dispositione, modò unum, modò alterum effectum producit, eosdem paritèr, licèt oppositos, indirectè et alternatim producit effectus.

Hinc est, quòd illa nihil intrà corpus nostrum sensibilitèr innovando, præter expulsionem febris ejusque symptomatum, sicuti nullas sensibiles excitare solet, ità nec ullas soleat cohibere evacuationes *criticas* inchoatas, sive per secessum illæ sint, sive per aliam quamlibet viam: supprimat verò

(1) In duobus hisce adeò oppositis casibus, non nobis videtur corticem hoc simili modo agere ut autumat *Torti*, nisi vis pulsûs differentia, in duobus his suppositis ægris, vigente tantum paroxysmo, manifesta sit; pulsûs enim in apyrexia quidem, vi elevationeque persistente, irritatio cujuscunque visceris quam verisimilitèr corticis exhibitio non sedaret, certò testatur.

symptomaticas tantum, et à febris demum sublati anteà pendentes, supprimatque præcisè per hoc, quòd febrem illarum productricem deleat, non quia illas vi quãdam adstrictoriã cohibeat. Ob id gravidis non modò, sed et puerperis, vel menstruas purgationes patientibus tutò exhibetur; neque tamen menstrua, vel lochia naturalitèr fluentia sistit, aut nimium promovet, ut videbimus in historiis. — Quo pacto ergò, inquit Mortonus, pharmacum, quod in puerperio salubritèr ministratur inter obstruentia numerari potest? Veteres isti philosophastri, qui ætiologiam omnium morborum ex humoribus et manifestis qualitatibus petendam esse duxerunt, ubi sine aliquã evacuatione sensibili, febriles fermentationes illicò à justâ dosi corticis exhibitâ, sopitas viderunt, inde experienciã reclamante, et rei ipsius naturâ: nescio quam omnipotentem constringendi, et obstruendi, facultatem pharmaco inesse commenti sunt. At sanè cortex febriles fermentationes neque facultate obstruente, neque deobstruente sistit, verum vi suâ alexipharmacâ, quâ eximie præpollet. Quocircà non est, quòd quisquam hisce terculamentis, insomniis, et deliramentis philosophicis ab usu polychresti hujus pharmaci terreatur.

Quoniã verò hæc suspicio, aut opinio, quòd China China suum munus cohibendi febres exerceat per hoc, quòd figat illarum causam, admodum communis est in ore medicorum quorundam, non secus ac in ore vulgi, ut proptereà hinc recidi-

vas graviores, et mille mala ominentur, lubet idcirco opinionem istam nonnihil examinare, et (se-motis etiam plurium auctorum tali sententiæ ex diametro oppositorum validis rationibus, quas referre supersedeo) illam blandiusculè excipere in bono sensu, non in eo videlicet, in quo intelligitur ab opponentibus, sed in eo in quo congruentèr potest intelligi, et in quo verosimilitèr puto eam esse veram, et admittendam, utpotè effectus Chinæ Chinæ satis naturalitèr explicantem.

Recolligendo itaque hìc, quæ sparsim dicta et dicenda sunt, extrà dubium est, Chinam Chinam non agere in fluida, ut ea in universum figat, neque hoc ab ullo asseri posse; sed ad summum, quòd figat causam febrilem fluida ipsa perturbantem, et effervescere facientem. Non figi sanguinem, aliosque succos utiles, ostendit perfectio actionum naturalium, vitalium ac animalium statim à febre depulsâ ope corticis. Ostendit idem, ut modò dicebam, criticarum evacuationum cujuscumque generis inchoatarum continuatus progressus à Chinâ Chinâ assumptâ pulsus solutus ac liber, cùm priùs depressus esset atque conclusus, evanescencia fixationum ipsarum, seu tumorum lienis, aut hepatis à febribus productorum et mille alia, quæ circulationem perfectam, et inculpatam fluiditatem succorum evidentèr patefaciunt, non modò conservatam assumpto cortice, si antecedentèr adfuit, verùm et restitutam, si defuit.

Ad solam itaque causam, seu materiam febrilem,

humores nostros, antè mixtionem talis materiæ cæteroqui benè se habentes, agitantem, perturbantem et effervescere facientem, tota contrahitur decantata fixatio. Sed ecquis certò novit materiam illam, quæ fermenti febrilis nomen sortitur, non esse aliquid in sanguine, vel alio quolibet succo nimis exaltatum, aut à vinculo mixtionis solutum, quod figi idcirco debeat, ac deprimi? Hoc sanè à probabilitate non multum abludit. Verum, quoniam ignota natura talis fermenti, nequit circa hoc quidquam præcisè determinari, fas sit pro nunc indeterminatè tantum, sed simul valdè verosimiliter sic ratiocinari.

Hæc causa febrilis nobis incognita, ubicumquè delitescat, et quantacumquè sit, non erit, saltè ut plurimum, molis, aut quantitatis insignis, imò, sepositis jam, atque exhibitis humoribus imaginariis antiquorum, fas est credere cum doctissimo *Borello*, quòd sit succus vel humor quidam molis sæpius exiguæ, quem fortassè coclear unum caperet, per intervalla sanguini affusus, illumque in motum febrilem concitare aptus. Qui enim quandoquè exeunt copiosè per vomitum aut per secessum, humores, præsertim in tertianarum principio, non sunt veræ febrium, causæ illis enim exeuntibus, febris solveretur, vel saltè miteretur, cùm tamen contrà potius augeatur ac exacerbetur; sed sunt effectus causæ febrilis, molis, ut aiebam, exiguæ, ut ut tumultum illum, et immaturas excretiones inducentis. Certè quicumque perfectè sanus, et bonis humoribus

scatens comedat ova piscis barbi, vel fungos noxios, vel emeticum vehemens, aut catharticum, paulò post copiosissimos per vomitum, et per secessum, effundet humores. An propterea exigua non fuit moles causæ suscitantis tantam evacuationem humorum minimè peccantium, sed à violentâ irritatione expressorum, et ab assumpto tantum pravo cibo, vel pharmaco corruptorum? Ad vitiandam magnam molem fluidi sani, sufficit immixta exigua moles fluidi vitiosi. Una vini mucidi, acidi, aut inclinantis pinta potis est inficere, aut currumpere dolium integrum vini meraci. Portiuncula spiritûs vitrioli injecta in phialam olei therebinthinæ totum liquorem effervesce facit. Cur et totum sanguinem non poterit inficere, ac in effervescentiam ciere immixtus illi paucus liquor febrilis? (1)

Hoc rationabiliter posito, supponamus hujusmodi succum febrilem (quem præ activitate magnâ in parvitate molis nomine fermenti donârunt auctores) à Chinâ Chinâ verè defigi, sed simul examinemus quo pacto verè defigi possit. Non profectò per veram narcosim, ut vidimus, ut patet experientiâ, et ut patere cuique potest ratione. Non ergò aliâ viâ, nisi per modum illaqueationis et vin-

(1) Hæc *Torti* ratiocinia ad Chinæ Chinæ præ cæteris corticibus præeminentiam probandam instituta, nihil probant; nostris quidem temporibus, quamvis chemia ad naturam substantiarum naturalium investigandam auxilia nobis suppeditetur, nihil tamen aliud scimus de *Chinæ Chinæ* præeminentiæ causâ, quàm quod experientia docet.

culi, seu per coalitum et coaptationem particularum fermenti cum particulis febrifugi, hoc est per ingressum illarum intrà poros istius, eo pacto, quo acida alchalinorum prositates subeunt, ut *Lemeryo* placet : uno verbo, per absorptionem fermenti factam à cortice illud *combibente*, *absorbente*, atque hoc pacto à reliquis humoribus, quos inquinabat, vel inquinaturus erat, *separante*, et in hoc tantummodò sensu, si loqui sic lubeat, *figente*.

Sed hoc est unicè quod quæritur à medico, hæc est intentio primaria, quam adimplere studemus cæteris omnibus febrifugis specificis in curatione febrium intermittentium, omnibus alexipharmacis in curatione malignarum, omnibus antidotis in correctione venenorum, omnibus chalybeatis in refectione succorum stagnantium, omnibus antivenereis, antiepilepticis et antiscorbuticis in medelâ talium affectionum, omnibus deniquè generalitèr alchalicis in absorptione quorumvis acidorum. Istiusmodi ergò fixatio, seu potius separatio, et specifica castigatio febrilis fermenti tantùm abest, ut prava sit, quin potius sit omne id, quod ab arte potest exquiri, ut notum est, pro curatione ipsarum febrium. Et sicuti in morbis antedictis non sumus solliciti de successivâ evacuatione causæ peccantis absorptæ, molisque paritèr perexiguæ, sed illam committimus naturæ, eamdem causam sic absorptam, vel perfectè subigenti, vel per consuetas ut plurimùm excretiones, sive sensibilitèr, sive insensibilitèr evacuanti, ità paritèr non est cur

major sit in casu depulsarum febrium nostra sollicitudo, maximè cùm quotidie videamus febres gravissimas, et periculosissimas spontè sine ullâ sensibili evacuatione per viam coctionis, ut aiunt, ab ipsâ naturâ integrè ac perfectè sanatas.

Et sicuti etiam quandoquè contingit in prædictis morbis, ut tractu temporis illorum causa, etsi antecedentè absorpta, per accidens reviviscat, vel quòd vitio viscerum, aut fluidorum universali iterum regeneretur, sicque chlorosis, scorbutus, lues celtica et hujusmodi sæpiùs repullulescant, quo fit, ut eodem chalybe, cochleariâ, guajaco, etc. rursus curentur, absque eo quòd istis medicamentis imputetur vitium de *fixatâ nec evacuatâ* causâ illorum productrice, deque inde secuturis recidivis, aliisve morbis deterioribus: ità etiamsi fermentum febrile semel absorptum aliquandò reviviscat, ac veluti à cortice illaqueante iterum dissocietur ac sejungatur, vitio vel naturæ diutiùs illud foventis, nec promptè subigentis, aut expellentis, vel alimenterum fermentescibilium ingestorum, vel aeris, vel tempestatis etc. quæ omnia illud rursus exaltare valent, (ut ope solius aeris vim emeticam iterum resumit stibium diaphoreticum) aut si vitio viscerum, fluidorumque universali idem fermentum denudò reproducatur, non propterea culpandus est cortex de *fixatâ*, ac veluti in visceribus sequestro positâ, sine ullâ retusione, causâ febrili, vel de eâdem insimul *non evacuatâ*, vel de cruore *constipato* paritèr atque *fixato*, ut perperam intelligunt

gunt, blaterantque nonnulli opposcentes. Atque hic, meo iudicio, est probabilior modus agendi Peruvianæ corticis, seu generalior, ac crassior, congruentior tamen illius explicatio. Non enim suppetit animus perscrutandi penitus modum planè admirabilem, quo præcisè febrifugum istud agit in fluida, vel in reconditas febrium intermittentium causas, cùm me imparem agnoscam intimæ explicationi sensibiliore, qualem nostri seculi eruditio, et solida ejusdem non verbalis, philosophandi consuetudo exigeret.

Haud inficior, me aliquandò tentasse experimentum aliquod, vi cujus possem Chinæ Chinæ actionem in varia fluida à longè saltè subolfacere, sed incassum; neque enim quicquam suprà id, quod retuli, licuit deducere. Dicam tamen quod contigit. Illam superinjeci diversis liquoribus, modò sejunctis, modò conjunctis, putà succis limonum, ac aurantium, aceto, aquæ, tùm dulci, tùm salsæ, oleo, bili bovinæ, lymphæ caninæ; urinæ humanæ, salivæ, etc. Parùm autem, ac ferè nihil alterari ab immixto cortice talium liquorum sapes dignovère, qui gustaverunt, nisi quantum adjuncta illius amarities, atque stypticitas ferebat, perindè ac quodlibet aliud amarum, et stypticum, minimè tamen febrifugum, iisdem confusum, tulisset. Paritèr sapor corticis, postquam liquores illos absorpsit, iterùm exsiccati non magis alteratus est, quàm par fuerit, habito ad liquorum absorptorum sapes adjunctos respectu; quod cuilibet similiter

amaro, et styptico non febrifugo illis immixto contigisset.

Sed quia non satis actum videbatur, explorando quid ageret cortex immixtus fluidis brutorum animalium, quæ febribus intermittentibus non videntur obnoxia, ut homines (fortassè ob maximam victûs illorum diversitatem, quæ maximam quoque diversitatem succorum procul dubio producit) placuit idcò eamdem corticis commixtionem instituere cum aliquot succis humanis præter jam dictos et præcipuè cum sanguine, ac bile. Quoad primùm, videlicèt sanguinem, nihil animadversione, dignum datum fuit intueri, neque verum id reperire, quod ab aliquibus traditur, Chinam Chinam nempè sanguini recentè educto commixtam, illius coagulationem impedire. Haud diffiteor, quòd diviso intrà quatuor vitrea vasa *sani* hominis sanguine per unam phlebotomiam extracto, tardiusculè concrevit portio, cui cortex peruvianus inerat, quàm duæ portiones, quibus ille non inerat; sed hoc ipsum procedere à ruptione fibrarum factâ per agitationem sanguinis, requisitam ad commixtionem illius cum cortice, nec non ab ipsâ pulvereâ materiâ (idem enim præstitisset alius quivis pulvis injectus) quæ fibrarum earumdem distractionem, propter sui intermixturem producit, me satis certum reddidit idem phenomenon, quod in aliâ portione sanguinis æquè observavi, in quâ videlicèt Mali arboris corticem pulveratum immiseram, quæque tardiùs etiàm concrevit, et concreta flaccidior apparuit ac

portio, quæ Chinam Chinam admiserat. Ob id etiã tenaciùs adhærebant parietibus vasorum portiones sanguinis impermixti, quàm portiones utroque pulvere scatentes.

Quoàd secundum verò, nempè quoàd bilem humanam, idem quodammodò mihi sum visus observasse, ac in bubulâ, hoc uno excepto, quòd absorptio bilis humanæ cysticæ, nequaquàm morbosæ, instituta per infusionem corticis, et descensus istius intrâ eam, longè lentior, et observatu difficilior apparuit, ac intrâ bubulam, quia longè crassior, opacior, ac densior est bilis humana cystica (saltèm quæ fuit ad manus, et quam aliàs etiã licuit inspicere) quàm bubula paritèr cystica. Quod igitur observabilius mihi visum est in cortice respectivè ad bilem bovinam (humanâ pro nunc sepositâ) et respectu habito ad alios liquores eâdem bile tenuiores, fuit modus, quo inæqualitèr diversos liquores istos absorbebat ipse cortex in pulverem redactus. Cùm enim ille acida omnia, itèm aquam, et dulcem, et salitam, urinam etc. ægrè admodùm absorberet, bilem tamen celeritèr combibebat, adeò ut in reliquis illis liquoribus bile minùs crassis, minùsque ponderosis, siquidem bilis eadem illis immixta subsidebat, pulvis Chinæ Chinæ, ut mos est, diù innataret, cùm in bile crassiore, atque graviore mergeretur, ac fundum peteret, celeritate non multùm absimili, licèt non tantâ, ac subsidebat in oleo omnibus illis fluidis longè levioire. Eadem verò China China imposita bili cum aceto mixtæ, imò etiam

mixtæ cum aceto simul et salivâ (quæ duo fluida à bile sejuncta ægrè combibebantur à cortice) visa est celerius adhuc, vel saltèm æqualitèr mixturam illam absorbere ac solitariam bilem. Sed istæ qualescumque observatiunculæ vix aliquid effatu dignum suggerunt, pro explicatione etiàm remotâ, operationis admirandæ Peruviani corticis in febrium causas, tùm quia idem spectaculum modò parùm ab- simili, licèt non planè eodem, observabatur in corticibus pulveratis aliarum plurium arborum, et fruticum, aquæ, aceto etc. diù innatantibus, in bile verò celeritèr subsidentibus (levi tantùm inter illorum, et Chinæ Chinæ descensum intercedente discrimine) tùm quia parùm refert observare quid China China operetur intrà bilem qualemcumque, cùm nos lateat quinam sit, vel esse possit ad causam intermittentium constituendam bilis concursus. Interim tentamen meum, etsi irritum, fas sit curiosioribus retulisse.

Si quid autem ex his licet arguere, illud est fortassis, quòd China China (et ad illius normam aliarum proportionalitèr arborum cortices) intrà suas porositates faciliùs admittat minimas humoris biliosi particulas, illasque promptiùs combibat et absorbeat, quàm particulas minimas aquæ, aceti etc. quod constare videtur ex faciliiori illius intrà bilem ponderosiorèm atque crassiorem descensu, quàm intrà aquam minùs ponderosam bile, minùsque crassam. Suppono etenim, seu potiùs ex re ipsâ deduco, nudam corticis, ut et aliorum lignorum materiam,

semotis omnibus interclasis porositatibus, esse specificè graviolem tùm aquâ, tùm bile suis adhuc poris, si quos habet, scatente, omnemque intrâ eadem fluida innatandi vim, quam suapte naturâ habent omnia ferè ligna (quæ proindè specificam gravitatem, talium fluidorum gravitate minorem, datâ scilicèt paritate molis, habere dicuntur) procedere ex multitudine atque amplitudine eorundem pororum intrâ ipsa ligna copiosissimè latitantium; sive hujusmodi poros vacuos dicamus, sive aere aliâque subtiliore materiâ repletos, quod parum refert: adeòque quò laxior est lignorum compages, illa eò faciliùs emergunt, difficiliùs verò, quò strictiorem habent texturam, ut in Ilice aliisque lignis densioribus observare est, si mergantur, fundum petentibus. Hoc supposito, dicendum est, quòd Chinæ Chinæ pulvis porosus impositus tùm bili, tùm aquæ, in utroque liquore ideò sensim mergatur, et fundum petat, inquantum intrâ illius porositates tantùm bilis, et tantùm aquæ subintrat (præstante id potissimùm circumambientis aeris pressione) quantum sufficit ad tollendam levitatem, non quidem absolutam, quam nulla obtinent corpora, sed respectivam, quam scilicèt nudis ejusdem Chinæ Chinæ particulis adjungebant interspersa spatiola, sive inania, sive aere tantùm referta, aliâve quâvis materiâ levioze, tùm bile, tùm aquâ subingredientibus. Et licèt gravitas adjuncta particularum subintrantium non sit major gravitate specificâ suorum liquorum, quibus imposita est China China, sed æqualis:

cùm tamen sit major gravitate materiæ intrâ corticis poros præexistentis, et ab iisdem exclusæ, adeòque juncta nudæ corticis materiæ, quæ aquâ et bile gravior est, componat novam gravitatem, mole nequaquàm adauctâ; majorem specificâ gravitate subsectorum fluidorum, hinc est, quòd in utroque liquore China China descendit atque submergitur, ut in aquâ mergitur navis per ingressum ipsius aquæ intrâ cavitatem illius. Cùm itaque faciliùs, atque celerius id fiat in bile, licèt graviore, ac fiat in aquâ, licèt minus gravi, concludendum est omninò, quòd faciliùs, et citius absorbeatur à cortice bilis, quàm aqua, adeòque quòd pori corticis habeant figuram magis dispositam, et aptam ad suscipiendas minimas bilis, quàm aquæ particulas.

Quænam verò individualitèr sit ista proportio, quam habent particulæ bilem constituentes, magis ac habeant particulæ componentes aquam, acetum etc. cum poris Peruviano cortici inexistentibus, arduum est definire, ignotâ nobis genuinâ talium particularum, ut et pororum hujusmodi particulas admittentium, figurâ. Præscindendo tamen ab hâc specificâ determinatione, videtur ista major facilitas posse refundi in illam, quam bilis (præsertim bubula, in quâ experimentum clariùs emicuit) manifestè præsefert unguinosæ oleositatis speciem, quæ analogam quodammodò bilis et olei structuram videtur indicare, licèt olei et bilis tam diversum sit pondus, ut olim mihi hæc, et similia curiosè inquirenti, non injucundum spectaculum

licuerit observare. Immissis intrâ vitreum tubum æquis circitèr portionibus primò bilis humanæ crassioris, densioris, fuscoque, ut dictum est, colòre, præditæ; secundò bilis bovinæ longè minùs crassæ, minùsquæ fuscæ; tertiò aquæ; quartò tandem olei: omnes illi liquores sedem sibi à primordio, ordineque antedicto assignatam retinuère. Concusso postmodùm, et moto susquedequè tubo, ac proindè confusis omnibus, quilibet liquor paulatim suam sedem spontè repetiit, ibique substitit, humanâ scilicèt bile immediatè suprâ tubi fundum, bile bubulâ suprâ humanam, aquâ suprâ bilem bubulam, et oleo suprâ aquam locum tenente. Cùm ergò, ut suprâ retuli, ferè æquè facilè mergatur cortex intrâ bilem longè graviolem oleo, ac mergatur intrâ oleum ipsum, mergatur verò difficillimè intrâ aquam oleo quidem graviolem, sed leviolem bile, satis patet id præcisè non pendere à majori, vel minori gravitate illorum fluidorum comparativè ad gravitatem corticis, sed à faciliiori, vel difficiliori ingressu particularum cujuscumque fluidi intrâ poros illius, undè facilius redditur augmentum ponderis ejusdem corticis, ac proindè etiam faciliior illius submersio in bile graviore, quàm in aquâ minùs gravi. Itaque, cùm submersio hujusmodi ferè æquè facilis sit in bile ac in oleo, bilis autem et olei plurimùm analoga sit structura, licèt utriusque fluidi plurimùm diversa sit gravitas, hinc est, quòd bilis potest habere majorem proportionem cum potis corticis, ut eos subintret, ac habeat aqua, et con-

sequentèr hujusmodi proportio potest haud irrationabiliter refundi in quasi oleagineam bilis structuram poris corticis ferè æquè facile aptabilem, ac sit iisdem aptabilis structura olei.

Hanc bilis et olei similitudinem in structurâ plurimi suadent effectus utrinque similes. Sic licèt fatear cum *Glissonio*, bilem non minùs quàm aquam extinguere ignem, neque flammam facile concipere, æquè tamen certò expertus assero cum *Ettmullero* et aliis, eam, si vehementiori igne urgeatur, absumptâ aqueâ humiditate, plurimùm, unguinis exhibere, inflammabilis olei adinstar. Paritèr ab oleo et à bile alvus redditur lubrica, et ab utroque liquore solvuntur colores. Deniquè sicuti gutta olei suprâ panum v. g. laneum decidua illum statim pervadit, ità gutta bilis eundem penetrat, sed paulò segniùs, gutta verò aquæ hæret globuli ad instar in ejusdem panni superficie, nec illum pervadit; undè quod levius est in hoc casu citiùs penetrat, penetrat paululùm tardiusculè; quod graviùs, nullo pacto penetrat quod medio modo se habet inter utrumque in genere gravitatis. Non ergò varia præcisè liquorum gravitas, sed varia partium illos componentium figura, variaque illarum in casu nostro cum poris Chinæ Chinæ proportio faciliorem, vel difficiliorem reddit illorum absorptionem, et consequentèr submersionem ejusdem Chinæ Chinæ, quæ proindè ferè æquè facile mergitur in bile, etsi graviore, ac mergatur in oleo leviori, minimè verò facile in aquâ, aceto, etc. licèt liquores isti sint ut graviore oleo,

ità bile leviores. Symboleitas autem nonnullarum partium bilis cum oleo sicuti fortassè sufficit ad hoc, ut bilis admixta aceto, salivæ etc. reddat liquores illos, utpotè sibi arctè implicatos, faciliùs aptabiles poris corticis, cum cæteroqui se-juncti à bile ægrè admittantur ab eodem: ità ex adverso non sufficit ad tribuendam bili nec levitatem, nec promptam inflammabilitatem olei, propter consortium aliarum partium conjunctarum, et illam integrantium, putà terrestrium, aquearum etc. quæ id tandè efficiunt, ut bilis, quamtumvis quoàd apparentiam plurimùm, et quoàd substantiam non parùm oleaginea, nullatenùs tamen sit oleum, sed bilis.

Quod de bile et oleo constat per experientiam, potest fortassè per conjecturam credi de fermento febrili, sive ad illud constituendum bilis concurret, sive aliud fluidum oleosæ forsitan naturæ particeps. Potest enim contingere, quòd tale fermentum æquè facilè, et fortè faciliùs absorbeatur à cortice, saltèm quoàd particulas magis noxias, et febrilis tumultùs reas, ac ab eo absorbetur ipsa bilis, effætâ postmodùm, ac enervi remanente ejusdem fermenti sic retusi portione superstite: sicuti contrà potest minùs felicitèr exerceri talis actio in idem febrile fermentum ab aliis corticibus, atque pulveribus febres infirmiùs pellentibus, quemadmodùm illi idem pulveres bilem ipsam, oleumque nonnihil diversimodè absorbent, ac illam absorbeat cortex noster, etsi in illa non longè

absimiliter submergantur, atque præcipitentur. Ratio autem tam insignis diversitatis inter actionem Peruviani corticis, et actionem aliorum corticum, non admodum insigni diversitate bilem ipsam absorbentium, videtur aliquo modo elici posse ex ipsâ partium Chinam Chinam componentium analysi, et notabili ejusdem ab aliis corticibus diversitate: siquidem (admisso quod asserunt artifices fide digni) China China, præter alias peculiare suæ texturæ prærogativas, habet hanc insuper ut quadruplum circiter salis contineat, exhibeatque comparative ad aliarum arborum cortices. In quâ fortassis etiam salis copiâ, simul ac peculiari configuratione, ea potest eminentè contineri virtus febrifuga, quæ in aliis corticibus minori salis, etiam debilioris, quantitate prædita, infirmior est, ad hoc, ut febrile fermentum ab iisdem salibus retundi possit, atque dulcescere.

Et hâc occasione nequeo planè subscribere doctissimo *Fabri* ex inclytâ societate Jesu viro celeberrimo, qui sub nomine *Antymi Conygii* Chinam Chinam propugnaturus, inquit illam componi ex minimis talem determinatam figuram habentibus, quæ porositates fermenti febrilis per vim, et cunei adinstar pervadens, ac ipsum trituran (non absimiliter, ac ferrum solvit aqua Stygia) reddit illud, et impotens ut lædat, et dispositum ut excernatur. Potius enim ob rationes dictas crediderim, fluidas fermenti particulas ingredi, saltè sensibilius, poros corticis, sicque à cortice absorptas illaqueari

et infringi, quàm particulas corticis ingredi poros fermenti, eâ præsertim vi, quæ valeat illius texturam nervosè solvere, licèt ingressum etiam reciprocum particularum corticis in porositates fermenti nequaquàm rejiciam, cùm non minùs à cortice, quoad maximam licèt sui partem præcipitato, saporem aliquem mutuentur fluida, ac humectationem paritèr, et saporem à fluidis cortex infusus. Utcumquè, sive absorptum dicatur, sive distractum febrile fermentum, facilè postea est intelligere, quomodò, si opus sit, possit illud foràs protrudi: id siquidem nullo negotio fieri poterit, ut aliàs diximus, per ordinarias naturæ vias, per alvum scilicèt, per urinam, per sudorem, aut per insensibilem transpirationem, non quidem criticâ, copiosâ et repentinâ semper evacuatione, (id enim paucula sæpè illius moles non exigit) sed modicâ, et sensim, sub velamine scilicèt consuetarum excretionum, non quantitate notabiliter adauctâ, sed qualitate tantùm mutatâ, licèt, vix dignoscibili, mox prodeuntium.

Et in hoc solo sensu concedere non renuo, aliquam quandoquè exigi posse, et probàbiliter etiam sæpè contingere, causæ morbificæ evacuationem ab assumpto cortice; hanc ipsam tamen absolutè necessariam esse non æquè concederem. Posse enim per solam variationem texturæ partium, liquores plurimos à suâ crasi desciscere, et per novam earumdem partium coaptationem in pristinùm restitui, absquè eo quòd ab illis quicquam dematur

aut sensibilitèr separetur, satis ostendunt vina æstate morbida facta, et fugientia, autumnò verò nonnumquàm spontè redeuntia; idemque confirmaturina à solo frigore corruptionem patiens, per calorem verò iterùm clarescens, ac restituta, et alia id genus, mutatâ scilicèt in iis solâ particularum componentium texturâ et situ. Quòd idem, datâ proportionè, succo aut humori febrili, per contactum intimum Chinæ Chinæ posse quandoquè accidere, citrà ullam omninò illius evacuationem, non est cur absolutè negemus.

Huic opinioni non parùm videtur favere *Borellus* aliàs citatus, qui pro febrium curatione solam salium fermenti febrilis retusionem, edulcationem et contemperationem requirit, mediante commixtione salium diversæ naturæ, qualia sunt quæ in Chinâ Chinâ delitescunt. *Potiùs igitur*, inquit, *èd quòd salium separatio ab humoribus, et expulsio frustrâ speratur* (et hic notetur insperata salium morbosorum extractio et eductio) *prædicti sales contemperari, et dulcorari possunt, vel admiscendo fluida menstrua appropriata, vel adhibendo salia contraria, ut experimur in aquâ forti, quæ acredine salinâ vitrioli et aluminis componitur adedò validâ, ut possit argentum corrodere et dissolvere in atomos minutissimas. Huic verò aquæ forti si addantur sales ammoniaci multò magis acres, quàm sint vitriolum et alumen, nedùm vim majorem corrodendi non acquirit, sed è contrâ eam vim quam habebat, amittit; adedò enim retunditur et debilitatur, ut nequeat*

amplius argentum corrodere. Similiter mistura salis nitri et sulphuris accensibilis est, et addito sale ammoniaci, accendi nequit. Alibi postea sal prunellæ ex eisdem nitro et sulphure combustis compositum, inflammationes tollit, et fusionem succorum coagulatorum promovet. Sal quoque et pulvis cornu cervi et cancrorum, acredinem acidissimam retundunt et tollunt: et ipsum acetum distillatum plumbo affusum, dulcedinem saccharo similem acquirit. Ex his ergo, et ex aliis exemplis, quæ adduci possunt, constat acredinem salinam fermenti febrilis retundi, dulcificari, et destrui omnino posse ab aliis salibus admistis contrariæ naturæ. Sed jam satis concessimus hisce minutulis disquisitionibus, ex quibus nihilominus obvium est conjicere non modò quàm difficilis, et dubia sit explicatio ulterior modi individualis (de genericis enim notionibus quilibet novit loqui) quo alexipyretum istud agat in causam febrilem; verum etiam, quàm parùm consistens sit eorum opinio, qui ut à cortice reportatam de febribus credant victoriam, opima evacuationum spolia ostentanda requirunt.

CAPUT IV.

Ad placita Humoristarum et Galenicorum accommodata evacuationum prædictarum sensibilibium carentia.

RESTITANTE adhuc intrà caligines mirabili agendi modo Peruviani corticis, iterum monuisse non erit

inutile, quòd, quemadmodum nulla, ut vidimus, potest adduci congrua explicatio actionis illius, nisi dilucida habeatur cognitio causarum febres intermittentes materialitèr, ac efficientèr producentium, ità sine eàdem dilucidâ cognitione, nulla contrà illam potest adduci nervosa oppositio. Cùm verò omnes, quotquot circà intermittentium naturam et causas circumferuntur hypotheses (si candidè velimus fateri) nondùm scopum attigerint, quælibet objectio proindè contrà certam operationem corticis perpetuò laborat suppositione quâpiam fundatâ suprâ hypothesim aliquam saltèm incertam, imò probabilitèr falsam. Sic difficultas, quæ tanti fit de carentiâ evacuationis post assumptum corticem, supponit, quòd causa febrium sit aliquid, quod debeat absolutè *sensibilitèr* eliminari, non solummodò temperari, aut retundi; non aliquid stagnans, quod tantùm egeat moveri; non aliquid fixum, quod expetat exaltari; non quicquàm exaltatum, quod exigat deprimi; non quid intemptivè influens, quod debeat inhiberi; non quid obstructum, quod indicet reserari, etc. quæ tamen omnes, et similes hypotheses; nullius sensibilis evacuationis necessitatem inferentes, suâ nequaquàm carent probabilitate. Sanè causas aliorum plurium morborum periodicè recurrentium, in asthmatis, arthritidis, epilepsiæ, et hujusmodi, præmissis (ut loqui consuetum est) universalibus, non evacuatione semper sensibili, sed alterantibus, temperantibus, edulcantibus, decoctis exsiccantibus, etc. ra-

dicitur extirpare pro viribus artis conamur, pensum postea evacuationis materiae dispositae uni naturae liquentes.

Exemplo sit inter vulgaria, sed maximè proficua medicamenta, aqua stibiata *Pomponacii*, ex antimonio crudo, lapide pumice, salsaparillâ, et visco querno infusis, atque decoctis confecta, quae ad morbos innumeros, eosque gravissimos, tum venereos, tum alterius analogæ, contumacisque naturae curandos, quàm felicissimè solet usurpari. Nonne illa, licet quandoquè notabiles excretiones habeat adjunctas, sæpius tamèn absque ullâ insigni evacuatione, imò facibus et urinis aquae epotæ quoàd quantitatem vix correspondentibus, humorem ischiadicum *v. gr.* absumit, ulcera sanat, scabiem pustulosam emendat, cachexiam tollit, etc. reflorescente quàm citò vivido faciei colore, et maturescente simul fructu optimæ renutritionis? Et tamen sæpius, ut dixi, vel nil excernitur, vel, si quid excernitur, id fit non rarò per modicam succi alicujus pravâ qualitate peccantis quantitatem, qui sub consuetis evacuationibus, quoàd apparentiam vix immutatis, delitescens, cùm reliqua excrementorum turba indiscriminatim foràs abigitur.

Nollem itaque suspicari, allatam objectionem, adhuc inniti mucidæ suppositioni à scholis jamdudum exhibitæ ac explosæ, de celebri quaternario humorum tum alibilium, ut vocabant, tum excrementitiorum numero, quibus putrescentibus

attribuebantur febrium causæ, biliosum scilicet humorem tertianæ assignando, pituitosum quotidianæ, melancholicum quartanæ, etc. quod figmentum anteactis sæculis vix condonandum. Sat sit eos humores admittere quos cernimus, et quibus humectamur, non quos per metaphysicas abstractiones imaginabantur antiqui. Sunt autem isti, chylus, sanguis ipse et ab eo secreti liquores, iique, sive in usus digniores reservati, sive ut inutiles foras protrusi, sive post longa itinera in eundem reduces, quorum generum diversorum sunt latex nerveus, seu mavis spirituum animalium continuatum syntagma, serum ipsius sanguinis, lymphæ eundem cruorem duplici flumine perluens, pinguedo, cæterique peculiares succi, ut pancreaticus, salivaris, stomachicus, biliosus, alique complures tum à conglobatis, tum à conglomeratis glandulis prodeuntes, quorum catalogus hujus loci non est, et quorum nihilominus compositio, ac integralis constructio ab innumeris salibus pendet, ex quorum variâ combinatione, tum saporis alteratio, tum motus eorum inordinatio, tum denique actionum et naturalis œconomix læsio paulatim emergit. In his ergo humoribus alteratis, et vitiata illorum crasi, seu mavis structurâ, compage et motu quærendæ sunt febrium causæ, non in fictitiis et imaginariis.

Talia quidem commenta etiamnum amplectentes, absit ut aggrediar refellere; nam, præterquam quod hodiè sinè stomacho nequit audiri hujusmodi controversia, illud præterea certum est, quod prorsus

sus incassum hanc provinciam adornandam susciperem. Neque enim sperare fas esset, quod hujusce tractatus vel lectioni vacare vellent, vel rudi admonitione resipiscere, qui tot gravissimorum scriptorum opera, ex quibus propriæ hallucinationis medelam addiscerent, vel legere neglexerunt, vel iisdem præoccupato jam animo inspectis, nondum resipuere. Sanè istos, omnia per consequens artis medicæ recentiora incrementa, quantumvis certa, quantumvis utilia, cæco quodam ac irrationabili instinctu respuentes, haud levitèr peccare crediderim, ut qui plurimos antiquorum errores crassos atque palpabiles, quibus nonnunquàm curationes morborum innixæ sunt, adhuc retinent, adhuc sectantur : cùm tamen ubiquè prostent apud neotericos tot experimenta, et dogmata inconcussa, ex quibus hujusmodi errorum correctio, saniorque proindè medendi methodus, à verioribus *Hippocratis* præsertim imò et ipsius *Galen*i placitis nequaquàm aliena statim emergeret. Scruletur medicus necesse est, et examinet quidquid, saltèm cum plausu et cum aliquâ non contemnendæ novitatis famâ, scriptum est hinc illinc; facitque ad majus complementum artis, quod prisci medicinæ patres integrè præstare non potuerunt, licèt innumera æternum venerabilia præstiterint, plura fortassè daturi, quàm ii, à quibus nihilominus corriguntur, si diutiùs vixissent. Si quid autèm certum ac evidens, sive ex antiquis, sive ex recentioribus noverit quispian depromere, id alacritèr seligat; si quid verò

in alterutris, vel in utriusque rationi, aut experientiae minus consonum repererit, id totum animosè respuat; prius tamen expendat, ac trutinetur antequàm judicet. Nisi hoc pacto se gerat medicus, vereor, ne sibi ac conscientiae suae inexcusabili defectu desit; neque enim id peragit, quod ab eo strictè consuevit exigere quisquis se illi committit, ut nempè rectè pro viribus pensitet quidquid bonae valetudini conservandae conducit. Talis autem omissio, ut patet, est de re admodum gravi tum ratione subjecti, tum ratione rei ipsius, cum ex vi talis omissionis medicus quandoquè terat iter, oculo ipso iudice, omninò fallax, à quo tamen, si quæ scriptis undiquè tradita sunt, probè calleret, procùl dubio deflecteret. Sed hæc tyronibus tantum. Jam verò claudamus hos rivos,

— *sat prata biberunt.*

Quandocumquè igitur veteri doctrinae de humoribus superstructa sit objectio corticem culpans de sensibilis evacuationis defectu in febrium expulsionem, licet hoc nomine audienda non sit, lubet tamen, datâ etiam tali hypothese, respondere quòd febrium, ut et aliorum plurium morborum solutio dupliciter, ut aiunt ipsi humoristæ, solet contingere, scilicet, vel per *crisim*, cui de more adjuncta est aliqua evidens evacuatio, vel per *pepasmum*, per quem absque ullâ evacuatione solvitur morbus. Atque postremus iste modus est admodum frequens, et consistit secundum *Galenum* in quâdam vel *maturatione vel deductione in mediocrem temperiem*,

quam idem Galenus *coctionem* vocat, seu *pepsim*, eamque docet, ut modò dicebam, in *solâ succorum alteratione* consistere. Hujusce doctrinæ semina priùs jecit in *lib. de affect.* magnus *Hippocrates*, eamque insuper remediis antifebrilibus nil evacuantibus, adaptavit, dicens : *ea vim habere in his febribus* (loquitur de tertianis ac de quartanis) *ut pote corpus conservent in consuetâ caliditate ac frigiditate, et neque præter naturam calefiat, neque frigeat.* Quid obstat ergò, quominùs dicatur China Chinæ istam succorum moderationem, istam deductionem in mediocrem temperiem, istam corporis in consuetâ caliditate ac frigiditate, quam diebus à paroxysmo vacuis sortitur, conservationem inducere, seu mavis illam bilem, vel melancholiam, in quibus putrescentibus causa febrium somniatur, à putredine vindicare?

Fortè obstat celeritas illa, quâ momento temporis jugulatur febris, cùm cæteroqui *pepasmus* lentiolem consuescat habere progressum? At cur vitio vertere volumus Peruvianæ cortici ipsam celeritatem et energiam operandi, humoresque tumultuantes citò compescendi, quam in omnibus aliis specificis adeò quærimus et commendamus? Deniquè, si nimia illi virtus obest, in promptu est remedium. Cortex sanat æquè, si lubeat, illicò ac per longiusculas moras. Una dosis paroxysmos sistit, et pluries paulatim repetita eosdem præcavet : eadem verò diminutè ab initio ac sensim exhibita, diutius nonnihil humorum coctionem et morbi solu-

tionem protrahit. Sic qui metuit torrenti è directo aggerem opponere, eodem obliquè ac sensim opposito impetum illius infringit, ut cursum paulatim deflectat. En ergò, quo pacto per Chinam Chinæ lentam humorum alterationem, præparationem, ac *pepsim* assequi possumus. Huc fortè respiciens acerrimus humorista, et ipsius circulationis sanguinis injurius osor *Restaurandus*, etsi *bilem* à reliquis humoribus *secretam* pro febrium causâ conetur statuminare, attamen loco evacuationis (quam experientiâ ductus, ut mox videbimus, maximè improbat, Chinam Chinam ideò impurgatis ægris præscribens) loco, inquam, evacuationis, id potius à Peruviano cortice quærit, et assequi semper gloriatur, nempè, ut *talis humor*, ex vi remedii, *massam iterum subeat, quâ secessum fecerat, undè temperetur ac nutritioni aptus evadat, non secus ac aqua deserti* (sunt illius verba) *ex amarâ dulcis facta fuit à ligno, quod Moyses injecit ex mandato Dei ad alendos Israelitas*. Hæc auctor ille de Chinâ Chinæ experientissimus, qui idcirco illius usum *Hippocratis* doctrinæ summè consonum demonstrare contendit tractatu peculiari in hunc finem edito.

Hanc ipsam succorum attemperationem absque sensibili evacuatione multò magis admittit, atque tuetur in Chinâ Chinâ *Monginotius*, qui licèt immunis à præjudiciis humoristarum, datâ nihilominus eorum suppositione, ait: *Sæpè fieri, ut pauca subsit materia evacuanda, id quod illi supponunt, defervente humorum æstu, maximam illorum par-*

*tem contemperari, et ad idoneum statum à natura deduci quæ in rectum usum remedium adaptavit; affertque in confirmationem, exempla eorum qui paroxysmos experti vehementissimos, nullis usi remediis, nullâque manifestâ naturali, aut artificiali humorum exclusione, febre tamen subito defunguntur, nullo indè secuto verendo symptomate. Cui proindè textui appositas hasce notas subdit cl. Nigri-
solus in lib. aliàs citato: Nonnè pepasmo mitificantur humores? Nonnè juxtâ divi præceptoris effata, libro de veteri medicinâ, concentratione et permixtione meliora ac mitiora omnia fiunt in homine? Cur etiam acidum febrile superstes in sanguine mortificari similèr ac dulcificari concentratione non poterit? Idem quoque dixerat cl. D'Acquin, qui dans paritèr per modum concessionis, aliquid restitare in corpore et vasis, post depulsas ope corticis febres, subjunxit: At verò, etsi reliquiæ quædam in corpore delitescerent, illæ hujus (nempè corticis) ope temperantur, ac naturæ gratiam recipiunt vel saltèm per reiteratas et continuas digestiones concoquuntur, maturantur et discutiuntur.*

Quòd si nihilominùs hujusmodi temperationi sive coctioni succedentem quis optet evacuationem, is sciat, eam non posse cum fructu, quantùm novi, per artem tentari, sed necesse esse, quòd illam moliat, atque perficiat natura. Quorsùm enim vergendum est, ut causa morbifica expellatur? An per vomitum, vel per secessum? At, si fermentum febrile sæpesæpiùs emeticum est atque catharticum,

ut experientia testatur, et ob id ipsum contumacius : itè, si fugatis per corticem febribus, quodlibet catharticum, vel leniens, ut ut leve, febrem revocat, quo jure speranda est expulsio causæ morificæ à medicamentis eidem causæ analogis, et morbum eundem prius depulso certò certius revocantibus? Deindè, si humor peculiaris, qui febres intermittentes gignere creditur, stabularetur intrà cavitates intestinorum immediatè, aut stomachi, quasi iisdem vel innatans, vel adhærens, undè purus et impermixtus citrà opus secretionis posset educi, atque insuper à tali suppositione non multùm abluderet experientia, in tali profectò casu aliquis rationabilior, primo aspectu purgantibus, vel emeticis locus esse posset: quemadmodùm iisdem, saltèm levioribus, locus est, illisque identidem utimur ad educendum noxium venenatumve cibum ingestum, priusquàm ille lactearum valvulas prætergrediatur. Sed jam clarè dignoscimus rem aliter se habere, hoc est, vel fermentum febrile in talibus cavitatibus verè non esse, vel saltèm ab iis per hujusmodi medicamenta, et tentamina de more nequaquàm educi: constat enim experienciâ, neque à naturâ per repetitas vomitiones, aut alvi dejectiones in paroxysmis febrium sæpissimè contingentes, neque ab arte cuncta hæc provocante, febrium causam vel tantillùm submoveri (1) qui-

(1) In errorem versat *Torti*, quandò fermento peculiari in febribus intermittentibus existente innixus, paroxysmos eva-

nimò sæpesæpiùs fortiolem et contumaciolem reddi. Cùm itaque probabiliter hinc deducamus, vel idem fermentum longè altiores radices habere, saltèm quoàd scaturiginem suam, licèt adhuc occultam, vel illud alteratione potiùs, atque attemperatione solà demulcendum esse, quàm irrità expulsionem tentandum, non est ideò, cur hujusmodi fidamus evacuationibus, easve à Chinâ Chinâ, per solam alterationem febrifugâ pertinaciter velimus exquirere.

Dicant ingenuè, si velint, ipsimet qui opponunt, quot quartanas, quot tertianas *autumnales* (de *vernīs* enim non loquor, quâlibet methodo, etiam minùs rectâ, sicut multò meliùs si sibi relinquantur, citò solubilibus) per repetitas purgationes sanaverint; vel, si renuant ipsi fateri, dicant tot scriptores, à crebro catharticoꝝ usu spirituum dissolutionem, succoꝝ perturbationem ac viscerum enervationem, loco sanationis, succedere clamitantes. Inter hos unus audiatur iterùm *Monginotius*,

quantibus non posse removeri asseverat. Nonne quotidie emeticum accessionem supprimere vidimus, non fermentum illud febrile illaqueando, ut censebat *Torti*, vel expellendo, secundùm humoristas, sed (ex nostrâ opinione) per totam œconomiam motum tonicum excitando, qui vires vitales omnibus organis æqualiter dispertit, et in eo casu, eodem modo ac China China agere videtur? Attamen verum est usum evacuantium in omnibus febribus intermittentibus non æquè conducere, sed tantùm in principio vernalium in quibus abdominis viscera non inflammatione laborant.

qui purgantium effectus cum effectibus Chinæ Chinæ conferens, hæc habet: *ab his* (loquitur de purgantibus) *atteri vires, robur ventriculi aliarumque partium infringi, concoctiones imperfectè obiri, hinc perennem pravorum humorum generationem* (inquit generationem, non extirpationem) *subsequi, experientiâ patet. Quamobrè febres ab illis potius sæpenuerò foventur, quàm abolentur, cum ex opposito, si in usum ducatur hoc remedium, videlicet cortex, sæpè uno ictu declinantur accidentia ab aliorum usu plerumquè metuenda.* Super quo textu dignæ sunt, ut per extensum lustrentur solidæ, doctæque animadversiones citati *Nigrisoli*.

An ergò per urinam tandèm, vel per sudorem sollicitanda erit humoris peccantis expulsio? At per istas vias soli humores, qui sunt in sanguine, atque in coctione subacti solent excerni. Quo pacto ergò materia antecedens (conjuncta enim quolibet paroxysmo subigitur et expellitur) quæ vel sanguini citrà ullam secretionem confusa est, vel probabiliùs eidem nondùm immixta, sed adhuc extrà illum degens in loco particulari, poterit per glandulas renales, vel per cutaneas evacuari? Sed frustrà est, quòd diutiùs de postremis hisce excretionibus verba faciam, pro quibus obtinendis, quandocumquè etiam possent prodesse, ars est remediorum inops, et effectuum incerta. Tota fiducia, jam scio, reposita est in catharticis, quæ tamen, quantum observare licuit, vix aliud unquàm ægrotantibus præstare novi, quàm quod illis præstaret fungorum

noxiorum esus. An et istos pro intermittentium medelâ loco Peruvianæ corticis malimus præscribere? claudamus hoc caput textibus duorum vel trium auctorum satis oppositis, quos etsi prolixiores, contrâ quod proposueram, non piget transcribere.

Nemo miretur, inquit Morton de intermittentibus verba faciens, veteres medicos futilem atque inanem operam navasse huic morbo debellando; sensibus enim magis quàm par est confisi, humores in receptaculis nescio quibus stagnantes fomitem morbi fuisse somniârunt, indeque toto cælo errantes, utramque curationis paginam longo apparatu medicaminum deobstruentium et evacuantium impleverunt, idque methodicè, licèt absque certâ aliquâ indicatione à naturâ rei ipsius desumptâ, sed in propriis ipsorum musæis excogitatâ. Cùmque morbificum hunc fomitem penitùs eradicari impossibile crederent absque sensibili humorum evacuatione, copiâ medicaminum incidentium humores præparabant, ut remediis evacuantibus magis obsequentes fierent. At hos ipsos medicos appello, noverint ne unquàm, nisi fortuitò, hâc methodo, utut diutiùs protractâ, quemquam perfectè sanatum? Me quod attinet, ego simplicem tertianam, eamque admodùm benignam et legitimam inde non rarò in hemitritæam vel quartanam mutatam esse, cum hydropisi, aliisque duris symptomatis sociatam observasse memini, naturâ hisce venæ sectionibus et purgationibus incassum lacessitâ Hujus malæ et infelicitis praxeos (quæ per

multa sæcula cum magno ægrotantium incommodo intèr nostræ artis professores invaluit) πρῶτον ψεῦδὸς est falsa ætiologia. Non enim, nisi ex accidenti, ut in plethorâ, cachexiâ insigni etc. (de quibus posthac dicetur) ulla omninò evacuatio indicatur; verùm ut plurimùm istæ evacuationes, naturam inanitèr lacescendo, veræ curationi multùm officiunt, saltèm copiam antidoti (videlicèt Chinæ Chinæ) admodùm ingratae multò majorem necessario requiri faciunt. Hæc ille philosophicâ libertate, nimiâne, an nimium veridicâ?

Neque ab eodem dissentit experientissimus Sydenham, qui licèt post solutas (et quidem sine ope corticis) autumnales et diuturnas intermittentes, aliquam purgationem admittat per epicrasim institutam, morbo tamen (quòd palàm inculcat) penitus depulso, eo nimirùm tempore, quo, ut ait, non tantùm paroxysmi perceptibiles, sed etiam alteratio ista, qualis ea fuerit, quæ diebus illis, in quos paroxysmus incidere debuerat, persentiscitur, omninò evanuerit, atque unus insupèr mensis fuerit elapsus: eamdem tamen purgationem, durante vel insensibilitèr febrium motu, prorsùs abdicat; ea siquidem tunc temporis instituta: Id tantum, inquit, lucri à purgatione fecerimus, ut morbus contumacior evadat, subditque: Quotidiana id nos docent eorum exempla, qui in morbi παρακμή, ut theoriæ isti morem gerant, quæ in tollendis obstructionibus et evacuando humore melancholico (loquitur enim præcipuè de quartanâ) qui mali fons

et origo vulgò habetur, curationis spem omnem ponit, repetitis purgationibus miserè plectuntur; quibus sanè quicquid id demùm est humorum, quod à corpore divellitur atque eliminatur, compertissimum est nobis, febrem altiores exindè radices agere, et pertinaciùs stationem suam tueri, quàm si non fuerit proritata. Quaproptèr religio mihi est catharticum propinare etc. additque tandem, quòd, etsi post elapsos à fine morbi duos vel tres menses potionem aliquam identidèm ex lenitivis vulgaribus consuescat præscribere, singulis tamen vicibus haustulum aliquem paregoricum horà somni assumendum, finitâ jam medicamenti operatione, successivè porrigit, ut nempè, inquit, paroxysmo se de novo ingerendi (etiam post tàm insigne spatium temporis) ansam præscindamus, quam alitèr fortè arriperet ex occasione tumultus atque orgasmi, quos vel mitissima excitant cathartica.

Idipsum confirmat aliàs citatus *Restaurandus* Monspeliensis universitatis professor, qui licèt, uti Galenicorum principiis imbutus, causam febrilem reponat, ut diximus, in *bile* à reliquis humoribus *secretâ*, et intrâ venas *accensâ*, adeòque licèt in ipsius peccantis, et secretæ bilis purgationem videatur esse debere propensus; nihilominus solâ ductus observatione experimentalì candidè inquit: *Experientiâ quotidianâ constat, si febris intermittens desinat, nullâ prægressâ purgatione, (id quod sæpenumerò contingit, præsertim in febribus tertianis) convalescenti autèm catharticum datum fuerit,*

eâdem die febrem resurgere. Quia verò locum aliquem ipsi nonnunquam purgationi reservare vellet, en, dùm aliquod quærit latibulum, quo se condat, en, inquam, quomodò ineluctabili convictus experientiâ, eidem purgationi ipsam rursus anteponat omissionem purgationis hoc alio textu : *Nec tamen purgationem improbaverim, si modò ejus indicans, cacochymia, adfuerit ac febris character nullus omninò supersit* (observentur quæso hæ conditiones). Porro id ut securiùs succedat, concedendum est aliquod temporis spatium præterire, imò die uno vel altero antè usum cathartici, et die subsequente, utile est infusionem Chinæ Chinæ assumpsisse in aquâ frigidâ factam, quod nisi factum fuerit, postliminio redit febris; quare satius sit abstinuisse, quàm periculo ægrum exposuisse; satis fuerint plebotomia, enemata refrigerantia et proba diæta, quæ illis præferenda. Videant ergò, qui tantùm fidunt solventibus in febrium curatione, quid testentur ab experientiâ coacti auctores ipsi à purgatione minùs alieni, in ipsâ febrium intermittantium (ex quibus illatio fiat à fortiori de eo, quod dicendum est in acutis) diuturniorum medelâ. Quâ igitur ratione accusatur cortex, intermittentes hujusmodi fugans, eo quòd non pollet purganti, aut aliâ insignitèr evacuante virtute, cui febrium earundem possit adscribi sanatio?

Reverà quo pacto sanitas hominis febricitantis, sanguinemque proindè (quæcumque hujusce rei sit causa) immodicè tumultuantem habentis, poterit

obtineri ab ullo remedio vim purgandi, majoresque idcirco tumultus excitandi possidente? Mucet jam foetetque in scholis commentitius putrescentium humorum et in latrinas ablegandorum quatuorviratus, cujus auctoritate jam penitus collabescente, corrui pariter, quæ illi famulabatur purgatio. Satis nōrunt omnes, cathartica, etiam *minorativa* dicta, imò et quæ *lenientia* vulgò appellantur, omnia secundum magis et minus acria esse, et irritantia, mediamque quodammodo rationem habere inter alimentum et venenum, plusque accedere ad istius, quam ad illius naturam, et propterea id, quod ab illis expellitur, de more excerni per expressionem violentam, et immaturam succorum sæpius utilium, ferè ac si veneficum poculum quis sive sanus, sive febricitans assumpsisset, undè noxa plurima, levamen nullum potest emergere. Nōrunt pariter pharmaca ista *corruptiva* ingesta, quæ primam vim suam in fibras solidorum exercent, secundum aliquam saltè portionem sui, necessariò lacteas ingredi, et massam sanguineam subire, cùm illis non minus, ac aliis esculentis pateat indesinentèr hujusmodi aditus. Quinam autè inde tumultus, quænam confusio et agitatio sanguinis, nemo non videt? Neque enim imaginaria illa sympatica attractio, quæ ipsi hodiè denegatur magneti, potest ampliùs sustineri, præsertim cùm tormina, tenesmi, convulsiones et alia hujusmodi, quæ difficilem non rarò purgationem comitantur, manifestè suadeant oppositum. Nōrunt tandem, quod ad utiles, *conferentes*,

et facile tolerabiles instituendas evacuationes, necessaria est prævia intestina secretio, maturitas, atque concoctio. Harum nullam (siquidem differant inter se) nullum potest efficere, nisi ea præextiterit, solvens medicamentum. Si præextiterit, nullo negotio, vel levi adjuta clysmatis usu, quæ secretionem fecit, faciet et expulsionem natura. Usus in contrarium siquis fuit, præsertim verò in *acutis*, ut abusus delendus et abolendus.

Non hæc sanè docuit, nisi per vim trahatur ad id, quod verè non docuit, magnus *Hippocrates*, imò ausim dicere, nec *Galenus* ipse, qui licèt aphorismum primæ sectionis *Hippocratis* vigesimum quartum exponens, purgationem quodammodò admittat in acutorum principiis (in solo tamen casu *materiæ turgentis*) dùm verba nihilominus tanti præceptoris perpendit videlicèt : *in acutis passionibus rarò, et in principiis medicinis purgantibus, et hoc cum præmeditatione faciendum* : per hæc verba, inquit, quantum hujusmodi vereatur purgationes, manifestat *Hippocrates*. Neque enim, subdit idem *Galenus*, minimum periculum est in morbo acuto uti purgante medicamento, cum omnia id genus medicamenta sint potentia calida; febris verò, quatenùs febris est, et sui ratione, non calefacientibus atque exsiccantibus, sed potiùs contrariis, hoc est humectantibus et refrigerantibus egeat. Non igitur ob igneam febris caliditatem purgationem abhibemus (hanc enim scimus sui ratione nocituram) sed propter humores illam efficietes. Quarè majorem oportet ex noxiorum humo-

rum evacuatione fieri utilitatem, quàm id, quod necessario consequitur ex purgantibus medicamentis, detrimentum. Ut autem ista subsequi possit utilitas major, quàm noxa, tot tantasque subjungit *Galenus* cautiones, ut ferè impossibilis sit casus, in quo liceat, juxtà hujusmodi regulas, instituere purgationem. Cùm itaque *detrimentum, et periculum* ex purgatione in febribus, tanquàm duo mala certa, fateatur *Galenus*, stetque etiàm in febribus non acutis : quæ tamen facilè in acutas migrare possunt, ac solent : firma ea ratio, præter tot alias longè potiores, quòd purgantia omnia ut calida, febriculis, ut calidæ et igneæ, malè congruant; addo ego (1), quòd non in fluida immediatè, ut perperàm censet imperitorum vulgus, sed in solida, seu fibras agant : et cùm ex aliâ parte cesset nostro hoc sæculo ratiocinatio opposita de humoribus putrescentibus evacuandis, ut cessavère tot alia non minùs erronea, non aliud superest dicendum, nisi, quòd mens *Hippocratis* et ipsius *Galen* (qui suis quoque temporibus purgationem vix trepidantèr admittebant, in conspectu majoris, quod falsò imaginabantur, mali) nisi, inquam, quòd mens eorum sit, quoties malum illud, quod timetur, timeri non debeat, toties ab omni purgatione, in

(1) *Torti* qui hypothesim de humoribus putrescentibus non admittebat; demonstrat erroneas opiniones veterum de humoribus et de modo agendi purgantium; *non in fluida immediatè, ait, sed in solida, seu fibras agunt.*

febris quoque non acutis, esse abstinendum, vel saltè ea, quotiescumquè aliundè indicetur, non-nisi summâ cautione atque circumspectione nobis utendum.

CAPUT V.

Perpensis circà febrium intermittantium causas placitis neotericorum profitentium fluidorum systema, decernitur, ab assumptâ Chinâ Chinâ nullam sensibilem evacuationem fieri debere. Idem multò magis asseritur in solidorum systemate, de quo, et de nonnullis eidem cohærentibus pauca obiter.

QUEMADMODUM, ut nuperrimè vidimus, nulla, secundùm principia humoristarum, expectanda est, vel expetenda insignis evacuatio post corticem exhibitum, ad hoc, ut per eum febres credantur cum ratione sublata, ità nec ulla talis exigi debet ad normam aliarum thesium, saltè magis famigeratarum, quæ circà febrium intermittantium causam et earum genesim frequentius resonant in recentiorum scholis. Has ideò quoque sententias, saltè plurimas, cursim recensere operæ pretium est, ut ad modulum earumdem corticis actionem successivè metiamur.

Primò igitur, si cum *Villisio* hujusmodi causa refundatur in diathesim vel acrem, vel acidam sanguinis, succum nutritium, seu chymum non ritè subigentis, sed in materiam periodicè, citius quidem, aut tardius, fermentescibilem convertentis,

sat

sat erit, quòd China Chinæ absque ullâ excretionem talem diathesim emendet, cruoremque in nativam *crasim* quasi dulcorando reducat, sive ut eidem auctori placet, in novam quamdam fermentationem compellat.

Si secundò cum *Sylvio* succus pancreaticus, ob moram in ductibus pancreatis lateralibus obstructis nimium acescens, obice demum perforato, intrâ tenue intestinum, vitiosè cum bile illuc confluenta effervescat, cruorique per viam chyli periodicè instillatus paroxysmos febriles producat, sufficiet quòd China China, posthabitis evacuationibus, eidem succo pancreatico nimiam adimat aciditatem, vel motum ei naturalem reddat, viscidam forsitan pituitam in ductibus pancreatis lateralibus incidendo, ad hoc, ut idem succus liberè fluens, ac blandè cum bile effervescens, blandam quoque et naturalem in sanguine foveat fermentationem.

Si deniquè cum *Borello*, intermittentium causa ex nervoso potius, quàm ex arterioso genere petita, reponatur in glandulis obstructis ad apices nervorum appensis, undè succo nerveo, à materiâ aliquâ viscidâ ibidem detento, aciditas, vel alia quævis acrimonia accedat, vi cujus idem fermentescens, cerebro prius, mox et fibris cordis motricibus irritationem communicet, et exandescentiam febrilem successivè producat, illud à cortice præstandum erit tantummodò, quod auctor ipse pro curatione febrium exposcit, nempe quòd reserentur glandulæ, attenuatâ crassâ ma-

teriâ obstruente, et temperetur, seu diluatur fermentum, ut à naturâ ipsâ vel per sudores, vel per insensibilem, ut idem innuit, transpirationem, penitus dissipetur.

Tres istæ sunt potiores circâ hanc materiam sententiæ, quarum prima causam febris agnoscit intrâ ipsum sanguinem, altera extrâ illum in succis aliquot eidem refundendis, tertia deniquè in latice nervoso ab eodem dissito. Sed præter illas, sunt aliæ complures quæ iisdem, veluti matribus, videntur subordinari, et quarum, utpotè nonnihil diversarum, aliqua obitèr habenda est ratio, ut illis quoque operationem corticis ordinariam demonstremus congruere.

Sic opinioni *Borelli*, ut ordine inverso suas unicuique consentaneas referamus, affines sunt hypotheses *Mundii*, et *Cole*, febrium intermittentium causas in nervoso paritèr systemate, diversa licèt nonnihil via, quærentium; sed actum agere pergam, si hujusmodi placitis accommodare coner actionem corticis citrà ullam evacuationem febres fugantis, cùm ipse *Cole* peculiari capite, *de corticis Peruviani, circâ febres intermittentes sistendas, facultate*, hanc quoque circumstantiam minutim examinando, rem totam planè confecerit, imò ab ipsâ evacuationum sensibilium carentiâ hypothesim suam confirmare sategerit, ut ideò supervacaneum sit hìc idem repetere.

Sylvianæ autem hypothesi, cujus exemplar retroactis seculis velut in nube, delineare visus est

perspicacissimus inter humoristas *Fernelius*, cùm in mesenterio, pancreate reliquisque imi ventris visceribus, eorumque peculiari succo intermittentium focum agnoverit, quodammodò divinando, utpotè veris anatomes luminibus destitutus (non-dùm enim ductum pancreatis *Virsungus* detexerat, sicut nec lacteas inferiores *Asellius*, multòque minùs thoracicam *Pecquetus*, laticemve lymphaticum *Rudbechius Bartholinus* aut alius quispiam) Sylvianæ inquam hypothesi, cui subscribit *Graaf* et alii, consonant, imò et eandem ampliando, magis illustrant opiniones *Nigrisoli* et *Tozzi*, quorum primus in glandulis omnibus succos suos sanguini, sive mediatè, sive immediatè suggerentibus, febrium intermittentium mineram reponit: alter verò in succis paritèr omnibus astruit, ad tenuia intestina confluentibus, iisque vitiatis ac incongruè mistis, quin et in aliis fluidis, qui à glandulis lumbaribus ac mesentericis prodeunt, et chylo, atque allabenti lymphæ commiscentur; tandèmque concludit febrium fermenta, non modò ab his, quæ dictæ sunt partibus, sed ab innumeris penè aliis suggeri posse. Hujusmodi autem sententiis quàm benè quadret operatio corticis sine evacuatione contingens, vel exindè patet, quòd idem *Nigrisolus* usquè contendat, per actionem remedii febrile fermentum, absque eo quod per vim illud extrahere tentemus, tùm in ipso sanguine, quatenùs jam eidem accesserit, tùm in suo ipso foco, extrà vel ultrà sanguinem extinguì, sive nempè fermentum illud in ventriculo et in-

testinis (1), sive in glandulis remotioribus hospitetur.

Hypothesi verò Villisianæ, quæ plures habuit plaudentes, quàm assecclas, haud parùm conformis videtur opinio *Sydenhami*, qui totam ponit in sanguine, seu in illius particulis non probè assimilatis, febrium intermittentium ut et continuarum causam, licèt non mutuatis à chymo recenti, sed ab ipsâ minerâ sanguineâ pro novâ accessione suppe-

(1) Ex variis hypothesibus auctorum à *Torti* relatis, *Fernelii*, *Sylvii*, *Borelli*, *Mundii*, *Cole*, etc., febrium intermittentium sedem in abdomine ab iis locari vidimus; juxtâque cujuscumque opinionem, aut in pancreate, aut in mesenterio, vel secundùm *Borellum*, in glandulis obstructis, ad apices nervorum appensis; in eoque congruunt opiniones *Lasari Riveri* et recentius Præclarorum virorum *Bichat* et *Broussais*. *Riverus* enim, in libro de febribus putridis dicit: « In febrium acutissimarum et perniciosarum curatione, hoc diligenter advertendum, rarissimè eas fieri sine internâ et peculiari visceris cujusdam affectione, et plerumquè inflammatione. Et infra: Quod ad prognosin (febris hemitritæ) attinget, periculosa est ista febris et in eâ ventriculus, partesque nervosæ plurimùm afficiuntur. Dicit etiam cl. *Broussais*: Lorsque les causes d'irritation opèrent sur le système nerveux, il n'est jamais isolément affecté; c'est dans ses expansions, qui s'entrelassent avec les capillaires sanguins, lymphatiques, sécréteurs et autres, que les mouvemens morbides ont lieu. Ce fait est prouvé par l'augmentation d'action qui se remarque dans ces vaisseaux, quelque soit la région du corps affectée de névrose active. — *Examen de la doctrine médicale.* »

tiis. Eidem quoque quadantenùs videtur accedere ea, quam protulit *Jones*, quatenùs et ipse, si non puri sanguinis dyscrasiam, saltèm particularum aliquot intrà ipsum degentium, et ægrè cum ipso circulantium pravam habitudinem, nec non improportionem chymi partiumve illius crudiorum, nec benè subactarum, sed acescentium, et cum sulphureis sanguinis tumultuantium, pro causâ intermittentium accusat: mutuato tamen ex aliâ parte modulo suæ opinionis ab antiquis, eamdem causam in corporis habitu collocantibus, quatenùs et ille suprâ dictum febrile fermentum in eodem corporis habitu, sive in arteriarum extremitatibus hærere atque acescere statuit; illincque postea partibus sensibilibus primam vellicationem inferre, ut dein febrilem commotionem sanguini imprimat universo. Ad eamdem Villisianam propiùs adhuc accidit opinio *Sponii*, qui ex improportionatâ itidem chyli cum sanguine misturâ et fermentatione, febrium causam deducit, licèt radicem talis improportionis non in ipso sanguine collocet, ut *Villis*, sed in chylo, proptèr aciditatem eidem impressam à succo glandularum tunicæ pannosæ ventriculi, atque intestinorum, nec non à latice salivari et pancreatico, (circà quod cum *Sylvio* coincidit) intrà quas glandulas primariam fermento febrili sedem assignat. In quibus sanè sententiis pro febrium curatione, nil aliud à Chinâ Chinâ expetendum erit, nisi, si de primâ sit sermo, ut, semotiz evacuationibus, vel sanguini universo robur addat, undè faciliùs par-

ticulas miuùs assimilatas possit ille subigere, vel ut easdem haud satis subactas ad talem recipiendam actionem, sive coctionem disponat. Si verò sermo sit de secundâ, sat erit, si chylosim juvet, ac particulas ejusdem chyli crudiores, et ad motum segniores, quæ in extremis hærent, atque acescunt arteriis, ab acore contracto vindicet, et pari cum aliis velocitate circulationi restituat. Si deniquè sermo sit de tertiâ opinione, sufficet, quòd China Chinæ eamdem chyli aciditatem retundat, vel impediat, correcto glandularum ventriculi, et intestinorum fermento, ob nimium paritèr acorem peccante. Quæ omnia sine sensibili evacuatione obtineri facile possunt, ut fusiùs videre est apud eosdem auctores, Peruvianî corticis etiam patronos.

A vitiatâ paritèr digestionem, sive id fiat culpâ assumptorum, sive fermenti digestivi, remotiorem intermittentium causam in stomacho fabricari putat *Ettmullerus*, qui postea sensim in Sylvianam sententiam descendere non refragatur, licèt nec eam voto satisfacientem existimet, ut qui ordinatos febrium, recursus inexplicabiles censet, illorumque rationem se prorsùs nescire, ingenuâ et magno viro dignâ confessione fatetur. Si ergò prima tantùm ex allatis causa spectetur, suas in curatione febrium partes satis absolvat China Chinæ, si absque ullâ evacuatione digestionem simpliciter corrigat, et fermentum ipsum stomachi digestivum restauret. Quòd si spectentur causæ magis propinquæ ad mentem *Sylvii*, de his jam suprâ

facta est mentio, quantum opus est, et difficultas sublata.

Huic sententiæ affinis est alia, quam tradit *Mon-
ginotius*, fermentum febrile acidum adstruens, à
pravo chylo, vel alimentis assumptis suppeditatum;
ex quâ suppositione postea deducit, Chinam Chinæ
directè pravum ejusmodi fermentum in febribus
alterare, alienam illi naturam imprimere, illudve
destruere, et in nihilum redigere, ac etiam insen-
sibilitèr, si non sensibilitèr, è corpore eliminare.

Ità quoque *D'Acquin*, aliud acidum febrile sta-
tuens in sanguineis particulis, ab ipsis acquisitum
in venâ portæ, intrâ quam, velut intrâ amnem, len-
tiùs excurrant, in solo sale fixo Chinæ Chinæ verum
ejusmodi acidi correctivum agnoscit, nullâ postmo-
dum inde quæsitâ sensibili evacuatione: quam quo-
que multò minùs in suo systemate exigit *Blegnius*,
quippe qui autumat Peruvianum corticem stypti-
citate, et adstrictione suâ, sanguini justam particu-
larum cohæsionem, quâdam veluti constipatione,
redintegrare.

Sed et ex præcipuis saltèm hactenùs allatis opi-
nionibus, earumque veluti combinatione, ac com-
mixtione, suam peculiarem condidit cl. *Sacchus*,
fermenti febrilis radices constituens in obstructione
tali viscerum imi ventris, factâ ab humore viscido
et lento, quæ valeat sanguini per obstructam partem
transitum ad tempus impedire, donec, superato
obice à nisu ipsius cruoris, proptèr sui occlusionem
effervescentis, idem vicissim recurrat, et superetur

impedimentum, et in hoc quoque casu totum corticis Peruviani pensum erit, vel crassum illum humorem vasa obstruentem, et impulsui sanguinis validiori cedere solitum, immediatè attenuare, atque dissolvere, vel ipsi cruori tantam volatilitatem, et penetrationem injungere, quanta par est ad perterebrandum, superandum, vel omninò tollendum illud obstaculum.

Sententiam quodammodò huic oppositam visus est priùs protulisse *Barbette*, inquantùm, non in alicubi præpeditâ, ut *Sacchus*, sed in auctâ per omnes corporis partes sanguinis circulatione, febrium essentiam generalitèr constituit. Sed ex aliâ parte, cùm intermittentium causam fundet in pravâ chyli crudioris, bilis et succi pancreatici misturâ, et inde ortâ ejusdem bilis regurgitatione per cavam ad cor, patet, eum non longè distare à *Sylvii* placitis; adeòque sat esse, si China Chinæ tollat improportionem, quam ii succi inter se habent, ut dictum est: quaproptèr neque in istâ, sicut neque in superiore sententiâ, ullâ evacuatione est opus ad amovendam causam febris.

Multò minùs eâdem est opus in sententiâ *Dolæi*; licèt enim in quâcumque parte corporis solidâ, etiam in digito, febrium intermittentium somitem existere posse contendat, ordinariâ tamen lege, ab obstructione ductuum chyliferorum et stagnatione ipsius chyli, easdem intermittentes oriri decernit. Quo casu in promptu est dicere, sat esse, quòd China Chinæ in expugnatione fe-

brium absque eo quòd quidquam sensibilitèr excernat, ductuum chyli ferorum obstructions simpliciter aperiatur, et eidem chylo, ne in posterum stagnet, occasionem tollat; ut propterea vanum sit et amethodicum, velle ad fugandam simul febrem et evacuandam causam illius, eidem Chinæ Chinæ, quam cæteroqui summè commendat hic auctor, purgans aliquod admiscere, ut ipse nunquam, vim illius infringendo potius, quàm roborando commiscet, siquidem experientiâ testatur, per repetitam Chinæ Chinæ solventibus associatæ oblationem, vel nullatenus febres depelli, nisi per accidens actio diuturna febrifugi prævaleat viribus enervantis adjuncti, vel seriores saltè, debilioremque subsequi curationem, nisi ea per simplicem tandem impermixti corticis exhibitionem absolvatur, ut præmissis se junctim de more purgationibus solet contingere. Neque tamen in mitioribus intermittentibus hujusmodi methodum planè improbarem, si quid boni à solventibus solitariis cæteroqui observassem. Utcunque sit, ubi morbi benignitas det inducias, quilibet ad modulum suæ credulitatis potest hac in re sequi methodum, quæ sibi magis arrideat; non sic in casu arduo, ac præcipiti febrium perniciosarum, de quibus *libro tertio* sumus acturi.

Nulliusdeniquè sensibilis evacuationis necessitatem à Chinâ Chinâ excitandæ infert ingeniosa sententia famigeratissimi *Bellini*, ut quæ lentorem alicujus viscidii, sive ingeni sive adventitii sanguinem inqui-

nantis, pro causâ intermittentium statuit: hoc siquidem pariter casu sufficit, ut eadem China China solâ vi suâ abstersivâ lentorem illum, seu viscidum lentescens incidat, abstergat, et ultrò urgeat, illudque sic fluxile redditum motui sanguinis universali, ac æquabili sensim restituat, nullâ sensibili factâ suprâ ordinarias illius evacuatione.

Omnium verò expeditissimam, et operationi corticis facillimè adaptabilem, sed intellectui discendi cupido minùs acceptabilem hypothesim prodidit experientissimus *Morton*, vir longè felicior in usu remedii, quàm in explicandâ illius actione, vel abditâ febrium expugnatarum causâ: Putat hic (præeuntibus quodammodò *Bado*, *Protospatario*, et *Josepho Donzello*) Chinam Chinæ esse verum antidotum, adeòque sine ullâ sensibili evacuatione fermentum febrile corrigere, seu mavis extinguere; quo nomine specioso occultam verè, ac admirandam illius virtutem designare contendit. Ab antidoto, de quo nequit reddi ratio præter experientiam, progreditur ad statuendum, febrile fermentum esse verum sui generis venenum, seu, ut inquit, *delecterium quid in spirituum systemate delitescens, quod adinstar fermenti eos adoriens, atque æstro primùm exagitans, deindè humoribus, secundo quasi momento, varias mutationes, atque qualitates morbosas, nobis sensibiles impertit*. Quâ explicatione, obscuriore adhuc re ipsâ explicatâ, vix ulla pariter potest reddi ratio essentiæ ipsarum febrium, vel periodorum, vel causarum earundem.

Subjectum autem talis veneni, ut dictum est, solos spiritus esse asseverat, et hanc ipsam assertionem lætatur in uno *Protospatario* se reperisse, quin et in eandem sententiam conatur alicubi *Badum* trahere, eò quòd nomine antidoti utentem videat, licèt planè adversantem in re videre potuerit, quin et asserta *Protospatarii* sic opinantis expressè refellentem. Reverà tamen in hâc parte *Protospatarium* ipsum *Campanella* præcessit, causam videlicèt cujuscumque febris, primam et antecedentem esse quærendam, non in humoribus, inquiens, sed in spiritibus accendentibus, et agitantibus humores.

Quòd verò iidem spiritus miasmate quoque venefico inficiantur in febribus intermittentibus, etiam *benignis*, singularis, quod sciam, est opinio *Mortoni*, atque, si lubeat, etiam *Protospatarii* (siquidem iste nomen *miasmatis* pro vero veneno, et non pro quâcumque spirituum, minimè quidem vitalium, sed mixto cuilibet nullatenùs etiam viventi, inexistentium excandescentiâ, morbosam massæ sanguineæ fermentationem suscitare aptâ, usurparit, quemadmodùm, ex dicto ipsius *Protospatarii*, *Donzellus* explicat) ni velimus illis adjungere eundem quoque *Josephum Donzellum*, *Protospatario* quodammodò subscribentem, necnon etiam *Talbotium*, qui, referente *anonymo* quodam aliàs citato, dicere consueverat, corticem *Pcruvianum* operari adversùs febrem, ut antidota adversùs venena. *Ayant reconnu*, sunt illius verba, *par les expériences innombrables, qu'il avoit faites en An-*

gleterre et en France, qu'il opérait, videlicet China China, sur les fièvres ainsi que font les antidotes contre les venins, lorsqu'ils sont donnés à temps : quod quidem verum est, quoàd effectum clarum in se, sed obscurum in causâ, et productionis modo. Mortonus tamen, dato quod obscuriùs, aut infirmiùs (ut et alii eundem prægressi) febrium causam exposuerit, satis tamen viriliter suprâ eos utilissimam illarum curationem, per usum animosio-rem atque methodicum Peruviani corticis, indigitavit, ut suo loco videbimus. Pro nunc ex istâ hypothese, non secus ac ex cæteris omnibus hucusquè recensitis, sufficiat colligere cum illis auctoribus, nullam requiri pro fermenti, aut miasmatis, ut vocant febrilis extinctione evacuationem, quemadmodum in omnium antidotorum, et communium alexipharmacorum usu, pro edomando malignarum febrium veneno, sicut et in administratione reliquorum febrifugorum vegetabilium, quæ dicuntur specifica, pro eodem vincendo intermittentium fermento, qualecumque illud sit, quotidie succedit.

Nec alitèr quidem potest evenire; nec alitèr quoque potest medicus se gerere in praxi. Etenim, si ulli unquàm specifico febrifugo locus est (loquor de quovis communitèr recepto) semper adversùs eum militare poterit ratio, quòd causam febris non evacuet, sed intùs detineat. Licèt enim plures præmissæ fuerint purgationes, aliæve evacuationes artificialitèr institutæ, quandò tamen post eas omnes febris perseverat, ità ut pro sui depulsione, aliquo

specifico indigeat, semper stat, quòd causa febris perseverantis perseveret et ipsa, et consequentèr, quòd à specifico illo nil evacuante non expellatur, sed intùs detineatur. Si ergò aliquandò non tenet hujusmodi ratio, quandò scilicèt alia præscribuntur specifica, sive id dicatur non officere, eò quia sufficientèr jam purgatus sit patiens (cùm tamen haud ità purgatus sit, quin adhuc febricitet, causâ videlicèt febris nondùm eductâ) sive ob aliam quamvis emèndicatam excusationem, quare sub iisdem excusationibus eadem ratio seponi non poterit, ut citrà culpam Peruvianum specificum efficacissimum possit exhiberi, quemadmodùm alia citrà culpam quotidie exhibentur imbecilliora, et inania sæpè specifica? Satiùs ergò sit, evacuationes nil proficientes dimittere, utpotè parùm congruentes cum experièntiâ et minimè cum allatis opinionibus vulgatorum hujusce materiæ scriptorum.

Vulgatiores consultò dixi post Galenicam sectam, quos nuper retuli de hac materiâ scriptores; cæteros, utut doctissimos, sed vel minùs notos, vel minùs acceptos, libentèr prætergressus, non ideò cum Paracelsistis, aut Helmontianis hìc mihi res est; quorum tamen ideis apprimè congrueret actio corticis sine sensibili evacuatione exercita, sive illa dicatur sulphur, et nitrum peccans corrigere, sive archæi indignationem compescere, sive alio simili modo turbas febriles componere. Eos namque præcisè selegi, qui ab exoletâ humoristarum scholâ dèflectentes, usquè tamen in

perturbatâ, vel assiduè ex principiis intrinsecis, vel periodicè extranei cujuspiam laticis affluentis culpâ, particularum sanguinem integrantium dispositione, ac texturâ, et in vitiato proindè multifariâ earumdem motu, solidis secundariò tantùm affectis, febres omnes, quas essentielles vocant, et conjunctam illarum causam, seu fermentum ipsum febrile mecum reponunt. Supervacaneum quippè credidi, pro eâdem actione corticis nil nos cogentis excernere, in novissimo *solidorum*, ut vocant, *systemate* apologiam texere; tùm quia hujusmodi remedium unanimi consensu amplexantur in febribus antedicti systematis conditores primi, eorumque sequaces; tùm quia reverà sufficit in eorum sententiâ, quòd cortex, absque eò quòd quicquam sensibilitèr deturbetè corpore, congruas vasorum oscillationes, vel mediatè, vel immediatè, restituat, eisque adnexum fluidorum æquilibrium et harmonicam circulationem.

Neque verò miretur quispiam, qui me à vacuis quibuscumque vocabulis, rem minimè declarantibus, cæteroqui alienum sciens, in designandâ tamen intermittentium causâ, metaphorico *fermenti* nomine etiamnum utentem videt: quò certè nomine nil hodiè magis exosum mechanicis, iis præsertim, qui antedictum *solidorum* systema profitentur, cujusmodi sunt famigeratissimi viri, *Pitcarnius*, et *Boerhaavius*, necnon doctissimus *Hecquetus*, mihi plurimis humanitatis, ac benevolentiae suæ argumentissemper colendus, alique non pauci,

tùm transalpini, tùm cisalpini scriptores, quibus omnibus præclaro suorum theorematum lumine præivit (ipsis quidem non diffidentibus) celeberrimus Italus noster *Laurentius Bellinus*. Ne inquam præmaturè nimis quispiam miretur de servatâ hucusquè à me, et in posterum etiam servandâ *fermenti* nomenclaturâ; sciatque idcirco, malle me inscitiam meam ingenuè prodere, dùm vocem *fermenti*, quidpiam mihi reapsè ignotum connotantis, usurpo, quàm provinciam novam suscipere, cui plenè administrandæ sim impar; non quidem quòd systema hujusmodi planum non sit, et captu facile vel iis ipsis qui geometricen vix à limine salutârunt; sed quia per illud, etiam usquequaque adoptatum, nondùm satis doceor, ut explicandis sufficiam *ordinatis* intermittentium *periodis*; quo sanè defectu laborat et illud systema non minùs quàm cætera. Cùm ergò per illud reddi satis nequeat, aut explicari ratio periodi, consequens est, ut neque satis explicari queat ratio causæ, quæ cùm obscura, et inexplicata remaneat, æquè potest appellari *fermenti* nomine, ac quovis alio, dummodò eo nomine causam eamdem nos indicare tantùm, non explicare fateamur. Insuper cùm causa hujusmodi, seu primum principium motûs febrilis, quodcumque illud sit, à fluidis primariò affectis de more, ut suprâ, petendum putem, non autem à solidis, nisi forsàn in symptomaticis febribus; idcirco systemati *fluidorum* inhærere satius duxi, quàm *solidorum*, etsi hoc ipsum (quotiescumquè

per illud peculiari quoque fluidorum texturæ quidpiam activitatis tribuatur, ut à scriptoribus medico-mechanicis potius quàm mechanico-mediceis, solet attribui) laude non modicâ dignum censeam, illique in sensibili explicatione rerum verè sensibilibus explicabilium, quoàd plurima libentè assentiar.

Caveat nihilominus (siquidem in hanc messem datum sit quasi furtim, et cursim obrepere) caveat, inquam, qui artem verè medicam satagit exercere, ne ad lectulum ægrotantis accedat mathematicus nimium, seu mathematicus magis, quàm medicus, ni fortè sibi gloriosius putet meliorem in medicinâ faciendâ mathematicum dici, quàm medicum. Rationalis equidem medicinæ professorem omnis esse matheseos expertem, nedùm indecorum censeo; sed et hominem ejusmodi, nisi acriter admodum polleat ingenio, facile dixerim ad ritè capessendas omnes physico-mechanicas artis notiones haud sufficientè dispositum. Alium tamen inter universa instructum mathesi, sive junior ille sit, sive in virili etiam constitutus ætate, monitum velim, ne nisi post exercitam assidue quadragenariam in rebus medicis praxim, crebramque, ac sedulam institutam sine præoccupatione observationem, rationali medicinæ mathesin applicet; siquidem unâ tantum ex his conditionibus deficiente, res, nullatenus ex voto succedet. Hinc fit, ut passim præ medico plus mathematicis, quàm medicis disciplinis imbuto, excellat rudior: sed in operibus artis magis versatus, diagnosimque imprognos, et curationem

curationem morborum per triviales indicationes, ex ipsâ rei naturâ, et observationes depromptas, præ illo felicius absolvat, etsi eorundem causas, et productionis modum ad regulas geometricas nequeat explanare: quod ex adverso ingeniosissimè præstabit bonus geometra: hic ipse tamen, utut elegantiorum reddere sit aptior rationem eorum, quæ evenêre postquàm evenerint, et quæ profuêre, aut obfuêre, postquàm profuerint, aut obfuerint; certissimam nihilominùs fateatur necesse est præcognitionem à priori, et præordinationem eorum, quæ sunt eventura, profutura, vel obfutura: quo facilè evenient, ut fortè medelam morbi (utinàm satis cogniti) per indicationes à remotissimis suæ matheseos fontibus conquisitas tentet absolvere, ad quas tandem implendas, vel media deficient, vel si præstò sint, sæpesæpiùs aberrabunt à scopo. Ob id ipsum (si exemplo rem liceat illustrare) in sanandis infirmis cujuspîam torrentis aggeribus, vel dirigendis tortuosis ejusdem fluctibus, præ viro mathematicis disciplinis imbuto nonnunquàm præstat rudis homuncio omni jejuna mathesi, sed ad ripas fluminis natus, et diutinus illius loci incola, qui nempè solertem observationem adhibuerit ad cuncta, quæ sunt variè tumescentibus, et variè detumescen-
tibus aquis. Id equidem (fateor) non accidit ob ineptitudinem principiorum viri mathematici; hæc enim in se ipsis vera sunt, et infallibilia; sed ob applicationem eorum haud satis appositè institutam, seu mavis ob implexam, nec satis dignoscibilem,

rei, cui applicantur, materiam, et ob diversas, incertasque circumstantias concurrentes in facto: neque enim mathematicus, quantumvis peritissimus, mistos, reflexos, repercussos, et intercisos aquarum fluentium motus, ac impetus, fluctusve ipsos interiores diversis lineis se decussantes, et intersecantes, potest ad leges mechanicas exactè metiri, sicut nec resistentias lateralis soli hìc illic varias, multòque minùs inæquales hìc illic alvei inclinationes; propter quas circumstantias haud satis patentès, factumque ipsum occultè variantes, torrens ipse per artem nonnunquam coactus rectà progredi, vetèremque alveum deserere, haud longo temporis tractu per absconditas, ac fermè imperscrutabiles, sed veras hydrostaticæ leges, obliquo, ac tortuoso cursu spontè reddit ad consuetum iter, argilla, et sabulo illud idem incile sensim opplens, ac obruens, quod planum, rectum, declive, et amplum illi non multò antè mathematica aperuerat industria; quem sanè eventum expectationi contrarium à rudi homine per solam experientiam docto tempestivè prævisum, constanterque prænunciatum ipsemet non semel vidi, nec sine meâ admiratione, alienoque dedecore ipsâ re comprobatum. Propterea tamen nequaquam inficiabor, quin datâ utrinque paritate observationis per diutinam experientiam comparatæ, rudi quovis homine, utut experto, rem longè meliùs sit confecturus bonus geometra.

Idem datâ proportionè dicas de re clinicâ; plura

quippe sunt in physiologicis etiam sensibilibus, quin et in ipso architectonico humani corporis ædificio, nedùm mathematicis omnibus, verùm et anatomicis ipsis etiamnum incomperta et ex comper-
tis obscura non pauca; plurima in pathologicis circa morbos, eorumque symptomata et causas fermè incomprehensibilia; innumera in semeioticis, iis præsertim, quæ ex *Hippocratis* observatione præsagia respiciunt, admirabilia potius, quàm perscrutabilia; infinita propemodùm in therapeuticis, nempè in remediorum inventione, et compositione incertâ, sive materiam eorum consideres, sive usum ipsum, propter circumstantias etiam identidèm diversas, ancipitem: circa quæ profectò omnia expertissimus mathematicus sine consummatâ in rebus medicis praxi, non potest quin ingeniosè nugetur. Cuncta hæc ergò priùs experiatur, expendatque exactè prudens medicus mathesi instructus: dein sobriè, temperantè et cautè, quantum fert artis incertitudo, et observatio phænomenorum illius, rationali medicinæ mathesin applicet.

Certè animadversiones istiusmodi ex diuturnâ naturæ, artisque observatione prognatæ, impulère me non parùm, ut systemati fluidorum semper adhærerem in praxi: ubi enim contendatur, quòd in hydraulico-pneumaticâ humani corporis machinâ, cui præter vectes, trochleas, funes, tubos, fistulas, incernicula, cola et organa hujusmodi, insunt insuper diversi generis fluida, quibus intercluditur spiritus summè activus, capaxque tribuere illis om-

nibus momentum, et vim ad exercendas functiones suas idoneam, ubi inquam, contendatur, quòd in machinâ sic conformatâ eadem solida primariò ex se ipsis se ipsa moveant, ac exerceant, et ab ipso exordio se movere cœperint, ac exercere, sintque ea tantummodò, quæ fluida urgeant, triturent, ac pinsitent; neque quicquam ferè aliud præstent fluida ipsa, nisi suum esse fluxile, et fluxile quidem à solâ solidorum vi quaquà versùs motum, et actum, plura pro certis in hac hypothesisi supponere necesse est, quæ talia fortassè non sunt, quæque tamen nisi pro certis assumantur, mathesis nequit per medicinam universam tam latè spatari, ut eam architectonice regat, efficiatque, ut conjecturalis hæc ars, quæ simplici est, ut plurimùm probabilitate, et nonnumquàm divinatione contenta, sepositis, neglectisve humilioribus conjecturis, quas longus usus ad cujuspiam certitudinis gradum evexit, valeat pari passu cum mathesi procedere, illive arctè semper inhærere, aut ancillari quasi pedisequa: etenim si vinculum hujusmodi nimium sit, ac fermè individuum, res faciliè inauspicatò finietur propè lectulum ægrotantis, etsi in exortu suo speciem prætulerit magistrali è cathedrâ auspicatissimam. Ubi verò solidorum motus à liquido fluidorum elatere dicatur emanare, et ab eodem primitùs emanasse, ità ut eadem fluida non merè passivè se habeant, meliùsve, aut infirmiùs operentur præcisè per hoc, quòd magis, vel minùs fluxilia sint, sed radicitùs, et principalitèr per hoc, quòd talem, vel talem sor-

tientur texturam intimamque compagem, latior rei medicæ campus patet tam pro intelligendis ordinariis, quàm pro corrigendis extraordinariis naturæ phænomenis. Licet enim secundum congruam, vel incongruam sanguinis, aliorumque laticum fluxibilitatem, et secundum proportionatum, vel improporcionatum eorundem motum, exerceanur immediatè secundum naturam, vel præter naturam solidorum actiones; attamen proportio, vel improporatio isthæc à justâ, vel alteratâ crasi, seu mavis determinatâ compage, ac texturâ ipsorum fluidorum radicitus pendet; ad quorum proindè alterationem, ac restitutionem in pristinum statum, si ab eodem deflexerint, tota convertitur medicinæ intentio, et opera, cum non nisi mediâ fluidorum correctione possint medelam suscipere ipsæmet solidorum alteratorum fibræ. Quâ dubio procul in re feliciter peragendâ, opus est ut mathesis arti medicæ quodammodò famulari non renuat, ut reverà quadantenus decet, nec nisi usquè ad certos progrediatur limites, subsistens deindè nonnihil, ac locum conjecturis concedens, ubi progressui verè scientifico, ipsique adeò mathesi non est, ut sic dicam, commensurabilis proteiformis materia.

Non tamen ideò sibi quisquam persuadeat, me nullam in ipsis fluidis, et naturalibus eorum motibus mechanicen admittere, quin potius eam elegantissimam in iisdem suppono, sed nobis inexplicabilem, ob varias, et multiplices particularum fluida nostra, præcipuè verò sanguinem, naturaliter componen-

tium, et mole, figurâ ac pondere differentium, combinationes, multòque magis ob diversos, et inistos earumdem motus in unum æquabilem conspirantes. Longè minùs ad regulas mechanicas explicabilis est vitata in febribus, ac interrupta earumdem particularum dispositio, ac textura: cum enim tunc sanguis præcipuè, ob errores in rebus, quas non naturales vocant, et ob præpeditas subindè secretiones, confundi incipiat, ac tumultuari, simulque alicubi lentescere, vel torpescere, alicubi exorbitare, et inflari, dubio procul præposterì hujusmodi motus certis regulis nostræ mechanices non sunt determinatè explicabiles; sed indeterminatè solummodò, ac generalitèr, quippè non à solidis primariò affectis, sed à fluidis intestino tumultu commotis pendentes, à fluidis, inquam, ipsorum tunc solidorum vim vi propriâ superantibus, ac in usum ab officio suo sæpiùs alienum cogentibus. Cæterùm in statu naturali mechanicam sanguinis, et succorum præcipuè alibilium, dispositionem, occultam licèt, talis elegantix, ordinis, ac dignitatis reputo, ut in uno *vitalium fluidorum* mechanemate intimo, nobis abscondito, latere credam principium illius mechanices, quæ solis adscribitur solidis, inquantùm scilicèt solis *vitalibus* fluidis æthere et aere turgidis, radicitùs saltèm, et primitùs inesse reor principium illud viventibus omnibus insitum, quòd negari æquè, ac explicari non potest, et ab Hippocrate dicitur *impetum faciens*; quodque per participationem intimam à fluidis derivatur in solida,

ut in solidas molendini rotas derivatur motus ab aquâ jugitèr influente; qui sanè molendini motus æquè diceretur illius rotis communicatus ab eâdem aquâ, aliundè licèt perennè adveniente, si molendinum talibus organis instructum foret, quæ valerent vi sibi ab aquâ motrice, principalitèr saltèm, impressâ, eandem aquam ultrò pellere eo nisu, qui potis esset illam reduci gressu in ipsum molendinum artificiosâ circulatione referre. Machinæ humani corporis hydraulico-pneumaticæ, cui fert suppetias assiduas inspiratus aer, et affluens chylus, haud longè dispar est ratio: eandem siquidem vim, quam ratione suæ gravitatis, majus semper in descensu momentum adeptæ, pro movendis solidis molendini partibus habet aqua, per apertos, ac liberos canales excurrentes, eam habet sanguis intestino spiritu pollens, ac intrâ canales undiquè clausos coercitus, assiduoque torrentis insequentis appulsu ultrâ venarum valvulas, regressum vetantes, adactus, ut medio spiritu in nervos transfuso, ipsi demùm cordi eundem sanguinem impulsuro, quam à principio vim dare cœpit, indesinentèr pergat suppeditare. Ad normam itaque collationis hujus, aliarumve elegantiarum, quas subministrare possent tot hydraulica, et pneumatica simul, quæ passim visuntur in aquis artificiosè ludentibus, ingeniosa spectacula, quibus quoque continuatus, hinc flatus inmissi, illinc aquæ subeuntis influxus, eam quodammodò diuturnitatem posset impertiri, quam machinæ nostri corporis impertiuntur hinc inde-

sinens acris, illinc repetita alimentorum ingestio; ad normam inquam crassiorum hujusmodi artefactorum facillè dixerim, proportionem hinc inde habitâ, omnem vim suam motricem, suumque intimum elaterem à solis fluidis vivifico spiritu imbutis mutuari (animâ quidem immortalī, nunc jubente, nunc etiam insciâ, etsi jugiter informante) fibras ipsas oscillantium vasorum, et contractilitate ab ipsis fluidis medullitūs receptâ, fluida eadem ulterius urgentium; non autem fluida (si rectè conjicio) in circulum acta merè passivè se habere, ut à solis solidis, tanquàm à motoribus sibi prorsus extrinsecis, primam originem sui motūs agnoscant.

Haud equidem diffiteor, mutuum dari inter solida, et fluida actionem, et reactionem, et à justâ proportionem impulsûs, et resistentiæ inter utraque, emergere congruam naturalium actionum habitudinem, ab æquilibrio virium, et potentiarum hujusmodi resultantem, ut ab earumdem virium improportionem resultant actiones morbosæ, ac læsæ; nihilominus, quamvis ad eas concurrant mutuum tùm solida, tùm fluida, atque idcirco non tam facillè videatur in simultaneo hoc, et utrinque necessario concursu decernere, cui debeantur primæ; sermè non dubito, quin intrâ corpoream animalium machinam principium motūs sit petendum à fluidis primò actuantibus solida, à quibus deindè sic actis *diuturnitatem* sui motūs ipsa fluida recognoscant, et sic deinceps vicissitudinario utrinquè subsidio: intelligendo semper nomine *fluidi* quidquid actu

fluit, vel aptum est fluere; cùm cœteroqui me non lateat, prima ipsorum fluidorum componentia solida esse; quod tamen veræ fluidorum denominationi nil detrahit, quemadmodum nil officit veræ solidorum appellationi, quòd solida ex fluidis sic compositis fuerint à principio suo coagmentata: notum est quippè, solidiores quasque humani corporis partes ab exordio fuisse in embryone mollissimas, mucosas, et fluxiles; cùmque in adulto nutriantur illæ, et conserventur assiduè in suo vigore à fluidis, ex illis quoque credendum est, fuisse conflatas, primamque suam vim systalticam et oscillatoriam à fluidis recepisse, eamdemque ab illis per influxum perennem jugitèr mutuari, animâ semper, quandiù corpori jungatur, mechanicos illius motus, saltem quos ipsa imperat, modo ineffabili per spiritus exercente. Hunc ergò ordinem in movendâ universalitèr humani corporis machinâ libentèr dixerim à naturâ assumptum, et constantèr servatum à primâ ipsâ humani cujuscumque fœtûs conformatione usquè ad interitum illius, sive deindè prima hæc conformatio dicatur fuisse coæva mundo à principio creationis illius, et nova tantummodò quotidie nobis apparens per solam *evolutionem*, sive *explicationem* partium jam constructarum, latentium in ovo muliebri, latente paritèr cum prædecessoribus omnibus, et cum totâ posteritate nasciturâ æquè ac non nasciturâ in primæ parentis ovo, specie integrâ etiam possibili turgido, ut post *Malebranchium*, opinantur neoterici non pauci, iique doctissimi;

sive reverà in quocumque humano conceptu fabrefiat de novo structura ejusdem corporis, magisterio quidem haud planè explicabili, sed tamen mechanico, et verò, ut ego libentiùs opinor, utque magis cohærentè fert, quod nuper innui, fluidorum systema, cui superstructam volui therapeuticen hanc meam ad febres intermittentes, ut et aliam compendiarium, quam præ manibus habeo ad continuas; siquidem hanc ad umbilicum perducere sinant vires, quæque pluries ab opere manum dimovit lubrica nimium, et labilis valetudo.

Cæterùm etsi vulgato *fluidorum* potiùs, quàm *solidorum* systemati adhæream, iterùm fateri non renuo, plura in postremo quoque reperiri, tum laudabilia, tum ingenuorum assensum promerentia: usquequò enim possumus sensibiliter, et mechanicè progredi, dubio procul faciendum, dummodò caveamus, ne machinam aliter ac ea est, constructam, vel motam nobis fingamus, eamque ideò nostris aptemus regulis, non regulas ipsæ machinæ, ut omninò deberet. Sic exempli gratiâ dum in eo systemate ablegantur *fermenta* (quæ re et usu verè sint talia) ab opere naturalium secretionum, quotiescumquè sine hujusmodi fermentis, per solam secernentium organorum, et liquidorum secernendorum dispositionem, eadem secretiones commodè queant explicari, profectò hæc opinio alteri anteferenda, quippè magis consona simplicitati naturæ. Quòd si fortè hujusce modi secretionum opus magisterio, vel analysi fièret veluti chy-

micâ , cui præter dispositionem instrumentorum , suis , ut sic dicam , opus esset igniculis resolutoriis , saltèm occultis , eo casu parùm differret à fermentistarum hypothese mechanica hæc explicatio ; siquidem ipsi fermento pistorios suos igniculos , ipsisque igniculis peculiarem suam mechanicen inesse nullus dubito , quæ videlicet panis massam , ejusque particulas sibi arctiùs invicem adhærentes à nimio contactu liberat , atque disponit , quò faciliùs in stomacho subigantur , et vertantur in chylum.

Atque in hoc quidem opere , quod digestionis est , non secretionis , esto quòd minùs rectè usurpetur *fermenti* nomen , cui meliùs substituitur vox *menstrui* ; attamen quidpiam aliud ad hoc munus peragendum requiri præter ventriculi , et viscerum circumprementium motum , cibos triturantem , pinstantem , et comminuentem , rationi consentaneum videtur. Certè sola saliva in masticationis actu cibos solidos vix dentibus contritos ità dissolvit , ut eos non æquè dissolveret , inertiquopiam liquore madidos , pistillum ullum in ullo mortario ; quamobrèm salivam saltèm , et probabiliter alios latices salivæ congeneres in ventriculum influos , et menstrui cujusdam gerentes munus , eandem dissolutionem principaliter efficere , et promovere crediderim , ut leguminum coctionem faciliorem reddit non tam leguminum eorundem in lebetes ferventium , ac susdequè actorum tumultuaria agitatio , quàm prævia eorum maceratio in lixivio dulci : quidpiam namque lixivio analogum inesse salivæ , aliisque suc-

cis, existentibus in ventriculo, et intestinis, præsertim tenuibus, pro ciborum chylicatione, persuasum habeo; vixque quicquam ad hoc præstare autumo actionem viscerum circumprementium; quam tamen minimè inficior, conferre nonnihil ad ulteriorem chyli jam elaborati attenuationem, primasque tenere in adjuvandâ, et promovendâ protrusione illius in proximas lacteas. Vix enim adduci possum, ut credam, prædicta legumina integra cum corticibus deglutita ab animalibus pennatis, ne dicam lapillos, et limaces, ipsumque adeò ferrum, posse per simplicem ventriculi, et adjacentium viscerum compressionem ac motum, in chylum redigi absque menstrui alicujus concursu, quod actione suâ in cunei morem exercitâ, intimam earum rerum solutionem efficiat, saltèm ut solutionem colorum efficit bilis, quæ crassiora ipsius chyli recrementa naturalitèr solet fluxiliora reddere. Hujusmodi *menstrui* sublato subsidio, difficile est, intrâ ventriculum debitam chylicationem fieri, quantacumque vis extrinsecùs premens per potentias mechanicas, in corpore nostro cæteroqui validissimas, ac admirabiles, superpositis musculis, et circumpositis visceribus tribuatur. Pari ratione difficulter crediderim, ab eâdem *mollium solidorum* actione et motu, posse peragi in ventriculo hominis dissolutionem et chylicationem ovi gallinacei ad duritiem cocti, et detracto tantùm putamine, ac investiente, quippè asperiore pelliculâ, integri deglutiti, (quod ab helluonibus nonnullis

joci gratiâ non semel peractum vidi) nisi dissolvens aliquod *menstruum* in potiozem causam hujusmodi effectus vocetur. Cujus profectò rei conjecturam augent retrimenta ipsa, et sæces per alvum excretæ, nihilque propemodùm de manso cibo referentes, tam in volucris, et quadrupedibus, quàm in hominibus. Idipsum, inversâ regulâ, videntur confirmare alimenta, quæ in lenterîâ et cœliacâ passione, imò et in nonnullis quandoquè febribus, inconcocta redduntur, etsi motus molaris ventriculi, et actio pinsitantium viscerum, ac prementium musculorum in suo vigore maneant, vixque, quoad solida, trahi possit in partem culpæ, fibrarum pylori inservientium laxitas quædam; nisi ab omnimodâ illarum paralyti velimus harum ægritudinum causam gratis emendicare. Cuncta tamen hæc, et quotquot ex antedictis physiologiam respiciunt, nolim ità lector accipiat, ut me illis planè acquiescentem putet: non enim tam facile mihi prætereunda est plurium illustrium virorum, et geometrarum aliter sentientium auctoritas; in quorum tamen castra me nondùm sinunt descendere, donec melius erudiar, non modò aliorum plurimùm in physicis, et mathematicis haud minùs illustrium virorum mihi faventium auctoritates, verùm et plurimæ, nescio an rationes naturales dicam, an præoccupaciones intellectûs mei, quas aliquandò forsàn in medium proferam, dummodò vita, et otium suppetat, easque vel refellam ipse, si à probabilitate alienas agnoverim, vel, si judicii tantùm

ancipitis, sanioribus expendendas, et ne hiscens quidem, castigandas dabo. Jam verò de his satis, quæ hujus loci non sunt, nisi quatenus *fermenti* nomen à me in' febribus metaphoricè usurpatum, et cæteroquì ubi non benè sonat, aut ubi superfluit, rejectum, longiusculæ huic digressioni occasionem præbuit.

CAPUT VI.

Theoremata ex diversarum opinionum examine, aliaque cogitata circà intermittentium originem. Indè usus *Chinæ Chinæ* stabilitur absque ullâ necessitate insignis evacuationis.

Ex collatione vulgatorum opinionum hactenùs allatarum idem dicendum de similibus, quæ possent afferri: (1) quarum unicuique quædam plùs

(1) In totius hujusce capitis decursu, modum agendi *Chinæ Chinæ* in enodandis febrium intermittentium causis proximis, ipsisque debellandis, animum intendit *Torti*. Successivis temporibus, innumeræ vulgatæ sunt hypothesés, quarum dissensio illas causas nunquàm penitùs comprehendi ultramodùm probat. Autorum qui de istis affectionibus scripserunt, opiniones breviter investigemus.

Huxham censet causis prædisponentibus febrium intermittentium fibras relaxari, transpirationem cutaneam perverti, quod sanguinis lentorem gignit, et inde obstructions, in ultimisque ramis stagnatio gignuntur: hæc opinio refelli non meretur; etenim cum sudor sæpè copiosus accessum febrilem sequatur, primo accessu obstructions reserarentur; undè febris finem obtineret.

minùs inest veritatis portiuncula, licèt earum nulla rem integrè complectatur, crediderim, erui posse

Boerhaave et *Vanswieten* aiunt : „ causa proxima febrium
„ intermittentium constituitur viscositas liquidi arteriosi, fortè
„ et nervosi tam cerebri quàm cerebelli, cordi destinati. „

Pringle febres intermittentes à fibrarum laxitate, humorum-
que propensione ad putredinem pendere concludit ex causis an-
terioribus : attamen hypothesim de febrium naturâ se nullam
statuere fatetur.

Cullen qui intermittentes aut remittentes (non immeritò qui-
dem fortassè) omnes febres esse arbitratur, inertiam cerebri,
ex quâ omnium functionum procedit debilitas, sed præsertim
in actione minutâ superficiiei vasculorum sistens, pro causâ
proximâ febrium intermittentium habendam esse contendit :
ait enim in spasmò à causâ quâdam cor arteriasque irritante
producto, totum accessum versari; spasmusque ac frigoris
accessum esse naturæ conamina morbi sanationem promotura.
Vidimus ergò spasmus à debilitate procedentem; vidimus
causam à suâ naturâ alienos promoventem effectus; quæso an
hæ ideæ insociabiles conciliari possint?

Cel: J: F: Franck his verbis de naturâ intermittentium
suam exprimit opinionem : „ quæcumque verò intermittentes
„ legitimas causa produxerit, non unica hæc dicenda, licèt
„ effectus, quem plures causæ habere queunt, specificus esse
„ videatur. Peculiarem generis nervosi morbum intermittentes
„ constituere docet actio purgantium, venæ sectionis, quæ fe-
„ brem jam cessantem frequentissimè revocant; docet pathe-
„ matum animi ad gignendas, reproducendas intermittentes ap-
„ titutio; docet corticis Peruviani ex astringente, amaroque
„ principio minimè derivanda mira actio, opiique virtus; docet
„ observatio facilioris, quo tempore mulieribus menstrua im-

generalia quædam asserta sat probabilia, quæ Peruviani corticis usui plurimum conferre, illiusque actioni

» minent recidivæ, et hujus in horam, quâ pridem accessio
 » fiebat à minimis causis derivanda incidentia, et tandem il-
 » lorum quæ imaginationem ferunt, ineptissimorum aliàs
 » remediorum, amuletorumque probata credulis potentia. »

Celeb. Pinel, typum intermittentem ut symptoma febribus variorum ordinum ligatum considerat, undè febris intermittens *mucosa*, *biliosa*, *adynamica* procedit. Discipulus ejus *Fiseau* huic opinioni assentit; attamen, febrem intermittentem accipit simplicem quam *Selle nervosam* appellavit.

Asserit *Cel. Broussais* brevem congestionem febrium intermittentium essentiam constituere; intermittentes tùm benignas tùm perniciosas inter se tantùm quoàd formam, causarum quidem intensitate obnoxiam, discrepare.

Auctores articuli: *fevres*, *Dict. des sciences médicales*, causis intermittentium perpensis, illas systematis nervosi morbum esse arbitrantur; hæ verò causæ, ut suprà diximus, inflammationes gignere possunt.

Quamvis his opinionibus nec adscribere, nec ullam de naturâ intermittentium proponere sententiam nobis veniat in animum, hæc tamen in mentem haud inutile revocabimus, illas viscerum interiorum vitæ exaggeratione semper implicari, quæ quidem exaggeratio per accessum manifestè augetur; et reipsâ symptomata accessus concomitantia in viscera interna vires vitales repelli sat manifestè demonstrant. Sequentia hoc assertum corroborant :
 1°. Crises antè *Chinæ Chinæ* exhibitionem expectandæ, irritationem præexistentem denotant : 2°. Causæ febrium intermittentium ad inflammationes viscerum gignendas omnes aptissimæ sunt : 3°. In cadaveribus febre intermittente necatorum, inflammationis intestinorum, mesenterii, pancreatis, jecoris, pulmo-

actioni apprimè respondere videntur: Hæc autem, spectatis phænomenis, quæ febres omnes intermittentes, et singulas earum species, à principio ad finem comitari solent, sunt quæ sequuntur.

Primò, quemadmodum febrium continuarum continentium radix stationem suam agere videtur in sanguine potius, quàm in quolibet alio fluido, ità fermentum intermittentium consideratum ac sumptum, ut scholasticè loquar, in suo esse completo, ut proximè aptum ad excitandam febrem, non verò respectu habito ad remotam materiam illius, videtur paritèr esse aliquid, quod sanguini potius vel accedat, vel insit, quàm alteri succo, v. g. nerveo, quandoquidem talis succus (bona venia opinantium alitèr) est potius terminus, *ad quem* quandoquè progreditur prava febrium dispositio, quàm ter-

num, cerebri etc. signa non dubia patent; quæ virorum clarorum *Spigel*, *Morgagni*, *Broussais* observationibus sunt manifesta: 4^o. Læsiones organorum patentes, jamjam degenerescentiâ quâdam afflictorum febris intermittens, quotidianæ, quartanæ, tertianæ etc., accessus proferunt; hæc asserta quotidianâ experientiâ illustrantur.

In hac quidem notâ, observetur nos de febribus periodicis perniciosis non agere, quæ tamen signa congestionis sæpissimè medico offerunt, putà *peripneumonicae*, *hemoptoicae*, *apoplecticae* etc.; nam non intelligimus quomodò *China China*, solum in has febres debellandas remedium hucusquè efficax, harum accessiones vinciret congestionum, hæ si legitimæ forent. Hic theoria observatione inflectatur, hinc cum *Socrate*: *hoc unum scio me nihil scire.*

minus, à quo proximè soleant, ut reor, ipsæmet exordium capere.

Secundò, quemadmodum in continuis memorata radix in sanguine pullulat ab intrinseco, seu ab ipsius particulis constitutivis, sed incongruis, olimque suâ alterius amicali laticis larvâ, putâ chyli, lymphæ, aeris, etc. introductis, ac post diutinam tantum moram fermentescentibus: ita in intermittentibus fermentum illud sanguini probabiliter advenit immediate ab extrinseco, velut aliquid extraneum, quod statim lædit, per totum nempe tempus tam exhorrescentiæ, quàm effervescentiæ febrilis, donec per tempus despumationis subigatur, ac secernatur.

Tertiò, sicuti in illis, videlicet continuis, materia febrilis sensim ac sensim, lentâque aggregatione congeritur in sanguine (cum quo secundum minima integraliter coit, circulaturque, etsi segnius) illique tam arctè miscetur, ut non secuta, per consuetas cribrorum naturalium filtrationes, debitâ ejusdem materiæ secretionem tandem ob illius heterogeneitatem haud diutiùs sociabilem, suscitetur febrilis effervescencia, quâ mediante sensim pariter, lentoque progressu eadem materia ab ipso sanguine subigatur, et intra tempus despumationi necessarium secernatur: ita ex opposito in istis, videlicet intermittētib, fermentum febrile videtur esse aliquid, quod alicubi aggestum, affatim potius, successivi torrentis adinstar, sanguini adveniat, illique quolibet paroxysmo per commixtionem minùs intimam veluti confundatur, quàm

quod paulatim tempore intermissionis aliundè stillans, ibidem ad turgescientiam colligatur vicissim, et vicissim pariter dissipetur. Adeoque principium paroxysmi potius haberi crediderim *ab extra*, in actu primi ingressus materiæ febrilis in sanguinem quàm *ab intra* in actu turgescentiæ ejusdem materiæ, sensim antecedentè aggestæ, etsi ab extrinseco, ut dictum est, pariter procedentis.

Quartò, cùm in sanguinem latex nullus conspicuus soleat introduci, qui non deferatur per viam ductuum lacteorum, vel lymphaticorum sese tandem mutuo concursu exonerantium in subclaviam, non per alia vasa, nisi per ista possumus, ratione aliquâ præeunte, asserere, quòd fermentum febrile develatur in ipsum sanguinem, et consequentè quòd vel intrà aliqua ex istis vasis, glandulisve, quas ipsa vasa pervadunt, congeratur, ibidemque ad tempus stagnet, et ad tempus ab iisdem excarceretur, vel quòd cum illis (etsi extrà situm) aliquo saltèm modo communicet, ut per intervalla possit in eadem insinuari. Etenim (ne vel hoc intactum relinquam) introductionem lentam, rariusculam, et indeterminatam rei cujuscumque exoticæ in torrentem sanguineum derivatæ ab interstitiis, si sint, extremarum arteriarum atque venarum, et ab iisdem venis potius, quàm à lymphaticis cum sanguine refluò absorptæ, de nihilo esse fermè crediderim, quantum sit pro assignandâ planâ, ut requiritur, ac regulari fermenti febres intermittentes gignentis semitâ et scaturigine, ac pro celeri explicandâ,

ut opus est, illius irruptione, etsi hâc forte viâ
 pus *v. g.* ulceris alicujus absorptum, et sanguini
 affusum, accidentalis, ac vagæ cujuspîam febris
 causam esse posse, minimè inficier. Semotâ ergò
 postremâ hâc fermenti febrilis in sanguinem re-
 fluum, venis mediantibus, introductione, remanet,
 quod illud per vasa tantùm lactea, vel lymphatica,
 non ex duobus recensitis modis introducatur;
 nempè, vel quîà intrâ eadem vasa glandulasque
 interpositas stabuletur, vel quîà cum illis, etsi extrâ
 eadem positum, aliquo modo communicet.

Si itaque fermentum istud se habeat primo modo,
 sitque situm *ad intra*, nullus aptior locus collec-
 tioni illius, etiam temporaneæ, neque magis obs-
 tructionum facilè solubilium, et renovabilium capax
 intrâ totum tractum lymphaticorum, et lacteorum
 reperitur, quàm glandulæ in mesenterio sitæ, ubi
 chyli et lymphæ fit inæqualis concursus et mutua
 commixtio. Neque ullum foret theatrum magis
 accommodatum ad explicandam scenam sympto-
 matum, non modò horroris, rigoris et frigoris,
 sed et reliquorum omnium, quæ in tertianis præ-
 sertim, exercetur in regione gastricâ, epigastricâ,
 hypogastricâ, lumbari atque dorsali; si nempè
 conclusum in mesentericis glandulis idem fermen-
 tum, primò vim faciens, ut suâ acrimoniâ, suoque
 nisu viam sibi paret, postmodùm sic furens, exclu-
 sum, et per propinqua loca, canalemque tandem
 thoracicum excurrrens, ac successivè in sanguinem
 repens, consideretur.

Si verò situm *ad extra*, ità ut cum iisdem vasis communicet, eademque stato tempore subeat, non alibi possumus fodinam, seu focum illius constituere, nisi in locis, undè repleri incipiunt, osculisque suis hiant eadem lactea, vel lymphatica. Et sic vel respectu priorum ab intestinis exordium ducentium, dicendum erit, coacervari in ventriculo et intestinis ipsis, vel in illa saltèm confluere fermentum febrile, sive immediatè ab eorum glandulis stillans, sive mediatè à propinquis partibus, putà pancreate, aut folliculo fellis subministratum; vel respectu posteriorum credendum erit, ipsum latitare in partibus omnibus, artubus extremis, atque visceribus, undè oriuntur lymphatica. Atque in utroque casu eadem æquè facilè ac superius diximus, explicarentur symptomata. Si enim loquamur de primo, cùm parùm distent à mesenterio intestina, idem idcirco, quin imò magis extensum in tali suppositione esset iter fermenti febrilis per lacteas tùm primi, tùm secundi ordinis. Si verò loquamur de secundo casu, faciliùs adhuc explicarentur horror, rigor, ac frigus intermittentium per confluxum fermenti ab omnibus, extremisque partibus, et glandulis conglobatis universi corporis; reliqua autem symptomata ferè æquè facilè; quatenùs tandem eosdem ductus chylo-lymphicos, seu lacteas secundi ordinis, receptaculum nempè lumbare, lacteamque thoracicam pari passu (maximà saltèm ex parte) subiret idem fermentum. Sola periodus, seu vicissitudinaria ista conclusio, et exclu-

sio, intromissio, et extromissio, generatio, et extinctio fermenti febrilis nodum maximum præ se fert, ac difficulter solubilem.

Quintò, licet ex omnibus locis in antecedenti theoremate recensitis, et consideratis ut talibus, ut in iis probabiliter delitescere possit fermentum febrile, nullus à me determinatè approbatur, nec ullus pariter determinatè excludatur; dico tamen, durum nonnihil videri, quòd materia febrilis, vel in intestinis, tamquam in suâ sede cumuletur, vel per ipsa in lacteas primi ordinis excurrat in accessionum principio, per modum laticis transeuntis, sive à pancreate, sive à vesicâ felleâ, sive ab aliâ quâvis, si qua est, parte peculiariter cum intestinis communicante, suppeditari.

Hanc dubitationem suggerit crebra experientia, quâ videmus, nunquam, aut ferè nunquam, ut alibi dictum est, sive distante, sive instante, sive invadente febrium intermittentium paroxysmo, materiam febrilem egredi, vel educi per copiosas et repetitas vomitiones, ac dejectiones, sive à naturâ, sive ab arte institutas; quod secus semper, aut ferè semper fieri deberet, si talis materia in cavitatibus intestinorum intermissionis tempore cumlaretur, ibidemque pacificè oriaretur (quod pariter arduum intellectu, nempe quod ibi subsideat quovis tempore, nec irriter sursùmve, aut deorsùm exeat, nisi fingamus in intestino cæco v.g. recondi) vel si in eadem intestina, instante accessione, per ductum pancreaticum, aut choledocum antecederet

obstructos, mox reseratos, irrumperet succus febrilis. Et hæc ratio non à fallacibus speculationibus, sed ab experimento petita, una est ex fortioribus, propter quas etiam in hisce febribus tam religiosè abstineo à purgantibus et emeticis, quæ tamen, fateor, si in ullis unquàm febribus possunt convenire, in intermittentibus potissimùm, nudâ quâdam et superficiali spectatâ ratione, convenire videntur; illisque sicuti olim in gratiam talis indicationis inaniter sum usus, et blandioribus etiamnum (rarò licèt, et cautiùs, aliisque solùm motus indicationibus) utor, ità semper uterer, nisi oppositum mea, et aliena infelicioꝝ me docuisset experientia.

Sed et alterum experimentum dat ansam huic dubitationi, nempe quòd intrà cavitates intestinorum nec stabuletur, nec fortè percurrat ab aliis procedens partibus fermentum febrile, cæteroquè per lacteas secundi saltèm ordinis, et per lymphaticas, in cruorem delatum. Istud autèm petitum est ab usu Peruviani corticis, qui, quocumque modo agat, et fermentum febrile corrigat, illud profectò meliùs, et faciliùs corrigeret, quatuor aut quinque horis antè febrilem accessum exhibitus, (quo tempore corripere omni suâ vi idem fermentum proximè ingressurum in lacteas) quàm aliis temporibus à paroxysmo distantibus, quod tamèn secùs contingit: constat enim experientiâ, Chinam Chinam exigere pro suâ operatione tempus ut plurimùm horarum vigintiquatuor, antè adventum

paroxysmi inhibendi. Cùm ergò China China etiam validè administrata, neque instante, neque invadente, benè verò distante, ut suprà, paroxysmo, suam exerat operationem, neque agat, in materiam futuræ accessionis, nisi post horas longè plures, ac exigat correctio rei existentis in cavitatibus ventriculi aut intestinorum, signum est, ab illà non corripì eandem materiam intrà intestina, sed ab eà quæri in locis penitioribus, hoc est saltèm intrà ductus chylicos secundi generis, (1) vel al-

(1) Modum agendi Chinæ Chinæ in febribus intermittentibus diù sed frustrà investigârunt practici ac physiologici, qui ad suam opinionem de harum febrium naturâ, hujus medicaminis actionem accommodârunt : alii alterando, attenuando alii suam actionem exercere putârunt. *Pringle* et *Cullen* illud thonicè in ventriculum agere censent. *Desbois de Rochefort* 1°. componendo systema nervosum adstringentis antispasmodicæque virtutis ope, 2°. totam œconomiam excitando principii amari gratiâ; doct. *Alibert*, vires vitales fulciendo, illud medicamen febres intermittentes sanare arbitrantur. *Celeb. Barbier* de Chinâ Chinâ verbum faciens, ait : “ On „ pourrait trouver la cause de son efficacité curative, dans „ l'influence fortement tonique de cette substance ; et pré- „ senter la corroboration de tous les appareils organiques, la „ somme de vigueur que reçoit l'économie animale au mo- „ ment où l'on attend la fièvre, comme la cause qui s'oppose „ à sa naissance. „ *Illust : Broussais* Chinam Chinam agere contendit, determinando actionem in ventriculo factitiam, quæ, sympathicâ ratione, in peripheriâ renovatur.

In notâ præcedenti, jamjam hujusce auctoris de febribus intermittentibus theoriam dilucidavimus : hæc si vera sit,

tiùs; et consequentèr, quòd in illis potiùs, vel alibi, quàm in cavitatibus ventriculi, et intestinorum lateat fermentum febrile.

Hâc in re si paritate aliquâ uti liceat, subit observare, quòd si in ventriculo, et intestinis, sive ad modicum, sive ad breve aliquod tempus moraretur succus febrilis benignarum intermittentium (de malignis enim alibi) vitiosus quidem, sed non venenatus, adeòque solum quadantenùs, et cum detractatione, suscitaturus turbas, quas suscitare solet chylus aliquis veneno extrinsecùs propinato infectus, idem quadantenùs in curatione illi accidere deberet, quod isti. Sicuti itaque venenum

quòd intermittentes simplices, de modo Chinæ Chinæ agendi opinioni, quæ cum ideâ *Celebris Barbier* consonat, jure merito adscriberetur: etenim physiologia docet, congestionem in viscere quodam æquilibrii vitæ perturbationem probare, hancque congestionem anteverti aut sanari, dùm æquilibrium restituitur; atqui, hâc hypothese acceptâ, *cortex Peruvianus* omnia organa quodam modo excitando, in ipsa revulsionem promovet; sicque æquilibrium fulciendo, *China China* congestionem, accessûs causam, oppugnat.

Quamvis hæc ultima hypothesis nobis verisimilis videatur, attamen assensum nostrum ab hâc materiâ cohibemus, usquedùm harum affectionum natura ab experienciâ dilucidetur; reflexionem tantùm proferemus, scilicèt: si Chinæ Chinæ actio ea esset à *doct. Broussais* concessa, ab aliis medicaminibus virtute thonicâ fruentibus febres intermittentes satiùs debellarentur, tuncque *cortex* in his morbis vincendis remedium princeps non foret.

assumptum, quamdiù est intrà cavitatem ventriculi et intestinorum, (nisi sit summè deleterium) obsequitur ut plurimum vomitoriis, etiam mitioribus, et oleosis, sicuti et mollioribus laxantibus alvum, eoque sic educto, statim solvitur omnis molestia; secùs verò, si ultrà primarum lactearum valvulas sit intrusum, adeòque irrevocabile; ità fermentum febrile benignarum intermittentium, pravum quidem, sed non venenosum, quamdiù in illis cavitatibus degeret, et non ultrà (quod profectò, instante saltèm accessione, infallibilitèr certum foret ob imminentem ingressum in lacteas) deberet obsequi emeticis, atque catharticis, sive mitioribus, sive fortioribus, et extrahi è corpore, et sic imminens saltèm accessus inhiberi. Paritèr, sicuti venenum propinatum longè feliciùs, ac citiùs corrigitur à suà specificâ antidoto statim ab epoto veneno, vel paulò antè ipsum epotum assumptâ, quamdiù scilicèt eadem antidotus immediato contactu intrà ventriculum, et intestina potest illud infringere, quàm si in penitiores chyli vias idem sese insinuarit: ità materia febrilis imminentis paroxysmi, noxia saltèm, ni venenata, longè fortius, ac melius corrigi deberet à specifico febrifugo Peruviano, si istud exhiberetur tempore illo, quo in dictis jam cavitatibus eadem materia est integrè cumulata, et lacteas ingressura, adeòque parata ad suscipiendam immediato contactu illius actionem, quàm si alio tempore propinaretur, dùm eadem materia in pancreatico, vel choledoco ductu adhuc

obstructis, intimè reconderetur, et fortè in ipsis pancreaticis, aut hepatis glandulis, tamquàm in suâ scaturigine, esset quærenda. Et tamen, ut diximus, aliter evenit, meliusque inhibetur quò magis distat, quàm quò propinquior est paroxysmus.

Non est tamen ideò, quòd excludam ventriculum, intestina et lacteas primi ordinis ab omni suspitione, quòd præbeant vel sedem, vel semitam materiæ febrili in sanguinem deferendæ, quia nempè neque per purgationes, neque per vomitiones, aut spontaneas, aut artificiales illa educatur: cùm me non lateat, etiam venena in ventriculo existentia neque per vomitum ab iisdem excitatum, neque per solventia, aut emetica propinata *semper* extrahi, aut impediri, ne migrent in lacteas; imò ab iisdem si fortiora sint, et acrioris naturæ, ipsum venenum acui, et deterius reddi. Quarè potiùs ex hoc deducitur, quòd febrilis quoque materia, etiam in primis latitans viis (cùm ex se ipsâ sæpè emetica, atque cathartica sit, etiam cùm benigna est) tantùm abest, ut ab emeticis et catharticis educatur, quin potiùs, tamquàm à similibus, ad nocendum adjuvetur; et, siquidem per eas vias sit educenda, potiùs tentandum id sit blandioribus remediis, ut oleo amygdalarum, sero lactis, et hujusmodi, quàm irritantibus, ut in venenorum educatione facere consuescimus; potiùs, inquam, infertur hoc, quàm quòd ullo pacto ibi non lateat talis materia.

Sed adhuc posito absolutè, quòd eadem ibi hospitetur, sive per modum permanentis, sive per

modum transeuntis, imò posito, quòd illa mediis solventibus, aut vomitoriis, educi non modò possit, sed et reverà educatur, datoque per consequens, quòd materia illa, quæ in exordio accessionis per vomitum exit, quæque, solutâ accessione, postridiè per catharticum educitur, non sit aliquid diversum à materiâ febrili, per vim expressum, et à quolibet sano homine, qui emeticum, vel catharticum (sæpiùs cum damno) propinetur, facilè educibile, sed sit ipsa materia febrilis accessionem proximam productura; cùm tamen eamdem accessionem verè non tollat, aut remoretur, quin potiùs intendat, ac augeat, signum est saltèm, quòd loco materiæeductæ nova jugitèr ex perenni aliquo fonte succrescit, (ut demonstrat irrita quævis, etiam epicratica purgatio) nova paritèr gignens incommoda. Quamobrèm his stantibus cuique non præoccupato sat obviis, inferendum videtur, succum febrilem, etiamsi in ventriculo, et intestinis sedem teneat, nec posse radicitùs à remotiore aliquâ scaturigine suâ, intestinalem ipsam mineram instaurante, nec debere, etiamsi posset, educi. Est enim ille probabilitèr succus quidam naturalis, suumque circulum, et peculiaritèr, et cum universaliore sanguinis circulo, junctis invicèm fluminis, agens, qui tantùm per accidens à suâ crasi desciscit, et desciscit totus (sive acida, sive alius generis sit illius dyscrasia, et sive ex intrinsecorum principiorum vitio, sive ex heterogenearum, et alienigenarum particularum intimâ commixtione illa procedat) adedque non

evacuari, non agitari, non exasperari, sed leniri, corrigi, et alterari tantum indiget, sive per viam absorptionis, sive alio quolibet attemperationis modo, ut strenuè à Chinâ Chinâ fieri videmus, quotiescumquè constans est illius usus, nec maximè refractaria (quod in quibuslibet morbis nonnunquam contingit) totius succi peccantis, viscerumque illum perperam elaborantium, dyscrasia. Posito itaque, redeamus in viam, non repugnare absolute, quòd fermentum febrile in ipso quoque ventriculo et intestinis stabuletur; omnes propterea, quotquot sunt, primas vias comprehendemus inter loca, quæ probabiliter sedem, aut semitam præbent eidem fermento febrili in sanguinem ingressuro. Interim conjecturas, quæ favent illius ingressui per lymphaticas, et per lacteas secundi potius, quàm primi generis retulisse non pœnitet.

Sextò, cùm intrà vasa chyliifera, chylo-lymphica (quo nomine lacteas secundi ordinis donare lubet) atque lymphatica, et intrà glandulas iisdem vasis interpositas, atque utrisque communicationem præbentes, non alii latices admittantur, quàm lymphæ et chylus, (forsàn et adeps) (1) dein cum chylo conjuncti, quin et ab eodem disjuncti, succus biliosus, pancreaticus, salivaris, et quotquot à glandulis intestinalibus, quas *peyerianas* vocitant, proficiscun-

(1) Haud facile concipitur quomodò vasa de quibus loquitur *Torti*, adipe occuparentur; quippè cùm adipe carentem concurrant in locum; sed ponatur ipsam absorberi, ipsane absorptionis actio hujusce elementi naturam adulteraret?

tur : in istis porrò succis , vel omnibus , vel quibusdam præternaturalitèr alteratis , acescentibus , stagnantibus , fermentescentibus , aut alio quovis pacto vitiatis , periodicè autem , ac regularitèr (typo scilicèt variis febribus correspondente) influentibus , proxima intermittentium materia videtur probabilitèr debere constitui. Quod si verum foret , quod suprà suspicati sumus , nempè fermentum febrile ; ne per modum quidem transeuntis , perluere cavitates intestinorum , atque ventriculi , in tali casu vix ullus locus esset imputandi causam febris aliis succis , quàm chylo , et lymphæ , iisque intrà penitiora tantùm vasa vitiatis. Alios nihilominùs succos modò recensitos plurimùm conferre ad vitiandum ipsum chylum , et lympham , et consequentèr ad acuendum ipsum febrile fermentum , quin et ad multiplicanda , atque insignitèr intendenda febrilia symptomata ultrò crediderim.

Cùm verò succi fermentum constituentes , quicumque sint , non videantur posse ad tempus inhiberi , ne influant in sanguinem , nisi per interpositam obstructionem , neque in libertatem pristinam pluries vindicari , nisi per ejusdem obstructionis temporaneam sublationem , aut apertionem ; hinc est , quòd vitium peculiare istorum fluidorum , et præ reliquis aliis magis certum , videatur esse *stagnatio* eorundem , eaque *temporanea* , esto quòd postrema hæc qualitas , aut conditio adjuncta , quæ regularem ipsius stagnationis periodum includit , difficilissimè sit explicabilis.

Septimò deniquè, ex sententiis omnibus diversorum auctorum capite antecedente relatis, deducitur quidem veluti corollarium quoddam, mineram intermittentium, seu congestionem febrilis fermenti latere in aliquâ ex tribus hisce regionibus, nempe vel *citrâ* sanguinem, vel *intrâ* sanguinem, vel *ultrâ* sanguinem; sed ex propositionibus à nobis hucusquè præmissis potius videtur, in alterâ ex duabus tantum regionibus enumeratis eandem fodinam esse constituendam, videlicet, vel *citrâ* sanguinem, vel *ultrâ* sanguinem, non autem *in ipso* sanguine; licet postremum istud, ut minus verisimile tantum, nequaquam verò ut absolutè falsum, hîc excludatur.

Ex unâ itaque parte, vel *intrâ* totum tractum vasorum lacteorum, et chylo-lymphaticorum in sanguinem tendentium, sed alicubi fortè obstructorum, sive in loco aliquo propè lactearum oscula consito, et cum iisdem communicante, hujusmodi minera statuenda erit: vel ex aliâ parte, in 'puris lymphaticis, ab arterioso, quin et nervoso probabiliter genere jam inebriatis, atque in ipsum denuò sanguinem refluis, sive in eorum remotâ scaturigine, glandulisve longè dissitis, erit quærenda. Si tamen postremum istud seligatur, id saltèm oportet admittere, quòd, etsi à principio tam longinquo derivetur febrilis materia, maximâ nihilominus ex parte, in memorata jam chylo-lymphatica influat, *citrâ* sanguinem posita, ut iisdem mediis in ipsum tandem sanguinem asportetur, in quem cæteroquè minore dumtaxat ex parte, à membris superioribus

immediatè potest influere. Ultrà hos limites progredi non audeo; licèt me non lateat, quantum ad rectum usum Peruviani corticis, et ad definiendam litem instituendarum, vel omittendarum evacuationum, pro febrium intermittentium curatione, conferre possit ultima inquisitio causarum febres hujusmodi producentium. Imò fateor, me quondam hâc de causâ, præviis iisdem theorematibus, quæ suprâ exposui, altiore hujusce rei tentasse indaginem, Icario tamen ausu, nec fortè multum absimili. Utcumquè, incertos aereosque ut sic dicam, mentis volatus, in medio demùm itinere collabescentes, qualitercumquè referre non piget.

Illusit itaque mihi aliquandò phantasma quoddam, quo, mecum ipse considerans, ab ulcere, vel abcessu glandularum mesenterii febres lentas et continuas fieri, quæ prius glandulis iisdem tumebant tantum, et obstructis intermittentes fuere: itè animadvertens, quòd tuberculo in pede suborto, et tumefactâ subindè glandulâ in inguine, diaria febris exoritur, quæ dubio procul periodica fieret, si periodicè recurreret ejusdem glandulæ tumor: ad consimilia postmodum conficienda ratiocinia circa febrium intermittentium causas, per analogismum quemdam transitum feci, hæc quæ mox subdam, commentus. Si aliqua viscida et glutinosa materia ex ipsis chyli, et lymphæ particulis crudioribus, et impropotionatis genita, intra loculos earumdem glandularum mesenterii ita *laxè* condensaretur, ut illac transitum omnem, vel fere omnem,

omnem, tùm chylo, tùm lymphæ impediret quidem ad tempus aliquod, sed tamen, accedente majore fluidorum momento, liberiores progressum eisdem concederet, non ità, ut ab illis fluidis penitus ablueretur (id namque non sineret illius visciditas, nisi repetito pluries eodem opere) sed ità, ut simpliciter perforaretur, transitum scilicet pleniori torrenti concedens, eundemque negans exiliori rivulo, aut stillicidio : si, inquam, positio hujusmodi, quam in pancreate olim *Sylvius* adstruxit, ad glandulas aliquas mesenterii insigniores posset transferri, profectò longè facilius, et clarior foret hìc, quàm ibi, tùm symptomatum omnium etiam infrequentiorum, tùm ipsorum etiam circuituum explicandorum ratio.

Enimverò quòd glandulæ omnes, quæ chylum à vasis suis *deferentibus*, id est à lacteis primi generis, et lympham à solitariis lymphaticis recipiunt, ut liquorem utrumque simul mistum, quin et in iis adauctum, per lacteas secundi generis, seu per vasa chylo-lymphica *effferentia*, ultrò promoveant ad receptaculum commune, et indè ad canalem thoracicum, facillè possint infarciri, et obstrui quâdam veluti mucositate, glutine, aut pulte inficiabitur nemo, qui utriusque laticis inæqualitatem tùm absolutam, tùm respectivam animadvertat. Chylus siquidem ex diversis, et disparatis eduliis confectus, et ex pluribus succis intestinalibus illum integrantibus coagmentatus, lentorem facillè contrahit, atque crassitiem, quæ illum intrà sua vasa,

et successivè intrà glandulas mesentericas stagnan-
tem potest efficere; lymphæ verò mille ob causas
vel crassior, vel acidior reddita, non modò eum-
dem effectum producere potis est, sed et à chylo
productum augere, adjungendo scilicèt eidem chylo
concretionem ulteriorem, eo pacto, quo ulterio-
rem crassitiem aptus est adjungere lymphæ idem-
met chylus: undè non modò sibi succus quilibet,
sed et alter alteri, motum intrà glandulæ loculos
valet præpedire, visciditatemque, ac stagnationem
mutuam, ubi simul coeunt, impertiri. Adde tan-
dem, ab ipsis succis, bilioso, pancreatico (fortassis
etiam adiposo) et glandularum intestinalium, so-
litariè quoque aliquandò influentibus per chyli vias,
eamdem, si aliquo peccent lentore, aliâve ad simul
concrescendum dispositione, in glandulis mesen-
tericis obstructionem posse produci.

Quòd verò hujusmodi obstructioni, aut infarctui
aliquæ peculiaritèr ex illis glandulis, et quidem offi-
cio insigniores, ac notatu dignæ, sint magis ob-
noxia reliquis, magisque dispositæ, sive ob intimæ
structuræ compositionem, sive ob aptitudinem si-
tûs, sive ob exercitii majorem, vel minorem usum,
sive ob succorum affluentium copiam pleniorè,
aut parciorem, sive aliam quamvis ob causam, fa-
cilè concedet qui observârit strumas frequentius
oriri in collo quàm in inguine, obstructiones in
glandulis lienis potius quàm hepatis, inflammatio-
nem pleuræ faciliorem esse quàm peritonæi, pa-
raplegiam sæpius in sinistrâ quàm in dexterâ cor-

poris parte contingere, et similia, quorum ratio mechanica non est hujus loci.

Quòd deniquè æstare potius, et autumnò, quàm aliis temporibus, ut facilis est febrium intermittentium generatio, ità facilis sit hujusmodi glandularum infarctus, et obstructio, suadent coctiones stomachi imbecilliores, ob enervata universaliter fermenta chylicationis, et dispositio succorum acescibilium, quales sunt chylus, et lymp̃ha, ad ulteriorem acorem contrahendum, ut illum facile per eas tempestates contrahunt vina. Adde et hìc concursum aliorum succorum intestinalium, aptiorum tunc temporis (etiam ratione ambientis externi, in nativâ temperie inæqualitèr excedentis) ad augendam in iisdem glandulis chyli, et lymphæ improp̃tionem, undè et facilior in utroque latice ad vitiosas ibidem fermentationes excitandas, et successivas præcipitationes, hinc et ad obstructions gignendas dispositio.

Pro glutinosæ autem obstructionis hujusmodi *alternâ* reclusionē, atque occlusionē, obvium est animadvertere, idipsum sæpiusculè (irregularitèr licèt) observari in ictero ab obstructis biliariis ductibus procedente, ubi scilicèt conclusæ bili aliquis nonnunquàm reservatur aditus, atque iterùm clauditur; perforatâ videlicèt quandoquè obstructione ab ejusdem bilis impulsu, eâdemque obstructione iterùm coalescente, quòd fæces modò flavæ, modò cineræ, colorque faciei et oculorum, modò minus, modò magis citrinus satis patefaciunt. Perio-

dicæ verò, ut sic dicam, occlusionis, et reclusionis ipsius lymphæ à suis vasis, et glandulis, specimen aliquod nobis exhibent nonnulli coryzâ, vel rheumate laborantes, qui è naribus affatim, et è pectore insignem lymphæ copiam emungunt, vel expuunt, quasi illam intrâ capsulam aliquam coacervatam haberent, idque statis horis, putâ matutinis, aut vespertinis; ut sileam similia fieri constanti ritu non modò in vasis, et glandulis infarctis, sed et in amplis quoque cavitatibus. Sic, etsi in plurimis inæqualis admodùm sit modus, quantitas, et hora assumendi alimenti, tamen in iisdem regularis admodùm est hora alvum deponendi, sive quotidie, sive alternis diebus, itèm hora esuriendi, sitiendi, mingendi etc. in tantùm, ut et dormientes ob id ipsum expergiscantur, licèt id ipsum non exigat ulla necessitas, sed quædam potiùs naturæ consuetudo, ad certas tamen quamvis occultas mechanices leges exercita. Sic paritèr menstruam mulierum excretionem integro lunæ spatio, quasi alicubì congestam, parùm gnari suspicimus; eandem verò (quod magis est) quolibet mense per eos institutam, et apud alios legimus, et in duabus scëminis ipse vidi, quarum altera phthysi tandem confecta obiit. Admodùm ergò mirum fortè non erit in casu nostro, quòd aperiatur, et vicissim claudatur mollior, recensque obstructio glandulæ mesentericæ, ductûsve chylo-lymphici, quandò hoc idem, vel simile phænomenon in aliis casibus observamus; sicut nec adeò mirum erit, quòd hoc ad regulam quamdam

fiat, quotiescumquè hujusce regulæ mechanicum artificium, vel mechanici artificii probabilitas aliqua constare possit, ut infrà.

His præmissis, ponamus, dicebam tunc (modò verò dico : fingamus) aliquam ex memoratis glandulis mesentericis (1) insignioribus ità infarctam esse viscido illo, quod diximus, glutine, ut omnem, vel ferè omnem chylo, et lymphæ illac fluentibus ultrà se cisternam versùs, progressum inhibeat. In hoc casu totum vas lacteum (sive autem unum sit, sive multiplex, parùm refert) quod ab intestinis ad glandulam protrahitur, chylo stagnante replebitur; paritèrque lymphaticum *inferens* integrum, quod in eandem inseritur, ab exortu suo usquè ad eundem terminum, lymphâ suâ similiter stagnante, utpotè exitum non inveniente, sensim repleri necesse erit.

Cùm autem chylus iste sic stagnans assiduè non urgeatur ab alio chylo, quippè inæqualitèr, et per interruptas vices influente, et cùm influit habente alios ductus patentes, per quos nullo negotio potest insinuari, nullum idcirco patitur conatum (excepto eo levi, quem potest recipere à compressione viscerum propinquorum, et à valvulis, tunc tamen feriantibus, vasis obstructi) nullum, inquam, patitur conatum, vi cujus possit ultrò promoveri ad supe-

(1) Has mesenterii glandularum obstructions, non ex humorum lentore, sed ex irritatione lymphaticâ originem ducere nemo nunc nescit, quod physiologici probè docent.

randum obicem in glandulâ existentem. Necesse est ergò, totam vim ad hoc opus requisitam exerceri ab humore lymphatico, tùm fluidiore, tùm valentius, atque velocius, ratione validioris impellentis, tùm etiam perennè influente. Hoc facile intelligetur, si consideremus, quòd vas hujusmodi lymphaticum, ut suprâ obturatum, naturalitèr quidem semper irrigatur liquore suo, sed non ità, ut patiatur repletionem, aut distensionem notabilem, qualem patietur, si per injectam ligaturam stranguletur, aut obstruatur. Itaque si vas istud tale quidpiam quodammodò patiatur intrâ glandulam (quantùm sit pro intercipiendo illius liquore) quale patitur ab injecto extrinsecùs vinculo, necesse erit, quòd paulatim totum vas, scilicèt interstitium omne, quod intercipitur à primo illius exortu, usquè ad insertionem in glandulam, lymphâ indesinentèr influente distendatur usquè ad turgescientiam insignem ejusdem vasis, seu usquequò capax illud est distentionis : cùm rivuli, si qui sint, per anastomosis, vel alitèr cum eodem vase communicantes non possint supplere omnem defectum causâ obstructionis illius resultantem. Et quoniam, repleto vase cessat quidem introductio liquoris in illud, sed non cessat, quin potius augetur circà primam illius originem conatus primi impellentis (arteriarum videlicèt, ac si lubeat, etiam nervorum ibi sese exonerantium) assiduam lymphæ secretionem, et introductionem in idem lymphaticum molientis, adeòque secretam antecedentèr, et in ipso præexis-

tentem lympham urgentis, ac indesinentèr prementis, accedente etiam aliquatenùs valvularum officio, et circumditorum musculorum motu : hinc est, quòd multiplicato per repetitas vices hujusmodi potentiarum nisu, brevì cedat mucosum obstaculum in glandulâ lentescens adhuc, nec satis solidum, transitumque idcirco prementi, atque acrimonia quoque sua perterebranti liquori concedat, usquequò durat illius impetus, atque vis perforans, et non ultrà.

Cùm itaque regularis, et continua sit secretio lymphæ ab arteriis (dicamus et nervis) fieri solita, itèr determinata, plùs minùs quantitas liquoris secerni soliti, et determinata paritèr capacitas vasis liquorem excipientis, sequitur per consequens, quotiescumquè fiat, renoveturque hujusmodi summa distensio, determinatum quoque, et ferè æquale semper esse debere tempus, quod requiritur tùm ad summe distendendum, replendumque ipsum vas, tùm etiam ad superandam resistantiam obstaculi extrema illius infarcientis : sumendo hoc tempus determinatum in aliquâ latitudine, prout scilicèt magis, vel minùs viscida est materia obstruens, et consequentèr prout citiùs, aut celeriùs communicatur extremo liquori glandulam intimè attingenti vis, atque pressio in primâ vasis origine indesinentèr exercitâ, ubi videlicèt impeditam ob incapacitatem vasis incassum moliuntur arteriæ lymphæ secretionem, conamine semper fortiore, quo diutius repetito, et frustrà tentato.

Istud autem tempus determinatum intercedens à puncto transitûs inhibiti ipsius lymphæ usquè ad tempus summæ repletionis, seu ad tempus superati obicis, quod idem est ac dicere totum tempus morbosæ collectionis lymphæ fermentum febrile principalitèr constituentis, usquè ad tempus exclusionis illius è suo carcere, longius, aut brevius esse debet, prout major, vel minor erit capacitas ipsius vasis, spectato diametro, et longitudine illius, et prout magis, vel minùs resistens erit viscida materia glandulæ impacta, quæ liquorem in extremo vase remorabitur.

Potest autem contingere, quòd inter plurimas glandulas, quæ huic vitio peculiaritèr sunt obnoxiae, aliquæ (et quidem numerosiores) appendantur tali lymphatico, pro cuius extremâ plenitudine, et successivâ contenti liquoris excarceratione mechanicè, ut suprà, faciendâ, requiratur spatium temporis 48 circitèr horis circumscriptum, aliæ verò (minùs quidem frequentes) vas aliud possideant, sive longiùs protensum, remotiùsque derivatum, sive recipiens parciùs lymphæ secretæ stillicidium in suo principio, cui ideò pro eodem opere, summæ videlicèt repletionis, et, quod magis est, successivæ reclusionis, ob majorem primi impellentis distantiam, vel ob illius minorem nisum fortè difficilioris, necessarium sit intervallum horarum circitèr 72 et aliæ deniquè sint (nec ipsæ quidem numero plurimæ) quarum vas ad idem opus non exigit plùs quàm horas 24. Et sic periodus

tertianæ febris cæteris frequentioris, quartanæ minus frequentis, et quotidianæ pariter rarioris, poterit haud difficulter intelligi. Quòd si duæ glandulæ sustinentes obstructionem horarum 48 seorsim successivè obstruantur, ità ut una hodie, altera cras idem vitium capiat, tertiana duplex duplicem habens focum emerget. Si duæ aut tres glandulæ ex iis, quæ sustinent suum, ut sic dicam, infarctum ad horas 72 diversis successivè diebus infarctum similem suscipiant, quartana duplex aut triplex orietur; et hac proportionem fient hemitritæ, aliæque febres complicatæ. Non tamen absolutè negaverim, pro variâ glutinis obstruentis visciditate, et consistentiâ, itèmq; pro variâ humoris gluten ipsum perterebrentis acie, diversas febrium intermittentium species ab unâ forsàn, et eâdem insigniore glandulâ obstructâ posse pendere, sicut et varias forsàn ejusdem speciei, aut generis febrium differentias.

Hæc idèa, qualiscumque sit, primam febris generationem complectens, circuitum pariter illius ob oculos ponet, si perpendamus, quòd superato per vim, ut suprâ diximus, obice, extremum vasis intrâ glandulam obturante, liquor quidem excarceratus per viam recentè apertam facilè dilabitur, nec sinit iterùm gluten illud coalescere, quousquè durat illius impetus, quin potiùs ipsi chylo intrâ lacteum similiter occlusum stagnanti editum reserat per eandem glandulam, ut eum secum rapiat, et per chylo-lymphicos *effrentes* ductus cum eodem ad cisternam properèt, et dein in sanguinem de-

labatur : attamen cùm brevis, et temporaneus sit huiusmodi torrentis etiam lentioris affluxus, necesse est quòd conniventibus denuò iisdem vasis, lacteo videlicèt, atque lymphatico, idem mucus tùm ipsi glandulæ, tùm vasis lymphatici antecederentè obstructi oris extremis adhærens, ad novam concretionem disponatur, cessante, ut dictum est, impetu illum perforante solum, non abluyente, vel abstergente, et succedente, loco torrentis lymphatici jamjam exhausti, lento tantùm, ac enervi lymphæ recentèr secretæ stillicidio, novam perforati antea glutinis concretionem nequaquam impedire, aut superare valente. Et quoniam idem vitium nativum, vel crassitie, vel acoris in lymphâ à primitivis suis causis adhuc fovetur, sicut fovetur in chylo (præsertim tempore morbi) eadem ac antea prava dispositio multòque magis in fermentis et succis ipsum chylum actuantibus, et ex parte integrantibus : hinc est, quòd concesso per vim transitu liquori urgenti, et perforanti, paulò post idem facilè recurrat impedimentum et vitium, remanente scilicèt in parte obstructâ portione adhuc maximâ causæ conjunctæ, integroque etiamnum superstite in fluidis causæ antecedentis vigore. Cùm itaque stato tempore, ut suprâ, eandem fieri collectionem, et successivam effusionem febrilis fermenti necesse sit, stato quoque tempore renovari opus erit febrilem circuitum. Hujusce rei rude quoddam specimen in ictericis, in rheumate affectis, etc. passim observari jam suprâ notavimus.

Quo pacto verò lymphæ aliquo modo jam peccans, postmodum diu detenta, item chylus tot succis fermentescibilibus (quales sunt in primis bilis et succus pancreaticus) imbutus, diutius stagnans, quantulacumque sit illius portio; adeoque, dum stagnat, ferme corruptus, possint, dum chylo-lymphica pervadunt, receptaculum commune et canalem thoracicum, incommoda omnia producere, quæ febrem incipientem comitari solent, qualia sunt horror, rigor, frigus, dolor dorsi et lumborum, vomitus biliosi, alvi fluxus, etc. quilibet ex se facile potest conjicere.

In sanguinem verò suapte etiam fortasse naturâ tunc malè constitutum, delata hæc omnia, quomodò in eo effervescentiam febrilem excitare valeant, tamdiu duraturam, quamdiu succus febrilis subigatur et redigatur ad naturæ leges, extraneis jam salibus spoliatus, per diaphoresim, diuresim, aut aliâ quâvis viâ excernibilibus, optimè novit quilibet ex paucillâ puris portione, ab ulceribus etiam externis in sanguinem absorptâ, febres quamdam quoque periodi speciem habentes identidem suscitari observavit. Sed de his adhuc aliquid capite octavo.

Hæc, et alia plurima, Sylvianam quodammodo hypothesim à pancreaticis ad mesentericas glandulas transferentia, menti quondam meæ obversabantur, quibus modò, cum nimiam compositionem sapere, nec satis simplicitati naturæ etiam errantis, respondere videantur, nequaquam acquiesco; sed

illa, ut manca tantum, et imperfecta profero. Sat sit eadem adumbrasse, ut, si rudem aliquam ac indigestam veritatis speciem in illis quispiam reperiatur, ulteriori culturâ ad meliorem frugem reducat.

Posset equidem fortassis adhuc ambigere non nemo, ut aliàs tetigi, an febrile intermittentium fermentum sit quid *exoticum* à partibus, vel quibusdam, vel omnibus profisciscens, *et à venis* cum sanguine refluo potius, quàm à *lymphaticis* absorptum, atque ad corporis interiora delatum: quod, licet ægrè crediderim, aliquo tamen pacto congrueret cum iis, quæ dixi, et mox dicturus sum de probabili quoque illius sede in aliis glandulis, etiam circa corporis ambitum, et viscera consitis, cum discrepantiâ tantum circa vias, per quas inde transferatur in sanguinem. Posset quoque suspicari quispiam alius, an fermentum huiusmodi sit succus quidam peculiaris nobis adhuc *ignotus*, qui vel per semitas ordinarias chyli et lymphæ *per vim*, ac *præter naturam* intrudatur, vel per *occultas* et *nondum patentes* (quandoquidem sunt, ut reor, in corpore nostro succi adhuc ignoti, et ignotæ viæ) ut exinde pariter deferatur in sanguinem. Sed hoc esset explicare ignotum per ignotius. Quamobrè, sepositis iis, quæ nondum patent, si reverà illius natura, et existentia *in succis*, *et locis notis* sit quærenda, præter ea, quæ suprâ retulimus, non planè quoque displiceret materiam febrilem cuius germanam indolem designare arduum quàm

maximè semper erit, ab universo corporis ambitu in centrum ejusdem per vasa lymphatica derivare, hoc est à glandulis conglobatis, sive omnibus, sive saltèm aliquibus universi corporis, et viscerum illius, undè prima lymphaticorum origo; ut per hujusmodi semitas, ab eâdem corporis et viscerum peripheriâ, in ipsum sanguinem, quasi in centrum, simultaneo quopiam, et periodico confluxu, difficulter tamen explicabili, adduceretur, immediatè quidem respectivè ad lymphatica superiora, mediatè verò per ductus omnes chylo-lymphicos, respectivè ad inferiora, et media. Sic saltèm congrua haberi posset explicatio illarum febrium mitioris indolis, quæ cum rigore et frigore, sine ullo alio intestino tumultu solent invadere, et universali demùm sudore facilè solvi. Sed, si cui non satisfaceret pro explicandis symptomatis tertianarum in infimo ventre maximè observabilibus ea, quæ posset adduci, irritatio facta à fermento febrili in cisternâ chyli, aliisque lacteis secundi ordinis, is ad salvandos enormes vomitus, motumque ventriculi inversum, et intestinorum antiperistalticum (1) ex-

(1) Quæritur an ventriculus actionem activam in vomitu exercent, an econtrà musculorum abdominalium ope passivè evacuetur? hanc quæstionem insolutam solvere minimè contendimus; attamen, factum medicinâ practicâ exhaustum ad actionem ventriculi activam admittendam in vomitûs actu summooperè tendit; enimverò, versùs hoc organum emetici ope congestiones cerebri sæpè convelluntur. Contractiones musculorum abdominalium revulsionem operari fortassè objicietur; sed omni

planandum, à lacteis primi ordinis, et à succis omnibus intestinalibus illac fluentibus, præsertim verò à bilioso, adjumentum quæret.

Si verò de explicandis perspicuè hujusmodi symptomatis in primâ paroxysmorum invasione serè perpetuis, et circa infimi ventris confinia valde conspicuis, sit minùs sollicitus, influxum succi febrilis in sanguinem, quem nos acervatim fieri posuimus, ipse paulatim factum (cæteroquì non improbabilitèr) statuatur, succumque ipsum febrilem à quâvis affectâ corporis glandulâ, modò hac, modò illâ, modò unâ, modò pluribus, cum auctoribus non paucis derivet, stillicidio quidem assiduo, sed cruoris excandescientiam periodicam, noxiæque materiæ sensim congestæ expulsivam non inferente, nisi donec succus peccans fuerit intrâ cruorem ipsum ad turgescientiam collectus. Quod quidem pro diversitate loci, seu glandulæ suppeditantis, et pro variâ liquoris, pari postmodum proportionem in sanguinem influentis, quantitate, modò per breviora, modò per longiora, semper tamen ab invicem æquidistantia temporis intervalla, repetitis subindè vicibus, posse contingere, haud arduum erit intellectu.

Pro reddendâ autem ratione saltèm aliquâ symp-

probabilitate hæc objectio destituta videbitur, si attendatur vasa cerebri sanguine expurgari, statim ac nausæ manifestantur, ergò antè musculorum abdominalium contractiones, quod facile faciei palore judicatur.

tomatum in infimo præsertim ventre locisque propinquis invadente paroxysmo apparentium, poterit is fortassè dicere, sanguinem tunc præter naturam fermentescere incipientem, in primo illo conatu ità turgescere intrà sua vasa, ut valeat obsistere novo succo febrili, sive per lacteam thoracicam, sive per solitaria lymphatica perennè affluenti, prohibendo scilicèt, ne tunc temporis succus iste recentèr adveniens superare possit obstantem valvulam, ad ostium canalis thoracici in subclaviam tendentis appositam, vel aliam quamcumque excipiendo lymphaticorum tributo destinatam, atque ab eodem fermentescente, et contranitente cruore compressam. Sic Padus tumens, furens, et ad latera pre-mens, nec Gabelli, nec Scultennæ consuetum facile admittit vectigal, sed illud repercutit. Sicuti autem minora illa flumina intrà aggeres suos repulsa et detenta, plurimas in circumstitis locis excitant turbas, ità et succus febrilis sic repercussus, et intrà occlusum canalem thoracicum chylique lacunam, vel intrà quævis solitaria lymphatica per vim coercitus, cùm neque ultrò proptèr inhibitum illius progressum, ut suprà diximus, neque retrò proptèr inferiorem portionem sursùm urgentem, et proptèr obstaculum valvularum regressum prohibentium, viam sibi parare queat, interimque à stagnatione suâ ulteriorem acrimoniam adipiscatur, potis erit suscitare in præcordiis, stomacho et alibi, angores, vomitus, irritationes, aliaque incommoda, quæ in iisdem locis tunc temporis

observantur. Enimvero tumultus non longè minores, immò illis non parùm analogos ob eandem fortassè rationem, nonnunquàm excitare ibidem solet simplex chylus, si quandò ex cibo paulò antè accessionem exhibito contingat intempestiva protrusio illius in sanguinem, fermentescere, ut suprà, atque tumescere incipientem, ipsique proptereà chylo, quo minùs liberè possit ingredi, aditum præcludentem. In universâ hac rerum serie atque congerie, veteribus ipsis, cæteroquè colligantibus, non prorsùs ignotâ, tota ratio intermittentium posita videtur, et hanc persequi fortassè non foret inutile, si omnium humorum peculiarem motum, statumque tempus circuitùs particularis eorundem distinctiùs nosceremus: indè namque explicandæ quoque periodi modus forsitàn aliquis plausibilior elucesceret. Sed hic est scopulus ad quem infelicitèr allidunt omnium opinantium naves in hoc mari vela facientium.

Retentâ itaque pro nunc hypothesi probabiliore et universaliore scilicèt, quòd humor febrilem effervescentiam periodicè inducens, sit succus aliquis per accidens tantùm vitatus, et vel præviâ stagnatione per intervalla *statim* sanguini affusus, vel congestionem *paulatim* aliundè suppeditatâ, per intervalla paritèr in eodem turgescens, qui proptereà suam sedem aut semitam habeat vel citrà ipsum sanguinem, hoc est circà pylorum, intestina et lacteas utriusque generis, (ut omnia primæ regionis loca indiscriminatim comprehendamus) vel
ultrà

ultrà eundem sanguinem, hoc est in glandulis vasisque lymphaticis, haud difficile erit conjicere, quomodò China China possit (quod est intentum nostrum) materiam febrilem vel alterare ac emendare in ipso suo foco, vel intercipere atque corripere in medio itinere, priusquàm in sanguinem deferatur, nullâ sensibili præter consuetas factâ illius evacuatione.

In primo siquidem casu, cùm China China diutius immoretur intrâ cavitates ventriculi et intestinorum, quod segnior ramentorum illius excretio, et sæcum tinctura satis patefacit, itèm, cùm ductibus omnibus chyliferis secundùm minimas suâ particulas adhæreat, eosque lentius pervadat, poterit nullo negotio febrilem laticem ibidem conditum infringere, combibere, retundere, et ad naturalem crasim reducere, vias ipsas, glandulasque chylo-lymphicas abstergere ac reserare, aliaque hujusmodi diuturno usu præstare, quæ materiam et occasionem febrilem, nec non *ipsius* quandoquæ *occasionis initium*, ut verbo *Hippocratis* utar, sine ullâ excretionem admodùm sensibilitèr adauctâ, valeant submovere.

In secundo verò casu, ubi fermentum febrile supponatur radicari ultrâ sanguinem, videlicet in glanduloso lymphaticoque systemate, cùm istud è suâ, ut aiunt, minerâ dupliciter possit in sanguinem influere, nempe, vel mediatè (et quidem magis abundè) per chyli vias secundarias, vel immediate (et parcius) per ipsa lymphatica, statim

in eundem sanguinem se exonerantia, dupliciter quoque poterit suscipere extrà ipsum sanguineam actionem corticis, et ab eo debitam alterationem recipere, uno nempè loco intrà receptaculum chyli; cæterosque illius ductus lymphæ communes in sanguinem tendentes, in quibus idoneam pariter, ut in primo casu, potest recipere à cortice alterationem; et siquidem minera ipsa remotior non planè attingatur, correctâ tamen assidue per continuationem remedii novâ fermenti illuc affluentis portione, à glandulis etiam longinquis subministratâ, ipsa demùm corrigi potest, aut exhaustiri remota scaturigo. Altero verò loco correctionem suam potest à cortice sortiri febrile fermentum ultrà sanguinem stabulans, videlicet in ipsis glandulis, viscerum et corporis ambitum, aliumve quemvis locum occupantibus, undè lymphaticorum origo, vel propagatio : quandoquidem ad extremam hujusmodi glandulosam provinciam potest pertingere ipsa tenuior substantia, tinctura et actio corticis, mediantibus arteriis in glandulas desinentibus, quæ arteriæ ipsum forsitan febrile fermentum (non excluso si cui lubeat nervorum ministerio) iisdem glandulis antea subministrârunt. Facile namque concipere possumus, non modò, quòd materia lymphatica in sanguine (majore saltèm ex parte) residens, quæ febrilis quoque fermenti glandulis imprimendi materia futura est, per corticem alteretur atque demulceatur; verùm etiam possumus intelligere (quod mihi quidem magis arridet) quomodò eadem mi-

nimæ corticis particulæ, sub chyloso vehiculo etiam-
nùm integræ, suâque virtute pollentes, sanguinem
transmeent, illo intacto, videlicet eum notabiliter
non immutando, suamque vim integram soli fer-
mento imprimant ultrâ ipsum sanguinem, sive in
glandulis, sive ubivis existenti, atque ibidem per-
eas absorpto. Quòd si etiam ipsi sanguini taliter
impressam quis velit corticis virtutem, ut illum
balsamico quopiam robore muniat adversus fer-
mentum ab extrinseco undelibet adventurum, is,
licet me planè consentientem non habeat, actioni
tamen corticis citrà sensibilem evacuationem feбри-
fugæ planè favebit. Et hæc quo ad virtutem corticis
agentem contrâ fermentum, suum focum, sive, ut
aiunt, suam mineram agnoscens, vel citrà, vel
ultrâ provinciam sanguineam.

Quotiescumquè verò intrâ ipsum cruorem im-
mediatè *orta* simul, atque *congesta* ad turgescientiam
credatur, quousquè effervescat febrilis intermit-
tentium materia (etsi hoc minùs verisimile repu-
tem), adhuc facilius erit explicatio actionis Chinæ
Chinæ in ipsum cruorem, nullâ sensibili evacua-
tione subsequente; sive id fiat per hoc tantummodò,
quòd illa fermentum febrile combibat ac absorbeat,
sive illud juxtà *Conygium* disgreget atque dispergat,
ut aquæ salsæ retundit aciem aqua dulcis affusa,
(quo pacto non ineptè fortassis explicaretur dispo-
sitio cruoris ad remorbescendum, quatenùs sci-
licet eadem facilè renovetur; ni impediatur per
continuationem remedii, salium febrilium coacer-

vatio, priorque unio) sive alio quovis modo ejusdem fermenti energiam reprimat; quæ res, cum multifariam possit contingere, difficile est definire quo pacto præcisè contingat, interque varias probabilitates veritatem, quæ una est, exactè seligere.

Cum tamen aliquò ex prædictis modis se habere fermentum febrile certum videatur, æquè certum per consequens est, aliquò ex iisdem modis haberi correctionem illius à Peruviano cortice. Cumque vitiosus latex, qui tale fermentum constituit, vel in se continet, debeat redigi ad naturæ leges, vel per effervescentiam febrilem (restitante plurimâ illius portione utili, secretâ verò inutili) vel per alterationem medicamentosam, quæ ipsam portionem inutilem magnâ ex parte rectificet per solam contrariarum qualitatum alterationem, seu per vim occultam proveniente à totâ substantiâ, ut aiebant antiqui; sive deniquè, ut sensibiliùs loquamur, per variationem texturæ particularum minimarum febrile fermentum componentium, habitam quomodolibet à commixtione particularum minimarum corticis; hinc est quòd nullâ vel paucâ evacuatione sit opus. Etenim, quandocumquè etiam ad correctionem fermenti aliqua requiratur particularum ejus absorptio, præcipitatio et excretio, benè possunt hæc omnia integrè haberi à Chinâ Chinâ; cum enim malitia fermenti febrilis consistat in paucâ mole (quod benè novit qui novit quàm pauca sint magnorum etiam morborum semina) potest ultrò excerni, quod excernendum est per

illas evacuationes, modò sudoris modici, modò alvinæ dejectionis, modò (quod frequentius est) urinæ notabiliter adauctæ et immutatae, quæ post depulsas ope corticis febres quotidie observatur. Sanè postrema hæc evacuatio, lotii scilicet sensibilibiter aucti atque concocti, evidens est ac perpetua, sanguinisque defervescentiam, atque defæcationem apertè testatur; non quidem fortassè quia China China agat immediatè intrà ipsum sanguinem, sed quia agit intrà ductus chylo-lymphicos, quorum latices dum corrigit, et primam sic coctionem juvat, mediatè saltè juvat et alteram, quemadmodum videmus ex solâ fermenti stomachici correctione debitam statim urinarum coctionem subsequi. Quod eò facilius in hoc casu succedit, quoniam, impedita per Chinam Chinam novâ sanguinis conspurcatione, ille facilius se expedit ab inquinamentis antea susceptis, undè urinarum concoctio, earumque uberior proventus emergit. Quid ergò de aliis copiosis excretionibus, quæ secundum *Hippocratem*, *non multitudine sunt æstimandæ*, sumus solliciti, cum, quid illæ per artem institutæ conferre possint ad curationem intermittentium, planè ignoremus?

Propterea (iterum repeto) nunquam mirari desinam, quomodo in tantâ rerum, et opinionum caligine circa intermittentium causas earumque sedem, quomodo, inquam, virtus febrifuga corticis per experientiam clara, tuta, certa, et evidens, quibusdam suspecta reddatur, eo quia nihil in-

signitèr evacuando, doctrinæ februm causarumque earumdem non satis videatur quadrare. Hoc sanè nonnisi ex defectu experientiæ potest procedere, et ex defectu fidei ergà experientiam alienam, ne dicam etiam ex carentiâ peritiæ in administratione remedii, si quandò illud, vel unicâ tantùm vice, vel bis ad summum, vel pluries quidem, sed parciùs quàm par sit, præscribant, vel si exhibeant admixtum catharticis, ad evacuandam, ut opinantur, simul et semel materiam morbificam, vel si eadem cathartica propinent postridiè, aut paucis elapsis diebus ab exhibito cortice : signum evidens infirmioris experientiæ, tùm in illis, tùm in auctoribus omnibus, qui talem methodum docent, utpotè quâ nil certius ad revocandam febrem, ut aliàs diximus, utque luculentèr testatur *Restaurandus* his verbis : *Si nonnulli Chinam Chinam usurpantes, ejus ope febres non expugnant, id illorum imperitiæ adscribendum est. Hodie Chinam Chinam exhibent, postridiè purgans porrigunt. Quâ die illa data est, febris desinit; purgans autem de novo paroxysmum accersit, adeò sibi invicem adversantur. Ego illam absque successu nunquàm exhibui. Si cæteri medici voto exciderint, procul dubio id illorum culpâ contigit. Si non hanc culpam, saltèm cautelam abstinendi à quocumque solvente vel levi post usum corticis; fassus est Sydenham ipse, purgationi quondam addictus, in postremis suis epistolis clarâ istâ protestatione : Advertendum autem quòd, cùm de febribus intermittentibus olim agens, ægrum sublato*

morbo sedulò purgatum iri admonuerim, hoc intelligi velim de iis solùm febribus (rectiùs forsàn de nullis) quæ, vel sponte suâ, vel alio, sive medicamento, sive methodo, præter corticem Peruvianum, erant debellatæ. Etenim curatio, cùm huic remedio de quo jam loquor, innitatur, purgatione nec eget, nec eamdem planè fert. Ità potentèr dictus cortex sine ope cathartorum non solùm paroxysmis, sed et dyscrasiæ, quam corpori iidem inflixerunt, subvenit. Vitandæ itaque antè omnia evacuationes qualescumque, cum vel blandissima catharsis, quinimò enema è lacte saccharato (hæc autem cautela est nimia) in morbi discrimen certissimè, fortè in morbum ipsum, denuò ægrum conjiciet.

Quòd si nihilominùs quispiam contenderet, succum febrilem lacteas alicubi subeuntem non esse liquorem per accidens tantummodò vitiatum, solitumque in statu naturali illac cæteroquè confluere, cujus proindè crasis solùm indigeat alterari, illiusque elaboratio, secretio, aut motus redigi ad naturæ leges; sed potius vellet, illum esse aliquid planè præternaturale, vel merè excrementitium, insuperque tale, quod omninò debeat ac possit affatim è corpore, et *electivè* ut aiunt, educi, etsi illius extractionem è minerâ irritam experiantur quotquot catharticis, vel aliter evacuantibus medicamentis, quartanarum v. gr. (idem dic datâ proportionem de tertianis, ac quotidianis) curationem tentant: in hoc casu unicuique mordicùs ità sentienti, relinquendo in primis methodum suam po-

sitam in manu consilii sui, luberet tandem palpum obtrudere, et ad dirimendam litem cum eodem mitius deinceps agere. Quamobrèm in rejectam hucusquè sententiam per modum concessionis quodammodò descendendo, antagonistam hujusmodi, si quis fortè esset, sic alloquerer: Estne purgandum? Eja, purgemus. Mittendus etiam est sanguis? Mittamus. Omnifariàm evacuandum adhuc est? Evacuemus, extenuemus, excarnificemus. (Non sic forsàn suprà corium suum luderet antagonista) At post tot lanienas, saltèm incassum, ni cum detrimento patratas, quandò tandem rutam, serpillum, verbenam, chamædrym, quandò mithridatium, aut theriacam, aliave febrifuga specifica, invalida tamen, et inertia comparativè ad corticem, præscribimus, quandò carpis bursam pastoris, vel auriculam muris contusam, quandò telas aranearum, vel ovi pelliculas digitis admovemus, quandò deniquè animalcula insontia ægrorum collo suspendi jubemus, et alias hujusmodi, vel aniles, vel dolorificas nugas, antè Chinæ Chinæ adventum jam familiares (quarum tamen nullæ materiam febrilem evacuant) usurpamus, tunc saltèm, nisi citius, exhibeamus corticem, ut solemne erat vel ipsis meticulosus auctoribus, qui tantum superficie tenus Chinam Chinam noverunt orbi nostro primùm nascentem: exhibeamus, inquam, tunc corticem, si non alio título, certè ob remediorum inopiam; quoniam non sine pudore fateri cogimur, ad conterendas, ni sponte solvantur, diuturnas intermit-

tentes, si corticem demamus, artem propè deficere.

CAPUT VII.

Usus methodicus *Chinæ Chinæ* in vulgaribus intermittentibus diuturnioribus, variæque illam præscribendi formulæ.

STATUTO in antecedentibus Peruviani corticis usu, tanquàm innocuo, utili, et nonnunquàm necessario ad profligandas febres intermittentes, consequens est, ut vulgatiores selectioresque illum præscribendi formulas methodicè prosequamur, in gratiam saltèm candidatorum artis: cùm cæteroquè satis notæ sint, prostentque ubiquè variæ ac multiplices eundem præparandi ac propinandi regulæ.

Atque, ut à primævâ praxi meâ exordium ducam, ipse quidem, statim ac per obitum præceptoris evasi mei juris in arte medicâ, methodum, quam didiceram, præcisè prout didiceram, et prout à Romanâ schedâ docebar, sæpissimè in usum deduxi. Itaque, præmissis omnibus ex arte præmittendis, pro certâ subindè febrium adhuc vigentium curatione, dosim integram *duarum drachmarum* corticis, ex vino, ut mos erat, exhibebam horâ ingruentis paroxismi, et quidem die vehementioris insultûs, si febris *v. g.* tertiana duplex erat, quippè observâram, quòd si die minoris cortex fuisset exhibitus, correspondens tantùm paroxismus, levior

videlicèt, inhibebatur, graviore superstite, ac tertianâ duplici in simplicem mutatâ : si verò die gravioris accessûs propinatus fuerat, minor quidem immediatè subsequēbatur paroxysmus, gravior autem correspondens non modò supprimebatur, sed et post illum alter minor; nec ullus alius deinceps viscebatur. Quòd si eadem tertiana, aliave febris intermittens simplex erat, nulla animadversioni huic erat occasio.

Quia verò, fugatis febribus, frequentes recidivas quæ suboriri consueverant ægrè ferebam, easdem quodammodò mihi reputans indecoras, de iisdem quoque præcavendis, seriò, ac sollicitè intrà metipsum cogitare cœpi. Quamobrè ad repellendum pro viribus febrium reditum, per octo circitèr subsequentes dies, omni mane *Semidrachmam* pulveris exhibebam per modum alterantis cujusciam, ratus, me probabiliter inter paucos dies consecuturum à cortice illam humorum, ut aiebant, præparationem, quam aliàs per plures menses à centum julapiis, et jusculis frustrà quæsieram; imò, quò certior fierem de prohibendâ recidivâ, elapsis iterùm quindecim, plùs minùs, diebus, utut optimè convalesceret æger, per alios saltèm sex dies *scrupulum unum* ejusdem corticis singulo mane sumi jubebam, quâ repetitione, juxtà exigentiam casuum, quandoquè etiam pluries institutâ antè reditum febris omnem fomitem, ac omne fermentum pro recidivâ superstes non rarò penitùs tollebam. Et hac methodo etiamnùm utor, si quandò febres inter-

mittentes longiusculas per Chinam Chinam curare aggredior.

Non absimili admodum viâ incedunt hodiè cautiore quamplurimi, qui ad tollendam semsim, nec uno quasi ictu comprimendam febrilem effervescentiam, ipsum corticem exhibent à principio per modum levioris alterantis, imminutâ scilicet semper, ac parvâ dosi, (putà ad *Semidrachmam*, vel circitèr) idque semel tantum in die, tempore quo accessio deferbuit vel omninò cessavit, sive informâ solidâ, sive in aquâ etiam aliquâ stillatitiâ, putà card. b., scorzoneræ, etc. potius quam in vino; quam dosim semper æqualitèr ad plures, et plures dies protrahunt, usquequò nempè febris extincta sit, ac ultrâ etiam, ut præcaveatur regressus. Atque hanc quoque methodum in naturis, palatisve delicatulis, et in *debiliorum febrium diuturnitate* haud infrequentèr, et ipse teneo.

Sed si caussa febrium valida sit, uberior, et contumax, ob metum verò imminentium symptomatum, vel ob aliam justam rationem congruum videatur, febrem longas admodum moras non admittentem, suppressere, tunc satius est priùs exhibere dosim integram *duarum drachmarum*, postea sensim imminutâ dosi procedere; sic namque citius et infallibiliùs effectum consequimur. Neque enim *sex scrupuli* v. gr. pulveris, per sex successivos dies assumpti æquivalent activitati, licèt æquivaleant ponderi *duarum drachmarum* uno haustu assumptarum; quod, ut maximè verum est, ità et maximè

notandum in praxi. Hinc est, quòd unus medicus, cum *drachmis sex*, vel cum *unc. j.* Chinæ Chinæ, quamlibet febrem intermittentem diuturniorem sanet, et recidivam etiam præcaveat : alter verò cum *unc. iij.* vel *iiij.* vix, ac ne vix quidem, id assequatur; si videlicet primus *drachmas duas* primâ vice porrigat, (quibus solis febrem immediatè suppressit) de in post unam vel alteram diem, *drachmam unam* iterùm propinet, ac sequenti die alteram similiter *drachmam*, demùmque interposito octo circitèr dierum spatio, *semidrachmam* quotidie per alios octo dies continuos exhibeat, quâ methodo omnis ferè semper inhibetur recidiva : alter verò *tres uncias* integras ad *scrupulum unum* quotidie (propè inutiliter) impendat. Sanè una tantùm libra aquæ affatim effusa par est extinguendo ignorum carbonum cumulo ; duæ verò libræ guttatim, et longiusculis intervallis stillantes tractu temporis difficilè idem præstant. Sic purgatio per epicrasim instituta, quamquam persæpè tutior sit, ac utilior purgatione mediocritèr validâ, non est tamen citior aut certior, quoàd obtinendum finem evacuationis. Idem dicendum prorsus de dosi congruâ et integrâ Chinæ Chinæ, quoàd effectum certiorum pellendi febres, cæteris paribus.

Practicæ hujus veritatis ope decerni quoque posse videtur de usu liberaliori, prudenti tamen, omnium fermè alterantium. Horum sanè doses nostris temporibus sunt adeò diminutæ, et in dies minuuntur, propter nescio quamdam scrupulosi-

tatem magnorum etiam virorum, minùs tamen practica addictorum, ut sæpiùs fortassè cunctationi huic imputari possit feliciùs successuum carentia frequentior, et fraudatio expectationis nostræ, quam jure merito nobis indidit longa patrum experientia et auctoritas, sed nimia nostri seculi in usu practico fefellit cautela. Ad hanc superstitiosam, ut ità dicam, medendi rationem referri quoque potest austeritas nonnullorum vini usum pro Chinæ Chinæ infusione ac assumptione reprobantium, cùm tamen illud, pro complendo hoc opere, cæteris quibuscumque liquoribus sine ullâ suspitione præferri possit. Neque enim ab illo, etsi nonnunquàm generosiore, per infusum tamen corticem aliquo modo enervato, quicquam detrimenti unquàm evenisse dignovi, sicuti nec interesse, album ne illud sit, an rubellum, austum, an dulce etc., ut proindè liceat innoxie uti eodem, vel in febribus plurimùm intensis, teste experientiâ, et *Sydenhami* auctoritate, quem inter cæteros lubet seligere : *Neque enim*, inquit ille, *mihi unquàm contigit, ut viderem vinum in quo propinatur cortex (quod jure quis possit suspicari) febricitanti obfuisse ; econtrà verò calor, sitis, cæteraque febris symptomata ut plurimùm, post assumptam hujus remedii quantitatem sufficientem, mox evanescent, vino haud obstanti.*

Aliis itidem imitatoribus methodi, quam sub arcani nomine tanti vendidit in Galliâ *Talbotius* Anglus, in usu est solam corticis percolatam infusionem ex vino, rejectâ ipsius corticis substantiâ, (ne

videlicet stomachum gravet) ad *unc. v.* vel *vj.* propinare, idque assidue repetere, interposito quatuor scilicet horarum intervallo, incipiendo à remissione cujuslibet paroxysmi (nequaquam verò à principio) (1) usque ad alterius adventum, et sic

(1) Et reipsa nunquam, ineunte paroxysmo, administratio *Chinæ Chinæ* tuta, nam tunc proprietates vitales jam ad centrum confluentes, nimium evehit, et eminens febrifugus in hac periodo deglutitus, ægros sæpissimè enecavit.

Quoad eximiam speciei determinatæ *Chinæ Chinæ* virtutem, auctorum opiniones jam recensuimus.

Chemici Galli *Pelletier* et *Caventou* analyses chemicas de *Chinâ Chinâ* evulgarunt in Diario cui titulus: *Revue médicale*, mense Februario anni 1821. Duplicem alkalinam substantiam repperunt, quorum unam *Cinchonine*, alteram verò *Quinine* appellarunt; hæc ex *luteo* cortice, altera ex *griseo* extrahitur; utramque distinctè possidet china *rubra*. Illustri chemici de novo siscitati sunt an virtus febrifuga in iis substantiis resideat, uti virtus narcotica nunc apertè in *Morphine*, tetanica nucis metellæ in *Strychnine*; affirmativè nodum jam solvunt ex experientiis celeb. Doctores *Fouquier*, *Magendie*, *Double*, *Coutençeau* et *Chomel*, sed à repetitis experientiis veritas hujus asserti expectanda est.

Quoad utiliorem tutioremque modum administrandi corticem, in febribus intermittentibus non perniciosis, partitis dosibus, in substantiâ exhibitur, sensim adaugendo doses, sed duabus aut tribus drachmis, initium faciendo, prout species *Chinæ Chinæ* adhibita, uti jam notavimus. Excipitur aut vino aut coffeæ infuso aut alio quocumque liquido, ut deglutitio facilior evadat, aut boli, vel electuarium cum syrupo efformantur. Cùm febri quartanæ pertinaci opponitur, *tartaro stibiato* maritatur. For-

primò ad plures et plures dies, deindè manè tantùm, et serò, tandemque semel tantùm in die, ad plures usquè hebdomadas sensim procedendo, febre etiam sublatâ.

Sed, ut verum fatear, licèt hanc præparationem absolutè non improbem, suâ quippè præstantiâ nequaquàm carentem, ea tamen minùs arridet, non quidem ratione temporis exhibendi febrifugi, quod potius cum aliis commendo, cùm tutius sit hostem fugientem, febrim nempè, insequi à tergo, quàm venientem aggredi à fronte : sed primò, quia debilis admodùm est hujusmodi modus, et tardioris effectûs, imò etiam incerti; secundò, quia sic fieri solet inutilis consumptio remedii præstantissimi, ac in urgentissimos casus sollicitè potius servandi, cùm

mulam *Debois de Rochefort* hîc transcribere utile credimus, quæ pro frequenti usu in nosocomiis *Lutetianis* venît.

<i>Rx. Pulv. Chinæ Chinæ</i>	<i>unciam,</i>
<i>Tartari stibiati</i>	<i>grana sexdecim,</i>
<i>Sal absynth. vel alius</i>	
<i>Alkali fixi,</i>	<i>drachmam,</i>
<i>Syrupi absynth. q. s. m. f. boli n°. LX.</i>	

In apyrexia viginti boli deglutiuntur, quinque singulo trihorio. Magna tartari stibiati dosis timenda videbitur, at ex eo quòd *Chinæ Chinæ Taninum Oxido* antimonii sociatur, remedium mitius evadit et virtutem emeticam deperdit, quæ cuncta experientiâ confirmantur.

Multæ aliæ sunt præparationes, ut *decocta, extracta, tinctura, syrupi*, et *Cel. Zea* et *Alibert* cerevisia medicata; in postremi operibus videantur, quæ scripsit hîc referre supervacuum.

pro tali infusione necessaria sit, magna quantitas Chinæ Chinæ, ad uncias nempè sex, vel octo, ut ipsi fatentur auctores Galli, pro uno tantum ægro perfectè sanando. Accedit quòd hujusmodi infusio, partitis etiam vicibus instituta, nonnisi in pluribus vini libris, longâ postmodum morâ vapescens, potest institui : siquidem cuilibet unciae Chinæ Chinæ, una saltè vini pinta Parisiensis, continens *unicas xxxij*, imò, secundum *Lemeryum*, duæ pintæ solent affundi. Quod sanè impendium corticis ad excessum usquè producit pro morbo vulgari, qui cum exiguâ cæteroquè corticis et liquoris mole curari potuisset. Et reverà solo cortice tali infusioni superstite, rejectoque jam ut effecto ac inutili, plures ægrotantes pauperes sanatos novi, cum tamen pro uno ditiori vix tota, quanta erat, infusio suffecerit. Tanta est substantiæ corticis etiam per infusionem præcedentem energiatæ activitas, et tam debilis est activitas simplicis infusionis illius, etiamsi vegeti! Hanc nihilominus methodum amplexa est Gallia serè universa, postquam eâ usi sunt omnes regii sanguinis principes, et sacra ipsa Regis persona, cui tamen verè profuit ipsa corticis epoti substantia. Edita proindè est, ac promulgata eadem methodus cum approbatione Aulicorum medicorum, scilicèt clarissimorum *D'Acquin*, *Fagon*, *Le Bel*, et *Du Chesne*, accedente universali aliorum totius regni medicorum usu.

Laudabilior tamen meo iudicio est mos eorum,
qui

quā factā dilutiori, ut suprā, infusione unciarum duarum, vel trium Chinæ Chinæ, eandem non *percolatam*, sed nonnihil *turbidam*, eādē paritē, ut suprā, dosi, iisdemque temporibus, cum non absimilibus intervallis præbent; quā demū propē absumptā, reliquæ portioni Chinæ Chinæ in fundo subsidentis, novum vinum quin etiam tantillum novi corticis (ut et factitabat *Talbotius*) affundunt usquē ad veteris, et novi pulveris absumptionem: sic enim citiūs, et certiūs sortiuntur intentum. Sed neque hoc planē satisfacit, quatenūs pro occasione nimis levi nimium paritē sit Chinæ Chinæ proluvium, nimisque diu vexantur ægri nauseosā, et frequentē repetitā ingrati medicaminis oblatione. Si ferat nihilominūs ægri stomachus, nec eum pigeat expensæ supervacaneæ, hujusmodi methodum improbare non audeo.

Sunt aliæ plures Chinā Chinā utendi formulæ, singulæ suo robore præditæ: ex eā siquidem parantur tincturæ admodū efficaces, extracta paritē non parū activa (plūs minūs tamen pro ratione menstrui ac modi eandem conficiendi) quæ sicut simplicem corticis substantiam superant quādam jucunditate saporis, efficiuntque ideò, ut assumantur faciliūs, itā ambigo, nec sine causā, an æquent virtute, ac energiā operandi, ut quandoquē opus esset, præsertim si hujusmodi artefacta diutiūs asserventur, imò nisi sunt valdē recentia. Quòd si auctoritati famigeratissimi *Malpighii*, et aliorum in hoc velimus subscribere, sanē tincturæ

potius quàm substantiæ, quippè lignæ, ac proindè gravioris, sicut et administrationis paulatim potius quàm cumulatim institutæ, usum tutiorem reputabimus. Ego verò sollicitus de certitudine, et promptitudine eventûs, ubi præsertim aliqua urgeat necessitas, circà primum caput, meum adhuc votum suspendo, etsi satis felicem sæpiusculè (haud diffiteor) extracti paritèr ac tincturæ experientiam nactus. *Mortonus* tamen in administrando cortice exercitatissimus, dùm tincturam suam satis elegantem, neque cum vini spiritu (qui aliorum mos est) extractam commendat, eidem nihilominus aliquot drachmas pulveris in substantiâ præmittit pro fundamento curationis. De dosi autem, quod secundum est quid sentiam, jam dixi superiùs: nec majorem requiri quantitatem in casibus *vulgarium* intermittentium, ac tunc edixerim, reor, utut idem *Mortonus* dosim augere soleat, non alio nomine, nisi quia spurium, et effœtum corticem genuino et integro copiosè mixtum, nostris temporibus suspicatur. In *Schedulâ Romanâ*, inquit ille, *dos* *drach. ij. præcisè adultis præscripta erat: jam autem quia cortex adulterinus est, coacti sumus saltem unc. j. nonnunquàm duas, vel tres ingerere, priusquàm scopum attingere possimus. Drachmas duas vix jam sufficere infantium, ac puerulorum febribus fugandis, cuilibet in medicinâ exercitato notum est.* Sic ille. Hujusmodi autem fraudem in cortice apud nos ego, ut verum fatear, nondum deprehendi, eundem nimirum effectum, ac pri-

mis temporibus, à consuetâ dosi etiamnum reportans.

Paritèr cum conservis rosarum, absynthii, violarum, etc. admixta China Chinæ, speciei opiatae vel electuarii, utilitèr exhibetur; itèm, quod commodius est, cum syrupo de absynth., de cortice citri etc. vel cum solutione tragacanthi, in formam boli redigitur, vel cum saccharo et idoneo liquore coquitur ad consistentiam syrupi. Sic ego sæpiùs tincturâ ejusdem forti in julapium redactâ pueros, quibus amarum ingratum est, ni fallantur specie dulcedinis, curare consuevi. En mea illius descriptio:

℞ *Chinæ Chinæ in tenuissimum pollinem redactæ unc. j. Irroretur vini spiritu qousquè humescat tota, mox infundatur in unc. xvj. vini albi generosi. Digatur in b. m. tepido per biduum vel triduum, agitando vas pluries in die, dein factâ per linteum valdè rarum colaturâ cum forti expressione, (ut portio saltèm tenuior substantiæ, cortici trajiciatur) adde sacchari albi clarif. unc. viij., et in vase fictili coquaturlento igne ad consistentiam syr. Dosis unc. j., unc. j. ss., unc. ij., et ultrâ, si lubeat. Julapium istud eò efficacius erit, quò turbidius et substantiâ corticis magis imprægnatum, secùs verò quò magis perspicuum. Poterit autem in tali casu, vel si adultis sit præscribendum, acui et roborari additione substantiæ corticis ad scrup. j. vel ad drach. ss. pro qualibet unicâ, quæ commixtio tempore oblationis valdè utilis esse potest, nec multùm incommoda.*

Omnibus hisce modis, quorum unicuique sua vis inest, exhibitus debitâ, continuatâ dosi, tûm in paroxysmo, ut olim, tûm extrâ paroxysmum, ut modò, et quidem partitis vicibus, Peruvianus cortex, in tenuissimum pollinem (quod unguè notandum est) probè redactus, febres omnes intermittentes lugat, modò citiùs, modò tardiusculè, prout magis vel minùs valida, copiosa, aut frequens fuerit illius oblatio. Harum tamen formularum nulla ex relatis promptiorem sortitur effectum, quàm ea quæ primùm fuit inventa, exhibendo videlicèt *drachmas duas* Chinæ Chinæ per aliquot horas (quod tamen minimè necessarium) in vino antecedentèr infusæ, invadente paroxysmo, vel, si mavis, eodem declinante; siquidem in principio accessionis metus est ne vomitu tunc temporis facili rejiciatur, illo enim paroxysmo transacto, certò certius non redit alter. Et si constantèr ac opportunè repetatur remedium modò ad *drachmam*, modò ad *semidrachmam* ad plures dies, semelque tantùm, vel bis in die, prout opus videbitur, videlicèt priusquàm semiconfossus hostis vires resumat, præcavetur etiam recidiva. De reliquo non est, cur simus admodùm solliciti de eleganti illius præparatione, nisi id fiat gustûs gratiâ, vel ob difficultatem assumptionis ex parte ægrorum; tunc enim tincturas tantùm, vel extracta, aliasve remedii contractiones, per infusionem, decoctionem, expressionem etc., cogimur anteponere substantiæ illius. Extrâ hujusmodi occasionem absque ullo fuco exhibeatur cor-

tex; quandoquidem, quocumque modo offeratur, nostram semper expectationem implet, eò fortior, quò simplicior.

In hanc rem audiat *Mortonus*, qui de *Chinæ* *Chinæ* tincturis, extractis etc. verba faciens, concludit: *Audeo palàm affirmare, multà ac diuturnà experiencià fretus, Chinam Chinam simplicem, et in substantià exhibitam (modò in pollinem seu alcohol arte priùs redacta fuerit etc.) certiùs ac compendiosiùs vires suas exercere, atque finem optatum attingere, quàm si multà arte, aut igne torqueatur, ac nativis viribus spoliata, more pomposissimo exhibeatur, adeò ut in istis præparationibus oleum et opera perdatur. Neque cuiquam auctor ero, ut nugas hujusmodi captando, atque reapse nihil efficiendo, temporis pretiosissimi jacturam faciat. Alibi paritèr idem inculcat, sic inquit: Febres sanè substantià corticis citiùs ac certiùs quàm quâcumque speciosissimà ejus tincturà, extracto, vel elixire fugari, atque fugatas ad recidivationem minùs aptas esse certò certiùs constat. Quod idem paucioribus his dixerat *Blegnyus*: Porro, me iudice, simplicissimæ præparationes, et quæ minùs artificium redolent, omnibus præferendæ sunt.*

Neque tamen primos *Chinæ* *Chinæ* fautores latuère istæ quæ recentiores vulgò reputantur, illam præparandi formulæ; siquidem de ipsis expressam mentionem facit laudatus *Badus*, qui non modò extracta et tincturas (quas inter celebris est quam profert ex descriptione *Jo. Gregorii à Gonzalez*

medici Cæsarei) sed etiam sales et spiritus ejusdem, imò et aquam stillatitiam, vel tunc fabrefactam indigitat, de cujus tamen viribus nollem inexpertus quicquam spondere.

Sed tantò luxuriantium præparationum apparatu nondùm contenta ostentatio medica cogitavit adhuc de adjungendâ huic Achilli, qui sibi solus sufficit, aliorum medicaminum inutilium (utinàm non contrariorum) societate, si non titulo expugnandæ febris, saltèm leniendorum symptomatum: quo nomine laudanum opiatum, ubi præsertim symptomatica diarrhæa, vomitusve frequens febribus adjungatur, communiter (nec tamen malè) solet cortici commisceri. At licèt injuria cæteroquè annectatur Chinæ Chinæ consortium cujuscumque remedii (ubi enim ea convenit, convenit sola) cum omnia febrium symptomata quantumvis gravia, devictis per corticem febribus, tollantur penitus; attamen, si cui lubeat eadem addere, non sine plurimorum scriptorum auctoritate, addat, licet ut plurimum supervacue.

Id unicè admittere nequeo, etsi eorum nonnulli faciliè admittant aut suadeant, nempè quòd cortici ulla cathartica, utut levia, admisceantur, vel post eam oblatam propinentur; per solos enim clysteres repetitos satius est negotium absolvere. Usu namque satis didici (quod et à scriptoribus magis expertis est adnimadversum) ea ipsa familiaria remedia, quæ vix ac nè vix quidem naturam alimenti transcendunt, suntque convalescentibus usui ordi-

nario ab alvum lubricam servandam, ea inquam ipsa, post ssumptum corticem febres iterum suscitare. Quamobrè eâ certitudine, quâ febris per Chinam Chinam expellitur, eâdem pariter per cathartica revocatur. Quod diutinâ observatione adeò constans reperi, ac adeò perpetuum reputo, ut olim quartanario quidam bimestri, per corticem curato, et adhuc nihilominus querulo, quòd plura mala ex istiusmodi curatione metueret, quam ex febre non satis diù (ut aiebat) gestatâ, impatiens responderim, quòd si tanti febrim suam faceret, ut, eâ sublatâ, re meliore per me spoliatum se crederet, paratus eram illicò febrim ipsam illi medio cathartico restituere. Melius consultus renuit, et vixit iucolumis.

Quoad modum diætandi ægros tempore febri-fugi oblatis, ego (quidquid aliis placeat) eandem servari jubeo victûs rationem, qualem pro ratione febris antè corticis usum præscripseram, servato congruo semper intervallo inter cibum atque remedium, quemadmodum in aliis quoque casibus mos est, ut scilicèt purior, quantum fieri potest, ac impermixta deferatur quò tendit substantia remedii. Neque ex hac praxi ullum unquam incommodum in stomacho ægrotantium, quale describitur ab iis qui ventriculum jejunum nolunt, sed cibus refertum, ut melius corticem ferat, contigisse memini. Forsitan id illis accidit, qui quartâ quâque horâ plures uncias infusionis Chinæ Chinæ stomachum inundantis, assumunt. Non sic certè in

præscriptione mihi familiari. Ingurgitationem idcirco, ac frequentem ciborum præsertim solidorum oblationem, quæ nonnullis arridet, in hac saltèm regione laudare nequeo.

Intrà hos cancellos vulgò subsistit usus frequentior Peruviani corticis, tùm quoàd dosim, tempus et modum offerendi remedii, tùm quoàd febres, quæ pro scopo activitatis illius communiter designantur. Innumeras equidem alias Chinæ Chinæ præparationes, atque illius antè infusionem prævias irrorationes, commixtiones, etc. ex plurimis auctoribus hùc afferre possem longiori ordine, sed crambem millies recoctam abnuo recoquere: nonnullas tamen ex iis quæ præstantiores creduntur, in gratiam tyronum tantummodò minimè gravabor transcribere. Interim, antequàm pergàm, mihi generalitèr dixisse sufficiat, *drachmas duas* genuini pulveris, sive solitarii, sive aliis febrifugis associati, et quomodolibèt, unâ vice, tempore idoneo exhibiti, sive in formâ liquidâ, sive solidâ, sive in aquis stillatitiis, sive in vino (quod ego, præsertim si tenuius sit, cæteris liquoribus antepono) quamlibet intermittentem fugare: eundem verò pulverem pro arbitrio, et pro morbi exigentiâ, parciore dosi ad plures dies similiter exhibitum, ac subindè etiam repetitum, ejusdem febris reditum ut plurimùm prohibere. Ne tamen sicco pede aliorum præscriptiones transigere videar vel negligere, elegantiores, ut spongi, nonnullorum formulas hùc apponam.

Sydenham in observationibus medicis simpliciorum hanc habet : ℞. Peruviani cort. sub. pul. unc. j. cons. ros. rubr. unc. ij. M. Capiat æger quantitatem nucis mosch. majoris, manè et serò quotidie, diebus à genuino paroxysmo vacuis, donec totam confectionem absumpserit. Repetatur porrò ad tres alias vi-ces, interjectis semper diebus quatuordecim. In epis-tolis postmodùm ab eodem conscriptis, postquàm experientiâ profecerat, unciam unam paritèr ejus-dem corticis syrupo caryoph., aut de rosis siccis commixtam, vel duabus vini libris infusam exhi-bet, duodecim partitis vicibus, singulo quadriho-rio, tempore intermissionis, eâ scilicèt proportionè, ut intrà duos tantùm dies tota quantitas absuma-tur, atque octo tantùm interjectis diebus, reme-dium repetit, idque ter vel quater renovat ad ar-cendas recidivas.

Idem auctor pro infantibus sequens (ut inquit) ju-lapium solet conficere : ℞. Aq. ceras. nigr. vini Rhe-nani an. unc. ij. corticis Peruviani subt. pul. drach. iij. syr. caryoph. drach. j. m. f. julapium. Capiat coch-leare unum, alterumvè, pro ratione ætatis, quartâ quâque horâ, donec paroxysmi non ampliùs discru-cient, instillando alternis dosibus (si diarrhæa ad-fuerit) laudani liquidi gut. j. vel. ij. Limpidam au-tem ex diligenti percolatione infusionem corticis, quam pro delicatulis præscribit, nullius ferè ro-boris esse, plurimâ fretus experientiâ pro certo ha-beo. Claris hujusmodi infusionibus, exiguâ corticis virtute imbutis, anteponerem potiùs vinum Mon-

ginotii (cujus tamen nullum mihi fuit unquam experimentum in praxi) paratum tempore vindemiarum ex Chinâ Chinâ immixtâ, in pulverem redactâ, illiusque probabiliter viribus mediâ fermentatione validiusculè imprægnatum.

Mortonus autem corticis strenuus administrator illum exhibet per octo, decem, vel duodecim vices ad *drach. j.* singulo trihorio, vel quadrihorio, tempore absentis paroxysmi, modò in formâ potûs, modò in formâ boli, vel pillularum. Quæ quidem dosis sic repetita, quemadmodum excedere solet exigentiam intermittentium *benigniorum*, ità nonnunquam non æquat, ut suo loco videbimus, exigentiam quarundam *perniciosarum*, utut methodos aliorum efficacia superet. Formulæ autem illius sunt sequentes: *℞. Aq. card. b. unc. ij., Aq. epid., syr. caryoph. an. drach. ij., Chinæ Chinæ elect. subt. pulv. drach. j. M. f. haustus, qui absente paroxysmo illicò propinetur, repetaturque tertiâ, vel quartâ quâque horâ ad viij, x, vel xij vices. Vel*

℞. Cort. Peruviani elect. in subtiliss. pollinem reducti drach. j., syr. caryoph. q. s. m. f. bolus sumendus ut suprâ. Vel

℞. Pulv. Peruviani subtiliss. triti unc. j. vel unc. j. ss., syr. è rub. idæ q. s., balsami Peruv. scrup. j. vel drach. ss. m. f. Elect. de quo sumat æger quantitatem nucis mosch. tertiâ, vel quartâ quâque horâ extrâ paroxysmum. Vel

℞. Pulv. febrifug. elect. et subtil. triti unc. j. vel unc. j. ss., mucilag. gum. tragacanthi, aq. plantag.

extract. q. s. m. f. pill. mediocres deaur., quarum viij, x, vel xij. quartâ quâque horâ intermissionis deglutiat.

Pro iis autem, qui ægrè ferunt substantiam corticis, post dosim aliquot drachmarum illius pro fundamento curationis priùs propinatarum hâc tincturâ utitur ad perficiendam curationem : *℞. Cort. Peruviani crassè pul. unc. iij, coque lenitèr in aquæ fontis, lib. j. ad medietatis consumptionem : deindè f. colatura, atque reliquias decocti, eâdem aq. quantitate recens affusâ, coque et cola iterùm, hoc modo repetendo operationem ad tertiam vicem, vel donec tota corticis amarities fuerit extracta. Denuò omnes colaturas commisce, et adde aq. epidem. syr. caryoph. an. unc. iv. vel v. m. f. apozema, sive tinctura, de quâ sumat æger unc. iv, v, vj, quartâ quâque horâ extrâ paroxysmum, vel sæpiùs ad libitum.*

Ex Zodiaco medico Gallico præter remedium Anglicum, seu præparationem Talbotii, de quâ infrâ, et alias præparationes aliorum, habemus specialitèr hanc opiatam non inelegantem : *℞. Quinquince pul., fol. aut flor. centaurii min. sub. pul. theriaces an. part. æqual, confice ex his opiatam, de quâ sumat æger bis in die drach. j. ss. sex dierum spatio, superbibendo haustum vini rubelli optimi, et aq. plantag. vel bugossi. Eamdem, meo iudicio, efficaciorẽ (quippe Chinæ Chinæ plùs admittentem) reddit cl. Nigrisolus immutans hoc pacto : *℞ Chinæ Chinæ pul. unc. ss. fol. centaur. min. pul. mithridat. opt. an.**

drach. ij. m. et cum syr. de absynthio, vel de cort. citri, vel aurantiorum f. pill. (non præscribit molem, aut pondus singularum, sed facile est id cuique determinare) quarum sex, vel saltèm quatuor assumat æger quotidie, superhausto cyatho vini generosi, vel aq. card. b., aut sonchi etc. continuando usum talis opiatae per aliquot dies, etiam sublatâ febre, ad recidivæ præcautionem.

Ex eodem deniquè *Zodiaco*, et ex ipso *Nigrosolô* innuere solùm juvat, minimè verò transcribere celebrem præperationem *Talbotii*, utpotè satis notam, scitu facilem, relatu operosam, et à vulgari infusione parùm discrepantem. Me tamen vade, ea per se imbecillis est; quidquid enim roboris eidem inest, illud à crebrâ tantummodò, et diuturnâ ejusdem oblatione procedit. Cæterùm excellentia, quæ illi à nonnullis tribuitur, eò quia virtutem nudam corticis in se contineat extractam à crassiore substantiâ, quæ proindè rejicitur (sed perperam) ut effæta, tanta reverà haud est, quanta creditur: et planè versutè id factum ad velandum remedium cognitu nimis facile, ut scilicèt pro arcano posset venditari. Id unum expedit animadvertere, quòd quotiescumquè simplici infusione uti velimus, idque sinat morbi benignitas, opus est dosim saltèm duplicare, et macerationem duorum, vel trium dierum præmittere, ac sæpiusculè vas liquoris concutere: ut sic liquore, quantum fieri potest, imprægnato, probabilem sortiamur effectum ab infusione duplicatæ dosis, quem à subs-

tantia dimidia certum consequeremur. Qui magis elaboratas expetit hujusce remedii præparationes, illiusve tincturas, extracta, etc. adeat *Badum*, *Sturmium*, *Rolfinchium*, *Lemeryum*, *Donzellum*, *Dolæum*, *Monginotium*, *Talbotium* modò memoratum, seu potius *Blegnyum* pandentem arcana *Talbotii*, *Helvetium*, *Charas*, et alios, quorum plurimos etiam reperiet in uno antidotario Mediolanensi acervatim citatos.

Similiter cum confectionibus cardiacis, ut de hyacintho, alchermes, etc. solet à nonnullis simpliciore apparatu, et retenta illius substantia, misceri cortex, supervacanea quidem impensa, sed eventu nihilominus æquali, dummodò illius sit dosis, ususque sufficiens, cujusmodi exempla passim videre est apud auctores ferè omnes cortice utentes. Mixturis autem hujuscemodi, præsertim verò opiatibus amaricantibus paulò suprà relatis, uti possunt ii præcipuè, quibus occasio est corticem velandi, vel quia ægrotantes panico terrore perculsi renuant assumere, vel quia ipsi erubescant palàm offerre, eò quòd aliàs incautè nimis, aut studiis propriis ducti, illum damnaverint: odor enim et sapor theriacales satis notus, simulque amarities centaurei saporem Chinæ Chinæ celabunt, ac obruent. Quod reliquum est, ut ingenuè loquamur, cùm quidquid illi commiscetur (etsi simpliciter bonum) eadem sit imperfectius, non est cur moles remedii augeatur adjuncto aliquo imbecilliore, quod à solâ Chinâ Chinâ efficaciam ferè totam debet mutuari.

Satis appositè in hanc rem aiebat Doctissimus Sydenham. *Qui aliquid cortici adjiciunt, præter vehiculum eidem in ventriculum transmittendo necessarium, aut ex ignorantia peccant, ut mihi videtur, aut dolo malo, à quo vir probus ex animo abhorrebit.*

Extensionem verò remedii istius ad alias febres expugnandas, putà continuas, malignas, etc. à nonnullis propositam, vel usurpatam, itèm ejusdem injectionem per clysteres ab *Hadriano Helvetio* descriptam, et à me quoque aliquandò institutam, variosque illius usus ad alias ægritudines, hic loci, ubi de usu tantùm vulgari ejusdem in intermittentibus agitur, examinare supersedeo, cùm ex professo de his omnibus suo loco sim plura dicturus.

CAPUT VIII.

Diligentior investigatio, an liceat in principio quoque earundem vulgarium intermittentium *Chinam Chinam* exhibere.

QUÆ diximus hactenùs de tutâ citâ, ac certâ actione Peruvianæ corticis in diuturniore febrium intermittentium *progressu* exhibitæ, et quæ de causis ipsarum intermittentium superficie tenùs tetigimus, omnem locum videntur surripere propositæ quæstioni, an scilicèt illam etiam in *principio* earundem liceat offerre, quandoquidem omnibus temporibus, et quò citiùs, eò meliùs, morbum semper tolli debere, si possibile sit, extrà dubium

videtur. Sed non est planè ità ; aliud namque quærendum est priùs , quod magis refert , nempè an verè hujusmodi febres ab initio liceat suppressere (quod et circà usum suorum alexipyretorum adnotârunt antiqui) præscindendo , an id mediante cortice , vel alio quovis febrifugo tentare expediat : nam quotiescumquè id facere congruum censeatur , nil profectò melius cortice in hunc finem occurret. Sed non est res parvi momenti decernere an congruat tempori.

Pro hujusce nodi solutione lubet aliquâ ex parte convenire cum *Sydenham* admonente : *Curandum esse antè omnia , ne præmaturè nimis hic cortex ingeratur , antè stilicèt quàm morbus suo se marte aliquantisper protriverit , nisi collabescentes et jam fractæ ægri vires* (virium autem collapsus in morbi principio nequit contingere , nisi ob ingravescentiam symptomatum , quam ideò satius fuisset exprimere) *eundem temporiùs suggerendum esse dic-taverint*. Sed quia ratio illius innititur suppositioni , quòd causa intermittentium æquè ac continuarum tota delitescat in sanguine , alia idcirco nobis , hac de re diversimodè sentientibus terenda est via , ut nihilominùs , etsi discordes in ratiocinio , ferè coincidamus in praxi. Jamque in hanc rem præstò est quædam *Avicennæ* aliorumque plurium scriptorum distinctio ipsi quoque *Sydenham* accepta , quâ uti solebant pro regulâ practicâ curandi febres , insignem aliquam cutaneam eruptionem , v. g. variolarum vel morbillorum secum ferentes , quas si

verè pro *depurativis* (sic dictis) seu *perfectivis* habebant, neque sanguinis missionem, neque ullam aliam opus illud inturbare valentem, celebrabant operationem, sed totum negotium committebant naturæ, sanguinis depurationem suo tempore mediâ ejusdem ebullitione maturanti. Si verò *corruptivas*, talis erat illarum nomenclatura, reputabant ejusmodi febres, illas totis viribus artis statim aggredi, moderari, ac tandem expugnare conabantur. Hæc eadem itaque sit nobis norma et distinctio in resolutione allati problematis; si nempe febris intermittens *depurativa* sanguinis aliorumve succorum rationabiliter censeatur, ea uti expers periculi et facilè tolerabilis, vel nonnihil diutiùs, vel etiam omninò sinenda est, vel vulgaribus tantùm remediis, cum circumspectione tamen, tractanda. At si ejusdem sanguinis, vel visceris alicujus læsiva, ac veluti *corruptiva* videatur, tunc ab ipso *exordio* per corticem suppressi poterit.

Pro hujusmodi autem distinctionis ulteriori explicatione, et practicâ utriusque casûs dignotione, hùc iterùm revocanda sunt in gratiam tyronum quæ de febribus adnotavimus capite præcedenti: ex duobus siquidem, vel tribus theorematis generalibus ibidem relatis tota pendet solutio problematis, et varia rationalisque administratio remedii.

Suppono itaque ex jam dictis, febres tam continuas (eas saltèm, quas putridas appellârunt antiqui) quàm intermittentes in hoc convenire, quòd illarum scena intrâ sanguinem peragatur; idque
vel

vel perpetuò, vel saltèm ut plurimùm, ob rei aliqujus non exactè miscibilis, aut in probum cruorem convertibilis, copiâ verò aut activitate suprâ modum luxuriantis, heterogeneitatem. Suppono paritèr, easdem continuas et intermittentes in eo ipso in quo diximus convenire, ab invicem discriminari per hoc, quòd illud incongruum nec probè miscibile, quod continuas parit illarumque fermentum appellari potest, sit aliquid ipsum sanguinem integralitèr constituens cum ipsâ specie cruoris assiduè, licèt fortè imperfectiùs circulum agens, et cum chylo, lymphâ, aere etc. longo temporis tractu insensibilitèr aggestum, sed nec unquàm post diutinos labores eidem cruori assimilatum vel assimilabile, neque per repetitas circulationes in naturalibus viscerum cribris secretum aut expulsum. Quarè facto sensim determinato illius cumulo, qui non ampliùs, à reliquâ utili sanguinis massâ dilui, ferri, aut abscondi queat, eam necesse est, levi quâlibet accedente occasione, insurgere luctam et intestinam discordiam, quæ febrilem effervescentiam aut ebullitionem constituit. Hujusmodi autèm effervescentia plurium dierum curriculo pari passu procedens, nec interruptâ, sed æquali vigens duratione unius accessionis adinstâr (aliquam tamen etiam obscuram exacerbationem non excludentis) vel integram sanguinis depurationem ab intestino inquinamento, vel ejusdem integram paritèr conspurcationem, corruptionem aut inflammatoriam stagnationem asciscit, undè dispar exitus aut salutis aut mortis.

Intermittentium verò fermentum, ut reor, est aliquid, quod sanguini confusum potius quàm mixtum, eundem cruorem nequaquàm verè constituit, neque adhuc in eo specie liquoris assimilabilis delitescit; sed illi accedit omninò ab extrinseco, velut aliquid ab eodem planè diversum, quod periodicè aliundè suggeritur, tanquàm è fodinâ peculiari à sanguine dissitâ, ut eandem ebullitionis (periodicæ tamen, non assiduæ ut suprâ) scenam intrâ ipsum cruorem exerceat. Sed et hic idem succi extranei ingressus in sanguinem, seu illius intrâ istum confusio dupliciter potest contingere, nempe vel quatenus intrâ breve temporis intervallum (quantùm videlicet intercedit inter unum et alterum paroxysmum) succus hujusmodi paulatim congeratur, et intrâ idem intermissionis tempus sensim ad turgescientiam, mox et effervescentiam pertingat, vel quatenus affatim et unico appulsu (successivè tamen ad breve aliquod temporis spatium continuato) cruorem invadat, illumque statim perturbet, ac in febrilem effervescentiam cieat. Circâ hoc haud diffiteor, quòd licet primo modo facilior reddatur propositæ quæstionis solutio et explicatio actionis corticis non tam in correctionem succi vitiosi affluentis quàm in subsidium et adjumentum cruoris recipientis; secundus tamen modus, ut jam diximus, magis arridet, tanquàm phænomenis intermittentium omnibus, præcipuè verò quæ in invasione contingunt, explanandis, magis consentaneus.

Crediderim itaque haud improbabilitèr, in exordio paroxysmi febrium intermittentium succum febriferum lacteas statim venas, sive omnes, sive secundi tantum ordinis, undelibet illa iisdem accesserit, pervadere, eo quidem pacto, quo chylus per easdem delabatur: in quo itinere mirum non est, si peregrinus humor ille easdem excitet turbas angoris stomachi, vomitus et alvi fluxus, quas etiam excitare solet chylus ipse ex re aliquâ pravâ, ne dicam venenatâ, aut confectus, aut saltè infectus, ut proindè analogiâ quâdam venenosus quoque aliquandò dici possit succus ille chyli venenosi vices quodammodò gerens, ut alibi dicemus. Quo forsitan nomine excusandus foret aliàs citatus *Mortonus*, si venenum suum febrile hoc pacto intelligeret, sed reverà se alitèr explicare videtur. Ad ipsum verò cruorem jamjam pertingens in axillari latex antedictus, à scaturigine suâ fervidiore longè dimotus non modò ratione naturæ suæ tunc cum sanguine non sociabilis, sed forsàn ratione suæ actualis frigiditatis (respectivè scilicèt ad naturalem fervorem sanguinis ob partium heterogeneitatem assiduè fermentescentis) facile est intelligere, quo pacto postquam rigorem et horrorem excitavit in regione lumbari, in dorso et scapulis, utpotè locis per quæ excurrunt lacteæ insigniores, et cànalis ipse thoracicus tali tunc succo scatens, facile inquam est intelligere, quo pacto idem febrilis latex sanguinem ipsum, cui pleno gurgite infunditur, quodammodò frigesfaciat, saltè usquequò moram trahit citrà

cor, intrâ axillarem et cavam, suumque illi motum tam fermentativum quàm circularem interturbet, ac ad tempus retardet. Indicio sunt pulsus arteriarum depressus, ac fermè abolitus, extremorum perfrigeratio, labia pallida, facies universa insignitèr immutata, et hujusmodi. Sed et conjecturam hanc auget vulgata liquorum artificialium in vasa sanguifera viventium brutorum per syringam injectio, ex quâ eadem suboriri symptomata, cuique obvium est experiri. Tamdiù autem durat hæc scena quamdiù durat extranei succi intrâ cruorem ingressus; quo absoluto, ac subindè acquisitâ ab eodem succo intrâ utrumque successivè cordis sinum intimiori quâdam cum sanguine commixtione, majorique calore ac ad effervescendum dispositione, factâque idcirco primâ tumultuarium utriusque succi confusione, mox luctâ, sensim quod intrusum est, ab ipso præpollente sanguine quodam quasi attritu comminuitur. Demùm suscitât per mechanicam necessitatem cuique sensato sât notam, succi utriusque ebullitione, ordinata subsequitur partium miscibilium societas et immiscibilium secretio; undè paroxysmus mediâ heterogenei facilè separabilis (quippe confusi potiùs quàm mixti) exclusione, vel subactione qualicumque, omnimodè solvitur.

In hoc opere vicissitudinario per repetitos novi succi febrilis accessus exercito, illud lampadi nostræ vitali, sanguine velut oleoso pabulo sustentatæ (si metaphoricè saltèm, ni physicè sic loqui liceat)

illud inquam videtur accidere, quod veræ lucernæ accideret, si per intervalla et regulato stillicidio suprâ ellychnium eâ parte, quæ oleum inter et flammam mediat, aquæ guttula una, vel altera concideret. Aqua etenim recentèr affluens, oleoque intrâ ellychnium præexistenti confusa, statim ac ad flammam, quæ debet ali (itâ cum vulgo potius quàm cum philosophis loquor, ut expeditius me explicem) pertingit, flammulam eandem subindè languescere cogit, ac propè emori. Sed paulò post resumptis viribus ipsa flamma oleosis particulis adjuncta certamen init, et excitato crepitu tamdiù durat lucta, quamdiù præpollentes olei particulæ illisque inhærentes igneæ, aqueas pessundant, subigunt, ac explodunt.

Hæc collectanea potius hinc indè excerpta quàm mea, seu ex aliorum opinionibus resultantia, et per transennam tantùm oculis eruditorum oblata, seriò meditantibus, non longè fortè distare à probabilitate reperientur. Quidquid tamen sit, ea probare mei nunc instituti non est; sat erit, si assensum aliquem ab ingenuis assequar in re absconditâ, cujus principium verax nos latet. Id solùm fidentèr audeam proferre, nempè per istam succi febrilis coacervationem extrâ sanguinem, et dein subitanèam, successivam tamen, ut suprâ) eidem affusionem, dummodò ea non aliundè repugnet, longè meliùs explicari, ut modò innuebam, intermittentium phænomena, quàm per lentam et paulatim factam congestionem intrâ ipsum sanguinem, sive

hæc dicatur absoluta planè antè febres, plenoque acervo in singulas postmodùm accessiones dividendo, sive tempore ipsarum febrium, partitis tantùm portionibus quolibet intervallo repetitis aut reproductis, non quidem ab extrinseco, sed ab ipso sanguine, velut ex radice prodeuntibus; quod paritèr mihi dari, si licet, citrà probationem peto. Probari autem maximè posset ex ipsâ Peruviani corticis actione, quæ impedit præcisè febriles intermittantium accessus antequàm fiant, et solas paroxysmorum sese mutuò excipientium periodicas renovationes, in febribus subintranantibus, seu per subingressum continuis, nequaquàm verò suffocat ipsam, quâ cortex offertur (si sit inchoata, vel imminens) earundem intermittantium accessionem, neque tollit febres essentialitèr continuas, sicut neque illam accidentalem quæ continuis per subingressum quandoquè superest, sublatâ periodo, continuitatem. Hæc enim quæ uni jam sanguini inhæret, non tollitur per corticem, ut per eum tollitur statim periodus, sed spontè absumitur insensibilitèr, inquantùm nulla ampliùs ab extrinseco accedit copia auxiliaria novi fermenti febrilis, quæ suppetias ferat, utpotè per corticem impedita.

Ex hoc patet Chinam Chinæ assumptam forsitan relinquere sanguinem in eo statu, in quo eundem reperit, ut dicebamus capite antecedenti, illique tantùm occasionem præbere, ut à materiâ heterogeneâ propriis viribus se ipsum expediat, mediante præconceptâ effervescentiâ. Quod qui-

dem opus, ut ab eodem sanguine citrà impedimentum peragi possit, ipsa China China occurrit fermento febrili adventuro, et ne vel influat, vel saltèm nonnisi correctum, validè obsistit: atque ità non in febrem (quæ non corrigitur facta, sed præcavetur ne fiat) neque in sanguinem directè agit, sed in solam causam febris aliundè illuc tendentem. Et hæc observatio non est parvi momenti in praxi, siquidem ducit nos in cognitionem, quòd symptomata febrium, quantumvis gravia, dummodò ab iisdem febribus producta atque pendentia, nullo indigent post sublatas febres directo remedio: sed sufficit, ut per corticem pugnemus adhuc adversus causam febrilem, ut eadem certiùs advertantur febres, à quibus produci solent, atque foveri talia symptomata, contrà quæ cæteroquì, quoties pendeant ab alio vitio sanguinis non periodicè febrili, vel facta sint idiopathica, nil valet cortex.

Istæ et aliæ non absimiles observationes practicæ me trahunt in sententiam, quòd hujusmodi remedium parùm agat in sanguinem, repurgando illum à febrili miasmate præconcepto, aut eundem firmando contrà miasma sensim accessurum intermissionis tempore, sed potiùs agat immediatè in ipsum fermentum febrile, priusquàm sanguini immisceatur, sive postea illius influxum dicatur avertere, aut quomodolibèt impedire, sive illud (influxu non impedito, ut probabiliùs videtur) corrigere ac emendare. Quod dictum intelligo, etiamsi fermentum non modò in primis viis stabuletur, vel

ad eas quomodolibet pertingat, verum etiam si degat in glandulis remotis et in ipso corporis habitu, quo dubio procul China China ejusve tinctura, à fluidis nostris extracta potest pertingere, tanquam ad mineram, prætergrediendo sanguinem, atque intrà illum transitoriè vagando, altiùs tendens, si altior sit minera fermenti; prætergrediendo, inquam, ipsum sanguinem habentem in se (si quidem in se tunc habeat) miasmata febrilia disgregata et dispersa tantum atque confusa, agendo vero contactu immediato in nudum fermentum, ubicumquè illud lateat. Intrà istas conjecturas lubens subsisto, nec ulteriùs transcendere suppetit animus, easque expono uti tantum probabiles, neque tamen ullam ipsarum adopto.

Sed si res ita se habet, dicet quispiam, allata nuper distinctio febrium intermittantium in *depuratorias* et *corruptivas* (in cujus distinctionis gratiam cuncta hæc fuere præmissa) corrui omninò; siquidem nunquam ut depurativa cruoris considerari poterit ulla febris intermittens, quæ suum focum non habet in sanguine, neque is proinde dici poterit unquam peccare, nisi quatenus periodicè conspurcatur à succo febrili, à quo cæteroquì per se ipsum immunis est: adeoque febris intermittens semper erit corruptiva, nunquam verò depurativa sanguinis, nisi ex suppositione, quòd eadem ipsum antecedentè infecerit. Quapropter una corruiet ipsa praxis ex adductâ distinctione resultans quoad usum Peruviani corticis, qui proinde nullâ potius inter-

positâ morâ, ut sentiunt auctores quàmplurimi, statim ab initio præscribendus erit (1), prohibendo

(1) A nullo auctore, quod sciam, indigitatum est momentum febris intermittentis quo sine incommodo, sive China China sive aliud quodcumque febrifugum administrari debet. Usquè ad septimum paroxysmum morbum naturæ nisibus sinendum esse nonnulli crediderunt, dùm recentiores primo insultu febrem cohibent, complicationibusque deinceps curam impertiuntur.

Periculi plena nobis apparet postrema tractatio, nam complicationes ex naturâ phlegmasiæ semper participes, sæpissimè causam morbi constituunt, indè sequitur remedia feбри debellandæ usurpata complicationibus aut causis adversari; et febrem in *continuum* mutant, infarctusque gignunt, antiquitatis *obstructiones*.

Sapientiores alii crisin expectant antequàm febris paroxysmos cohibere tentent.

Ad ea quæ notis præcedentibus exposuimus si mens revocetur, sive quoad naturam febris intermittentis, sive de modo agendi Chinæ Chinæ, quantum inanes sint opiniones istæ videbitur.

Ex observatis illustr. medicorum probavimus febres intermittentes ferè semper irritatione organicâ stipari et Chinam Chinam huic summoperè nocere, nam in hoc casu infarctus viscerum obveniunt.

Sic, febre intermittente nullis complicationibus aggravatâ, apyrexiiis regularibus, si febrem Chinâ Chinâ suppressere liceat, corticem per primam apyrexiam exhibere nihil obstat; irritationeque aliquâ existente, (et in intestinis sæpè sæpiùs existit), si pulsus frequentiam per apyrexias servet, et membranæ mucosæ orificia vividiorum colorem retineant, si secretiones turbatæ, cutis sicca, ut hæc cuncta evanescant necesse est, antequàm China China præbeatur. Quorum tamen resolutio, nec die determinatâ, nec paroxysmorum serie adducitur,

scilicèt, quàm primùm fieri potest, ne sanguis inficiatur. Vanum est enim velle illum qui per se purus est, depurari per febrem, quod idem est ac expectare, quòd impurus fiat ut postmodùm depuretur.

Si hoc ductus ratiocinio controversam exhibitionem corticis in principio intermittentium benigniorum indiscriminatim suaderem, non aliud profectò agerem, nisi quòd antè me gravissimi scriptores egère, et quòd practici celeberrimi adhuc agunt, et agi debere non sine solidâ ratione contendunt; potest enim reverà benè fieri utrumque, etsi forsàn non æquè benè. Quia tamen ego in hac materiâ fortè sum delicatior et cautior, ac sibi quispiam persuadeat, ideò non tam facilè, ut vulgò creditur, in hanc sententiam delabor. Dico itaque sanguinem verè in intermittentibus per se

cuncta à febris intensitate, à ferocitate epidemiæ, et præsertim à sensibilitate individuali dependent.

Resolutio cessatione symptomatum modò enumeratorum semper præ sagitur, et sæpè crisi præceditur; tùm China China liberè propinatur, nihil detrimenti affert ejus exhibitio, infarctus viscerum non gignit, et si febris revertatur, potius erratis hygienicis tribuendum est.

Attamen quoàd exhibitionem corticis, non statim post devictam inflammationem propinanda est, tunc enim inflammationem renovat, et nimia expectatio naturam assuefacere sinit renovationi accessuum, undè cortex impotens sæpè evadit. Tempus administrationis Chinæ Chinæ eligitur vel tardius vel citius, pro duratione prægressæ inflammationis.

non peccare, nec, quantum est ex hoc capite, depuratione indigere, cum se habeat merè passivè ad recipiendam conspurcationem ab extrinseco. Adhuc tamen si non indiget depurari sanguis, indiget depurari corpus universum à vitioso succo sanguinem inficiente; vel indiget idem succus depurari ab iis quæ præternaturalitè ipsum alterant, inficiunt, et vitiosum seu stagnantem reddunt. Cum autem experientiâ constet, rarò per naturales et ferè nunquàm per artificiales evacuationes antè ipsam corticis oblationem in principio institutas, corpus à tali succo seu fermento febrili radicitus expurgari: insupèr, cum talis succi congrua alteratio, correctio, vel purificatio per Chinam Chinæ quomodolibèt obtenta (detur semper locus veritati, maximè verò cum agitur de hominum vitâ) relinquat nos incertos de modo genuino quo ejusmodi attemperationem consequamur, spectatâ quoque incertitudine opinionum circà ipsas intermittentium causas, quæ opiniones omnes et singulæ, non plùs quàm par sit faciendæ sunt in praxi, cum securitate semper ubicumquè licèt instituendâ; proptereà non sine aliquâ præmeditatione aut limitatione decernendus est in principio hujusmodi febrium usus corticis, ne forsàn suprà explicatam depurationem aliquo modo impediat aut remoretur, eamve saltèm nimis imbecillitè præstet. Adde, quòd cum febrifugum istud, etsi optimum inter cætera, totam tamen radicem vel scaturiginem haud semper perfectè tollat aut at-

tingat, (quod crebriores recidivæ oblationi præmaturæ corticis, ubi causa febrium valida sit, pertinaciter succedentes nonnunquam videntur testari) nec alius proindè suppetat modus succum illum certò absumendi vel corrigendi, quàm sinere ut partitis vicibus, atque portionibus transferatur in sanguinem, ut ibidè ope febrilis effervescentiæ, partim assimiletur cruori (si sit quid capax) partim verò, vel etiam in totum (siquidem sit quid omninò dissymbolum) foràs eliminetur; idcirco etiam pro suppressendis universaliter hisce febribus in earumdem principio per præcòcem corticis oblationem, haud ità facilè, aut indiscriminatim calculum meum appono.

Sed et alia circa hoc ipsum adhuc occurrunt animadversione digna, priusquàm propositum quæsitum integrè resolvatur. Nam ex unâ parte, non modò ex cursu febrium aliquandiù sibi relicto nec statim præpedito, id commodum sequitur, quòd hac viâ per repetitas succi febrilis asportationes in sanguinem et per repetitas paritèr utriusque laticis ebullitiones, idem succus secundùm partem saltè vitiatam per vices sensim absumatur, undè spontanea plerumquè intermittentium solutio; sed hac eâdum occasione potest insupèr contingere, quòd idem sanguis aliis ingenitis impuritatibus scatens, licèt nondum lædentibus, mediâ effervescentiâ febrili iisdem quoque paulatim repurgetur, atque hoc etiam nomine febrem sinere tantispèr expediat, nec statim suppressere. Ex aliâ verò parte potest æquè

contingere, quòd idem sanguis per se forsitan non benè dispositus, ab influente insupèr vitioso succo ultrò inficiatur, ac labem majorem contrahat, impotens eò magis hostem advenientem integrè superare. Sive potest contingere, quòd, etsi sit probè dispositus, ab inergiâ tamen, copiâ, vel pravitate succi affluentis adeò obruatur, ut nequeat ab eodem se penitùs expedire, sed aliquid subindè non subactum remaneat, quod vel accessiones protrahere, vel febrem continuam inducere sit potis. Sive deniquè contingere potest, quòd, licèt benignioris naturæ, faciliorisque subactionis sit succus febrilis, sanguis itèm sat validæ constitutionis ad ipsum subigendum; adhuc tamen, si diutiùs protrahatur febrium duratio, tandem idem cruor per crebras et diutinas deflagrationes paulatim enervetur ac vappidus fiat : undè, vel eodem in visceribus minùs volatilisato gignantur obstructions, vel in minerâ ipsâ febrili facilior reddatur novì succi morborum generatio, ejusdemque (factâ scilicèt circulari noxâ) pro novâ semper periodi repetitione proventus. Atque ità pro diversâ habitudine tùm cruoris, tùm extranei fermenti, febris intermittens modò depurativa dici poterit, modò corruptiva. Quod maximè verum reperitur in praxi, quandoquidem non rarò intermittentes diuturnæ, velut ignis naturæ purgator (ut aiebat *Hoffmanus*) à pluribus aliis morbis sanant, et ad longum tempus ab iisdem præcavent; ut ideò quandoquè sit obtabilis hujusmodi occasio, quæ cujus-

piam quasi lixivii loco sordes omnes universaliter abluat, quas nulla forsàn medica prophylaxis valeret abluere. Nonnunquàm verò ex opposito eadem intermittentes, putà quartanæ, vel etiam tertianæ longiores, sanguinem adeò et viscera infarciunt ac lædunt, ut ex earum vel diuturnitate, vel pravitate, pravus item habitus, cachexia, aut hydrops haud infrequentè suboritur.

Quamobrèm, ut totum tandem negotium ad praxim contraham, ea febris intermittens depuratoria censenda erit, ordine habito tam ad universum corpus, quàm ad ipsum cruorem, saltèm datâ occasione, ac eo, quo explicuimus modo, quæ tantumdèm succi febrilis quâlibet accessione maturat et expellit, quantum fuit introductum in sanguinem, nullis pravis restitantes ejusdem reliquiis; imò aliis, si quæ inibi præextiterint, cum eodem depulsis, itaque in tali febre genuina sit necesse est et planè inculpabilis intermissio, vividus naturæ vigor et facilis symptomatum tolerantia; eademque symptomata, etiamsi alicujus sint intensioris, non tamen modum excedant, habito respectu morbi, temporis particularis ejusdem (alia siquidem debet esse intensio symptomatum in principio, alia in augmento et statu) subjecti ægrotantis, regionis et tempestatis. Itèm sint vel signa, vel saltèm rudimenta coctionis, excretiones moderatæ et congruæ, morbo itidèm respondentes, aliaque practicis sufficientè nota. Et in tali casu, licèt Chinæ Chinæ usum non improbem, imò fortè proficuum

fore minimè inficier, attamen tutior mihi videtur via usu illius aliquantispèr supersedere, tùm ob rationes superiùs allatas, tùm etiam quia, si quandò ex suppressione febrium vix inchoatarum contingat, aliquam fermenti febrilis reliquiam in suo foco non integrè extingui, sitque indè possibilis (quod incertum est adhuc) alicujus alterius morbi generatio, in quem commutentur febres præmaturè suppressæ, (quemadmodum ex intempestivâ suppressione scabiei nonnunquam depurativæ, ulceris antiqui, fistulæ, fonticuli, etc. gravior quandoquè pullulat morbus) satius fuisset illas priùs tulisse paulispèr, in nullum tutiorem morbum commutabiles, vel eas vulgari tantùm cautâ tamen et prudenti methodo tractâsse, vel deniquè ipsi naturæ industriosæ morborum medicatrici prorsus curandas reliquisse. Industriosam morborum medicatricem cum *Hippocrate* naturam voco, sed proptereâ nollem (et hoc semel monuisse sufficiat) *naturæ* nomine intelligi quamdam velutî reatricem imaginariam, quæ corpus architectonicè gubernet, sed mechanicam ipsam nostri corporis dispositionem à summo opifice conditam, cum solidorum et fluidorum vicissitudinario ad invicem motu reciprocantium proportionem tali, ut eâ mediante (animâ verò immortalî eminentèr agente) motiones omnes, coctiones, secretiones, et excretiones, etc. organis hydraulico-pneumaticis, aliisque ad regulas præsertim staticas absolvantur.

Corruptiva verò dicenda erit ea intermittens,

quæ opposito modo se habebit ac suprâ descrip-
simus, videlicet, quæ succum febrilem haud in-
tegra subigit aut expellit, sed potius eidem alias
adjungit à se ipso commotas impuritates, cujusque
ideò symptomata graviora sunt quàm par sit pro
ratione morbi, cæteroquì cum facilitate et utili-
tate, solubilis. Quod quidem ex duplici capite po-
test procedere, nempè vel ex pravitate quâdam
causæ febrilis, vel ex ipusarm febrium nimiâ diutur-
nitate. In primo casu vitium rursus se potest tenere,
vel principalitèr ex parte succi febrilis, sive copiâ,
sive qualitate, sive inæquali et irregulari (etiam intrâ
eamdem accessionem) influxu peccantis, vel minùs
principalitèr ex parte ipsius sanguinis antea etiam
malè dispositi, vel ex parte utriusque. Quomodo-
cumquè autem hæc fiant, quæ pluribus sanè modis fieri
posse videntur, certum est saltèm, hinc emergere
identidèm suspectam paroxysmorum extensionem,
quæ ad continuitatem gradum facit, paritèrque ac-
cessionum inæqualitatem, immodicam intensionem,
irregularemque in ipsâ accessionis declinatione, ne-
dùm in principio, recrudescentiam; itèm sæpenu-
merò emergere symptomata gravia, ut stagnationes
fluidorum intrâ viscera, deliria, comatosos affectus,
et hujusmodi, quæ adhuc magis metuenda sunt,
si cum signis cruditatis appareant. In secundo verò
casu vitium ferè omne se tenere videtur ex parte
ipsarum febrium, quæ licèt benignæ sint, in symp-
tomatis moderatæ, et à miti causâ (contumaci ta-
men)

men) pendentes, tantam nihilominus sortiuntur longitudinem durationis, ut sanguis ex toties repetitâ effervescentiâ, et ut ita dicam, luctâ defatigatus, exhaustus, ac spiritibus depauperatus, tùm piger in circulo, tùm torpidus in fermentatione, tùm refractarius in secretionibus, tùm viscidus alicubi, tùm alicubi serosior et fibrarum inops evadat; indèque mille trahat morborum semina, nisi aliquæ saltèm eidem impetrentur induciæ, ut tantispèr resurgat, fortiùs dein, si opus sit, pugnaturus. Et in utroque casu, quolibet corruptivæ intermittentis tempore (ipso non excluso ubi hæc possint coire morbi principio) expedit corticem exhibere, et febrem suppressere modis omnibus et formulis lunculentè jam recensitis.

Quia verò et in hoc aliquis potest utilitèr haberi delectus, è re fore putarim, si præ solâ febrium diuturnitate præscribenda sit China Chinæ (et hoc sit ultrà quæsitum de oblatione in principio) eam epicraticè ac imminutâ dosi propinare, ut scilicèt vel in hoc imitemur naturam, lento quodam gradu in eodem opere pro viribus absolvendo procedentem. Si verò præ gravitate symptomatum sit usurpanda, id fiat magis virilitèr, eâ scilicèt proportionè quæ ipsi exigentiæ respondeat, quemadmodùm sumus dicturi tùm alibi, tùm maximè *Capite 5. libri 4.*, ubi quæstionem eamdem de anticipiti oblatione corticis in *principio quarundam intermittentium perniciosarum* potiore jure instituemus. prout enim citiùs vel tardiùs opus est febres suppressere, plus etiam vel minus corticis est of-

ferendum, idque crebriùs repetendum, vel rariùs : quandoquidem in nostrâ omninò potestate est febrem sistere eo præcisè quo volumus tempore, si in cortice exhibendo simus versati, dummodò congruens detur, breve licèt, temporis spatium, ut fusiùs paritèr alibi dictuti sumus. Fateor equidem, quòd cùm character febris corruptivæ suprâ descriptus rarò benignis intermittentibus accidat, vel possit accidere in illarum principiis, quoniam neque diuturnitas combinari potest, ut patet, cum illarum principio, neque paritèr cum eo ferocia symptomatum, ut quæ in intermittentibus non perniciosus nonnisi post plures periodos potest apparere, tollentes jam rationem principii ab iisdem intermittentibus, si quartanam excipias, cujus principium videlicèt latè satis extensum hujusmodi characteris est capax : fateor, inquam, quod penes me vix locum habere solet in earumdem *intermittentium benignarum principio* Chinæ Chinæ usus. Imò ultrò lubens edico (licet tanta tantisque rationibus de virtute, ac præstantiâ ejusdem hucusquè prædicaverim) me ferè nunquàm in illis etsi diuturnioribus consuevisse corticem exhibere, nisi vel supervenientia gravia symptomata, vel ægrorum tædio affectorum preces me cogant. Mihi namque solemne est, saltèm per totum ver, et per primam æstatem (quibus tempestatibus benigniores ut plurimùm sunt et *depurativæ*, etiam cùm diuturniores sunt febres) quasi perpetuò feriari ab exhibitione ejusdem corticis, quem in usus longè digniores amplâ manu profusus reservo.

Neque etiam diffiteor, esse quandoquē, rarissimè licet, quasdam pervicaces intermittentes, quibus curandis præsertim ab initio sit impar cortex, quibusque alia idcirco medela conveniat. in iis etenim, etsi fermentum febrile per corticem copiosè vel diutiùs assumptum absorbeatur, remanere tamen potest in visceribus ferax et fixa radix assidue reproductiva novi fermenti consimilis, vel materiæ illius saltè remotæ, quæ potiùs toti prospiciendum esse suadeat per alià remedia quàm ipsi fermento per sola febrifuga. Memini siquidem, me observasse nonnunquam febres hujusmodi intermittentes benignas, adeò refractarias, ut eà facilitate quâ pluries redibant antè usum corticis, eadem quoque recurrerent, etiam dùm actu ille ad prophylaxim assumebatur, etsi ope illius fuerint antea pluries depulsæ. Hujusce naturæ fuit tertiana modò simplex, modò duplex, quæ nobilem virum, patriumque Lucensem, Præfectum Aulæ Sereniss. Principum Mutinæ, *Dominum Marchionem Nicolaum Luchesium* corripuit. Hic an. 1709, dùm Corrigii decumberet, cujus urbis Gubernatoris munere tunc fungebatur, circà morbi initia (nec tamen prima) morem, ut inquit, patriæ suæ secutus, corticem sumpsit suo marte, vix conscio medico. Sed postmodùm totâ æstate autumnoque anni illius, mox hyeme, ac vere anni subsequentis forsàn duodecies recidit, duos identidèm vel tres, quatuor, vel quinque tertianæ paritèr nunc simplicis, nunc duplicis paroxysmos patiens; ad nihilum valente, pro

impediendâ recidivâ , repetitâ soli mutatione , vel diuturno usu corticis , modò meo , modò aliorum medicorum consilio , modò proprio Marte , modò amicorum suasu , et quidem diversis formulis ac methodis etiam Transalpinis , assumpti ; qui tamen cortex pro iisdem febribus quâlibet vice ablegandis consuetum munus egregiè præstabat. Sed et spontè quoque pluries abiit febris , abiitque paritèr aliis sine cortice curata remediis ; redibat tamen æquè spontè soluta , ac aliis remediis depulsa. Et sicuti cortex ad præservationem assumptus eam minimè arcebat , ità nec cæteræ prophylaxes sedulò institutæ illam remorabantur tantillùm , sive sermo sit de purgantibus epicraticis , sive de obstruentibus , atque omnifariam alterantibus remediis , sive etiam de iis quæ loco febrifugorum habentur.

Licèt autem hæc monstra rarò contingant , neque rariùs contingere soleant ubi febres absque cortice curatæ sunt , nihilominùs me quodammodò retrahunt , efficiuntque quo minùs febres istas , ubi nulla suadeat necessitas vel notabilis earum diuturnitas , per huiusmodi remedium curare aggrediar. Undè subit mirari , quomodò obtrectatorum corticis adeò me tangat magistralis scutica , ut non semel contigerit , quosdam ægrotantes ab iisdem aliquando deceptos , ne dicam seductos , priusquàm se mihi committerent , voluisse mecum pacisci , ne corticem (quasi in hoc sim nimius) illis unquàm præscriberem , mori potiùs sine illo , quàm ope illius sanari , ut aiebant , contenti. Quod sanè eò magis ridi-

culum mihi visum est, quò certior sum, inter medicos cortice utentes neminem in curatione *benignarum* intermittentium, quas sæpè pro *depurativis* habeo, me parciolem esse, magisve sobrium circà usum illius.

CAPUT IX.

An *Chinæ Chinæ* oblationem præcedere debeat purgatio, aut venæ sectio.

REMANET adhuc alia solvenda quæstio quæ scriptorum vota divisit, an scilicèt quocumque febris intermittentis tempore offeratur cortex, debeat priùs corpus purgari.

Si hac quoque vice vellemus, ut maximo jure possemus, subscribere *Sydenhamio*, in promptu esset resolutio problematis, dicendo nempè cum ipso, quòd : *Neque catharsi, multò minùs venæ sectione subducenda est materiæ febrilis pars aliqua, quò liberiùs cortex suo fungatur munere : cùm enim, inquit ipse, ab utrâque labefactetur quadantenùs æconomiâ corporis, eò promptiùs certiùsque recrudescant paroxysmi, evanescente semel pulveris vi; quod et paulò inferiùs confirmat subdens : Quòd si medicamenta purgantia subindè adhibeas (adhiberi scilicèt solent eo prætextu ut obstructions expediantur, atque humores in primis viis stabulantes exturbentur) vel si, quod præcipuum est, in constitutione epidemicâ venæ sectio celebretur, fiet*

ut morbus in longissimum tempus procurrat, atque interim, ut ægri mille symptomatis, iisque periculosissimis exponantur; Hæc Sydenham.

Sed ut illius aliorumque sepositâ auctoritate dicam paucis quod sentio, et mitiùs agam, quàm credar, respondeo, facilè esse ex alibi dictis colligere, me quidem à purgantibus in hoc quoque casu parùm vel nihil commodi unquàm sperare, imò potiùs profiteri, si non absolutè debere cum *Sydenhamio*, posse saltèm præscribi in intermittentibus Chinam Chinæ non modò impunè, sed cum ratione, et cum felici successu, ut sum non semel expertus, cùm idoneum tempus adfuerit, nullâ purgatione præmissâ; nihilominùs ex aliâ parte ad evitandam calumniam, et ad aliquam corporis expiationem, dummodò cautam, quin et ad meliorem forsàn dispositionem pro suscipiendâ febrifugitione, posse priùs alvum leniri, et venam secari; imò utrumque præsidium de mōre congruere nequaquàm diffitebor, quippè hoc ipsum mihi quoque fermè solemne est.

Haud equidem tanti facio cautelam istam, quin sæpesæpiùs vel alterutrum, vel utrumque ex dictis præsidiis æquè benè omitti posse sim certus, maximè cùm neutrum, et præsertim purgatio, de quâ principalitèr procedit quæstio, nec ratione febris, nec ratione causæ indicetur; imò et ratione febris, si sit plurimùm intensa, et ratione causæ, si sit facilè agitabilis, potiùs prohibeatur, eoque fortassè magis, quoniàm curatio, ut supponimus, est cortice

peragenda : siquidè , ut adnotat *Restaurandus* : *Reverà huic medicamento nihil magis repugnat , quàm cathartica ; quamobrèm , subdit , id remedium in usum duxi majori emolumento impurgatis meis ægris , præmissâ solùm phlebotomiâ , injectis clysteribus , exhibitisque jusculis refrigerantibus* : Sed purgationem circumspectam et levem , quæ sæpiùs etiam uno , vel altero clystere injecto (et quidem tutiùs) potest suppleri , non rejicio , quin et admitto ; sed solùm admitto , inquantùm ea exigatur ab aliis peculiaribus corporis ægrotantis dispositionibus , neque ab ipsâ febre prohibeatur ; non verò inquantùm directè indicetur à febre vel à causâ immediatâ ejusdem febris. Hùc forsàn respiciens *Hippocrates de affectionibus* in curatione tertianæ et quartanæ febris incipientium , non legem imponit de instituendâ universalitèr antè usum specificorum sui temporis purgatione , sed conditionalitèr loquitur in utroque casu , suadetque pharmacum dari tantummodò : *Siquidem æger impurgatus sinuerit , siquidem videbitur tibi non purgatus esse*. Signum evidens purgationem in prædictis febribus et absolutè , et antè usum specificorum omitti posse , eamque ubi opportuna censeatur , solummodò instituendam esse occasione aliarum præexistentium corporis dispositionum , quæ febrium hujusmodi curationem per antifebrilia absolvendam (ubi verè illæ adfuerint) possent remorari.

Quia tamen non pari semper passu , sive in quibusvis corporibus , sive in quibusvis anni tem-

poribus incedendum est , priusquàm de eâdem purgatione vel sanguinis missione instituendâ specialius iudicium feratur, iterùm cum *Sydenhamio* distinguere oportet (quod non parvi est in praxi momenti) inter febres intermittentes , vernas, æstivas et autumnales, de hybernis enim non loquor, quippè quod tali tempestate incipiant ferè nullæ , vixque ullæ soleant occurrere, nisi earum aliqua, ut quartana, æstate, vel autumno orta, in hyemem protrahatur. Alius ergò est status sanguinis et fluidorum verè, alius æstate, et alius autumno, quemadmodùm diversus est status liquoris cujusciam, qui fermentatur , qui fervet , et qui deferbuit. Verè siquidem succi omnes corporis nostri, non secùs ac succi vegetabilium, spiritu turgent per hyemem compresso, et vivifico anni juvenescentis, solisve calore perfusi, quaquaversùm alacritèr expanduntur, suntque ideò facilè in fermentationes depurativas, et utiles secretiones proni. Æstate verò idem succi nimio fervore acti faciles fusiones patiuntur, dissipantur , ac sensibili, et insensibili transpiratione evaporant. Autumno deniquè ex prægressâ æstatis de flagratione spirituum inopes et enerves reddit, vapescunt ut vina, aut acorem contrahunt, undè in lentores, stagnationes, concretiones, atque, his quodammodò oppositas, dissolutiones ac corruptiones (aucto scilicèt ad excessum ipsius concretionis gradu) haud difficultè aguntur.

His stantibus, si pro febris intermittētis curatione verno tempore Chinâ Chinæ uti contingat

(rarò tamen tunc ob febrium brevitatem, facilemque earum solutionem hujusmodi occasio solet contingere) suasor sum, ut tali tempestate quæ *Hippocrati* quoque pro instituendâ, ubi conveniat, purgatione et venæ sectione, videtur accommoda. levis aliqua præmittantur corporis expiatio, et concurrente vel modicâ plenitudine, ætate congruâ etc. etiam sanguinis missio. Neque verè obstat usui circumspecto solventium antè oblationem Chinæ Chinæ ea, quæ inter hanc, et illa intercedit dissymboleitas suprâ allata ex *Restaurando*, et propterea ut fatear, non æquè cavendum ab iisdem solventibus antè ac post exhibitum corticem: quandoquidem in primo casu non impeditur, ut usus satis me docuit, futura illius actio, sicuti in secundo deletur prægressa. Sint tamen ex usu ad majorem cautelam solventia tantùm mitiora, *v. gr.* cassia sola ad *unciam* circitèr, vel cum *drachmâ unâ*, aut alterâ cremoris tartari admixta, sive cremor ipse tartari ad *unciam* paritèr, sive syrupus aureus ad *uncias tres* vel *quatuor*, cui superbibatur serum lactis, vel aqua nuceriana ad *libras tres* vel *quatuor*, sive aliud simile diluens, et sine ullâ quantum fieri potest irritatione alvum leniens medicamentum.

Si autem Chinâ Chinæ utendum sit æstivo tempore, tunc in purgandis corporibus et sanguine mittendo cautiùs est incedendum; siquidem cum alvus tunc temporis soleat ut plurimùm esse lubrica, hile scilicèt magis fluxili et validus illam vellicante, sat erit pro eâdem alvo abluendâ potius quàm

sollicitandâ , serum lactis simpliciter ad libras aliquot absque ullo, vel saltèm cum levissimo vehiculo (putà pauco cremore tartari) propinare, vel oleum amygdalarum dulcium sine igne recentèr expressum , et tantillò juris dilutum , ad *unc. iv.* circitèr, maximè si notabilis succorum acrimonia ventriculi et intestinorum tunicas vellicet , cum inani et siccâ , vel etiam humidâ vomituratione. Phlebotomia paritèr vel parca sit, vel etiam omitatur diebus præsertim canicularibus, nisi fervor quidam sanguinis , ejusve quasi turgescencia, ætas vegeta, plenus habitus et vasorum distensio id planè suadeant; experienciâ etenim clarè comperimus , sæpè tali tempestate, eâdem ipsâ phlebotomiæ, aut purgationis die, febrem ex simplici duplicem fieri, quod tamen etiam haud rarò spontè contingere, etsi nil tale medicus præscripserit, nequaquàm inficiabor.

Deniquè , si autumnò pro curatione intermittentium, præscribendus sit Peruvianus cortex (minori , generalitèr loquendo , adhibitâ religione in purgando quàm in sanguine mittendo, præsertim si febris curanda quartana fuerit, quarum febrium feracior est illa tempestas) ipsum cremorem tartari ad *unc. j.* vel electuarium lenitivum, vel cassiam, eâdem dosi (admixto etiam , si lubeat , tantillò rhabarbari) vel quid antedictis ánalogum, pro alvo leniendâ, ex usu esse posse censuerim, superepoto juris potiùs tenuioris vel hordeacei, si aeris temperies ad frigidiorè inclinet , quàm seri largiore

haustu. Sanguinis verò missionem parcâ semper manu, et nonnisi validis suadentibus indicationibus (quæ in intermittentibus tunc maximè vix possunt adesse, nisi ingravescant symptomata) esse instituendam, ex jam descriptâ ipsius sanguinis diathesi videtur satis constare.

Exindè patet, quòd quò minor est febrium atque symptomatum intensio, eò liberalior esse potest solventium moderatorum usus; et contrà parior quò major est et febrium et symptomatum vigor. Hinc in febribus lentis et chronicis, vel ad chonicas saltèm tendentibus (intermittentibus tamen) tutior censenda est levis purgatio, etiam epicraticè instituta, antè oblationem corticis, quàm in aliis nonnihil fortioribus, in quibus, ut dictum est, pro ratione majoris, aut minoris intensiois ipsarum, nec non symptomatum earumdem, plùs vel minùs indulgendum est purgationi ab aliis casuum singularium circumstantiis indicatæ, dummodò febris ipsa intensa nimis non omninò prohibeat; quo casu prorsùs est abstinendum ab omni solvente, et tota intestinorum expiatio clysteribus absolvenda.

Neque inconsultè conditionem istam rursùs apposui in usu solventium, nempè illa posse adhiberi, si ab aliis circumstantiis exigantur, nec prohibeantur à febre. Prætèr enim id quod pluries tetigimus, et prætèr noxam, quam suâpte naturâ certò scimus semper inferre purgantia etiam mitiora, nisi summâ cum cautione usurpentur (non hîc loquor

de morbis acutis, in quibus cane pejus, et angue vitanda esse, clamat auctoritas, ratio, et experientia) præter, inquam, hæc et alia innumera quæ hujus loci non sunt, possum testari fortuito quidem experimento, sed non fortuitâ animadversione, me æstate et autumno anni specialitèr 1707. Peculiari solertiâ in id totum fuisse, ut observarem quid præstarent in intermittentibus, quarum ferax fuit annus ille, evacuationes tùm spontaneæ, tùm artificiales. Id quod sine ullo ægrotantium discrimine licuit experiri, cùm magna pars eorum ab aliis primitus medicis curaretur, ut cortici aversis, ita purgationi facilè indulgentibus; pars alia, etsi mihi uni commissa, illum potare renuerit, et alia deniquè me parùm proclivem ad eum præscribendum invenerit. Istis autem ægrotantibus vel sine cortice, vel eo solùm tardiùs assumpto curatis, cùm plurimæ, etiam sponte suâ, obtigerint dejectiones, hac arreptâ occasione potui meliùs memetipsum examinare, num ex vi alicujus præjudicatæ opinionis, plùs quàm par esset, à solventium usu distraheret. Ut rem paucis perstringam, et caput claudam, aliquem tantummodò casum subnectam obitèr :

I. Domina *Barbara Catanea*, Serenissimæ Ducissæ Mutinæ gloriosæ recordationis cubicularia primaria, duplici tertianâ laborabat circà initia sua satis forti. Hanc cùm doctiss. amicus atque collega, serenissimique paritèr Ducis medicus *D. Davinius* et ego insumul curaremus, eamque à principio ad finem morbi assumptioni Chinæ Chinæ,

ut pluries (modestè quidem) edixit, repugnantem agnosceremus, ab illius propterea oblatione toto morbi decursu abstinuimus. Rigit illa, sudavit et alsit, ac prætereà (quod unicè notari velim) contumaci copiosâque diarrhæâ spontaneâ ad plures hebdomadas vexata fuit. Febris tamen, vix moderato primorum accessuum impetu, usquè perseverabat. Suppressa est diarrhæa, at febris nihilominus pari passu processit. Rediit denuò eadem diarrhæa ad tempus non breve, febris verò iterùm adhuc eadem. Iterùm diarrhæa suppressa est omninò, et febris minimè immutata: nil proficientibus videlicet repetitis venæ sectionibus, nec jusculis alterantibus, nec febrifugis amaris vulgaribus, nec aliis quibuscumque remediis, quorum enumeratio nimia hîc esset. Tandem cum febris videretur declinationi propinquior, remissâ scilicet vi, sed perseverante jugitèr contumaciâ, præscriptum est à collegâ (neque enim semper conveniebamus) apozema solvens ad plures dies, ægrâ, ut reor, instante, meque mox non dissentiente, quippè qui doctissimo collegæ potiùs quàm mihi fidens, posse credidi ad istius quoque experimenti incudem soliditatem meæ opinionis examinari. Sed cùm exindè potiùs augerî febrem quàm imminui dignosceremus, dimisso apozemate, curationem naturæ commisimus et tempori. Reverà à solo tempore emersit medela morbi, febris namque primâ die septembris orta, omnibus evacuationibus irritis, ultrâ brumale solstitium perseveravit, tandem sponte, ac

post feriatiōem omnimodam à remediis paulatim evanuit.

II. *Monialis quædam carmelita excalceata*, habitûs gracilioris, valetudinaria, et tertianis æstivis obnoxia, eodem paritèr anno ex simplici tertianâ decubuit. Quâdam intermissionis die serum vaccinum depuratum ad liberas aliquot bibendum præscripsi; ex quo tot biliosæ dejectiones cum tolerantiâ subsequutæ sunt, ut idem remedium alterâ intermissionis die propinare non dubitaverim. Dejectiones adhuc plures et faciles, idemque contigit aliis vicibus, repetito sero. Febris de tertianâ simplici factâ est duplex, sed accessiones mitiores ambæ, ac veluti ex divisione unius fortioris resultantes. Alternis idcirco diebus (de aliis remediis nullam mentionem facio cum non sit opus, idem serum offero, et semper cum pari successu dejectionum copiosarum, summè biliosarum, spumosarum, et facilè excretarum, febres tamen semper æquales. Substiti ab usu seri ad aliquod tempus, sed febres non substitère. Cum verò alvus non flueret, serum rursum, ægrâ poscente, alternis diebus potari permisi. Sumpsit forsàn vigesies toto morbi decursu. Mirum quot et quanta dejecerit sine fructu. Stupidus ferè, eò quod nunquàm serum simplex, ut assolet in progressu, sed semper dejectionibus acerrimis (non tamen planè humoralibus) infectum redderet, usum illius nihilominus interdixi. Post aliquot dies febris adeò immutata est, ut propè evanescere visa sit: recrudit tamen paulò post. Iterùm ad aliquot dies

serum exhibitum pari exitu. Tandem perseverante pertinacitè febre, dimissis evacuationibus, Peruviano cortice particulatim assumpto, eodemque in recidivâ, quæ post mensem contigit, repetito, curata est

III. Unus ex tenerioribus ephæbis Sereniss. Ducis nostri *D. Marchio Joachimus Salviati* Florentinus, simplici tertianâ intermittente correptus, materiam porraceam planè humoralem, oleo adinstâr, adeò copiosè per vomitum excernebat (respondente paulò post non absimilitèr alvo) ut vix credibile videatur, habitâ ætatis ratione; vomitus siquidem solus quatuor librarum pondus facilè superabat. Perseveravit sic per plures accessiones febris semper intensa, sed planè intermittens, et copioso semper sudore soluta. Tractu temporis imminutæ sunt excretiones, sed durantibus febribus per artem sunt evocatæ. Exhibitum scilicèt et aliquoties oleum amygd., serum vaccinum modò simplex, modo syr. ros. aur. associatum, undè faciles et copiosæ dejectiones, sed irritæ. Post mensem febris dedit inducias, at paulò post revixit ferox, ut priùs iisdemque copiosis comitata vomitus. Iterùm purgatus est æger, præscriptaque sunt, præter juscula alterantia (non omissâ suo tempore venæ sectione) salia etiam vegetabilium febrifugorum, quoniam æger ob saporem corticis ingratum erat ei omnimodè adversus, quidquid ex patriâ suâ identidèm audiret adversus repugnantiam hanc puerilem. Procedebat nihilo-minus febris, institutæque insuper per repetitam

rhabarbari infusionem epicraticæ purgationi nequaquàm cedebat. Uno verbo, septies saltèm recidit, semperque gravitèr, febre modò simplicis, modò duplicis tertianæ typum servante; et sæpe-sæpiùs cùm videretur imminui tàm quoàd intensionem, quàm quoàd extensionem, statim nullâ occasione recrudescebat ferocior, et primis perpetuò conjuncta vomitibus. Post duos tandem menses cœpit æger tædio victus, nec ullis sublevatus evacuationibus, corticem assumere per modum alterantis cum levamine notabili, sed non prout expectaveram. Aucta est idcirco nonnihil dosis corticis, sed eodem paritèr tempore aucta est febris, ut consueverat statim ac cœperat imminui. Suspiciatus sum de effœtâ substantiâ remedii, de cujus infirmâ qualitate aliquod antecedens indicium habueram. Eo itaque rejecto, substitutus est melior cortex, exhibitusque dosi modicâ tunc, cùm febres incrementum suum validius capiebant. Statim uno ictu suppressæ sunt, et cum illis symptomaticæ excretionibus, continuatoque levitèr, ac repetito per aliquot dies remedio perfectè sanatus est æger, unam tantùm post mensem febrem passus, quæ intrâ horas quadraginta sudore spontè soluta nullo ulteriore indiguit corticis auxilio, aliove remediorum apparatu.

IV. *D. Viennam Mellinam*, canoram Scultennæ nostri sirenem, ultrâ bimestre spatium tertianâ duplici affectam nulla purgatio (prout illi spondebat, quoties præscriberet medicus senior et osor corticis)

ticis) unquàm sanavit. Hanc sine aliâ evacuatione illicò sanavit oblatus cortex, et recidivam levio- rem repetitus sustulit.

V. *Tres filiolos D. Comitis Sorræ* tertianâ duplici intermittente per æstatem correptos, syrupo de cichorio cum rhabarbaro quotidie utentes, et quotidie pariter copiosè alvum exonerantes, exactâ semper victûs ratione servatâ, tumidos tamen et inflatos per tres menses, et ultrâ assidue decumbentes vidi, donec hyemale solstitium opem aliquam, vernale verò æquinoc- tium (nonnisi tamen post plures ac plures recidivas) integram valetudinem attulerit.

VI. Idem omninò *tribus aliis* contigit *filiis D.* quondam *Joseph Galliani de Coccapanis*, Mutinensis patritii, quorum neque febribus neque inflationi ventris quicquam profuit diuturna levisque purgatio, sicut nec torminosa quæ uni eorum contigit diarrhæa spontanea. Hos omnes procul dubio transactâ aliquot tantum dierum epicriticâ purgatione, citius et certius sanâset cortex. At minimè solus ipse curæ incumbendam (illos enim majore assiduitate invisibat de more *D. Candrinus*) neque in febribus exitus cæteroquâ salutaris, neque in subjectis puerilibus facile illas ferentibus, magna erat in me ipso ad eum proponendum proclivitas.

Plurimos casus haud absimiles ægrotantium ab aliis præsertim medicis purgationi liberalius indulgentibus curatorum, ad quos invisendos accersitus fui, quosque nullæ purgationes, sed solus tandem

cortex liberavit, non afferam, ne longior sim. Paucos inter tot qui possent adduci, retulisse sufficiat ut quàm parùm conferant purgationes, etiam benigniùs institutæ, in intermittentibus (iis saltèm quibus altiores radices sunt) palàm fiat: ut idè parùm intersit, etiamsi illæ non semper religiose præmittantur oblationi corticis, præcipuè si non ob morbi diuturnitatem, sed ob supervenientiam symptomatum (quæ duo in praxi sunt valdè distinguenda) offeratur remedium. Sed jam illius administrandi sors varia tàm in principio, quàm in progressu vulgarium intermittentium, ad leges scilicèt et normam cautionum tùm in hoc, tùm maximè in præcedenti capite expositarum ex sequentibus historiis clariùs apparebit.

CAPUT X.

Doctrina præcedens de *cortice* modò propinando, et modò non in principiis intermittentium, variis confirmatur curationum historiis.

ETSI ad febrium *corruptivarum* categoriam revocaverimus eas etiam intermittentes, quæ solâ *diuturnitate* nostri corporis œconomiam notabiliter pervertunt, earum tamen curationes per Chinam Chinæ feliciter absolutas non lubet referre; cùm hujusmodi casuum tanta suppetat copia, ut quilibet medicus in usu hujusce remedii vel mediocriter versatus centenas facillè historias istius generis pos-

sit congerere. Ea propter nonnullas tantummodò in medium proferam, in quibus aliquid occurrat ad rem nostram notatu dignum, quod nimirum respiciat vel oblationem corticis in intermittentium benigniorum *principiis* vario cum successu administratam, vel eandem usurpatam tantum in illarum *progressu* ob supervenientiam graviorum symptomatum; eorum tamen, quæ remotum solummodò periculum à longè minantur, non quæ proximum et præceps afferunt; quandoquidem de hisce postremis specialior suo loco habenda est consideratio. Ut ergò ab iis exordiar casibus, in quibus præcox contigit exhibitio corticis, nullo prævio examine an febris curanda *depurativa* fuerit, an *corruptiva*, progrediendo postmodum ad eos in quibus corticis oblatio fuit maturior, (febris scilicet jam ad *corruptivas* vergentibus) in promptum sunt qui sequuntur.

I. D. *Flaminia*, uxor clarissimi quondam viri, D. *Nicolai* postea Comitum de Sanctis, à Secretis et Statu Consilarii Sereniss. Ducis nostri, dum Lauretum pergeret, in medio circiter itinere sub die ipsâ æquinoctii autumnalis anni 1704, correpta est simplici quartanâ intermittente adeò quidem levi, ut cum vespertinis tantum horis recurreret, ægra somnum placidum traheret per noctem, et manè vegetior surgeret, ac antè morbum: idque sibi perpetuò accidisse quamdiù vixit quartana, pluries asseruit. Post paucos dies ab invasione febris in patriam redux, in medio pariter itinere,

mihi undè illa discesserat proficiscenti occurrens narrat quæ sibi contigerant. Suasor sum ut benè se regat in itinere, remedia postea si opus fuerit, administraturus in patriâ cùm illuc appulerim. His auditis, iter prosequitur : cùmque aliâ de causâ Bononiæ per duos vel tres dies moram trahere cogeretur, jussu vigilantissimi conjugis eximios aliquot inclyti illius Archilycæi professores consuluit, qui habito forsàn gracilioris constitutionis ætatisque paululùm inclinantis respectu, vi quorum imparem diuturno morbo ferendo fortassis ægram sunt suspicati, extractum quoddam Chinæ Chinæ (ut mihi relatum fuit) satis blandum, partitis et parcis dosibus assumendum statim præscripsêre. Annuit iis libentèr amantissimus conjux, qui mirandas quondam noverat, me præscribente, in lethali ægritudine filii sui unici corticis vires, illiusque proindè extracti sufficientem quantitatem ægra secum detulit Mutinam, ubi cœptum Bononiæ usum prosecuta est cum notabili paroxysmorum imminutione. Mihi interim in patriam restituto narrantur quæ acta sunt, ægrâ tamen submurmurante, se quodammodò graviùs habere, et quamdam velutì majorem lassitudinem percipere post imminutas accessiones, ac antea. Culpatur tamen iter : ast ego subdo, quod libentèr illi adstitissem cùm professores Bononien-ses consuluit, ut nonnullas animadversiones meas circà ægræ statum ex notione rerum jamdudùm prægressarum petitas, iisdem minimè consciis potuissem exponere, executurus postea quidquid illis

placuisset, re clariùs intellectâ. Dixissem nempè, illam ex gravibus prægressis animi pathematis (occasione præsertim gravissimarum ægritudinum conjugis et filii) etsi nunquàm complete ægrotantem, valetudinariam tamen perpetuò fuisse, ac in cachexiam vel pectoris hydropem quandoquè proclivem, suadente id diuturnâ modicâ licèt pedum ac tibiæ intumescentiâ, scabiei cujusdam retro-
cessione etc., quibus pravis dispositionibus adhuc latentibus in unâ lance positis, et levibus quartanæ adeò mitis accessibus in alterâ, censuissem viros illos doctissimos, rem totam naturæ concedituros fuisse, ut ego dubio procul institissem, reservato usu corticis in casu tantummodò gravioris recrudescentiæ. Ad hæc instabat amantissimus conjux progressum remedii suspendi, si mihi de rebus prægressis optimè conscio illius usus non arrideret. Huic tamen reponi me quidem dubitare an feliciorẽ partem elegerint magni illi viri, sed non proindè mihi constare de opposito, neque conjecturas meas esse tanti ponderis ut eorum placita infirmare valerent : meque solùm optasse, posse illas tunc iisdem exponere, esto fortè super illis idem quoque potuerit cum ratione decerni, quod decretum jam fuerat, tandem omnem hæsitationem resecui concludens hæc omnia fortassè locum habere potuisse re integrâ, non cùm jam remedium magnâ ex parte febres sustulerat : neque idèò suspensiones meas, forsitan vanas, effectum jam propè completum debere aut opportunè posse impedire.

Et reverà, paucis vix elapsis diebus, febris in totum evanuit. Paulò post lassitudo cœpit ad articulos determinari et sensim in arthritidem universalem ac dolorificam, cui nunquàm ægra obnoxia fuerat, commutari. Quid multis? Duravit ad longum tempus arthritica affectio non sine aliquâ pulsûs perturbatione. Invocabatur tamquàm numen aliquod denuò quartana febris, ut accederet, quemadmodum colebatur antiquitûs, ut procul abesset. Accessit, et nonnihil levaminis attulit; non tamen affectionem sustulit, imò ægra et febre et arthriticis cruciatibus longâ vicissitudine alternatim torquebatur. Post plures tamen et plures menses, repetitis sudoribus, in accessionum declinatione, medio etiam diaphoreticorum usu, promotis, tandem convaluit; restitante solùm diuturnâ in partibus affectis imbecillitate, de quâ etiamnùm, humidioribus præsertim tempestatibus, quandoquè conqueritur.

Ex hujusmodi casu posset fortè illustrari theoria constituentium causas intermittentium in nervoso systemate. Sed si illum ad leges in antecedentibus sancitas fas sit revocare, dicendum erit, ob inhibitum influxum fermenti quartanarii (quodcumque sit illud) in sanguinem vel saltèm eodem, priusquàm influat correcto atque retuso, cessâsse quidem febrilem effervescentiam per quam depurabatur sanguis, non modò à supradicto affluente fermento, sed et datâ occasione, ab aliis quoque impuritatibus non febrilibus intrâ illum præexis-

tentibus ; verumtamen remansisse superstitem in eodem cruore , velut in mari sedatâ licet procellâ adhuc turbato , motum quemdam vel dispositionem irrequietam ad facile fermentescendum , illi impressam à prægressâ effervescentiâ , seu ab humore qui effervescentiam hujusmodi suscitavit. Hinc particulæ sanguinis suopte jam ingenio non benè dispositæ fluctuantes adhuc atque tumultuantes , neque sibi placidè cohærentes amplius , ut cohærebant in statu sano , loco febrilis ebullitionis clandestinam et occultam potius inière fermentationem , ac indè imperfectam secretionem , vi cujus impuritates ejusdem cruoris autecedentèr aggestæ decubuère ad articulos , nec non etiam ad universalem corporis habitum , quasi rheumatismi adinsitâr. Et hoc casu locum habere videtur , quod non semel se observâsse refert *Sydenham*. (subdens tamen hoc esse unicum incommodum quod à cortice allatum noverit unquàm) nempè quòd qui pluries Chinam Chinam assumpserint , rheumatismo fiant ad breve tempus nonnunquàm obnoxii : quo tamen mihi , ut verum fatear , aliàs nunquàm videre contigit , hoc et sequenti casu excepto , ubi quoque usus Chinæ Chinæ diutinus aut exuberans non fuit , sed fortassè potius immaturus.

Itaque à posteriori videtur constare , quod satius fuisset , vel febrem , quæ *depurativa* erat , sinere , quousquè talis mansisset , nec corticem exhibere , vel saltèm priusquàm exhiberetur , sanguinem ab inquinamentis suis mundare , sive remediis diapho-

reticis occasione defervescentiæ febrilis facile in actum reducibilibus, sive diureticis, aliisve similibus, præmissâ etiam blandiori ventris expiatione, quin et parcâ forsitan (quam ægra facillimè, non obstantibus iis quæ diximus, ferre consueverat) sanguinis detractio, ut sic purus et fluxilis, quantum fieri potuisset, redditus idem cruor, inhibitiæ postmodum febris commodo tutius, atque tranquilius perfrui valuisset.

II. Haud longè absimiliter contigit *D. Pegault* obstetrici olim aulicæ, habitu corporis valdè obeso præditæ, atque à toto tempore suæ mansionis in Italiâ (quippe quæ Parisiensis erat) variis ægritudinibus obnoxia fluxui scilicet immodico sanguinis ab utero, efflorescentiæ cuidam cutaneæ acerrimæ per singulas æstates, aliisque diversis incommodis quæ robustam licet, sæpius perturbare consueverunt. Hæc anno 1700 dùm appropinquaret, imò immineret partus Serenissimæ Ducissæ Mutinæ, correpta est tertianâ simplici intermittente satis validâ, et non modicæ diuturnitatis signa præbente ob copiosos vomitus et alvi dejectiones, profusosque in ipso febris augmento sine levamine sudores. Quapropter, cum ei admodum curæ esset excipere partum Dominæ tum suæ, tum meæ, rogavit me ut febrim quàm citò vellem suppressere saltèm, si penitus extinguere datum non esset. Tertio itaque vix elapso paroxysmo, præmissâque diebus antecedentibus phlebotomiâ et clysterum administratione, corticem propinavi, cujus usu opportunè

continuato, impetratae sunt induciae feбри, quantum exigebat opus illud quod propterea ad ultimum usque terminum feliciter perduxit. Post mensem circiter recidit, et curata est methodicè, purgata scilicet aliisque consuetis omnibus adjuta remediis. Sed neque planè profecit hæc methodus: siquidem aliàs recidit nec semel; quamobrèm novâ corticis oblatione, quam efficaciter imploravit, iterum est sanata. Sed (quod adnotavit *Sydenham*, ut suprà diximus, et quod forsàn Transalpinae magis quàm Cisalpinae genti est familiare) non multò post vagos in regione præsertim lumbari passa est dolores, à rheumatismo non longè absimiles: ac demùm, iisdem flexuræ genuum pertinaciter infixis, non sine incommodo descensum scalarum, et stationem ipsam ad aliquod tempus valuit exercere, nec nisi seriùs in pristinum restitui. Illud insuper de illà notandum, quòd quotiescumquè sumebat corticem (sumpsit autem pluries ac pluries per modum alterantis) toties illi alvus copiosè fluebat fermè ac si solvens aliquod ea sumpsisset, quod et aliquandò se observâsse *Mortonus* asserit, et *Sydenhamius*: ob peculiarem, ut inquit, *quorundam corporum temperiem, atque idiosyncrasiam*: iique proindè auctores in tali casu laudanum miscent cum cortice; neque tamen per hoc admodum feliciter ea curabatur, ut retuli: iisque diebus quibus feriebatur ab assumptione corticis, (ut pluries mihi placuit experiri) illis eisdem alvus in statum naturalem redibat. Quod sanè in ullâ aliâ personâ mihi nequa-

quàm contigit observare; cùm in Italis ægris aliquam potius alvi stipticitatem quàm lubricitatem, utpotè : *Operationem tam suæ naturæ* (eodem Sydenhamio iudice) *quàm morbo planè contrariam* consuescat inducere.

Atque hi duo casus respiciunt oblationem corticis haud satis felicem in intermittentium principio, ubi sanguis depurari indigeat non modò à fermento febrili, verùm et ab aliis inquinamentis in eo præexistentibus : nunc duos alios subdam longè minùs felices, et notatu dignos? Quos mihi nuper tantùm, sexdecim videlicèt annis à primâ hujusce tractatûs editione mihi contigit observare, commonstrantes eamdam oblationem ne semper quidem tutam in ipso febrium intermittentium, planè tamen depurativarum progressu.

III. Æstate anni 1728 dùm ruri agerem, nobilis quidam adolescens à villâ meâ mille passus distans corripiebatur levissimâ intermittente tertianâ, primùm simplici, mox duplici, sed quæ intrâ paucas horas copioso sudore integrè solvebatur, remanente per totum tempus intermediûm omnimodè actionum alacritate. Perseverante jugitèr hujusmodi statu, nil prorsùs faciendum duxi, sed totum negotium naturæ relinquendum ad excoquenda per ignem febrilem tam blandum quæcumque fluidorum vitia, quæ ob prægressos errores, præsertim in potu, insolatione, et nimio corporis exercitio commissos, potuissent in ægrotante latere. Jamque vigesimus tertius præterierat accessus, cùm ab im-

portunis precibus adolescentis aliàs à me rejectis tandem commotus, illi morem gerendum censui, Peruvianum scilicèt corticem dosi saltèm paulatinà eidem præscribens, præcipuè cùm ille clàm domum meam ob idipsum pedibus venisset, mihiq̃ue asse-
veràsset sed falso, nullo ampliùs aut fermè nullo sudore paroxysmos levissimos, nec ultrà tres vel quatuor horas protractos, solvi consuevisse. Præ-
cripsi ergò *tres drachmas* corticis in sex partes di-
visas, et intrà sex paritèr dies omni mane sumendas. Assumpsit ille, et circà tertiam vel quartam diem febris evanuit. Cùmque verò duas alias portiones superstites duobus diebus subsequentibus ad præ-
cautionem potàsset, primà post absolutum medi-
camen die, ex improvise correptus est paroxysmo, quem oppidanus chirurgus epilepticum reputavit, cui tamen morbo adolescens ille nunquàm antea fuerat obnoxius. Nunciatà mihi per eundem chi-
rurgum eventùs serie, statim venam secari jussi; quæ tamen operatio, nonnisi post horas quinque vel sex fuit celebrata: ab eà verò motus convulsivi, seu jactationes corporis cœpère quidem, ut fuit relatum, illicò imminui, sed eos excepit profundus sopor, vi cujus æger fermè exanimis videbatur: quâ de re novam iterùm venæ sectionem præcepi, et perseverante jugitèr sopore ac oppressione men-
tis, vesicantia quoque brachiis et cruoribus affi-
genda proposui. Hæc tamen omnia cùm incassum acta intellexerim, mane sequenti ægrum mihi invi-
sendum omninò credidi; quem cùm deprehendissem

obmutescentem, ac veluti obdormientem, sed nonnullos nihilominus motus, quos per evulsionem capillorum ipse excitaveram, facile edentem, eosque tunc observâssem sopiti potius, atque subdeliri, quàm epileptici hominis proprios, securitatem omnimodam matri sum pollicitus, ut reverà contigit, etsi nonnisi post horas 38 per novæ ac unicæ febriculæ supervenientiam ab ejusmodi paroxysmo integrè liber evaserit. Evasit tamen neque ampliùs usquè adhuc quidquam simile, vel ullum aliud incommodum passus est optimam quippè ac firmam valetudinem Deo dante assecutus. Una remanserat adversùs corticem parentum querela, quam tamen ego statim sustuli, asseverans febrifugum ex se insons fuisse ac strenuè suo munere functum; me potius haud satis cautum in concessione meâ et subdolo adolescentis relatu nimis credulum ingenuè confessus.

IV. Inclinate autumnno ejusdem anni urbi restitutus in consilium vocabat pro aulico equite nostro florentis ætatis, qui dùm Viennæ Austriacæ hyberno tempore moram traheret, levi tertianâ duplici intermittente, et copioso sudore solvi consuetâ, fuit ibidè correptus. Eam tamen ad decimam sextam usquè diem protractam cùm diutiùs ferre ob impatientiam detrectaret, medicus, etsi quodammòdò invitus, fervidis petitionibus illius tandem indulgens, Chinam Chinam frequenti haustu, per brevia videlicèt intervalla potandam præbuit; quo factum est ut sequenti die febris nullatenus

apparuerit, sed ejus loco successerit perturbatio quædam ventris infimi, tremor viscerum, evaporation ad caput, et dein manuum ac digitorum convulsiva contractio; itaut affectio isthæc ab epilepticâ parùm abludere visa esset, nisi mentis, et sensuum omnium usus integer aliud suasisset. Injuncto statim clystere, sedata sunt omnia; noctu tamen bis, aut ter, etsi levior rediit insultus, qui postmodum irregularitèr se se exerere non desiit. Progressu temporis supervenêre iterum febres, quæ per sexaginta dies et ultrà, modò tertianæ, modò quartanæ typum referebant, modò nonnisi erraticarum more invadebant; iisque etiam vigentibus recurrebat identidèm insultus ipse, quamvis debilior. Febribus tandem per amara depulsis, remansit nihilominus larva quædam transitoria ejusdem insultûs, quæ à primariis urbis illius medicis pro merâ hypochondriacâ affectione fuit habita consensu unanimi. Cùm tamen ea post epotas etiam quasdam thermales aquas recurrere, quamvis imbecillius, nequaquam cessâsset, reditus ad nativum aerem pro medela fuit ægrotanti præscriptus. In Italiam itaque reduci meo suasu secta est vena propè hyemale solstitium, non neglectis familiaribus quibusdam remediis, quæ medicus illius ordinarius præscripserat, quibus extenuata quidem remansit hujusmodi affectio, non tamen planè sublata, illius namque eradicationem ad vernum æquinodium differre fuit opus, martialibus tandem remediis absolvendam.

Hi duo itaque casus satis clarè videntur ostendere, non quòd cortex in se, vel ex se sit unquàm noxius, quemadmodum quispiam malè feriatos posset opponere. Cortex enim hiscè casibus febrim intercipiens non aliud præstitit nisi quod debebat, et quod solet etiam tunc cùm pereuntis hominis vitam ab imminente vindicat morte; sed solùm videntur ostendere quòd medicus debeat summâ cautelâ procedere in suppressendis quocumque verò specifico febrifugo (si quid aliud sit præter corticem) febribus depuratoriis, non modò in earum principio verùm etiam in earumdem progressu, quando nulla id exigunt symptomata, sed potius oppositum suadet facilis ægrotantis tolerantia: potest enim nonnunquàm contingere, rarò licèt, quòd non modò saburra in sanguine præexistens et latens, sed et ipsum fermentum febrile à febrifugo absorptum non integrè subigatur à naturâ, itaut possit vel insensibilitèr dissipari, vel per urinæ vias, uti frequentius mos est, vel per alias æquivalentes excerni; sed feratur per metastasim infrequentem quidem, sed tamen possibilem, ut in duobus hisce casibus, ad caput, vel alio, ibique non contemnenda producat phænomena, quamvis millies in similibus casibus id non acciderit. Quamobrè medicos monitos velim ne febrium omninò depurativarum, et planè salutarium, etsi nonnihil provectorum, ullo verò febrifugo suppressionem etiam paulatinam tam fidentèr, ut sæpè assolet, tentent, nisi earum diuturnitas sensibilia quæpiam gignat

incommoda, quorum ratione febres hujusmodi ob solam diuturnitatem suam videantur jam naturam nonnihil corruptivam adipisci : quod non prius quàm ultrà quadragesimam diem solet de more contingere. Interim tamen sicut nimiam fidentiam in animosioribus per exempla isthæc temperandam credidi, ità ne nimiam trepidationem pavidi-
dioribus incutiam, ad feliciora exempla oblationis Chinæ Chinæ in ipso intermittentium principio progredior.

V. *Matrem meam*, tunc propè octogenariam, adhuc tamen robustam pro ratione ætatis, et sanguine satis vegeto etiamnum refertam, querulam licèt, mense novembris anni 1706, quartana febris adorta est. Tribus elapsis accessionibus mediocris intensi-
onis, cum non satis fiderem virium nonnihil prostratarum robori, in tam propectâ ætate facile resolubili, et cum nihil incongruum intrâ illius sanguinem præexistens agnoscerem, quod occasione febrilis incendii indigeret absumi; sed contrà metuerem potius ejusdem cruoris conspurcationem à fermento febrili (quod tractu temporis non semper perfectè subigi solet) vel saltèm enervationem ipsius sanguinis à modici etiam temporis lucta, seu effervescentia, ad ejusdem fermenti subactionem requisita; idcirco ab ipso initio suflamen aliquod paroxysmis imponendum duxi, ne nimium excurrerent. Quapropter statim corticem ad *scrup. j.* quotidie manè propinavi, per modum scilicèt levioris alterantis, ratus me fortè intrâ decem vel

duodecim dies febriles accessus ad summam extenuationem vel ad totalem abolitionem paulatim deducturum. Sed mea me fefellit opinio ; siquidem tertiâ die assumpti remedii, quâ die quarta accessio expectabatur, vix ea sensibilis fuit : quare continuato ad duos alios tantum dies, eâdem quoque dosi, eodem medicamine febris penitus abiit, contra expectationem meam. Substiti proinde ab usu corticis, expectans post aliquot dies reditum febris, quam nonnihil sinere decreveram ; sed ea non amplius reversa est. Imò, cum post aliquod tempus occasione cujusdam errati in victu, vomitum nocturnum passa esset ægra, cui se adjunxit incalescentia febrilis, hæc nihilominus pari velocitate sponte abiit ac advenerat. Neque ab eo tempore usque ad ejus obitum ullum insultum febrilem experta est genitrix mea, quæ Deo favente deinceps vixit incolumis.

VI. *D. Margaritam de Marchesiis*, 76 annos natam, et alioqui sanam, hyeme anni 1708 febris quartana corripuit. Tribus elapsis paroxysmis, filius chirurgus domum meam petit, consilium capturus an corticem matri debeat offerre, nec ne. Absente me ab urbe, juniorem medicum quem tunc instituebam in praxi, allocutus est, votum illius saltém excerpturus. Cautus adolescens se præbet ancipitem ; subdit tamen sibi notum esse, quòd matrem meam in principio quartanæ eo remedio feliciter ipse curaverim. Hac notiâ contentus chirurgus, nec quicquam ultrà quærens, statim primâ die vacuâ,
post

post tertium paroxysmum exhibet matri suæ *drach. j.* corticis : alterâ die pariter vacuâ , alteram similiter corticis *drachmam*, et die quarti futuri paroxysmi *drach. ij*; quibus epotis, idem quartus paroxysmus minimè apparuit, nec ullus alius deinceps : imò nec recidiva, nec ullum ampliùs (quod unicè notandum occurrit) ex supressâ citò quartanâ successit incommodum, sed integra planè, constans et inculpata valetudo.

VII. *Filiolus* bimus, unicusque *D. Petri Joannis de Pedronis*, cæteroquì vividus, ac probè valens, febre quartanâ duplici ex improvise corripitur, quæ illum intrâ paucos dies plurimùm extenuat, angit atque debilitat. Huic præmissis aliquoties intermissionis tempore nonnullis cochlearibus *syr. de cichorio cum rhabarbaro*, qui alvum vix tantillùm subduxit, exihitum est statim extractum Peruviani corticis, paucò *syr. ex corticibus citri edulcatum*, paucâque similiter aquâ ex ejusdem floribus aromatizatum : quo per aliquot dies exhibitò, sublata penitus est febris, cui successit nullo interturbata incommodo perfecta sanitas.

Ex tribus hisce postremis exemplis cùm pateat ex adverso adhibitum esse feliciter in ipso intermittentium principio Peruvianum corticem, videtur inferri posse, quòd ubi nil purgandum in sanguine præexistit, sed solùm peccat in ipso fermentum febrile adveniens ab extrâ, capax tamen tractu temporis, si paulatim restitet, febrim naturæ anticipis in corruptivam convertere, non ab re sit

eodem nonnunquàm in ipso paritèr principio, cautè tamen ac prudentèr uti. Modò transitum faciamus ad alias recensendas historias itidem felices citæ oblationis Chinæ Chinæ in febribus corruptivam naturam nondùm quidem adeptis, sed tamen ad eam acquirendam non longè dispositis.

VIII. *Amita mea monialis* 78 annum agens, insultum apoplecticum antè tres circitèr annos passa, atque ex eo hebes jam, immemor, ac fermè stupida reddita, anno demùm 1708. capitur tertianâ duplici suapte naturâ intermittente, cum paroxysmis tamen sese invicèm excipientibus. Vix elapsis primis diebus, quibus præsidia medica consueta, et possibilia usurpata fuerant, eò devenit stupiditatis, ut nec cibum capere, nec urinam reddere, neque aliud quidpiam sciens, aut volens, exercere potis esset, durante accessione, præsertim potiore, vel saltèm nonnisi circà extremam declinationem ejusdem, qui postea ferè immediatè subsequēbatur altera cum rigore paulo minore. In hoc statu dixi monialibus assidentibus (quoniam ægrotans eo passu ad obitum tendebat intrà paucos dies, non tam ratione febris, quàm ratione adjunctorum) non aliundè quicquam spei superesse nisi forsitàn ex tentamine Chinæ Chinæ, si eam aliquâ horâ minoris stupiditatis deglutire valeret; cujus tamen remedii administrationem, utpotè in tali statu difficilem et probabilitèr inanem, earum arbitrio relinquebam, ut solum si luberet, tentarint: faciles se præbuère moniales, et quoniam intrà claustra pharmaco-

polium usuale habent, statim attulere remedium, quod summâ caritate et industriâ administratum fuit, et quasi vi illatâ, ab ægrâ deglutitum ad *semidrachmam*. Vesperè repetitum est eâdem dosi, et facilius haustum, quoniâ declinabat jam fortior accessio. Mane sequenti oblatum est ad *drachmam unam* (semper enim facilius potabat) et vesperi ad *semidrachmam* cum debito intervallo, et congruâ ab alimento distantîâ. Alterâ die, propinato ad *semidrachmam* paritèr manè et serò eodem remedio, vix tantillûm febris apparuit, quæ brevî postmodûm, continuato paulispèr medicaminis usu, disparuit omninò. Hoc autem mihi nequaquàm mirum. Illud potiùs miratus sum, et etiamnûm miror, quòd solutâ febre, statim ægrotans adeò vegeta, prompta et memor evaserit, ut vix talis fuerit antè insultum apoplecticum, nedûm antè febrem. An verò phænomenon istud planè mirandum cortici adscribendum sit, an acerbo et continuo tumorem hæmorrhoidum dolori). quod symptoma sublatae paritèr feбри statim supervenit) anceps hæreo. Eventum tamen non absimilem ab usu corticis refert de suo avunculo *Morton, historiâ 26 de Proteiformi febr. intermitt. genio*. Perseveravit ad aliquot hebdomadas, paucas tamen, ægra in hoc statu, solo hæmorrhoidum dolore vexata, et adjunctâ alvi stipticitate, clysterum usum ægrè admittente. Tandem sive proptèr hoc, sive ob intermissum præmaturè nimis, nec diù continuatum, aut repetitum corticis (metu scilicèt ne ab illius

actione emergerit in hoc uno casu hæmorrhoidum tumor ac dolor) febris rediit, et cum ea mentis, ac sensuum torpor consuetus, quin etiam major. Aberam fortè tunc ab urbe, neque ægram invisi, nisi post tertiam diem, quo tempore vix percipiebat quæ circa eam fierent, aut dicerentur, meque ipsum vix dignoscebat. Quintâ die cùm esset non nihil vegeta, sibi, ut aiebat, brevì morituræ institit ministrari sacramenta Ecclesiæ, quibus integrè munita, redeunte statim accessione, quæ vehementer invasit, ferè lethargica facta est, et deglutiendi impotens; ac propterea de Chinâ Chinâ propinandâ ne cogitandi quidem fuit locus; quamobrèm nullo perturbata remediorum incommodo, septimâ circitèr die animam Deo reddidit. Ex hoc casu, si non aliud in rem nostram, saltèm efficaciam remedii in subjecto constitutionis jam descriptæ; veterum affectionum temporaneam correctionem, et vitæ ipsius, laboriosæ licèt, protractionem ab administrato, necessitate cogente, circa initia remedio, subit animadvertere.

IX. *Aliam monialem* ex ordine Carmelitarum excalceatarum, annos 76 natam, habitu corporis à multis jam annis cachectico et squallore faciei cadavericum propè æmulante refertam : suffusione oculi utriusque ferè obcæcatam, antiquoque insuper et continuo asthmate laborantem, ità ut unum vel alterum gressum movere non posset, quin anhelitu gravissimo ipsam loquelam præpediente corriperetur, autumno anni 1707. invasit tertiana duplex

intermittens, nec admodum fortis. Roganti, ut præmisso leniente levissimo, phlebotomiam jamdiù intermissam, antiquitus verò pro minuendâ spirandi difficultate sibi (etsi ex tunc etiam cachecticæ) familiarem æquè ac proficuum permitterem, annui limitatâ ad tres, vel quatuor uncias sanguinis de tractione, ex quâ facillimè toleratâ nullum sive commodum subsequi dignoscere potui. Processit febris de more nonnihil intensior in augmento morbi. Cùmque in quinto paroxysmo, quintâque paritèr die non parùm somniculosa videretur, licèt quoàd alia non plùs gravaretur quàm par esset; perfectis, quæ illi aliundè imminebant periculis, si febris vel tantillùm ingravesceret, vel modicè protraheretur, præscripsi *scrup. j.* extracti Chinæ Chinæ quotidie manè assumendum, quo bis tantùm adhibito septimâ die vix umbra febris se prodidit. Continuato deinceps, febre licèt jam extinctâ, ad alios tres dies eodem remedio, ægra integrè convaluit, et (quod magis refert) sine ullâ penitus recidivâ.

X. *Alia paritèr monialis*, degens in Cœnobio S. Claræ senex gracilis, et valetudinaria, inclinante æstate anni 1709. corripitur quartanâ simplici intermittente. Hæc antè quatuor circitèr menses passa erat insultum levis apoplexiæ, statim solutum per decubitum materiæ ad nervos partis sinistrae (undè ejusdem partis stupor universalis, nec non ad nervos opticos, et linguæ motorios, undè hæsitatio sermonis in istâ, in oculis verò fenestratorum ob-

jectorum repræsentatio, et tandem stabilis caligatio. Superveniente quartanâ credidissem, auctoritate *Hippocratis*, materiam in nervos tùm deturbatam, tùm influere valentem, posse attenuari, digeri, atque resolvi; sed fortassis ætas, et debilis constitutionis languor obstiterunt. Quamobrèm, licèt febris primis insultibus non admodùm gravis videretur; cùm tamen paulò post sumpserit incrementum et robur, metum aliquem incussit tùm ægræ, tùm mihi, ne scilicèt ea suapte naturâ debilis pluribus accessibus valeret diù sufficere. Eaproptèr cùm potius debilitari, quàm refici partes affectas, et præcipuè visionem, quotidie noscerem, in ipso etiam morbi *principio*, videlicèt circà quintum (nī fallor) paroxysmum, vel eo vix transacto, cœpi corticem offere ad *drach. ss.* singulo mane. Substitit febris etsi valida post sex circitèr oblationes; nihilominùs continuatum est remedium usquè ad dies 14 postea, quiete duarum plùs minùs hebdomadarum interpositâ, iterùm exhibitum est ad *drach. j.* quotidie per tres dies. Immò ad majorem præcautionem altero simili intervallo posito, circà æquinoctium autumnale rursùs exhibita est quotidie *drach. j.* corticis per alios tres dies; undè stabilis sanatio et præservatio absque ullo alio incommodo, imò potius cum levamine, et alacritate ad motum, solâ oculorum caligatione superstite; à quâ nihilominùs nequaquàm impedita est, quin sola, et sine adminiculis etiam post biennium quaquaversùm vagaretur, et consueta munia mediocritèr exerceret.

Atque casus istos circà oblationem corticis bono successu institutam in principio intermittentium, *corruptivam* nondùm naturam verè adeptarum, sed tamen in eandem proclivium, retulisse sufficiat. Modò nonnullos alios circà eandem ablationem præ urgentiâ symptomatum administratam, febre scilicèt in deterius labente, recenséamus.

XI. Honestus juvenis *Franciscus Degoli*, structurâ corporis universâ ad tabem apprimè dispositâ donatus, cujusque frater jam tabibus, et mater peripneumonica obierant, correptus est anno 1699. circà medium augustum quartanâ simplici, quæ paulò post duplex est facta, illique adjuncta tussis importuna noctù, et interdiù præcipuè verò toto accessionis etiam declinantis tempore ægrotantem concutiens, cum plurimo sputo materiæ spumosæ insipidæ. Hunc à principio hortatus sum, ut febres ferret, opem postea idoneo tempore laturus, et citiùs etiam, si tussis admodùm increbresceret. Tulit ille tacitus quartanam duplicem per duos menses, tussimque contumacissimam et molestissimam, quâ ad marasum usquè deductus est, cum tantâ sputi spumosi copiâ, ut quanta fuerit vix credi possit. Deerat à sputo omnis purulentia, non omnis tamen deerat intermissionis (qualiscumque) die febrilis incalescentia, cætera tabidum consumptum referebat. Rursus accitus ego, ac prædicta omnia considerans, statim, paucis præmissis, exhibui corticem ad *drachmas duas* in vino, ingruente paroxysmo graviore, et confestim utraque jugulata est quar-

tana, tussisque indè manifestè imminuta, ipsumque adeò sputum. Per octo dies assumpsit *semidrachmam* ejusdem pulveris, et interim sedata est tussis, febre jam antè depulsâ. Hinc ad duos menses abfuit æquè febris ac tussis; sed circà brumale solstitium utraque reversa est, et utraque repetito pulvere iterum fugata. Quia tamen quartana modò duplex, modò simplex, levior licèt, irregularitèr nonnunquàm redibat, et cum eâdem tussis acerrima, sputumque suspectum, ideò æger coactus fuit pluries idem remedium paucâ dosi haurire, donec propè solstitium æstivum anni 1700. à febre, tussi, et macie, cui in dies succedebat proba nutritio, perfectè sese extricavit, nullum ampliùs morbum ab eo tempore passus ad annum usquè 1727, quo tempore è vivis sublatus est.

XII. *D. Carolo Antonio de Agnanis* sacerdoti, tertiana simplex intermittens, quæ illum die 26 Julii 1707. adorta est, post septem leviores circuitus duplex est facta, æquè tamen adhuc intermittens, ac levis. Curata est methodicè, sed loco levaminis, potiùs paulatim exacerbata est febris, quæ eousquè processit ut rigoribus, tremoribus, ac concussionibus intolerabilibus in invasione ægrum vexaret, succedente dein plurimâ in somnum proclivitate, cum torpore mentis sat gravi, et postmodum delirio; quæ tamen omnia symptomata copiosus tandem sudor unâ cum febre solvebat. Instabat mater ut Chinam Chinam præscriberem, natum imparem oneri morbooso credens. Renuebam tunc ego, ut qui vigesimam saltè diem jam propè imminentem

expectare decreveram; vires enim erant ferendo. Transactâ vigesimâ, febris fit fortior, illiusque simul ingravescunt symptomata; insuper urina crassa est, pauca et impensè rubra. Renovantur querelæ de cortice non adhuc propinato. Cunctabundus hærebam, videns morbum in summo vigore, quem proindè tunc veluti suffocare minimè audebam, certus (ut opinabar) de recidivâ longiore, cum tamen febris adhuc intermittens securitatem cum diuturnitate polliceretur. Augebatur interim non-nihil quâlibet accessione sopor atque delirium. Et licèt solveretur utrumque, solutâ febre, cum tamen relinqueret aliquod vestigium sui, instante viriliter matre (mihi dubio procul infortunia quæ accidissent, exprobratura) corticem præscripsi ad *semi-drachmam* tantum manè antè febrem, et serò declinante febre. Sed cum postremus accessus iisdem non modò symptomatis, sed et ultrà morem gravioribus fuerit comitatus, sequenti die dosim duplicavi, ut et die tertiâ. Statim febris abiit; urinæ factæ sunt concoctæ, et omnia tranquilla. Sumpsit corticem iterum ad *drachmam semis*, semel tantum in die ad modicum tempus; quo elapso, rus adiit, ubi paulò post, spontaneâ diarrheâ superveniente, perfectè convaluit, duos vel tres tantummodò tertianæ paroxysmos post æquinoctium vernum anni 1708. iterum passus.

XIII. Generosum virum, supremum domesticæ ducalis rei præfectum, *D. Comitem Ludovicum de Marsciano*, quartanæ propè bimestris, ni fallor,

quâ tenebatur (contigit id anno 1696.) ad nau-
seam usquè tædebat. Curabat illum de more *D.*
Davinus, meque tunc proptèr ægritudinem impe-
dito, et cæteroquè in consilium vocari solito, socius
illi jungebatur in curatione vir scriptis suis, et mul-
tifariâ eruditione clarissimus, ac orbi notus, *D.*
Bernardinus, *Ramazzinus*, comprofessor quondâm
meus, summoperè colendus in Lycæo Mutinensi,
postea suspiciendus in Patavino, ubi primariam
meritò occupavit pract. med. cathedram. In morbi
progressu accitus sum et ego, ut qui meam jam
cœperam circumferre convalescentiam. Nobis ita-
que omnibus in consilium vocatis, suum æger de
sumendo cortice desiderium ardens exposuit. Jam
lien illi cœperat nonnihil intumescere, ac prop-
tereà ne ultrò, ut mos est, durantibus febribus intum-
esceret, instabat easdem illicò suppressi. Me au-
tem præ cæteris mirabatur cunctantem, quem faci-
liorem sibi persuaserat, quippè tunc à morbo gra-
vissimo corticis ope convalescentem. Ponderato
symptomate, et iis omnibus quæ contrà usum cor-
ticis adduci potuissent (quatenùs metuendum foret,
ne plùs ob suppressam hoc pacto febrem augeretur
lienis tumor, quàm si illius curatio vel omitteretur,
vel remediis consuetis absolveretur) decretum fuit,
paucis præmissis, esse annuendum votis ægrî, qui
proptereà statim sumpto remedio eodemque modis
jam dictis continuato, tùm à febre, tùm à splenis
tumore absque ullâ recidivâ liberatus est: nisi fortè
morosus quispiam recidivam morbi illius appellare

velit lethalem ejusdem ægritudinem post septennium à causâ evidenti productam, febrem videlicet acutam, ex suppressâ cutaneâ quâdam habituali affectione oriundam, et intrâ 14. dies per abscessum ad anum imperfectè judicatam; quo demùm abscessu priùs in gangrænam converso, mox difficultè curato, translatoque interim ægro in aerem palustrem, febris erratica subsecuta est quæ tractu temporis lienis tumorem ascivit, dein icterum, mox hydropem, et mortem.

XIV. *Gracilis uxor D. Francisci Guicciardi* cantoris egregii, anno 1708. duplici tertianâ intermittente laborans, intrâ paucos dies, accessionibus sese mutuò excipientibus, eò devenit, ut jam versaretur in non levi discrimine, testante id pulsu exili, motibusque manuum, et linguæ tremulis, cum subsultibus tendinum, et hujusmodi gravibus symptomatis, ratione quorum viatico Eucharistico fuit munita. In consilium vocor, et quoniam reliqua remedia ex arte prescripta fuerant, et febris adhuc motum sensibilem suæ invasionis servabat, priusquàm iste obliteraretur, statim corticem Peruvianum proposui. Obstabat, vel videbatur obstare insignis et amplius lienis tumor tempore morbi, brevi licet, genitus, qui *D. Florianum* medicum curantem, doctum, ætateque magis provectum, nonnihil hæsitantem reddebat. Cunctantem nihilominus hortatus sum, ne in gravi periculo præsentaneum, quod spondebam, corticis auxilium omitteret ob suspicionem augendi lienis tumorem,

quem tractu temporis postea ægrâ superstitute curare poterat, nisi, sublatâ per corticem febre, spontè evanesceret, quod pluries mihi contigisse asseverabam. Annuit ille, et oblatis in remissione febris *duabus drachmis* Chinæ Chinæ, et *drachmâ unâ* quotidie per duos sequentes dies, febris omnimodè depulsa est. Præscribitur tamen ad majorem cautelam alia *semiuncia* in octo partes dividenda, quâ ad impediendam recidivam assumptâ, præter illius expectationem splenis tumor evanescit in totum; et sic eodem ferè tempore à febre simul, et à tumore lienis curata est absque ullâ penitus recidivâ. Plures casus istiusmodi, nempè de febribus intermittentibus, præsertim quartanis, tumore viscerum infimi ventris comitatis, et per corticem unâ cum tali symptomate sanatis, afferre possem, quos tamen, utpotè triviales, et passim obvios, satius est silentio præterire.

XV. Non æquè tamen silentio præteream (ne scilicèt meæ nunquàm desim ingenuitati) casum singularem inter tot felices minùs faustum, qui non mihi quidem, sed meo quondam præceptori contigit, dùm viveret, quamquam nec illum inter meos connumerem, neque cortici imputandum credam, ut ei fortassè imputârunt mussitantes quidam Cynici illius temporis. Referam tamen, ut alii judicent.

Meus itaque colendæ semper memoriæ præceptor *Frassonus*, nobili cuidam viro quartanâ febre per mensem circitèr detento, et suprâ modum

vexato, cum notabili anhelitûs difficultate, atque œdematoso pedum tumore, antè febrem exortis, et cum eâ in dies crescentibus, Chinam Chinam exhibuit, et febrem sustulit. Post aliquot alios successivè dies tumor œdematosus suâpte naturâ in incrementum pronus major est factus ad tibias, et crura sensim procedens, ventre non immuni; atque itâ, increbrescente anhelitûs difficultate, intrâ paucos tandem menses à serosâ colluvie universalitèr obrutus æger fato cessit, hydropicus abdominis simul, et pectoris.

Si casum hunc justâ lance obitèr pensitare velimus, pro corticis indemnitate subit animadvertere, non modò antè illius oblationem, verùm et antè febrem inchoata jam esse utriusque hydropis rudimenta, cui causæ quoque prægressæ (quas modò recensere non vacat) plurimùm contulerunt; undè ex præexistente dispositione in actum jam partim deductâ potius quàm ex suppressione febrium, quibus non solùm vigentibus, sed et antè eas, ab aliâ causâ ortum duxerat, hydrops ille accersendus videtur, quemadmodùm egregiè distinguit *Raymundus Restaurandus*: *vel enim*, inquit ipse, *hydropem præcedunt febres, præsertim quartanæ, sicuti Celsus adnotavit, vel hæ subsequuntur hydropem. Posterioribus bis inutilitèr exhibetur China Chinæ; quandoquidem sunt productum causæ, ut plurimùm curationem respuentis. Id remedium aliquandò à me usurpatum est in gratiam ægrorum illud efflagitantium, solatium aliquod illis quæsi-*

turo; desinebat reverà febris, sed paucis post diebus revertens, vel saltèm hydropi nihil detrahens, ut plurimùm lethali. Quod et confirmat propriâ experientiâ cl. Nigrisolus in scholio ad hunc textum: non eadem est ratio (sequitur Restaurandus, celebris licet humorista) si febres antecedunt hydropem; nam non admodùm difficultè curantur, nam sæpenumerò hydrops recedit, dummodò omnia convenientè accedant, præsertim in cathartorum usu, quæ eâdem die febres revocantia, hoc pacto hydropi augmentum et fomentum præbent.

Sed etiam præter hoc, quod maximè verum observatur in praxi, certum est ex adverso, et omnibus notum, plurimos ex quartanis per Chinam Chinam nequaquàm depulsis sponte suâ in hydropem labi. Immò æstate anni specialitèr 1707, non paucos vidi in urbe nostrâ ex tertianis simplicibus atque duplicibus, quibus cortex administratus non fuerat, intrâ paucos dies tumidos factos, ac velutî anasarcâ (rectiùs pectoris hydrope) correptos obiisse, inter quos puerula *D. Comitissæ Sorræ*, tres circitèr annos nata, parentum suorum antea deliciæ, mox luctus. Contrà, eodem tempore Germanus quidam ex ignobiliore famulatu Serenissimæ Ducissæ Brunswicensis Dominiæ meæ, quartanâ triplici laborans, cum universali corporis, præcipuè verò abdominis intumescentiâ, itaut jam hydropicus conclamaretur, curatus est à *D. Clerici*, me tunc absente vocato, per Chinam Chinæ, per quam fugatis febribus, ferè spontè, vel saltèm

paucissimis atque levissimis adminiculantibus remediis, hydrops ille plus quàm incipiens, utpotè februm vel soboles vel comes, prorsùs evanuit. Immò, dùm hæc actu conscriberem, quartanarium *sacerdotem Ecclesiæ S. Viti Rectorem* Chinâ Chinâ ipse curavi, cui quartana simplex in duplicem conversa pedum, tibiæ, crurum nec non ipsius abdominis intumescientiam intulerat, cum respiratione difficili, et ad quemcumque corporis motum valdè anhelosâ, huic ergò, sublati ope Chinæ Chinæ febribus (simplici tantùm leniente præmisso) partes omnes antea turgidæ, spontè, ac brevì detumuerunt, et respiratio in statum omninò naturalem rediit, itaut liberè ambulare, ac ipsi venationi indulgere facile potuerit. Et licèt mox recidivam sit passus quoad febres, non tamen ullam passus est intumescientiam, aut anhelitûs difficultatem, undè nullo negotio, post modicum temporis repetito remedii usu, prorsùs convaleuit.

Si ergò ex unâ parte sine usu Chinæ Chinæ quartanæ febres sæpiùs hydropem accersunt; ex aliâ verò parte, si ope illius evanescit cum quartanis hydrops indè productus, ut modò retuli, cur in casu unico, ubi, fugatis per eandem febribus, processit ultrò jam inchoatus hydrops, adscribendus erit ille ipsi Chinæ Chinæ, non verò antecedenti dispositioni post depulsas febres adhuc superstiti? Exempla febricitantium, quibus hydrops adjungebatur, curatorum ope Chinæ Chinæ, sunt adeò in praxi obvia, adeoque familiaris est hujus-

modi curatio utentibus Peruviano cortice, ut minimè hæsitârit idem *Restaurandus* peculiare caput inscribere : *de hydropis succedentis febribus curatione ope Chinæ Chinæ* ; ubi plures adducit historias hujusce generis notatu dignissimas. Idem vide apud *Monginotium* , *Jonesium* , *Blegnyum* , *d'Acquin* , *Badum* , *Glantzium* , et alios, quod lectori lubet indicare, ne unum tantum uni casui videar opponere, cum prostent mille favorabiles.

His stantibus, decernat modo pro libito quicumque vult super eodem casu infausto superius allato, intrâ annos triginta unico, quantum novi, videarque, an tanta illum teneat fiducia, ut corticem propterea velut absolutè noxium valeat dammare. Ad me quod attinet, crediderim, illum non suffecisse quidem curationi hydropis à febre nequaquam pendentis, ut suffecit curationi ipsius febris, minimè verò putârim ulli eorum obfuisse; cujus rei exemplum non absimilem afferam ipse *Lib. 3. C. 5. Hist. 5*; quod si verè obfuisse contendatur, id saltèm præcipitanter non imputetur remedio suapte naturâ insonti, sed inopportunæ forsitan, aut præmaturæ illius oblationi. Hanc ob causam constitutæ à nobis sunt, quæ in antecedentibus extant pro congruo illius usu regulæ, ac exceptiones : quibus cum hoc casu collatis satis patet, suspectam de inani eventu quo ad sublationem hydropis esse potuisse ab initio oblationem febrifugi. Quandoquidem, etsi verè depurativa non erat febris adjuncta, itaut corticem absolutè respueret,

pueret, neque tamen erat verè corruptiva, itaut planè eundem admitteret, quippè hydropem illum antè ipsam sponte ortum nequaquàm produciens. Notum est autem, quodvis remedium, utut innocuum, sæpè non prodesse, et nonnunquàm etiam obesse, si minùs tempestivè administretur : *sed hoc est peccatum temporis*, inquit *Badus*, *non est medicinæ peccatum*.

XVI. Eo ipso tempore, quo curabam *D. Comitem Nogarolam* à quartanâ simplici in *pernicialem* conversâ, insignemque illius curationem specialitèr describendam *Cap. 6. Lib. 3.* trahebam felicissimè mediâ validâ methodo tunc primò à me excogitatâ offerendi *Chinam Chinam* in casibus hujusmodi, eodem quoque tempore habebam præmanibus *D. Geminianum Levizzanum*, virum patricium, decumbentem ex tertianâ intermittente primò simplici, mox duplici, tandemque naturam *subcontinuum* et *corruptricem* adeptâ. Circà morbi initia, cùm errata in victu prægressa, et repletionem ventriculi fateretur æger, oblatum est vacuâ die, nempè 13. mensis Septemb. an. 1695. elect. lenitivum ad *unc. j.*, mox alterâ die vacuâ correspondente celebrata est phlebotomia, et in progressu administrata sunt ex arte consueta remedia. Cùm hæc nihil proficerent, sed febris quotidie magis invalesceret, vocatus est in consilium *D. Ramazzinus*, cujus suasu exhibitus est 23 Septembris die inter reliqua cardiaca lapis bezoarticus, et die 25 affixa sunt femoribus vesicantia, ob motus

artuum convulsivos, gravemque totius nervosi systematis affectionem. Quia verò morbus in deterius labebatur, et quâlibet accessione pulsus fiebat humilior, ac abolitioni proximus, algorque feralis artus omnes universaliter detinebat ad plures et plures horas: ideò metuentes ambo, ne unâ, vel alterâ accessione superveniente æger occumberet, de antevertendo totis viribus paroxysmo eramus solliciti; idque sperabamus quidem unanimiter à Chinâ Chinâ, sed cùm hoc discrimine, quòd *D. Ramazzinus* ei non satis fideret in tali casu ad exitum tendente (esto quòd periodi adhuc non obscure se proderent) ego verò certam illi fiduciam adhiberem, eo quòd insignes ejus vires in casu longè graviore, et morti proximo, nempè in memorato *Comite Nogarolâ* actu experirer. Cùm autem die 23 illius mensis corticem exhibuissem eidem *Comiti*, et manè diei 28 eum jam morti ereptum, ut referam suo loco, invenissem, eâdem die 28 Septembris enarrans *D. Ramazzino* casum, et exitum felicem, omnem ab eo hæsitantiam submovi circa oblationem Chinæ Chinæ in hoc quoque casu magis vulgari, etsi gravissimo. Quamobrè eâ ipsâ die 28, quâ mirus effectus corticis die prægressâ oblatis *D. Comiti Nogarolæ*, jam per urbem celebrabatur, illum obtulimus *D. quoque Levizzano*, sed methodo tantùm vulgari, ut vulgaris adhuc quodammodò dici poterat (quantumvis gravissima, sed tamen inducias aliquas adhuc præbens, morbi conditio. Oblatus ergò est cortex ad *drachmas* tan-

tum *duas* juxtâ morem, quoniam sufficiens erat à futuro paroxysmo distantia, ut vis remedii justâ dosi exhibiti in actum deduceretur. Repetitus est dein illius usus die ejusdem mensis 30 ad *drach. j.* et per quinque dies sic continuatus: undè celer et integra febris quondâm *benignæ*, mox naturam *corruptivam* sensim adeptæ, solutio.

XVII. *D. Carolo Tamburino*, præclaro, et egregiæ indolis adolescenti, postea Cassinensi monacho, quartanâ correpto in tertio paroxysmo supervenit ex improvise cæcitas ferè omnimoda cum dilatatione pupillæ utriusque oculi. Symptoma hoc visûs abolitionem minitans, uno vel altero repetito febris accessu *D. Candrinum* illi assidentem impulsit, ut de febre gravissimi hujusmodi affectûs productrice suppressendâ cogitaret. Super hac re tamen me privatim consuluit, et annuentem habuit; dein consilio inuito cum *D. Ramazzino* (sic exigente ægrotante) sancitum fuit inter ipsos, corticem nullâ morâ interpositâ esse propinandum: quo facto, statim substitit febris, nec ampliùs rediit, visusque sensim cœpit in pristinum statum reduci, mediantibus etiam aliis remediis materiæ jam parti infixæ discussionem promoventibus: quod egregiè præstitum fuit, remanente tantummodò eâ visûs imbecillitate, quæ pro acutiore, ac minutiore obtutu, opem specillorum exposcit.

XVIII. Pro coronide casum hunc addam, quî meo quondâm *præceptorî* paritèr contigit, et quî signatè adnotetur velim, cùm super hoc uno fun-

data primò fuerit praxis mea circà usum meliorem corticis, translatum scilicèt, atque promotum ad curandas febres exitiales, de quibus tùm libro sequenti, tùm præsertim tertio. Casus autem fuit hujusmodi :

Patricius quondàm vir *D. Octavius Masellus* quinquagenarius, habitûsque corporis summoperè obesi, corripitur febre quartanâ simplici intermittente circà annum 1678. Post aliquot paroxysmos incipiunt accessiones fieri aliquantulùm fortiores, et in suâ duratione protrahi. Observantur tractu temporis in vigore febrilis effervescentiæ aliqui motus tremuli, et subsultus tendinum, lingua fit scabra, urinæ imminutæ, ac crassæ, mensque non omninò constans; solutâ tamen accessione, solvuntur omnia. Quia verò quolibet paroxysmo gradatim intenduntur eadem symptomata, et paroxysmi iidem majorem extensionem acquirunt, de propinando celeritè cortice, priusquàm febris reddatur continua, decernit *experientissimus Frassonus* curans. Et quoniam eundem ægotantem amicitiae ergò invisere solebat alter medicus majoris auctoritatis, et gradûs, licet nec majoris eruditionis, nec æqualis experientiæ, huic quoque communicari *Frassoni* consilium, congruum visum est assidentibus. Horruit hic, iis auditis, mala innumera ægro ominatus, si China China oblata fuisset, cui potius remedia cardiaca, et bezoartica substituenda esse clamabat, repetita insimul quæ paulò antè luculentè celebrata fuerat venæ sectione, hirudinum quoque

et cucurbitularum appositione institutâ, et aliis hujusmodi. Hæc *Frassono* relata impedimento fuêre, ne corticem offerret; protestabatur tamen, quòd cuncta malè cessura erant amico ægrotanti, neglecto usu corticis opportuno. Differri in alteram saltèm accessionem hujusmodi remedium instabant consanguinei ægrotantis. Periculum esse in morâ, respondebat *Frassonus*, se tamen nolle, altero medico non approbante, immò palàm improbante, corticem exhibere. Interim non obstantibus quotquot præscriberentur cardiacis, aliisque præsiidiis, novus de more paroxysmus accessit, iisdem, sed longè intensioribus stipatus symptomatis, quibus insuper singultus frequens, atque importunus addebatur. Neque evanuêre brevî, ut antea, eadem symptomata, sed tantùm imminuta fuêre cum proportionem aliquâ ad decrementum febris, quæ tamen protrahi cœpit usquè ad alterum paroxysmum, remissionem tantummodò modicam passa loco consuetæ intermissionis. Intrâ duas, vel tres accessiones mortem futuram non sine lacrymis ominabatur *Frassonus*, omissionem culpans ex unâ parte, et ex aliâ gratias Deo reddens, eo quòd sors velutî quædam obstiterit oblationi corticis, quem fortassis inanitèr, et cum calumniæ periculo tentatum (quandoquidem tentatus foret) ex iis quæ subsecuta erant, suspicabatur. Clamabat contrâ alter medicus, optimum consilium fuisse, abstinuisse à cortice, quippè remedio semper quidem suspecto, maximè verò in hac febre, occultam

prius, mox remediorum methodicorum ope de-
velatam malignitatem præseferente. Clar. interim
J. C. philologus eximius, et mathematicus Seren.
Ducis, D. quondam *Jo. Baptista Boccabadatus*,
amicus ægrotantis amantissimus, *Frassonum* pri-
vatim interpellavit, suasitque ut corticem vellet
exhibere, posthabitis alterius medici in curam ne-
quaquam vocati sophismatis, quotiescumquè eo
remedio ægrum sanari posse haud improbabili-
ter crederet, quem cæteroquì ad exitium properan-
tem, ipse clarè dignoscebat; subdens insuper,
æquum non esse, ut propter medicas cavillationes,
vel politicas cautelas, vel vana officia periret homo,
intentato remedio probabiliter profuturo. Ad hæc
respondebat *Frassonus*, occasionem suapte naturâ
præcipitem jam lapsam esse, febrem jam, nedum
continuum (etsi remittentem) sed et malignam esse
redditam, et consequenter cortice inexpugnabilem.
Interroganti verò, nùm saltèm sine damno posset
remedium tentari, ultrò respondebat se credere
corticem in hoc casu æquè insontem, ac invali-
dum; nolle tamen proinde dubio tentamine illum
ægrotanti præscribere, *nec subire speciem ejus ut
occisi, quem brevè sors ipsius erat peremtura*. Si
res sic habet, subjunxit alter, offeram ipse, nec
refert, si virum mihi amicissimum, cæteroquì
morituum jugulasse dicar, quem interea fortè
servare per remedium tutum in periculo certo,
et in occasione ancipiti, extra spem non est. Hoc
dicto, abiit statim, *drach. ij.* pulveris Chinæ Chinæ

à monialibus emptas secum detulit, easque ex vino, ut mos erat, ægro potandas dedit ingruente paroxysmo; quo non sine magno discrimine tandem transacto, novus non rediit. Inscius rei gestæ alter medicus triumphum canebat, reportatam de morbo victoriam cardiacis adscribens. *Frassonus* verò totius successûs conscius jam factus, dolo laudabili, eundem corticem adhuc præscribebat ad *semidrachmam* singulo mane in formâ boli, sub nomine confectionis alchermes et de hyacintho. Hac piâ fraude citrà aliud pharmacum æger à reliquis febrilibus, à motibus convulsivis, singultu, etc. intrà paucos dies feliciter evasit, nullam omninò dein recidivam passus.

Hujus eventûs menti meæ tunc validè impressi crebra postmodum reminiscencia quemadmodum mihi occasionem præbuit olim excogitandi methodum efficaciorẽ Chinâ Chinâ utendi, pro febrium perniciosarum tùm intermittentium, tùm subcontinuarum medelâ, ut nupèr innui: ità postea fidentiùs animum addidit pro faciliore vulgarique illius usu in quibuslibet intermittentibus non planè quidem *perniciosis*, sed ob adjuncta in progressu gravia symptomata naturam *valdè corruptricem* nactis. Sic nupèr (ut unum alterumve hujusmodi exemplum cursim subnectam) tenellam virginem, neptem ipsius præceptoris mei *Frassoni*, tertianâ duplici primùm intermittente, mox subcontinuâ cum præexistente chlorosi, ac cachexiâ detentam, dùm transactâ decimâ septimâ morbi die febris in acutam jam

sensim degenerantis indicia se proderent cum notabili periodōrum obscuratione, China China bis in die parcâ dosi propinata satis laudabiliter curavit : chlorosi quidem pro tunc superstite, sed et eâ quoque propriis remediis opportuniori demum tempore sublatâ. Aliam deniquè (ne longior sim) adolescentulam, infectoris cujusdam filiam antiquâ item chlorosi, tussi molestissimâ, diuturnâque simul tertianâ duplici subcontinuâ, quæ acuta palàm symptomata tandem asciverat laborantem, undè illi vel vitæ periculum proximè imminebat, vel transmutatio febris in habitualement (id quod macies insignis cum calore ad tactum acerrimo, tussis contumax, et symptomata indesinens sudatiuncula satis indicabant) exhibitus in his circumstantiis cortex, idemque ad diutinum tempus continuatus ac repetitus, perfectè sanavit.

Atque has tandem historias, quarum fermè quælibet rationalem et cautam Chinæ Chinæ administrationem ostendit in febribus intermittentibus, suapte quidem naturâ *benignis*, sed quopiam sui progressus tempore ob superventum graviorum symptomatum naturam *corruptricem* adeptis, placuit recensere : immò et aliquam ex iis inserere, in quibus febris neque perfectiva quidem, sed neque ex se planè corruptiva, alicui morbo etiam insanabili præorto, vel saltèm præconcepto, supervenit, qualem *num. xv.* suprâ retulimus. Quæ sanè omnia non alio nomine hîc fuimus complexi, nisi ut multifariæ oblationis Peruviani febrifugi in qui-

buslibet intermittentibus non perniciosis, ut et in quibusvis illarum circumstantiis, et quolibet paritèr ipsarum tempore institutæ, exemplum aliquod prostaret modò magis, modò minùs felix, ad illustranda secundùm praxim, confirmandaque cuncta quæ antea statuimus, et ad complementum integrum primi hujusce libri : cui propterea, omnibus jam, quæ in eo proponere contigit, absolutis, Deo dante, finem imponimus.

THE RAPETICS

SPECIALIS

LIBER SECUNDUS.

Febrium perniciosarum intermittentium (saltèm ab ortu) descriptionem, et curationem continens, ex aliorum auctorum observatione, additis scholiis materiam hanc magis illustrantibus.

CAPUT PRIMUM.

Malignus mos, et prava in universum febrium hujusmodi perniciosarum natura indicatur. Accurati circà hanc materiam auctores perpauci. Vis *Peruviani corticis* adversùs eas eximia.

JAM verò postquàm latiusculè spatiati sumus, fas est paululùm vela contrahere, et rectà deinceps terminum petere, in quem ab exordio, totoque paritèr primi libri decursu saltèm indirectè collimavimus. Etsi autem quæ hactenùs tradidi reputem talia, ut cum subsequentibus, licèt longè certioribus, non malè cohæreant, quippè nec in semetipsis vana, nec in praxi absona vel contemnenda, si cui tamen ea non prorsùs arrideant, liberum sit ei sentire quod velit in rebus identidem tam incertis, ac dubiis,

me quidem hîc loci minimè reluctante. Quamobrem mutatâ in totum priore scenâ, fingere saltèm non renuo, fallaces fuisse usquè adhuc omnes ratiocinationes meas. Atque hac fictione suppositâ, do lubentèr cuicumque (nec piget) Chinam Chinæ in benignis intermittentibus, etsi fuerint diuturnioris, aut diffîcilioris judicationis, non adeò liberalitèr esse usurpandam : do, quòd ignoto nobis modo intimiore operationis illius, quasi agentis incantamenti adinstâr; detur ansa suspicandi, quòd causa febris intùs detineatur, quòd febris ipsa consopiatùr potius quàm sanetur, post repetitam quandoquè pluries ac pluries remedii oblationem nihilominùs reversura. Hæc, inquam, omnia do cuicumque contra febrifugum istud pertinacem etiamnùm antipathiam foventi; immò fateor, quòd hæc ipsa qualiscumque nonnullorum constans adversatio, quantumvis vana, non potest, quin mihimetipsi, oppositum licèt palpanti, sed de imbecillitate meâ, ut par est, demisse sentienti, quidpiam vel demat, vel saltèm enervet fiducia meæ : ut proptereâ Peruvianum corticem rariusculè in iisdem intermittentibus *benignis*, quæ scilicèt non rarò *depuratoriæ* sunt, nisi aliqua indè emergens urgeat necessitas, consuescam præscribere, ut aliàs edixi. Quod fortè haud facîle credidisset quisquam ex iis, qui me pro hujusmodi remedio in antecedentibus quasi declamantem (neque tamen dicti me pœnitet) ac velutì pro aris et focis dimicantem legerit.

Reverà minimè ex animi proclivitate ingenitâ

ergà illud , remedium istud tueor , vel opiniones meas , vel dicta mea , quæ parvi facio sed miseros tantùm ægrotantes studeo tueri ab exitio cæteroquì nonnunquàm irreparabili , quomodocumquè illos et promptè , et certò tueri valeam , neque enim refert in præcipiti casu , et instante morte quærere utrùm tollatur omninò , an solum consopiat vel figatur causa febris , sicuti neque an curatio sit quodammodò palliativa , et an metus sit recidivæ. Qui enim jam propè moritur , quoquo modo sanari queat , sanetur saltèm ad tempus , ut iterùm possit ægrotare , ut in posterum , dummodò seriùs , possit occumbere. Hoc unum si sponderem , non quid ninium sanè sponderem. Quid si integram , favente Deo , incolumitatem pollicear? Cùm ergò istam et firmam , et tutam opportuno Peruvianí corticis usu in quibusdam casibus , etiam fermè deploratis , obtineri posse plurimo usu compererim : ideò posthabitis theoriis omnibus , quæ fallaces esse possunt , et fortassè ut plurimùm sunt , certam tantummodò sanationem in certo periculo ostendam ; quod est potissimum totius nostri tractatûs argumentum.

Contingit itaque aliquoties , ut intermittens febris quælibet , maximè verò tertiana tùm æstiva , tùm autumnalis , tantam præseferat pravitatem , eamque primis paroxysmis adeò occultam , adeò latentem , ut quantumvis medicus (nisi admodùm cautus sit et expertus) nil tale metuat , illa tamen inopinatò tertiâ , quartâ , vel quintâ accessione ægrum tollat de medio , omnibus artis conatibus planè irritis.

excepto Peruviano cortice : cui uni, si valide usurpetur, indita fuit à Deo facultas hominem in extremo periculo constitutum præsentaneo auxilio ab orci faucibus eripiendi, dummodo ad vîngintiquatuor horas circitèr victurus sit, quatenùs scilicèt per totidem distet à novâ accessione ipsum proximè interempturâ. Priusquàm tamen certam methodum prodam ducendi in usum strènuum istud medicamentum in hujusmodi casibus, in quibus posse illud proficere, ne per somnium quidem antè me (absit à verbo veritatis jactantia) cogitaverat quisquam apud nos necesse est, casus ipsos, seu febres illas peculiare atque exitiosas, in quibus specialitèr convenit, exactè describere : maximè cum istiusmodi febres constituent intrâ genus intermittentium speciem suam determinatam, in varias etiam differentias seu subalternas species divisibilem. Neque enim illæ, licèt non admodùm frequentes sint comparative ad intermittentes benignas, sunt adeò infrequentes, ut quolibet anno aliquas saltèm earum cuilibet medico ægros plurimos invisenti non contingat observare ; immò audeam asserre, illas in quibusdam constitutionibus præsertim fervidioribus, et propè dies in primis caniculares, nec non etiam ultrâ autumnale æquinoctium, adeò familiaritèr nonnunquàm grassari, ut nescio quid, ferè dixerim, epidemici redolere videantur. Atque ideo non parùm fortè præstitero, neque monstri cujuspiam in medicinâ perrari jugulationem tradidero, sed morbi ferocissimi et passim obvii, suamque,

ut dictum est, speciem apud medicos saltèm accuratiorès obtinentis, si febrium harum priùs naturam, aut morem describam, ut possint dignosci : mox methodum exhibendi in iisdem Peruvianum corticem proferam, ut possint expugnari.

Ne tamen videar affectare novitatem ubi ea verè non est, palàm profiteor, in ore medicorum identidem subaudiri illarum nomenclaturam, easque vulgò *perniciosas* appellari. Sed id ferè tantùm dici consuevit, cùm jam hominem interfecêre : quasi medicus eo casu non ultrà teneatur pro sui tutelâ, nisi de aperiendo post obitum ægrotantis nomine morbi inopinato lethalis facti, sitque satis, si re infelicitèr gestâ stupidus exclamet, ac terrefactus : *Quis unquàm credidisset ?* Neque planè reprehensibilis hucusquè fuit huiusmodi excusatio : cùm retroactis temporibus vix tantillùm luminis prostarèt medicis pro tempestivâ fraudulentì huiusce morbi dignotione, aut curatione. Etenim nulla ferè apud auctores (exceptis infrà recensendis) facta reperitur nisi per transennam mentio intermittèntium *perniciosarum* : et siquidem reperitur; nulla tamen peculiaris earumdem præscribitur cura, sed oscitantèr prætermittitur : dùm ex adverso *benignarum* solâ periodo se prodentium, et septeno ut plurimùm circuitu sponte cessantium, graphica traditur descriptio, et copiosissimus instituitur pro ipsarum curatione remediorum apparatus.

Unus inter antiquos excipitur, ut qui utrumquè egregiè præstitit, *Iudovicus Mercatus*, vir celeberr-

rimus suorum temporum, et duorum Hispaniæ Regum, Philippi Secundi, et Tertii Protomedicus, qui tertianarum intermittentium perniciosarum descriptionem æquè ac curationem distinctam pro viribus artis illius sæculi incomparabili sedulitate complexus est. Illius deindè animadversiones diagnosticas tantùm, atque prognosticas in fide auctoris potius quàm ex propriâ observatione retulit, ac in epilogum satis luculentè contraxit *Daniel Sennertus*, ommissâ tamen multifariâ primi auctoris curatione, singulis perniciosarum speciebus aut differentiis ab ipso constitutis, accomodatâ. Et quasi nil de hac re possit ipse testari, priusquàm *sensa Mercati* referre aggrediatur, hanc velut protestationem partes tantummodò relatoris agens præmittit: *Verùm licèt tertianas febres intermittentes omnium putridarum brevissimas et securissimas esse vulgò tradatur: quidà tamen Ludovicus Mercatus Lib. de febr. 6. experienciâ sibi compertum scribit, etiam tertianas nonnunquàm periculo non carere, et febres etiam intermittentes inopinatò ægros non paucos perdidisse, breviter complecti libet, quæ ille adnotavit.* Reliqua vide apud eundem *Sennertum* suo loco. Alii quoque auctores (quod et alibi sum dicturus) perniciosas intermittentes dari scripserunt, aut docuerunt exemplis, sed obiter; nemo autem, quod sciam, Spartam hanc, ut *Mercatus* adornandam suscepit.

Inter recentiores verò *Richardus Morton* practicus Londinensis felicissimus intermittentis per-

niciosæ descriptionem sub aliorum potius morborum nomine, quàm sub nomine ipsius febris (cujus tamen iidem morbi sive veri, sive crediti, sunt mera symptomata) aggressus est: et quod magis refert, illius curationem ope Chinæ Chinæ (mihi quoque, antequàm ipse sua ederet scripta, Urbe meâ teste compertam) auspiciatò attigit et experientiâ multiplici confirmavit; licèt apud nos, nescio quo fato perexiguam ac ferè nullam visus sit fidem obtinuisse; fortè quia, vel quæ protulit de suo veneno febrili, et de actione Peruvianæ antidoti in illud, communiter parùm arriserint, vel quia larva illa Proteiformis, quam ipse febribus intermittentibus imposuit (easdem sub aliorum morborum specie, omni suppressâ febris signaturâ, latere asseverans) illas adeò velârit, ut potius morbos illos quàm febres velle curare per Chinam Chinam sit creditus. Quod equidem sicuti in his terminis falsum esset, ita sic intellectum pro falso fortè reputatum est; licèt auctor omni laude, omnique fide dignissimus, si attentè legatur, verè alitèr sentiat.

Cùm itaque contrà methodo clarissimâ in perniciosarum intermittentium descriptione procedat *Mercatus*, illi proptereâ, utpotè primo observatori, concedenda est in præeundo dignitas ordinis. Et quoniam tam dilucidè scripsit, ut non facile fas sit æquali claritate, ac ordine idem præstare, liceat potius quàm vel id intentare, vel lectorem illuc relegare cum incommodo, liceat, inquam, quæ ipse exaravit transcribere ad litteram, prout jacent in codice

codice meo, et brevibus tantummodò scholiis appositis, à veteris doctrinæ zizaniâ tantillum purgare. His absolutis, *Mortoni* postmodùm sensa lubet adjicere in subsequentibus, ad hoc, ut lector commodè possit utramque descriptionem ob oculos positam, cum utilitate simul conferre : ut demùm tantis toto secundo hoc libro præmissis luminibus, clariùs quæ ex observatione meâ, et diutinâ praxi, ipse tandem sum prolaturus in tertio, valeant intelligi, credi, et in communem usum adoptari.

CAPUT II.

De tertianâ perniciosâ ex *Ludovico Mercato*, scholiis aliquot insuper adjectis.

« **I**N eo febrium genere, quod febres complec-
 » titur tertio die exacerbationem efficientes, per-
 » niciosa hæc, neque satis vulgata, aut cognita
 » tertianæ species, non sine magno laborantium
 » exitio, et medicorum admiratione reperitur. Quæ
 » sanè ut rariùs accidit, ità difficiliùs nocitur, gra-
 » viùsque ob id invadit, et ob ignorationem, ma-
 » jorem infert terrorem, et admirationem; et
 » quod perniciosius est, negligentius curatur. Quis
 » enim credet usquàm, tertianam febrem posse
 » lethalem fieri, eò maximè cùm ab Hippocrate
 » dictum sit : *Quocumque modo intermiserit, pericu-*
 » *lum abesse significat*, et mille aliis in locis tertia-
 » nam brevissimam securissimamque esse. Sed mi-

» rari jam desinat quisque, cùm experimento non
 » admodùm raro constet, febres multis modis inter-
 » mittentes inopinatò laborantes non paucos perdi-
 » disse, decepisseve medicos, vel doctissimos. Qua-
 » mobrèm quod experimento mihi in hac re habeo
 » compertum, hoc uno capite patefacere studui.

SCHOLIUM I.

Auctor reapsè ad perniciosæ febris genus solas tantùm tertianas tùm simplices, cùm duplices refert; quod quidem frequentius, et infortunio magis præcipiti solet contingere; nihilominus etiam quartanis intermittentibus tàm simplicibus quàm duplicibus aut triplicibus, eundem characterem (rarius licèt, ac lentiùs) nonnunquàm accedere, satis ostendunt historia ultima libri antecedentis, aliæque in subsequentibus exponendæ. Idem quoque videre est apud *Donatum*, *Mortonum*, et *Hortstium*. Idque ipsum pariter intermittentibus quibusvis quandoquæ accidere posse, nullus dubito. Pravam autèm hujusmodi febrium naturam satis apertè in ipsâ definitione patefacit, ubi eas *lethaliùm* nomine statim designat :

» Est itaque perniciosa tertiana febris quædam,
 » quæ, simulatâ tertiani circuitûs effigie, lethalis
 » et mille accidentibus periculosissimis implicata
 » existit. Tertianæ tamen vocabulo, et *simplicem*,
 » et *duplicem*, subaudiendam esse diximus, cùm
 » utramque perniciosam esse haud rarò mihi et
 » multis compertum sit.

» Fieri quidem perniciosam aliquam tertianam
» contingit uno è sex modis : *Primò* quidem , occa-
» sione membri alicujus præcipui, in quod decum-
» bat humor , quem natura à vasis ad eorum
» extrema transmittit ; nam cùm membrum ex
» præcipuis sit, dubium non est, vitæ periculum
» impendere ex læsione quâvis in ipsum illatâ ,
» haud secùs quàm in turgentibus humoribus, à
» quibus factam affectionem ob id periculosam
» arbitramur, quòd vereamur ne humor turgidus
» in aliquod membrum princeps irruat. *Secundò*
» talis efficitur, quia humor qui à venis ad præ-
» dicta extrema ejicitur, tenuis admodùm sit, et
» summè putridus, qualis censetur tenuissima bilis
» copioso ichore plena; quo fit, ut qui hac febre
» laborant , frequentissimè syncope corripiantur,
» et eo , quòd facillimè exolvantur , inanitione
» periclitentur, sudore enim pernicioso dissipan-
» tur, quod ex humoris vitio, spirituum, et ali-
» turæ substantiæ plurimùm cum sudore habeat.
» *Tertiò* ab humoris (*non putredinem quidem*) sed
» summam pravitatem, vi pravorum alimentorum
» contractam, cujus constat meminisse Hippocra-
» tem 7. *popul. tex.* 81. referentem causas et occa-
» sionem cholerae morbi, quem in has febres
» commigrare plerumquè refert, ut optimè intel-
» lexit Vallesius : aut prodeunt sic vitiosi ob ustio-
» nem, et peculiare vitium, quale sortiuntur *bilis*
» *vitellina*, *prassina*, *æruginea*, et quæ in confinio
» est atræ-bilis, quippè cùm tanta sit horum

» humorum pernicies, si accedat insupèr putredi-
 » nosus calor, eosdem adeò excitat, et deterrimos
 » reddit, ut quocumquè ierint, perniciosissima
 » inferant, et lethalia accidentia. Multi verò ex
 » barbaris medicis arbitrati sunt impossibile esse,
 » ex prædictis humoribus febres fieri, cujus censùs
 » fuère *Isaac et Rasius, Avic. Serapio, et Halia*
 » eo quòd humores ejusmodi, ut *Averro 7, collig.*
 » scripsit, de naturâ essent veneni, quos protinùs
 » in quovis affectu natura per vomitum trudit,
 » licèt læthalitèr sæpiùs, et nituntur probare suum
 » dogma ex *Arist. qui 4. meteor. profert, ignem*
 » et quæ ignea sunt putrescere non posse. Verùm
 » si quis rem ipsam, et auctores penitùs consulat,
 » reperiet hos humores et febres, et alios etiam
 » affectus excitâsse; nam primò eorum meminit
 » *Galen. lib. 12. method. in exemplo de juvene*
 » febriente, qui æruginosam evomuit choleram,
 » et ob id convulsione correptus. Zoarus etiam
 » expressè 3. *theisir* febrium reminiscitur, quæ
 » ex his humoribus concitantur, dicens : *febris*
 » *quæ fit de genere transitionis febris ephemeræ ad*
 » *febrem cholericam, si fuerit de genere prassinæ,*
 » *aut eruginosæ, habebit accidentia magis fraudu-*
 » *lenta.* Idem dicit : *febris ex cholerâ, quæ in ultimâ*
 » *caliditate, ac siccitate existit, cum substantiâ*
 » *densâ et crassâ, sicut est cholera vitellina, pras-*
 » *sina, et æruginosa, febres perniciosas gignit ; et*
 » *Aver. 4. collig. scripsit etiam in confirmationem*
 » hujus veritatis : *Pejor specierum causonis est illa*

» *quæ fit ex cholera zinariâ, vel prassinâ, et ter-*
» *tiana insanabilis.* In tantâ autem auctorum
» controversiâ censeo primos sensisse, non posse
» fieri febrem salubrem ex prædictis humoribus,
» non autem ex toto negasse ejus *generationem.*
» Quinimmò ex eorum rationibus ego colligo,
» non rarò posse succrescere febrem interpolatam,
» nam ut Isaac scribit, tantum est odium, quod
» natura habet cum cholera prassinâ, et æruginosâ,
» quod non patitur ejus malitiam in venis; quo
» fit, ut certius sit ab hoc humore febrem inter-
» polatam fieri, quàm continuam; quam sanè fore
» gravissimam et malignam, nemo dubitabit.
» *Quartò,* tertiana efficitur perniciosa, ob humo-
» ris crudi, et inæqualis crassitiei, ac tenuitatis
» maximam copiam; cujus ratione more febris
» syncopalis humorosæ tertiana etiàm talis effici-
» tur, undè non rarò sicut illa cordis calorem,
» ità hæc totius corporis calorem extinguere niti-
» tur, et ob id periculosissima existit. *Quintò,*
» non minùs perniciosa efficitur ex adjuncto ali-
» quo accidenti, nimirum ob aliquem defluxum,
» quem calor febrilis mox à principio concitat,
» cujus ratione thorax, pulmo, et cor non rarò,
» aut ventriculi os anxietate, difficili respiratione,
» et pulsûs interceptione, mille modis periclitantur.
» Quod etiam et longè graviùs accidere conspici-
» mus, si uterus, aut uteri aliquod vitium, feбри-
» lis caloris vehementiâ in consortium trahatur.
» *Sextò* verò et ultimò, perniciosior efficitur ter-

» tiana ob venenosam , ac pestilentem , et con-
 » tagiosam aliquam humoris, qui è vasis ejaculatur
 » conditionem, qui sanè eò quòd moveatur, longè
 » graviora efficit accidentia. Quinimmò die inter-
 » medio latitans et quiescens, ac humoribus aliis
 » adjunctus videtur nil mali efficere, neque corpus
 » laborare, post verò in accessione propriam na-
 » turam, ac venenosam conditionem, non sine
 » magno laborantis malo ostendit. Hæsunt in uni-
 » versum, optime lector, causæ hujus perniciosi
 » mali, quas hucusquè adinvenire valui, quarum
 » omnium seorsùm meminisse opus erit, ut cujus-
 » que constent natura, signa, et medendi ratio,
 » si priùs omnis tertianæ perniciosæ in communi
 » signa, et præsagium scripsero.

SCHOLIUM II.

Cùm notabilem in his febribus diversitatem no-
 verit auctor tùm ratione sævitiei, et pravitatis iisdem
 velutì intrinsecæ, tùm ratione celeritatis motûs,
 tùm ratione symptomatum variæ conditionis; plùs-
 que, vel minùs intensorum, tùm deniquè ratione
 aliorum adjunctorum, indolis etiam, atque speciei
 diversæ, mirum est quàm ingeniosè conatus sit
 cunctas hujusmodi differentias distinguere per suas
 causas, labantibus licèt innixus sui seculi funda-
 mentis. Negari idcirco non potest, quin ipsis in
 tenebris aliquod cæspitanti lumen affulserit, vi
 cujus nonnunquàm abstrusam hujusce materiæ ve-
 ritatem à longè saltèm salutârît. Sic et philosophi

ethnici, innumeris licet erroribus involuti, in veritates quandoquē orthodoxas inscii impegerunt. Si vixissent atavi nostri in hæc usque tempora, fortassis et suprā nos profecissent. Ob id semper colendi et suspiciendi, dummodò non eo usque, ut nos ab ulterioribus inquirendis avertant, aut remorentur; undè quis meritò nobis exprobet cum *Tacito* socordiam nostram: *dum vetera extollimus, recentium incuriosi.*

« Monstrant quidem tertianam fore perniciosam.
» gravia quædam et perniciosa accidentia, quæ
» statim primo accessu necessum est hæsitabun-
» dum reddant medicum. Hujus naturæ est labo-
» rantis *vultus*, primâ accessione *cadaverosus*, aut
» nimis *tumidus*, cum pulsûs inæqualitate, par-
» vitate, debilitate, aut interceptione, vel asphyxiâ.
» Urina nimis crassa, et pravi coloris, inquietudo
» insolita, anxietas, syncopis, animi deliquium,
» exsolutio, et frigidi sudores, vel toto accessionis
» tempore inordinati rigores, difficiles respira-
» tiones, deliria, aut somni profunditas, vomitus
» etiam ærugiosus, paucus, cum gravi nausæâ, et
» qui non confert. Alvi fluxus pinguis, dysente-
» ricus, variegatus, aut sinceri humores, ingens
» totius corporis gravitas, aut inquietudo, et sitis
» quæ nullo potu sedatur. Sed præcipuè tertianam
» perniciosam esse ostendunt hæc signa et alia,
» quæ cæteris tertianis sunt communia, cum ab
» eis nondum ex toto in die quietis liber evadit
» laborans; sic etenim malum portendit delirium

» aut somnus, qui usquè in diem quietis protra-
 » huntur : itèm eâdem die languidos, inquietos,
 » anxios, et siticulosos superesse laborantes, aut
 » alio quovis accidenti oppressos, quantumvis febris
 » vel levissima, vel nulla appareat. Sic rigorem
 » vidente febre superesse perniciosum censemus,
 » aut rigoris tempore corpus sudare, vel sudando
 » frigere, animo linqui, et plurimùm vexari. Quæ
 » sanè omnia diligenti animo expendat medicus
 » oportet, ut discat primo accessu quantùm mali
 » affectio minari possit. »

SCHOLIUM III.

Diagnosis in universum completa est, et medici
 practici consideratione dignissima, quia omnia
 signa generalitèr comprehendit. Sæpè quidem ex
 istis pauca concurrunt, ac quandoquè vix unum
 tantùm ; quod tamen si vehemens sit, et ex de-
 terioribus, plurimi faciendum est. Nec ideò frau-
 dulentæ quietis subsequenter intermissionis nimium
 fidendum, sicut ex opposito neque nimis metuenda
 afflictio, qualitercumquè gravis. Et in hoc *judicium*
difficile, quòd, ut maximè oporteret, ità maximè
 nequit doceri.

« Atquì licèt prædictas tertianarum species per-
 » niciosas esse constet, non subindè existimandum
 » est, omnes fore lethales ; quædam enim perni-
 » ciosæ, et timore plenæ sunt, aliæ in alios morbos
 » migraturas se ostendunt ; nonnullæ in diutinos
 » affectus, et plerique licèt sævissimis accidentibus

» insigniantur, non omninò lethales existunt. Sic
» profectò quæ ex defluxu ad membrum aliquod
» princeps fiunt, plerumquè perniciosæ sunt et
» lethales, sed ex his quædam magis, et quædam
» minùs; quæ autem ad cerebrum tendunt, lethales
» fiunt, si in lethargum aut phrenitidem commi-
» grent; quæ verò in cor irruunt, sive ex oppres-
» sione, sive ex humoris vitio, omnes lethales
» sunt. Inter quas hæc est differentia, quòd hæ
» quæ ex oppressione fiunt, in principio acces-
» sionis interficiunt; quæ verò ex humoris vitio,
» non nisi in declinatione, ob virtutis et caloris
» vitalis dispendium. At si in os ventris humores
» irruant, partim fiunt lethales, et partim secùs;
» nam si ex ventre per vomitum fiat copiosa et
» spontanea vacuatio, conjectabile est conferre,
» si laborans toleraverit; sin alitèr, minimè: ve-
» rùm, si plurimùm laborans conqueratur, et nihil
» notatu dignum excreverit, vereri oportet, ne
» præ nimio dolore succumbat virtus, et morbo
» non sufficiat. Itèm si syncopis frequentèr acci-
» dat, mortem ocysimè venturam commonstrat;
» sin alitèr, minimè, sed morbum fore gravem;
» quòd si in jecur malum incumbat, vel morbi
» diuturnitatem, vel hydropem pertimescere oportet.
» Et tandem in his omnibus malignam et
» continuam febrem posse subsequi existimandum
» est; sic profectò ex his, qui ex putredine tenuum
» humorum exolvuntur, vel subitum virtutum ca-
» sum, vel hecticam febrem vereri oportet: hoc

» quidem consumptis tenuibus solidorum mem-
 » brorum humiditatibus, illud quidem nimium re-
 » solutis spiritibus. Qui verò ex crudorum, et
 » inæqualium succorum copiâ laborant, plerum-
 » què suffocatione periclitantur, et maximè ineunte
 » accessione, vel saltèm febris in diuturnissimum
 » commigrat affectum. Itèm qui ex humoribus
 » adustis, et omninò perniciosis infirmantur, vel
 » in causonem, vel in hecticam febrem, vel in
 » gravem dyssenteriam degenerant. At qui fluxu
 » alicujus humoris simul cum febre interpolatâ
 » delinentur, vel suffocantur catharrho (*ut aiunt*)
 » suffocativo vi accessionis evocato, vel cessante
 » tertianâ, difficultè deinceps respirant, aut tale
 » symptoma patiuntur, quale fuerit membrum in
 » quod defluxus prolabitur. Cæterùm, qui vene-
 » fico et pestilenti humore abundant, licèt in-
 » terpolatâ febre corripiantur, non ob id in minori
 » periculo versantur, quàm qui pestilenti aliâ febre
 » laborant, sed forsàn majori, quòd in die acces-
 » sionis veneficus ille humor valdè moveatur, quod
 » solet in pestiferis morbis perniciosissimum esse,
 » et sic non rarò conspiciamus, subitâ morte quam-
 » plurimos inopinato interiisse. »

SCHOLIUM IV.

Prognosis paritèr undequaquè absoluta, tàm hìc,
 ubi generalitèr instituitur, quàm infrà, ubi institui-
 tur specialitèr, quamlibet perniciosarum differen-
 tiam respiciens. Digna idèò ubiquè, ut diligentèr

perpendatur sicut diagnosis, ità et prognosis auctoris, quarum postrema eò verior, quò funestior. Febres namque verè perniciosæ ægrum interimunt sæpiùs (nisi illis citò et validè cortice opitulemur) quàm in diuturnos morbos commigrent. Nonnullas equidem, antequàm in iisdem curandis cortice uter, etiam sine illo sanatas vidi, at paucas, et difficillimè. Sed eheu! quot vidi contrà iisdem sublatis, quos vix dubitem fuisse sanabiles, cortice exhibito, si tunc virtutem illius integram, validamque (quod seriusculè comperi) ejusdem administrandi methodum perspectam habuissem.

« His habitis opus erit, uniuscujusque prædictarum causarum seorsùm meminisse, ut cujusque constant peculiaria signa, præsagium, et propria ac genuina curandi ratio.

CAPUT III.

Prima tertianæ perniciosæ differentia ex eodem *Mercato*, additis ut suprà, scholiis.

» **E**FFICITUR quidem perniciosæ tertianæ sors et
 » differentia, quòd humores transmittat natura
 » errans, aut impotens in partes, et extrema vasorum
 » membri alicujus cordi, vel alteri membro
 » principi vicini. Accidit profectò hoc mali genus
 » his corporibus quibus adeò totius corporis vasa,
 » vel obstructa, vel carne aut pinguedine oppressa
 » sunt, quòd ad extimas vasorum propagines, et

» eas quæ degenerant in carnosas partes sese natura
 » exonerare minimè possit, vel quòd ipsa nimis
 » languida et impotens sit. Quo fit, ut cùm è vasis
 » majoribus primùm se nitatur exonerare, humo-
 » rem ad partes internas per vasa sibi proxima
 » studeat transmittere; quâ in re conjectabile est,
 » necessariò humorem transmissum propè aliquod
 » membrum princeps prolapsurum. Occasio autem
 » transmittendi humores communis naturæ est cum
 » reliquis febribus interpolatis nimirum copia, aut
 » vitium irritationi naturæ sufficiens, sed in hac
 » febre non æquè valens, quod longè à partibus
 » præcipuis non possit pellere, vel impedita, ut
 » dictum est, si id suâ sponte possit. »

SCHOLIUM I.

Quod inquit auctor, fieri per affluxum humorum decumbentium in partes, mediantibus venis illuc eosdem propellentibus, intelligere faciliè possumus, fieri per stagnationem eorundem, mediis arteriis illuc delatorum, nec pari facilitate absorptorum à venis, sive sanguiferis, sive lymphaticis. Reliqua fundata suprâ vanas hypotheses de naturâ transmittente in partes internas et viscera, cùm non possit, sive propter imbecillitatem propriam, sive propter impedimentum aliquod, transmittere ad remotas et externas, corrigantur mechanicè, et redigantur ad eundem modulum.

« Verùm licèt in hac febris sorte hæc sint com-
 » munia, nihilominus tamen duplex ex hac causâ

» suboritur febris conditio, duplicia et varia ac-
» cidentia, et longè diversa signa, ac ex conse-
» quenti varia præsagiendi, et curandi via, quæ
» omnia specialius expendisse oportet.

» Ad primum igitur accedendo, conjectandum
» est, transmissum humorem ad extrema vasorum
» membri præcipui, aut juxtà ipsum, vel esse co-
» piosum, vel malignum: quippè ex hac varietate
» reliqua quæ sequuntur necessum est insigniri.
» Verùm potissima varietatis ratio ex membri,
» propè quod incumbit humor, naturâ, et præ-
» tantiâ petenda est; si verò in venulas juxtà cor
» vitiosus humor illabatur, tunc procul dubio syn-
» copem, pulsûs parvitatem, frequentiam, inæ-
» qualitatem, et aliquandò omnimodam asphyxiam
» sequi necessum est. Quæ omnia accidere solent,
» cum faciei rubore, sudore, et oculorum cavitate,
» ob impensam spirituum vitalium resolutionem,
» ex quo subitum virium casum, et inopinatam
» mortem vereri oportet, ac plerumquè in acces-
» sionum inclinatione, vigore vitali simul cum fe-
» brili calore solutis. Quòd si humorum crassities
» potius quàm malitia propè idem etiam mem-
» brum causam præstiterit, tunc quidem pulsus
» magnâ inæqualitate inter magnitudinem et par-
» vitatem pollet, ubi parvitas elucet magis, et in-
» tercadens nonnunquàm efficitur, ac non rarò
» myurus deficiens. Torpet laborans, fronte exsu-
» dat, et maximè frigidum, suspiciosus est, et nes-
» ciens referre quid sentiat, plerumquè angore præ-

» mitur, et impotens ad motum, quasi gravi onere
 » pressus efficitur. Ex quâ sanè affectione labo-
 » rantes, vel cum frigido sudore et pulsu formi-
 » cante, aut omninò deficiente, tertiâ aut quintâ
 » accessione pereunt, vel si has effugerint, gravi
 » febre, eâque continuâ, et plerumquè de maligna-
 » rum sorte, corripiuntur.

» Si tamen ad vasorum extrema, quæ ad ventris
 » os terminantur, vel juxtâ ipsum projectus è vasis
 » humor profluat, ibidemque diù immoretur, do-
 » lorem orisque ventriculi morsus sequi est neces-
 » sum, nec non et cardiacum affectum, cum bi-
 » liosis, æruginosis, aut nimis crassis, aut viscidis
 » vomitibus, cæterùm minutis, aut præcedenti in-
 » genti nausæâ, utpotè humore penitus in carnis
 » venulis imbibito (*nam in reliquis tertianis licèt*
 » *copiosior in ventrem confluat bilis non quidem ad*
 » *carnem oris ventriculi, et per venas alimenti, sed*
 » *ad cavitatem per communes canales*) quod quidem
 » monstrat anxietas, inquietudo, exsolutio pulsûs,
 » vel ingentissima frequentia et parvitas, vel ra-
 » ritas, maximè si propè syncopim fuerit labo-
 » rans, ut multis videatur febre carere, adest et
 » frigidus propè frontem sudor, faciei pallor, ocu-
 » lorum grandis cavitas, et calor. In quo quidem
 » vereri oportet (*ni citò præveniatur, potissimè si*
 » *frequentior succrescat syncopis*) mortem quintâ
 » accessione, aut antè, nisi affectus factus fuerit
 » continuus, in quo jam nihil transmittitur in os
 » ventris, utpotè cessantibus accessionibus, et hu-

» moribus intrà vasa manentibus, licèt ob id labo-
» rantes non omninò videantur periculo carere,
» verùm præbet expectandi inducias, quòd acci-
» dentia majori ex parte cessaverint. »

SCHOLIUM II.

Quæ dicuntur in ambobus hisce locis de translatione febrilis humoris per vasa alimentum deferentia (quæ pariter, non pro venis quæ revehunt, sed pro arteriis quæ deferunt, sunt habenda) ad cor et ad os ventriculi, non sunt omninò extrà probabilitatem inquantùm fermentum febrile sanguini affusum, per omnes arteriolas; et, si cui lubeat, etiam per nervos, (inquinato eâdem occasione illorum succo) ad ea viscera tendentes potest dispergi. Probabilius tamen crediderim, cor ipsum ab affluente intrà suos sinus unà cum sanguine eodem febrili latice, molestiam ferè omnem, quem patitur, posse recipere; ventriculum verò eam mordicationem pati, non modò à succis intestinabilibus, motu inverso in eum assurgentibus, propter irritationem factam à fermento febrili in ductibus chyliferis, et partibus circumjacentibus (undè et tunicarum, nervorumque stomachicorum consensus) verùm etiam à succo glandularum ipsius ventriculi, aut depravato, aut immaturo, et per violentam expressionem ab iisdem stillante, illius sensile orificium spasmodicè vellicante, portionemque febrilis fermenti forsitàn constituyente. Quæ omnia et singula suis temporibus auctor nosse non poterat,

animadversione deniquè dignum est, quod legitur cap. *si tamen* etc. propè finem, nempè febrem hujusmodi cardialgiâ comitatam quartâ vel quintâ accessione mortem minari, *nisi affectus factus fuerit continuus*. Reverà etenim observatione didici, rem ità se habere: ac proindè peioris conditionis esse hanc febrem, si sit intermittens, quàm si fiat continua: si quidem tunc cesset, ut assolet, symptoma ferox lethalis cardialgiæ: sicuti æquè verum est, quòd ex hujusmodi transmutatione febris intermittens in continuam impetrantur quidem induciæ, non tamen aufertur periculum, sed saltèm differtur.

« Verùm si vel ad capitis vicinam partem mutatur
 » humor, vel ad ipsum caput, aut omninò ex
 » humore vapores conscendant, in gravem sum-
 » num laborantem delabi, vel in gravem aliam
 » ex soporiferis affectionibus conspicies, maximè
 » si caliginosus et ex crassâ materiâ ortus prodeat
 » vapor: sicut dùm acris est et mordax, in pa-
 » raphrænitidem migrat affectio, cessat tamen in
 » die quietis. Cæterùm si humoris aliquid erra-
 » bunda natura illuc miserit, non omninò ad an-
 » tiquum statum laborantem redire conspicies: ac
 » pertimescendum est, ne tertiâ aut quartâ ac-
 » cessione iterùm in ipsum caput novo humore
 » irruente, omninò essenziale fiat malum. Quod
 » sanè ostendit dies intermedia, in quâ laborans
 » non omninò resipiscit, si vel dormierat, vel
 » phrænítico aliquo affectu laborabat. »

SCHOLIUM

SCHOLIUM III.

In capite tragœdiam fieri, vel propter stagnationem succi febrilis, per arterias cum sanguine ad cerebrum, et meninges delati, vel propter illius adhuc vividi transmissionem in nervorum principia, superatis glandulis corticalibus ejusdem cerebri, certum videtur, nedum probabile.

« Prætereà si in jecur humores irruant, minùs
 » quidem periculi est, sed affectio mox continua
 » fiet, et morbus diuturnior ob ingentes obstruc-
 » tiones, et magnam jecoris imbecillitatem. Cujus
 » occasione in hydropem sic affecti non rarò de-
 » ciderunt, quod nosces ex majoribus pulsibus,
 » majorique febre, dolore ipsius hepatis, cum
 » gravitate, et difficili respiratione, donec febris
 » solvatur. In plerisque enim ex his qui hac oc-
 » casione laborant, tussicula quædam in principio
 » accessionum reperitur, sicca quidem, et cum
 » ipsius jecoris ponderoso dolore, præludium qui-
 » dem futuræ in ipso inflammationis. »

SCHOLIUM IV.

Hepar affici periodicè, ut periodicè afficitur cor, ventriculus et caput, in intermittentibus perniciosis præcisè non novi; nec ob id fortassè illas (quippe ut fatetur auctor, minùs periculosas, et potiùs diuturnas) *perniciosarum* nomen propriè mereri crediderim, ut qui hunc characterem adscribo febribus intermittentibus citatoris motûs, et inusitatæ sævitiei. Quæ de diagnosi verò, ac de prognosi

dicuntur in casibus enunciatis, ut et quæ dicentur in subsequentibus, nullâ indigent limitatione, aut additione, quippè quæ sunt exactissima; quod semel tantum hîc monuisse sufficiat.

« Utcumquè, et ad quodvis membrum humor
» irruat, diligentissimè cognitâ et acceptâ occa-
» sione, curationem aggredi oportebit: quippè si
» in his malis differas, periculum ocyssimè accer-
» ses: procrastinatio enim in his nunquam non fuit
» perniciosâ. Commune autem præceptum sit, sive
» in cor, sive in cerebrum, sive in ventrem irruat
» humor, maximè si vitiosus sit, protinùs expur-
» ganti medicamento uti, haud secùs quàm in
» quâvis aliâ humoris turgescentiâ facies, præcavens
» ne in membrum princeps agitati humores ir-
» ruant: verùm expurgantia medicamenta non
» tenentur transcendere rhabarbari vires. Itaque
» cognitâ ex prædictis signis accessionis pravâ con-
» ditione, mox sequenti die citrà cunctationem
» corpus purgabis *mannâ, vel cassiâ fistulâ, cum*
» *infuso rhabarbari, vel syrupo ex novem infusio-*
» *nibus.* Cui usui censeo proficuum fore dilutum
» *drach. j. rhabarbari, cum unc. ij. et ss. mannæ*
» *electæ, vel pulpæ cassiæ fistulæ drach. vj. super-*
» *bibitis unc. iij. et ss. syrupi solutivi rosarum.* Itèm
» *drach. v. catholici, cum drach. j. rhabarbari.* Quo
» facto, si sequens accessio par afferat periculum
» et æquè gravia symptomata, pronunciato priùs
» discrimine, et viribus constantibus, sanguinem
» detrahes *dextrâ basilicâ.* Verùm si vires ex pur-

» gatione, et accessionum gravitate lapsæ sint, ex
» salvatellâ, vel talo censeo plus commodi labo-
» rantes suscepturos. Quibus factis pro virium ro-
» bore, et enematis alvo laxiori factâ, et aliquandò
» irritatâ, his quæ acria sint, victu utendum erit
» copiosioris nutrimenti, sed facili, eâ lege, quam
» *cap. de tertianâ exquisitâ* adduximus : si tamen
» accessionis periculum ex humoris copiâ subo-
» riatur, consultiùs te facturum arbitror, si mox
» à principio sanguinem miseris, maximè viribus
» robustis existentibus, et urinâ aliquo modo id
» poscente, idque primâ, aut secundâ quietis die,
» præsertim si symptomata non accidant vitio oris
» ventriculi, quo tempore à sanguinis detrac-
» tione abstinendum esse, ferè omnes consulunt
» auctores; nec displicet in hoc tertianarum ge-
» nere vel à poplitis, vel à manûs dextræ vel
» sinistræ venis sanguinem fundere, quo longiùs à
» partibus affectis, et quarum ratione periculum
» succrescit, humorem distrahas : quo facto, antè
» quintam accessionem, si fieri potest, ægrum
» purgato aliquo ex prædictis pharmacis. Postea
» autem curandum est, omni arte ad extimas
» partes, et carnosum genus humores evocare du-
» riusculis frictionibus, et linteis odorato aliquo
» suffumigatis, extremas partes ligare, aut pluri-
» mas et minutas cucurbitulas toti corpori affigere,
» quibus extremæ et extimæ corporis partes pa-
» tentiores sint, et ob caloris in eis revocationem
» humores ad ipsas natura pellat; quo forsàn à

» periculo suffocationis liberabis, et accidentium
 » inmanitatem compesces. Servabis tamen hanc
 » legem in adhibendis cucurbitulis, frictionibus,
 » et ligaturis, quòd in his accessionibus, in quibus
 » periculum suffocationis imminet, eis uteris pa-
 » rùm antè accessionem, et ipsâ adhuc incipiente,
 » quo ad extimas motum à naturâ humorem evo-
 » ces: in reliquis verò, quibus ob dissipationem
 » caloris periculum incumbit, censeo tutius esse
 » in die quietis naturam ad extrema evocare, ut
 » dissuescat à consuetudine mittendi ad interiora,
 » quàm dùm laborantes dissipantur humoris ma-
 » litiâ, his auxiliis ulterius spiritum et calorem
 » dissipare. Sed ad peculiaria cujusque membri
 » affecti auxilia tempestivum est devenire. »

SCHOLIUM V.

Curationem, tam modò, quàm in posterum sicco pede semper transigam, ne à proposito nimium aberrem. Universalitèr tantùm dico, eam esse promptè et quàm citò in hisce casibus instituendam; *quippe*, ut inquit auctor, *si in his malis differas, periculum ocyssimè accerses: procrastinatio enim in his nunquam non fuit perniciosa*; quod maximè locum habet, ubi negligatur methodus apta ad inhibendos paroxysmos lethales, qualis est ea, quam proponemus libro sequenti. Interim methodus curandi ab auctore adducta, licèt non sit notionibus nostri seculi omninò cohærens, ac proindè non levi castigatione indigeat, circumspecta tamen admodum

et prudens est pro ratione illorum temporum, adeò-
que admittenda etiānū, et in pluribus usurpanda,
dummodò in purgationis usu, quam tantoperè me-
tuit auctor, mītiūs adhūc, et timidiūs procedamus,
ac præscripserit ipse, potiūs ex consuetudine quā
ex voluntate nonnihil delinquens. Cæterū illius
religio atque cautela in tractando lenitèr, ut de-
cet, efferro hoc morbo, vel ex eo patet, quòd,
etiam ubi soporosi affectus lethalitèr ingruant, ves-
slicantia nihilominūs, indiscriminatim in hisce ca-
sibus medicis vulgaribus adeò familiaria, sibi verò
(ut ex hoc satis patere videtur) suspecta, nusquā
proposuerit.

« Præmissis igitur his quæ generalia et omnibus
» membris communia sunt, cordi, si in hac affec-
» tione patiatur, providendum est, non quidem fri-
» gidis epithematis, ne penitūs in seipsum sese in-
» serant et insinuent humores, quinimmò antè
» accessionem unguento *naphthæ*, aut *ejus oleo cum*
» *pulveribus electuarii de gemmis val diamargarito-*
» *nis frigidi, et granæ* : in accessione verò, quia
» opus est, quod juxtà existit resolvere (*antedè enim*
» *non resolvere, sed roborare solū expediet*) oleo
» *Matthioli, et electuario de gemmis, aut de hya-*
» *cintho* ipsius regionem inunges : et oleo etiam
» *angelicæ*, quod in discutiendis et evocandis ad
» cutem humoribus miram habet efficaciam. Item
» hæc eadem adjicies oleo, et unguento *naphthæ*
» cum prædictis pulveribus, aut aquam stillatitiam
» ex *cinnamomo* cum guttis adoratissimi vini; inte-

» rius tamen ea porriges, quæ et flatus cor irruen-
 » tes discutiant, et longè ab ipso, si quid ibidem
 » moratur, pellant, ac rursus ipsum roborent, ve-
 » lut sunt *tabellæ diamargaritonis frigidi, aut elec-*
 » *tuarii de gemmis, et modico diamusco confectæ*
 » *vino, aut aquâ stillatitiâ cinnamomi.* Verùm quod
 » efficacius esse arbitror, est electuarium *de hya-*
 » *cintho miris encomiis* à plerisque commenda-
 » tum. Antè accessionem tamen cucurbitulis uteris,
 » et in diè accessionis rariùs, et in hypochondrio
 » sinistro, ac in dorso è regione cordis, si forsàn
 » cogaris adhibere, scito opus esse aliquam scari-
 » ficare, ne plùs quàm evoces extrà, intùs magis
 » allicias.

» Quòd si caput periclitari et pati videatur,
 » præmissis distractionibus, crurum lavacris, et
 » evacuationibus, quæ satis sint, *oxyrrhodino* uten-
 » dum est, maximè in quietis diè. Quòd si eâ diè
 » accidentis alicujus, sive delirii, sive profundioris
 » somni aliquid supererit, vel sanguinem detrahes
 » ex venâ cephalicâ juxtà carpum manûs, vel cu-
 » curbitulas in brachiis scarificabis; quas si parùm
 » antè accessionem adhibueris, magis ex usu facies;
 » nam in diè quietis eas affigere oportet à cruribus
 » ad nates, in diè verò accessionis à cervice ad
 » nates per dorsum. Providendum etiam est, ut
 » laborans acetum rosaceum olfaciat, aquam rosa-
 » ceam, et alia frigida adoramenta quæ latius scripta
 » reperies *libro* hujus operis 7. in correctione ac-
 » cidentium, quæ febribus succrescere solent.

» Si tamen ventriculi os pati in hac febre com-
» pertum sit, præterquàm quòd mox sanguinem
» mittere recusabis (*sunt enim hujus visceris acci-*
» *dentia, maximè dolor, ex his quæ summoperè*
» *vires labefactant, non solùm ut sanguinis detrac-*
» *tionem non ferant, si accessio præcessit, et verecun-*
» *mur talem futuram quæ sequitur, verùm neque*
» *morbum adhuc ipsum, nisi vires post accessionem*
» *iterùm robustæ appareant, maximè si constiterit*
» *jecur in os ventris bilem rejicere: quo tempore*
» *tutissimum erit ex dextrâ basilicâ, aut salvatellâ*
» *sanguinem mittere; nam si vires in die accessionis*
» *etiam languidæ supersint, cavendum est ab hoc*
» *auxilio*) protinùs aliquo ex prædictis pharma-
» cis quæ purgationi idonea esse diximus, uten-
» dum est, ac si vires adeò esse dejectas constiterit
» per epicrasim purgabis singulis diebus interme-
» diis, pauxillulùm purgantis exhibens cum *syrupo*
» *acetoso, aut cichorii, et violarum. Et à purgatione*
» ventrem roborabis *oleo melino, rosarum, et om-*
» *phacino, sparsisque desuper pulveribus coralli,*
» *rosarum, santalorum, et diarrhodonis. Cataplasma*
» etiam conficies ex *tosto pane vino rubro made-*
» *facto, cum prædictis pulveribus et oleis, vel ex eo*
» *quod ex furfure, vino, et ejusdem pulvisculis con-*
» *ficitur. Cui etiam (gratiâ vitandi animi deliquium)*
» modicum aceti addere poteris; tandem omni arte
» curandum est, aut roborare; aut quodammodò
» adstringere, ut vel non recipiat venter, vel si
» quid receptum habet, ocysimè pellat. Quòd si

» id fieri sit difficile, studendum est, humorem in
 » os ventriculi jam fluxum compescere et attem-
 » perare, vel *aquæ calidæ potibus, vel succo gra-*
 » *natorum, agrestæ, papaveris, aut de portulacâ, vel*
 » *potu aquæ frigidæ, vel* (ut etiam vires roborentur
 » et spiritus reficiantur) *vini albi et optimi modico*
 » *haustu.* Cæterum quod satius esse frequenti expe-
 » rimento comperimus, est vel antè accessionem
 » clystere aliquo, quo laborans aliquid purget, uti;
 » vel saltèm vomere, maximè si id ventriculus ten-
 » taverit, et in ejus cavitate aliquid immorari cons-
 » titerit, non tamen instante accessione, ne vomiti-
 » toriis motibus et auxiliis, plùs bilis ad ventrem
 » ipsum evocetur. Curandum quidem est in hac
 » febre, si his quæ diximus non cedat, correc-
 » tionem, et præparationem humoris moliri, ut
 » vel copiosius purgetur, vel natura promptius ip-
 » sum devincat. Quòd si in alterius naturæ febrem
 » tertiana hæc migraverit, longè salubrius fore exis-
 » timato. »

CAPUT IV.

De tertianâ perniciosâ ob tenuis humoris putredinem ex
Ludovico Mercato, cum iisdem paritèr scholiis.

« **E**FFICIT non minùs perniciosam tertianam te-
 » nuis, seu biliosus humor, plurimo et copioso
 » ichore permixtus secretusque, et separatus ab

» aliorum humorum consortio , et in extrema
» vasorum projectus , ubi summam nanciscitur
» putredinem ; tùm quòd ipse sit vitiosæ naturæ ,
» tùm quòd aliis non temperetur , tùm etiam quòd
» locus sit arctus , et conclusus . Quibus etiam acce-
» dit , ut affectus gravior fiat , corpus esse raræ
» contexturæ , et porosum , et maximè exalofactum ,
» ità ut possint partes extimæ , et extrema vasorum
» facilè susceptare prædictos succos . Quem sanè
» affectum etiam accidere comperimus his , qui
» plurimos horarios fructus ingesserunt , *ut Hip-*
» *pocrat. 7. popul. tex. 81. de cholera morbo recen-*
» *set* , quâ parte etiam in malignos morbos , et ut
» *Vallesius* exponit , in febres intermittentes dege-
» nerare refert ; qui sanè succus cùm putrescit ,
» quocumque loco sit , adeò est perniciosus , ut
» gravissimam et perniciosam non rarò efficiat
» tertianam , maximè , si laborans raræ sit contex-
» turæ , et facilis resolutionis . Quo profectò fit ,
» ut ex ingenti illâ putredine , quam statim illius
» succi conditio , et peculiaris natura contrahit ,
» et ex prædictâ hominis contexturâ , facilè qui sic
» afficitur , resolutione et anxietate animo liquat ,
» aut syncopi , et mille aliis accidentibus prematur .
» Quippè tales succi ædeò maleficâ qualitate sunt
» affecti , ut ex motione , vel levi eorum agitatione
» laborantes ocysimè prædictis symptomatis cor-
» ripiantur , affectio quidem syncopali minutæ , *ut*
» *refert Avicen. sen. 1. 4. tractat. 2. cap. 53.* per
» similis , nomine tantùm *febris syncopalis minutæ* ,

» in quâ sanè dispendium sit immodicum spiritûs
 » ob sanguinis attenuationem, atque etiam ob ex-
 » pultricem facultatem immoderatiùs in toto cor-
 » pore concitatam: quod etiam ex imbecillitate re-
 » tentricis plerumquè accidere monet *Galenus* 12.
 » *method. cap.* 6. ut paulò inferiùs latiùs sum proba-
 » turus. Hujusmodi enim humores quàm citissimè
 » exhalant, quia tenuiores à febrili calore reddun-
 » tur, in iis maximè quorum retentrix imbecilla exis-
 » tit, quâ ratione diaphoreticis sudoribus sic affecti
 » exsolvuntur. Quapropter tria necessaria in hoc
 » affectu reperiuntur, nimirum *humorum tenuissi-*
 » *morum in ventriculo, et universo corpore copia;*
 » *secundum virium imbecillitas;* tertium verò *vitiata*
 » *meatum et venarum in laxitate compositio,* à
 » quibus procul dubio necessum est subsequi immo-
 » dicam resolutionem, et subitum virium lapsum.

SCHOLIUM I.

Totum hoc caput dignum est ut attentè legatur, illiusque omnia ferè dogmata ducantur in usum. Theoria ipsa non paucam laudem meretur; in eâ siquidem elucet perspicacia auctoris, adjungentis bili ab iis, quæ illam temperare valent, secretæ, consortium copiosi ichoris, ulteriorem labem incongruâ misturâ suâ illi communicantis. Si auctoris innotuisset via, quâ isti humores in sanguinem possent vehi, nonne Sylvianam hypothesim ferè attigisset, permutato tantùm ichore illo in succum Pancreaticum, tunc temporis nondùm detectum?

Curatio quoque ista peculiaris est summè cauta, paucisque modificatis, aut semotis recipienda, præsertim ab initio, cùm scilicèt occasio, vel oportunitas exhibendi corticem nondùm adfuerit.

In hoc capite, cùm iterùm recenseat auctor elegantem *Hippocratis* textum, quem et primo capite attulerat, simulque doctissimi *Vallesii* expositionem, utrumque lubet hùc transferre, ut à *divino* etiam *sene* notatas videamus hujusmodi perniciosas febres, vel aliquam saltèm illarum speciem. Inquit itaque *Hippocrates* loco citato, juxtà interpretationem eruditissimi *Mercurialis*: *Cholericae magis in æstate fiunt, et febres intermittentes, et quibus horrores accedunt. Hæ quandoquè malignæ fiunt, et ad morbos acutos perveniunt. Verùm cavere oportet. Judicat autem tales morbos maximè quinta, et septima, et nona dies. Melius tamen est cavere usquè ad decimam quartam. Juxtà Vallesium verò sic habet textus: Cholerica præcipuè in æstate, et febres intermittentes, et quibus rigores accedunt, hæ aliquandò malignæ fiunt, et ad morbos acutos perveniunt; sed cavere oportet. Maximè autem tales morbos arguit quinta, septima, aut nona; melius autem usquè ad quatuordecimam observare. Hunc ergò Hippocratis textum sic exponit idem Vallesius, dicit cholerica, idest choleras morbos fieri præcipuè in æstate etc. Addit: et febres intermittentes, et quibus rigores accedunt, quæ periphrasis significat febres tertianas præcipuè, deindè verò et quartanas etc. Addit nunc Hippocrates, has febres in æstate ortas aliquandò malignas*

fieri, et in febres continuas et acutas mutari; ac proinde cavere oportere, idest timere, et curare cautè (sunt verba aurea) neque quippiam erroris committere, etsi principio exiguus prorsus morbus, et contemptibilis esse videatur etc. et paulò post subdit: quòd suspectos semper habeamus morbos, qui aliòquè ob propriam figuram videantur esse securi; tandemque concludit: *Hippocratem nolle nos ab intermittibus æstivalibus securos esse, usquè dùm præterisse quatuordecimam periodum (an potius diem? viderimus, neque fieri continuas.* Quæ interpretatio, ut patet, restringit sententiam *Hippocratis*, saltèm ad genus illud pravarum intermittentium, quæ in continuas, acutasque degenerant. Istæ autem in lineâ perniciosarum, etsi admodùm periculosæ, sunt minùs formidabiles reliquis, vel saltèm longiusculas, etiam cum interemerint, præbent inducias, ut suprâ diximus. Si ergò in his tantoperè metuumdum est ex *Vallesio*, quantò magis erit metuendum de terribilibus illis, quæ intermittentes adhuc manentes, quartâ vel quintâ accessione, post dolosam intermissionis quietem hominem jugulant?

« Quamobrèm qui sic laborant, vel levi corporis
 » motione animo deficiunt, facilitè citrà levamen
 » sudant, pulsum habent parvum, debilem ac frequentissimum, urgent vigiliæ, caput vaporibus
 » infectatur, adest vomitio aut inanis nausea,
 » quam antecedit oris amaritudo, inappetentia et
 » tenebrosa vertigo, ut *Hippoc. refert 4. aphor. 17.*
 » ac mox sequitur syncopis. Vultum etiam, qui

» sic affecti sunt, Hippocraticum habent quàm
» simillimum, ob ingentem resolutionem citrà do-
» lorem in aliquo signato loco. Tandem loquens
» *Avicenn. citato capite de febre* ex hujusmodi hu-
» more obortâ, profert eam esse acutam, et quan-
» doquè non sufficere in eâ virtutem usquè ad
» quartum : quo fit, ut jure optimo inter lethales
» numeranda sit.

» Curationem autem hujus febris longè alitèr
» institues quàm reliquarum; quippè in hac præter
» levem quamdam purgationem, quam pari ra-
» tione à principio mali, et antequàm vires laban-
» tur, institues, omni arte cutis coarctanda est,
» et humores densandi. Sic profectò, quò citiùs
» possibile fuerit, corpus purgabis *syrupo solutivo*
» *è rosis hispanis, cum decocto corticum myroba-*
» *lanorum citrinorum vel cum unc. ij. mannæ, et*
» *codem decocto, vel pulveribus earumdem corticum,*
» *cum pulpâ cassiæ fistulæ, vel rhabarbari infuso*
» *largiori cum syrupo rosarum.* Deinceps tamen
» humorem compesces antè accessionem *syrupo*
» *rosarum siccarum et violarum, ana unc. ss. syrupi*
» *rosarum unc. j. aquæ deauratæ unc. iiij. cui adde*
» *pulveris diumargaritonis, aut coralli, aut elec-*
» *tuarii de gemmis gr. vij.* quibus humores den-
» siores fiunt, et longè meliùs coquuntur. Sed hu-
» mores ampliùs densabis, ineptioresque ad fluxum
» et putrefactionem reddes his, quæ intùs sumun-
» tur, qualis naturæ est *syrupus rosarum siccarum,*
» *de malis punicis, de portulacâ et papavere, cum*

» *aquis aut decoctis rosarum, portulacæ, oxalidis,*
» *cum aquâ ferratâ aut deauratâ. Cæterum pro-*
» *desse non parùm comperies, abluere in aliquâ*
» *prædictarum aquarum boli armeni, aut terræ*
» *sigillatæ scrup. j. aut drach. ss. cum modico sy-*
» *rupo papaveris aut agrestæ: hoc sanè medica-*
» *mentum præterquàm quòd humores densat, et*
» *corpus comprimit, inhibet quoque putredinem*
» *et viscera roborat ac præcavet. Confert etiam*
» *id, q. R. pulveris triasantali, et rosatæ novellæ,*
» *ana drach. j. succini scrup. j. sacchari rosati so-*
» *luti in aquâ rosacæ, quod sufficiat, ut fiat elec-*
» *tuarium in rotulis, cujus sumat laborans drach.*
» *j. et ss. cum haustu frigidæ aquæ, aut alicujus*
» *ex dictis. Utilissimum quoque est aliud, q. R.*
» *conservæ rosarum unc. ij. pulveris electuarii de*
» *gemma, aut diamargaritonis frigidi drach. ss. con-*
» *fectionis alchermes vel de hyacintho scrup. j, suc-*
» *cini, ossis de corde cervi, pulveris granæ ana*
» *scrup. ss. misce, et fiat conditum: cordi præ-*
» *tereà, ac cerebro roborantibus, providebis, ut*
» *Galen. consulit lib. 12. methodo cap. 6. Sic quidem*
» *primò facies attemperanda est frequenter aq. rosa-*
» *rum, myrtillorum, et plantaginis cum modico aceto*
» *rosaceo. Cujus indicationis gratiâ involvitur etiam*
» *æger linteo aquâ rosarum madente, aut consper-*
» *gitur multo rosarum rubrarum pulvere, vel myr-*
» *tillorum. Verùm ut ex toto syncopticis acces-*
» *sionibus, et sudoribus subveniamus, adhibere*
» *oportet epithema sceminarum mammis, aut vi-*

» rorum testibus, q. ℞. *aquæ rosarum unc. x. aquæ*
» *oxalidis, et buglossæ, ana unc. j. et ss. vini*
» *optimi unc. ij. aceti rosati unc. ss. pulveris mar-*
» *garitarum, santalorum, coralli, seminis acetosæ,*
» *succini, ana unc. ss. »*

SCHOLIUM II.

Potissima indicatio, quam pro curatione elicit auctor, est ut humor densetur, à fluxu et putrefactione prohibeatur, et quantum fieri potest, antè accessionem compescatur. Quæ quidem indicatio maximi est momenti, illamque nonnunquam mihi contigit cum fructu adimplere, priusquam vires Peruviani corticis planè nossem in hisce febribus, bolo isto, duabus vel tribus antè accessionem horis exhibito, quo etiamnum utor in casibus non extremè periculosis, et in quibus nondum placeat ad corticem devenire. ℞. *theriacæ rec., conf. hyacinth., salis absynth. (vel, pro re natâ, crystall. mont. præp.) ana scrup. j.; laudani opiati gr. j. vel ad summum gr. ij. m. f. h. sumendus ut supra, superepoto vini rubelli momento, vel haustu modico aquæ plantag., buglossi, vel totius citri, prout magis placuerit.* Quod remedium eximiè confert, præsertim ubi evacuationes immanes, et quasi cholericæ paroxysmum ingruentem solent comitari, atque ideò valdè gravem, ac tandem perniciosum reddere.

« Aer, quomodò et cutis, attemperetur refri-
» gereturque frigidis asperginibus, sparsis humi

» floribus, et foliis *rosarum*, *pampinorum vitis*,
 » *salicis*, *cannarum*, et *myrti*, *supersparsâ aquâ*
 » *rosaceâ cum modico aceto*: itè eundem aerem
 » flabellabis linteo aliquo madido aquâ frigidis-
 » simâ, aut rosaceo cum modico aceto. Præstat
 » quoque cordis regionem inungere unguento,
 » q. R. *pulveris electuarii de gemmis*, et *diamarga-*
 » *ritonis frigidi*, ana. *drach. j. lapidis bezoar. gr. xv.*
 » *pulveris granæ drach. ss. olei foliorum nympheæ*
 » *luteæ*, aut *olei rosarum omphacini unc. ij. ceræ*
 » *albæ*, quod sufficiat, ut fiat linimentum molle;
 » itè prædictos pulveres unguento rosaceo ex-
 » cipies, addesque *terræ sigillatæ drach. ss. rasuræ*
 » *eboris et cornu monocerotis scrup. j.* et eandem
 » partem inunges. Thoracem etiam et abdomen
 » illinies hoc unguento, q. R. *olei rosati ompha-*
 » *cini*, et *myrti unc. ij.*, *olei melini unc. j. bulliant*
 » *cum unc. ij. aquæ rosarum ad consumptionem*
 » *aquæ*, et adde *pulveris rosarum rubrarum drach. j.*,
 » *santalorum omnium*, ana *drach. ss. ceræ q. s. ut*
 » fiat unguentum. Hepati etiam ac fronti gratiâ
 » inhibendæ dissipationis, adhibebis præsidium,
 » q. R. *mucaginis tragacanthi*, et *seminis psyllii*,
 » et *cydoniorum unc. 6. albumina duorum ovorum*:
 » misce, et prædictas partes illine, spargeque de-
 » super pulverem, q. R. *santalorum omnium*, *ro-*
 » *sarum*, *seminis arnoglossæ*, ana. *drach. j.* Quibus
 » profectò et sudoris impetum, et virium resolu-
 » tionem compesces: id tamen prudenter, et pau-
 » latim facito, ne ex cutis densitate intensior fiat
 febrilis

» febrilis calor. Securissimum tamen est et utile
 » jecur illinire *oleo rosaceo omphacino cum pul-*
 » *veribus santalorum, positis desuper pannis aquâ*
 » *intybi madidis, vel succo agrestæ, et aquâ plan-*
 » *taginis, rosarum, et solatri.* Maximi etiam sunt
 » momenti, cerebri adhuc roborandi gratiâ, odo-
 » rata omnia tùm naribus, temporibus, ac pulsibus
 » adhibita, tùm super faciem roris modo inspersa,
 » cujus censûs est id, q. *℞. rosarum, santalorum*
 » *omnium, spodii, ana scrup. ij. ambræ gr. iij.*
 » *moschi et camphoræ, ana gr. ij. aquæ myrti*
 » *unc. j. aquæ rosarum unc. iij.* misce : ad cujus
 » pensum odorata omnia frigida prodesse possunt.»

SCHOLIUM III.

Quantùm ad morborum curationem conferat benè disposita aeris temperies, satis patefacit varia locorum, et tempestatum salubriorum, vel insalubriorum constitutio, varias quoque gignens nonnunquàm constitutiones morborum, ob id modò faciliùs, modò difficilius sanabilium : ut sileam quæ de hac re per se notâ, tùm sparsim, tùm cumulatè in libris peculiaribus olim scripsit *Hippocrates*, et quæ plurimâ eruditione ac doctrinâ, plurimoque styli nitore edidit doctissimus *Lancisius Pontificius Archiater* : *De nativis, deque adventitiis Romani cæli qualitatibus*, et de emendandâ accidentali aeris illius insalubritate.

Certè nostro seculo, quo aer non modò thermometrorum, verùm et barometrorum, hygro-

metrorum et anemometrorum examen subire coactus est, atque ità, mediâ fistulâ torricellianâ, staticæ quoque judicium substinere, quin et mirabili scloppi pneumatici artificio, propriæ elasticitatis vim dimetiendam exhibere, non secùs ac violento machinæ Boylianæ tormento, pati dimotionem è sede suâ, vacuis tandem relictis quæ antea tam pertinacitè occupaverat latibulis, inanitionem suâ stupentibus quidem, sed tamen ferentibus, ars quoque medica his inventis ditior facta, aeris ipsius, quo nil ad vitam magis necessarium, penitùs cogniti usuram meliorem cœpit instituere. Hinc eruditissimus *Ramazzinus* libro suo jam edito : *De principum valetudine tuendâ*, sano consilio monet, non negligendum esse varium aeris pondus, quod nobis exhibet assidua inspectio barometri, quâ factâ animadversione, quemadmodum sanorum valetudinem tueri, ità et ægrotantium casus dignoscere, præcavere, necnon iis opportunè subvenire valebimus. Idque eò magis cum plausu et utilitate eximiâ poterimus assequi, quò remotior est à vulgari censu cognitio, quam medio barometro acquisivimus de vario variis temporibus aeris pondere ; ut proindè assertione, cæteroquì propemodum paradoxâ, liceat statuere, barometro judice, aerem nebulosum, pluviosum, ac turbidum, contrà id, quod censuit famigeratissimus *Borellus* (quem tamen fortassè fefellit magis observatio circà experimentum minùs exactè instituta, quàm ratiocinium indè elicited) leviorẽ esse aere

sereno, sicco et perspicuo; paritèrque eundem aerem leviozem esse in australi, quàm in boreali constitutione, licèt hujusce phænomeni nondùm à quopiam satis dilucitati difficillima sit explanatio; ut ideò tam famosi problematis adhuc germana solutio desideretur.

Neque enim ipse inficiabor (ut hoc quoque in-
nuam, perfunctoriè licèt) ea quæ anno 1695. aca-
demico potiùs lusu, quàm philosophicè ac seriò,
circà hanc materiam conscripsi in peculiari disser-
tatione meâ, *Ephemeridibus barometricis* cl. *Ra-*
mazzini adnexâ, ad tutamen aliquod ipsius Borelli,
minùs forsitàn ac fuerit creditum, hac occasione
decepti, rem minimè tetigisse; sicut neque nega-
verim, id à me ne postea quidem fuisse præstitum
iis omnibus, quæ in alterâ tricipiti dissertatione
iterùm edidi anno 1698. In eâ siquidem, licèt non
planè improbabilia censeam, quæ viris doctissimis
Rodulpho Jacobo Camerario medico profess. Tu-
bing., et *P. D. Cajetano Fontanæ* Mutinen. reposui;
immò, licèt reputem absolutè vera et demonstra-
bilia ea saltèm, quæ adversùs hypothèsin alterius
cl. viri *Guntheri Christophori Schelhameri* prof. | me-
dici Kilon. Haud hæsitantèr ibidem adstruxi, nihilo-
minùs neque hinc solidam problematis solutionem
emersisse, lubens admitto. Aliud est enim aliorum
hallucinationes, aliud rei ipsius naturam detegere.
Quod ea non hoc vel illo modo se habeat, facile
est assequi; quo verò præcisè se habeat, difficile.
Interim neque diffitebor, ea quæ adversùs *Schel-*

hamerum protulit eodem tempore, quo illius hypotesim ipse rejeci, clarissimus *Ramazzinus*, eaque paritèr, quæ contrà repetitos ejusdem *Schelhameri* conatus recentèr adduxit vir perspicacissimus *Jacobus Placentinus*, eaque tandem, quæ pro solutione completâ controversi problematis, nupera ad celeberrimum *Scroëkium* epistola, ex eleganti hydrostatico famigeratissimi *Leibnitii* experimento, typis tradidit idem *Ramazzinus*, illustravitque demùm laudatus *Placentinus*, plurimum saltèm luminis contulisse, ad dilucidandam hanc rem, ceteroquì satis obscuram. An ea nihilominùs sit proindè planè confecta, adhuc ambigo. Sed quæcumque sit ratio phænomeni, certè experimentum ipsum accuratis medicis, pro utili ægrotantium regimine, juxtà varium aeris statum, aliquid opis afferre posse, extrà dubium videtur : quemadmodùm extrà dubium est, eundem aeris statum, siquidem median-tibus hujusmodi observationibus, non benè dispositus pro ægrorum salute deprehendatur, artificialis alicujus correctionis esse susceptibilem, eorumque indigentiae aliquo modo aptari posse, ut multiplici industriâ hoc loco conatus est facere noster auctor, in iis tantùm ungendis nimis industrius.

« Victu etiam subvenire his oportet paulò antè
 » accessionem, vel in ipsius accessionis principio,
 » sit autem ex his qui citissimè nutriunt, et mo-
 » dicè adstringunt, sint carnes assæ, et elixi gal-
 » lorum testes, et qui austeris cordiantur; vinum
 » sit rubrum modicè acerbum, dilutum aquâ fri-

» gidâ, aut decocto hordei, vel radicis buglossæ.
 » Prætereà cùm linguunt animo, *vino mali punici*
 » *acidi* pane excepto, itèm renutriendus est æger
 » crebris et minutis cibationibus ejus alimenti,
 » quod non ocysimè dissolvatur, velut est *caro*
 » *perdicum, caponum, vituli* et ejus aliquod ex his
 » confectum cum pane *loto*, et *saccharo* : fructus
 » itèm acerbi, et putredini resistentes. Potus sit
 » ex vino rubro, *ut dictum est*, aquâ ferratâ aut
 » deauratâ diluto. Quòd si morbus præstiterit expec-
 » tandi inducias, et vires ad meliorem statum re-
 » dierint, urinaque rubicundior apparuerit, non
 » erit ab re ex salvatellâ dextræ manûs modicum
 » sanguinem extrahere, aut iterùm aliquo ex præ-
 » dictis pharmacis per epicrasim purgare, donec
 » affectionem mitiorem esse factam comperiamus.»

CAPUT V.

De tertianâ perniciosâ ex pravâ humorum naturâ, ex eodem
Mercato, cum scholiis, ut suprâ.

» **A**DEÒ sunt perniciosæ naturæ, et conditionis
 » *bilis vitellina, prassina, et æruginosa*, ut dubi-
 » tatum sit quemadmodùm antea diximus, inter
 » Arabes medicos, possintne ex eis febres suc-
 » cendi : cùm hoc tamen præter adductam aucto-
 » rum mentem, non etiam ex his nonnullas vidi-
 » mus, quarum natura adeò fuit perniciosa, ut
 » pestilentem affectum æmulari viderentur : fiunt
 » autem ex his humoribus hac lege et ratione.

» Mediâ æstate ob ingentem resolutionem pro-
 » priæ humiditatis humorum, aut nimiam exus-
 » tionem, maximè si subito frigus occursaverit his
 » corporibus quæ improba et biliosa nimis usa
 » fuère victûs institutione, adustam bilem, pras-
 » sinam, æruginosam, et in confinio atræ bilis
 » existentem succrescere non rarò visum est; præ-
 » sertim si homo irâ, furore, aut aliis vehementibus
 » animi pathematis percitus fuerit. Quo quidem
 » tempore mirum non est, si febre corripiatur,
 » eam fore periculosam, etiamsi tertiana fuerit.
 » Quippè si vires non admodum dejectæ sint, si
 » humorum copia non grandis, certum est natu-
 » ram posse, quod intrâ venas molestum fore
 » persentit aut degustat, pellere. Quòd si ad emunc-
 » toria, et corporis canales pellere non possit,
 » poterit quidem propè partes sentientes sensim,
 » et paulatim projicere, ut facilè vel præmissâ
 » successione dissolvatur: quo fit, ut more solito
 » tertio quoque die id efficiat, quia sic humoris
 » conditio postulat.

» Dignosces quidem hanc febrem tertianam ab
 » humoribus pravis ortam ex vehementissimis hor-
 » roribus (*quòd humor sit mordacior*) et qui
 » diutiùs protrahuntur ob humoris crassitiem;
 » quippè sinceri sunt, et citrà nativam humidi-
 » tatem. Febris mox à rigore vehementèr crescit,
 » quòd humor suapte naturâ siccissimus, et exu-
 » rentissimus sit, sicut crassissimus; nam illi haud
 » secùs accidit, quàm pici et resinæ, dùm suc-

» cenduntur, quæ licèt crassam habeant compagem,
» ocysimè inflammantur. Mox verò ab inflam-
» matione, sitis et linguæ asperitas, nigredo et
» ingentissima siccitas succrescit. Oculi ob mag-
» nam spirituum resolutionem cavantur, et colo-
» rator universa facies (*licèt cadaverosa*) efficitur,
» anxius, inquietus, et universo corpore compunc-
» tus, ac velut exulceratus æger hinc indè vagatur,
» qui neque potu, neque ventilatione, neque res-
» piratione subsidium susceptat. Urina ignea, ac
» velut lixivium apparet, pauca, et cum cinericio
» vel furfuraceo sedimine, aut cum pinguedine
» supernatante; pulsus mediocris magnitudinis,
» non admodum debilis, dùm viget febris, cæte-
» rum frequentissimus et celerrimus, die autem
» quietis parvus, debilis, durus et creber subest,
» quòd vires ex accessione abierint, respiratio cre-
» bri, alvi dejectiones opimæ, pingues, aut bilis
» vitellinæ, porraceæ, aut æruginosæ naturam refe-
» rentes, plerumquè dysenteriam efficientes. Vomi-
» tus quandoquè alicujus dictorum humorum subs-
» tantiam et colorem æmulatur, cum angore maxi-
» mo, et animi deliquio. Laborantes parum aut
» nihil sudant, quòd crassior et sine humiditate
» sit materia, nisi propè mortem cum diaphore-
» ticus erumpit.

SCHOLIUM I.

Quæcunque sit, et qualiumcunque succorum mix-
tura, quæ bili dat denominationem prassinæ,
æruginosæ etc. certum est, ut inquit auctor, hujus-

modi humores acerrimos mediâ æstate, et ferventissimis potissimum tempestatibus observari. Æquè certum est, quòd eorundem humorum excretio sive sincera, sive variegata, magnum semper facessit negotium; et quotiescunque apparuerit, dat semper ansam suspicandi, aliquam pravitatem subesse, quæ morbum reddit non contemptibilem, etiamsi alioquì mitem, quod et *Hippocrates* docuit.

» Quod sanè malum mille pericula afferre solet,
» ac multis modis perniciosum efficitur; nam cuiusvis prædictorum humorum talis est natura et
» conditio ut etiam citrà putrefactionem, aut succensionem, quamcumque partem inierint, vel
» erodant, aut graviùs aliud malum machinentur, nedum cùm in extremis vasorum et propè
» partes sentientes jam putrescunt, initio etiam
» putredinis à vasis majoribus sumpto. Quo profectò tempore certum est, ipsam febrem mediante
» validissimâ virium exsolutione, laborantem aut
» interimere in febris ipsius inclinatione, aut
» ocyssimè labefactatâ naturâ, in causonem vel
» gravissimam aliam febrem migraturam, et quod
» certius est, ni arte, aut diligentîâ præveniatur, in habitualement febrem. Tanta enim est primarum
» humiditatum, et substantiæ membrorum, in quibus hi humores putrescunt, resolutio, ut non
» ultrà quartam accessionem visum sit laborantem
» in hecticam migrâsse, maximè si gracilis sit, juvenilis ætatis, et suapte conditione rari habitûs
» et contexturæ.

SCHOLIUM II.

In prognosi occurrit animadversione dignum, quòd ista perniciosæ tertianæ species *ultrà quartam occessionem* non extendatur, seu, ut ait in fine capitis, *quintam ad summum accessionem* non transcendat; sed vel intrà hos terminos necare soleat, vel in causonem, aliamve gravissimam febrem, ac tandem certiùs in habitualement commutari. En ergò quantùm teneamur divinæ bonitati, quæ præsentaneum remedium dedit, vi cujus et ab ocysimâ morte, et ab aliis periculis eandem longiore afflictione tandem inferentibus, certò possumus evadere.

» Non fert maligna et atrocissima hujus morbi
» conditio in exhibendis auxiliis moram ullam;
» nam cum certum sit, hujusmodi humores nullum
» posse beneficium, gratiam, aut coctionem à natura recipere (immò *ut inquit Averroes 3. collect.*
» corrumpant formam specificam illius) procul
» dubio necessum est, protinùs humorem purgare,
» maximè si in convenientem regionem incumbat
» ipse suâ sponte. Quippè si in superiorem ventrem irruat, vomitibus, cùm accessio instat (*quo faciliùs excernatur*) et venter nauseabundus apparet, minuendus est. Servabis tamen hoc præceptum in ejus educatione, ut maximè ipsum admisceas humectioribus cibariis, et copioso potu, tùm ut faciliùs venter evomat, tùm verò ut sine noxâ; gravis enim, et periculo plenus

„ est huiusmodi humoris contactus, et ob ipsum
 „ humidis præsiidiis compescere et attemperare
 „ opus est. Quòd si in inferiorem ventrem humo-
 „ rem irruere persenseris, aut saltèm ad nullam
 „ aliam se partem inclinare, per ipsum expur-
 „ gabis, id quod cautè facies: sive enim purges,
 „ sive secùs, periculo res non caret; quippè sci-
 „ mus, vel levissimis pharmacis gravissimas accer-
 „ siri dysenterias, quòd si has effugias, contabescet
 „ laborans, quò fit, ut prudentiâ, et maturo con-
 „ silio opus aggredi, aut ab eo subsistere tenearis.
 „ Sic profectò in huiusmodi humoris purgatione,
 „ plantioribus, verùm seligentibus pharmacis ad-
 „ mixtis rem ages; illud quidem ne nimis exacer-
 „ betur humor, hoc verò, ut peccans succus citrà
 „ aliorum agitationem excernatur: id quidem fa-
 „ cies *cassidâ fistulâ superbibito lactis sero, in quo*
 „ *priùs rhabarbari drach. j. maceraveris, aut ipso*
 „ *diluto copiosiore facto, vel syrupo ex ix. infu-*
 „ *sionibus violarum, cum infuso scrup. jv. rhabar-*
 „ *bari vel hordei cremore cum prædicto rhabar-*
 „ *bari infuso. Itèm confectione Hamech simplici,*
 „ *superbibito copioso haustu aquæ hordei cum*
 „ *saccharo, aut seri lactis, vel decoctionis viola-*
 „ *rum, et seminis malvarum. Præstat et manna*
 „ *dissoluta in aquâ hordei, vel violarum, sed ro-*
 „ *busta corpora optimè ferre poterunt drach. j. et*
 „ *ss. electuarii de psyllio, vel catholici drach. iv.*
 „ *cum copiosâ aquâ oxalidis, vel hordei. Quo ete-*
 „ *nim semel facto, non licet plurimùm inniti in*

„ sanguine extrahendo; quippè prædicti humores,
„ neque corpus eisdem scatens id plurimum ex-
„ postulant, neque innoxie ferunt, plerumquè à
„ sanguinis missione continua evadit febris, quòd
„ impotens, sanguine detracto, natura ad pel-
„ lendum à vasis nocivum supersit. Verùm si
„ vel simul sanguinem aliquo modo redundare
„ (*quod rarò exustis humoribus accidit*) vel opus
„ esse comperias, id quidem ex salvatellâ manûs
„ dextræ facito. Postmodum verò humores, et uni-
„ versum corporis habitum, ac viscera etiam hu-
„ mectare curabis plurimum, et modicè refri-
„ gerare, pusillus enim calor navitus, qualem hæc
„ corpora habent, nec evacuationem, nec refri-
„ gerationem innoxie ferunt, sed *ut Galen. 12. me-*
„ *thod.* in doloribus ab erodentibus succis ortis
„ consulit, paulatim et sensim lenire, sic sequenti
„ die à pharmaco copiosam aquam hordei cum
„ syrupo *violarum, aut saccharo rosaceo, vel de-*
„ *coctum violarum* bibendum dare oportet, quo et
„ vis medicamenti, et humorum acrimonia retun-
„ dantur, abluanturque; clysmatis prætereà uten-
„ dum est, maximè cùm laborans dormiturus est,
„ quæ sanè conficito *ex decocto hordei, vel viola-*
„ *rum, aut seminis malvarum, et papaveris, cum*
„ *saccharo, et oleo rosarum, violarum, et vitellis*
„ *ovorum.* Prætereà summo mane, aut propè som-
„ num, laboranti porriges *aquæ hordei, acetosæ,*
„ *violarum, scorcioneræ, vel per mortarium lapi-*
„ *deum excolatæ unc. vj. syrupi acetosæ, de succo*

„ *limonum, rosarum, aut violarum unc. j.* Confert
 „ et saccharum rosaceum, seu violaceum magis,
 „ quibus admisce roborandarum virium gratiâ *mar-*
 „ *garitarum præparatarum, aut electuarii de gemmis*
 „ *scrup. j.* Præstat et *diacorrallium cum mucilagine*
 „ *seminis cydoniorum, et psyllii pondere drach. j.*
 „ Ejusdem usus est, quod ex his omnibus confi-
 „ citur formâ boli, et pondere duarum drach.
 „ summo mane exhibitum. Sed ferunt non con-
 „ temnendi auctores, et conciliator etiam adstruit,
 „ alexipharmacum nullum reperiri in arte medicâ
 „ his humoribus pretiosius, quàm crystallum, cujus
 „ drach. j. in subtilem pulverem redacta, et aquâ
 „ dissoluta, mirè opituletur; ego autem arbitror,
 „ id forsàn occultâ quâdam proprietate illi acci-
 „ dere. Verùm si dysenteria ex prædictis humori-
 „ bus prodeat, vi suâ adstringente extrâ omnem
 „ expectationem prodesse comperimus; censeo ta-
 „ men admiscendum fore aliquod ex prædictis phar-
 „ macis. Exterius verò corpus *refrigerantè Galeni,*
 „ aut *rosaceo,* vel unguento ex *cucurbitulis* juxtâ
 „ dorsum inunges, aut cordi epithemata appones,
 „ eâ lege, quâ capite de tertianâ exquisitâ scrip-
 „ simus. „

SCHOLIUM III.

Quàm vanâ spe autem id expectare liceat ab aliis
 remediis, ostendit curatio. Magna remedia, ex
 mente auctoris, hic nullum ferè locum habent,
 etenim, si de purgatione sit sermo: *cautè id facies* ?

inquit ipse, *sive enim purges, sive secùs, periculos non caret etc.* Si verò de sanguinis missione loquamur: *ægrotantes hujusmodi*, subdit ille, *tale præsidium non innoxie ferunt, et plerumque à sanguinis missione continua evadit febris.* Magnis ergò remediis ferè proscriptis, quid sperandum superest à levioribus, et nullius fermè vigoris, saltèm respectu habito ad tantam indigentiam, ut nôrunt practici? De crystallo quidem non contemnendam mentionem facit auctor, (selecta ferè semper remedia indigitans) pro corrigendis pravis illis humoribus recensitis; et ego quoque experièntiâ fretus eidem remedio in mitioribus saltèm casibus, ut paulò antè innui, non parùm tribuo. Sed furente jam, sparsis quaquâ versùm structibus, torrente, frustrà infirmioribus hisce instructus.

Pugnat in adversas ire natator aquas. In hac sanè procellâ si quis consulisset *Mercatum*, jure merito contremiscentem, quærens, an liceret lignum corticis amplecti, certum planè pro naufragio evitando refugium, videlicèt specificum certum pro mansuefaciendis efferis hujusmodi humoribus, *nullum cæteroquè beneficium, gratiam, aut coctionem* (ut omnimodâ certitudine affirmat auctor) *à naturâ recipere aptis*, quid, quæso, respondisset? Mussitassetne, aut hæsitasset?

« Quod tamen majoris momenti arbitror, et victum summè humectantem, et facilis, atque copiosioris alimenti instituere; ob id *jura caponum, et carnes pullorum ex lacte, aut hordeo nutritio-*

» rum ex usu esse comperimus, et ex *oleribus de-*
 » *coctam lactucam, aut scariolam, et borraginem;*
 » tandem potus sit hordei aqua, vel purissima cum
 » saccharo. Quòd si vires laborantis labi videan-
 » tur, consultissimum est, vinum tenue, album, et
 » maximè dilutum præbere; tandem si affectionem
 » perstare adhuc contingat, existimandum est, jam
 » in alterius naturam commigrâsse, nam ex præ-
 » dictis humoribus non transcendit quintam acces-
 » sionem; quamobrem juxtà naturam ejus, in quam
 » degeneravit, curationem institues.

CAPUT VI.

De tertianâ perniciosâ ex miscellâ crassorum humorum cum
 serosis et tenuibus ex *Ludovico Mercato*, adjunctis itidem
 scholiis.

» CUM in humanis corporibus intrâ venas humo-
 » res abundant eâ copiâ, quæ naturam irritet ad
 » sese deonerandam; cæterum quæ non adeò gra-
 » vet, quod ad extrema vasorum pellere non pos-
 » sit, fit quidem, ut humorem pellat ipsa tertio
 » quoque die; sed quod frequentius est, more
 » duplicis tertianæ singulis diebus, maximè propè
 » noctem ad extrema vasorum, et præcipuè juxtà
 » os ventriculi humorem transmittat, quo feбри
 » syncopali humorosæ simillima existit. Quo fit, ut
 » ob ejus copiam, quæ sui respectu major est, quàm
 » fuit respectu majorum vasorum, à quibus pellit

» natura, procul dubio adeò graventur et offen-
» dantur universi corporis partes, ut hac solâ ra-
» tione tertiana, quæ sui naturâ salubris foret,
» perniciosa efficiatur; cui accedit, humorem esse
» mixtum ex tenui bilioso et crasso, cujus crassi-
» tiem velutî ex congelatione, et condensatione
» factam arbitramur. In cujus febris naturâ expen-
» dendum primò est, *quâ ratione hi humores gra-*
» *vent naturam in extremis vasorum, cùm intrâ ma-*
» *jora non adeò graves extiterint.* Secundò, *quâ*
» *ratione ob id perniciosa existat.* Circâ primum
» conjectandum est, humorem hunc concretum,
» quem secum movet biliosus, et tenuis humor,
» qui in accessionem prorumpit, cùm ad extrema
» venarum funditur, non protinùs, aut simul ad
» dicta loca transmitti, nec simul incalescere, sed
» paulatim projicitur, ac succenditur; tùm quòd
» copiosus sit, tùm quòd inæqualis. Quo fit, ut
» tenuior pars primò succendatur, et ex crassio-
» ribus, quæ primò transmittitur, et reliquæ sic
» successivè, ut natura pellit. Prætereà cùm mox
» tenues partes succendantur, quæ crassæ sunt
» simul incalescunt, gravioresque et rariores fiunt,
» eo quòd ex calore, quod crassum est, ocyssimè
» fundatur, et liquetur. Quo fit, ut ea humorum
» copia, quæ vasis majoribus non erat magna, nunc
» in intremis vasorum liquata, et fusa maxima fiat,
» gravis et ponderosa, ex quo procul dubio sequi-
» tur, perniciosam et periculo plenam efficere fe-
» brem, cùm vereri oporteat, ne universi corporis

» calor ex copioso illo humore suffocetur, extin-
 » guaturque, aut laborans syncopi frequentèr cor-
 » ripiatur. Finitima quidem est hæc febris conditio
 » ei, quam medici *syncopalem humorosam* vocant,
 » cujus Galen. 12. *method.* meminit nomine febris
 » cum redundantia crudorum succorum, licèt ex
 » continuarum fiat genere, transactis primis acces-
 » sionibus, quòd impotens sit natura longè à cor-
 » dis vasis humores illos crassos, et copiosos pel-
 » lere, hæc verò intermittens.»

SCHOLIUM I.

Torquet in hoc capite se ipsum auctor, ut explicet modum, quo detrudi supponit ad extrema vasorum, ibique succendi inæqualitèr crassos et tenues humores. Ignorato fluidorum motu tunc temporis occulto, mirum non est, si in tot figmenta sæpiùs labebantur prædecesores nostri etiam doctissimi. Quæ nihilominus ille adstruit de inæquali crassitie, ac tenuitate humorum irregularitèr effervescentium, sive, ut loquitur, succensorum, omninò locum habent in isto casu, si modo sensibiliore explicentur. Quæ paritèr addit de condensatione, congelatione, ac concretionem eorundem humorum crassorum, commixtorum cum biliosis et tenuibus, videntur nonnihil congruere cum iis, quæ ex principiis *acidi* et *alchali* hodiè deducunt quamplurimi. Quocumque tandem modo meliore hæc explicentur (quod theoreticis relinquo) certum est saltèm, vi hujusce febris, seu causæ

causæ illius immediatæ, inæqualem ebullitionem intrâ sanguinem suscitari, sive deinde id fiat ob heterogeneitatem particularum præexistentium in ipso sanguine, illumque ex parte constituentium, sive ob peculiarem, inæqualemque dispositionem, aut compositionem febrilis fermenti in sanguinem influentis, sive propter utrumque.

« Verùm ob id gravis, licèt procul à partibus
» cordi et ventriculo, aut jecori vicinis eosdem
» valeat pellere, è quo vereri oportet universi
» corporis caloris extinctionem, et ob id differunt
» etiam hæ febres ex occasione periculi, nam in
» illâ vereri oportet, ne humorum pondere, et
» copiâ, cordis calor exstinguatur, quòd propè
» ipsum existat plenitudo, in hac verò ne totius
» corporis calor pereat, præterquamquòd (*ut dic-*
» *tum est*) aliqua humorum crassorum portio propè
» viscera transmittatur, licèt in utrâque ob vitium
» et damnum ventriculo illatum laborantes peri-
» clitentur. Triplex igitur causa necessaria est hujus
» febris generationi, crudorum nimirum humo-
» rum copia ventriculum et carnosum, ac arte-
» riosum genus opprimens, virium infirmitas, quæ
» caloris paucitatem sequitur, et vitiata angustorum
» meatuum, et venarum compositio.

» Cognosces autem hanc febrem ab his humo-
» ribus inæqualitèr crassis, et copiosis provenire,
» quòd lentè, et cum diurno ac moroso rigore
» incipiat, quem nonnunquàm interrumpit calor
» quidam, velut flamma exurgens, quem iterùm

» rigor compescit, ità ut per intervalla rigeant
 » et incalescant qui sic affecti sunt. Quod symp-
 » toma illis succrescere censeo, quia humor co-
 » piosior est, et crassior (*potius profectò*) quàm
 » quòd simul totus possit à naturâ pelli, et si pel-
 » latur, simul succendi. Quo fit, ut pars post par-
 » tem succendatur, et primò quæ in eo tenuior
 » est, post verò quæ crassior. Dignosces etiam id,
 » quòd laborantes tardè incalescant ex toto, et
 » quòd calor diù duret, et non admodum sit ex-
 » tensus, sed per aliquod intervallum flammea in
 » corpore compareat caliditas, sed mox cesset, et
 » mitis appareat calor. Quod licèt ità sit, anxium
 » reddit laborantem ob pressuram, et gravitatem
 » arteriarum, et musculorum totius corporis, quàm
 » fusi et copiosi præstant humores. Impotens etiam
 » toto febris tempore efficitur laborans, et cùm
 » anxius sit, sese movere nequit, quo fit, ut mo-
 » lestius ferat, et velut obtusus sensibus existat.
 » Calore videtur carere, et siti plerumquè pre-
 » mitur, et à potu gravius se habet, præcordio
 » in principio inflato, corpus totum ampliori mole
 » quàm pro naturæ modo, tumens color omninò
 » vitiatus, aliisque albidior quàm pro naturali
 » habitu, et aquâ inter cutem laborantibus persi-
 » milis, vel lividus. Urina copiosa subalbida, co-
 » pioso sedimento et crasso plena apparet. Pulsus
 » ex parvitate, et magnitudine inæqualis, ali-
 » quandò interceptus, et quo magis crescit febris,
 » evidentiores fiunt prædictæ differentiæ, quòd eo

» tempore rarior fiat humor, et vehementiùs na-
» turam premat ; celeritas tamen et crebritas non
» plurimùm à naturâ dissident, ità ut plerisque
» videatur febre carere. Sæpè etiam animo defi-
» ciunt, et aquæ potu non levantur, neque asper-
» sione aquæ suprâ faciem, quinimò frictionibus
» et vinculis meliùs se habent; respiratio frequens
» est, et suspiriosa : in febris autem inclinatione
» laborantes maximâ cum inquietudine ab umbi-
» lico ad caput exsudent, et aliquantulùm liberari
» videntur, et licèt febre carere appareant, adhuc
» accidentia aliquot supersunt, quibus constat ni-
» mio pondere laborantes confringi : tandem hoc
» est in hujusmodi febribus tamquàm pathogno-
» monicum signum, nimirùm, nec augmentum,
» nec statum, nec declinationem æqualitèr fieri,
» sed in augmento aliquandò inclinât febris, de-
» luditque medicos, et potu exhibito, aut citrà
» ipsum iterùm increscit, in statu verè plerumque
» novum incrementum, et aliquandò declinatio-
» nem, et postea aliud incrementum susceptat,
» quod pari pensu in declinatione cernimus. Præter
» id hoc habet proprium et peculiare, quòd
» accidentia quæ propria sunt principiis reliqua-
» rum febrium, sibi vehementiora sint et majora
» propè statum, quàm in principio ; quo fit, ut
» eo tempore inæqualitates pulsûs, laborantis suf-
» focatio et periculum sine dubio sint majora ;
» ratio est, quia cùm hæc mala in hoc affectu ex
» arteriarum compressione, et caloris suffocatione

» prodeant, et hæc eo tempore commodiùs fiant,
 » in quo major fuerit plenitudo, et hæc major
 » sit propè statum, quia in hac febre usque ad id
 » tempus semper à vasis aliquid pellat natura ad
 » minora, et quod pellit magis attenuetur propè
 » statum, fit profectò, ut eo tempore accidentia
 » principii eluceant magis. »

SCHOLIUM II.

Ob id, signum febris hujusce speciei quasi *pathognomonicum* esse dicit auctor, quòd nec augmentum, nec status, nec declinatio æqualitèr fit; sed in augmento aliquandò inclinatur febris, deluditque medicos, dùm potu exhibito, aut etiam eo non exhibito, iterùm increscit, idemque non rarò repetit in statu, aut etiam in ipsâ declinatione; quod maximè verum est in praxi; et ideò summè paritèr observabile ad plurimos errores vidandos.

« Verendum profectò est in hac febre, ne unum
 » è tribus malis laboranti succrescat, *primum*, ne
 » laborans in augmento ipsius febris, cùm jam
 » incalescere cœpit universum corpus, antequàm
 » ex toto incalescat, suffocetur. Quippè eo tempore
 » rare rarior efficitur materia ob fervorem, quem
 » contrahere incipit, quo fit, ut compressione
 » vasorum, et extinctione caloris in toto corpore,
 » vel in syncopem gravem et periculosam, vel in
 » mortem prolabatur æger; quòd si quis quæsièrit
 » quâ ratione in hac febre, quæ suffocatione
 » interficit, laborantes pereant in statu et propè
 » ipsum, cùm in reliquis quæ hoc modo interfi-

» ciunt, in principio laborantes suffocatione pe-
» riclitentur; dicendum est, hoc esse principium
» hujus febris, quatenus ad eam portionem attinet,
» eo quòd natura non transmittat simul humores
» à vasis, sed paulatim usquè ad statum; quo sit,
» ut eo tempore (præterquamquòd funduntur, et
» effervescent, et liquantur) copiosiores utrâque
» ratione sint, quàm in principio, et ob id eo
» tempore calorem suffocent magis. *Secundùm*, si
» fortè natura sese à syncopi tueatur, pertimescere
» oportet gravem et diuturnum aliquem affectum
» subsequiturum; nam cùm tertiana hæc plerumquè
» sit nimis extensa, facilè continua efficitur, vel
» saltèm sub ingressum duarum tertianarum. Qua-
» rum occasione non rarò succrescere solet. *Ter-
» tiùm* malum, nimirum malus corporis habitus;
» quippè cùm calor in dies impotens reddatur,
» procul dubio verendum est, ne etiam bonum
» sanguinem conficere non possit, ac subindè ne-
» que corpus probè nutriri, et malum habitum
» ex consequenti subsequi.

» Videtur profectò posse hanc febrem curatio-
» nem suscipere simillimam ei, quam febribus syn-
» copalibus humorosis proficuum esse auctores
» scribunt, siquidem in omnibus ferè æquales exis-
» tunt, in quâ re non in parvam dubitationem
» incidimus, siquidem *Galen.* non satis apertè
» monstrat, *an liceat in hujusmodi febribus san-
» guinem mittere, aut expurgare*, cùm solùm fric-
» tionibus utendum esse consulat, nec immeritò

„ quidem, cum in hac febre crudorum humorum
 „ maxima copia subsit, præcipue juxta ventriculi
 „ os, quæ sanguinis detractionem plerumque in-
 „ tercidit, nec rursus expurganti pharmaco videtur
 „ esse à principio utendum, cum corpus plenum
 „ sit, et ob id non cessurum medicamentis; quo
 „ profectò fit, ut in dubium vertendum sit, quid
 „ agere oporteat. Quippè solùm uti frictionibus,
 „ insufficiens est tanto malo, nec licet corpore
 „ existente pleno, quod *Galen.* interdixerat 4. *de*
 „ *sanit. tuend.* Quamobrèm censeo *Averroem* à
 „ *Galen.* dissensisse 7. *collig.* qui non esse solùm
 „ agendum frictionibus scripsit, cui favet *Trallian.*
 „ qui neque mediam, neque multam frictionem
 „ sufficere docet, *Rasius* etiam 6. *cont.* cum *Tral-*
 „ *lian.* purgantia protinùs consulit. Verùm si quis
 „ rem hanc diligentèr expendat, reperiet procul
 „ dubio hujusmodi febris longè diversam esse me-
 „ dendi rationem à curatione febris syncopalis
 „ humorosæ et continuæ. Nam præterquàm quòd
 „ in *Galen.* doctrinâ non expressè constat hujus
 „ febris notitiâ, ejus quæ illi assimilatur, 12. *me-*
 „ *thod.* non dissimilis est curandi ratio. Sed dato
 „ quòd verendum sit sanguinem mittere, aut ex-
 „ purgare in illâ, in hac verò ambo auxilia præ-
 „ requiruntur, et utrique superest à principio
 „ commodissimâ occasio. Primùm quidem eo quòd
 „ plenitudo illa, quæ in hac febre subest, non
 „ sit adeò copiosa intrâ vasa, quia tantùm est
 „ plenitudo in potentiâ, quæ in extremis vasorum

„ efficitur actu, certum est subesse locum expur-
„ gationi; ac si cum sanguinis præsentia adsit copia
„ illorum humorum, quos et crassos et tenues esse
„ diximus, ob id credendum est, non deesse oc-
„ casionem mittendi sanguinem. Quapropter cum
„ in hac febre periculum sit, ne in accessionis
„ principio aut statu, ex humoris effervescentia
„ et plenitudine, calor universi corporis suffocetur,
„ ob id, si sanguinem præesse simul com-
„ pertum fuerit, vel occasionem malo præstiterit
„ sanguinolentæ evacuationis suppressio, demen-
„ dus sanguis est, venâ basilicâ dextri brachii
„ scissâ, idque semel aut bis, pro virium robore;
„ sint aliter, cavendum est à sanguinis detractio-
„ ne tamquam à magno malo; nam plerumque sic
„ affecti calore et viribus carent. Verum si præ-
„ dictos humores tantum dominari constet, à pur-
„ gatione et seligenti pharmaco factâ, principium
„ curationis auspicari oportet ex *syrupo solutivo*
„ *rosarum, cum infusione foliorum sennæ, aut cum*
„ *expressione agarici vel carthami*. Prodest et *diaca-*
„ *tholicon, in decocto sennæ dilutum, vel diaphæ-*
„ *niconis modicum cum confectione hamech simplici*.
„ Post hanc verò purgationem sanguinis demen-
„ dus est, quod si opus fuerit magis probo quam
„ antè purgationem et coctionem, si antea mis-
„ sus non fuerit. His tamen factis, omni arte cu-
„ randum est corporis calorem evocare, atque
„ excitare, quod facilius possit copiam humoris
„ discutere, quippè in hoc malo frictionibus et

» ligaturis, aut cucurbitis licèt utamur, non qui-
 » dem ut evocemus humorem ad extimas partes,
 » ut in reliquis dictum est, cùm potissima ratio
 » periculi sit copiosior humor, aut caliginosus et
 » frigidus halitus in partibus carneis, sed ut solum
 » calorem ipsum sopitum excitemus, evocemusque
 » ad easdem. Quod sanè facies leviusculis, sed
 » longioribus frictionibus, quibus, quod faciliùs
 » evocari ad cutim possit, facilè sequatur, et cùm
 » is sit calor et spiritus, is procul dubio succrescit.
 » Itèm parvis et frequentibus cucurbitis, quibus
 » ablatis, universum corpus suffumigabis, et per-
 » fricabis calidis linteis, quod sanè facies parùm
 » antè accessionem aut in ipsâ, et per vices et
 » intervalla in ipso augmenti tempore, ut per car-
 » neas partes aliquid ejus, quod ibidem moratur,
 » antequàm calorem offendat evanescat, aut calor
 » qui id conterat, excitetur. Curandum etiam est,
 » ut die quietis laborantes per alvum dejiciant,
 » clysmatis et suppositoriis acrioribus, vel vo-
 » mant, quod profectò grandi diligentia exequen-
 » dum est. Quòd si his omnibus factis animo lin-
 » quant, etiam incipiente accessione, *modicum*
 » *panis vino madefactum* porrigere oportebit, qui
 » etiam odoramentis reficiendi sunt; quod secundò,
 » aut tertio iterabis, donec incalescere corpus,
 » et calorem conspicuè excitari comperias. Ac si
 » eo pulsus parvitas devenire videatur, quòd effi-
 » caciore auxiliis opus sit, porriges *cum modico*
 » *vino pulverem q. R. aromatici rosati drach. j.*

» margaritarum præparatarum scrup. ij. pulveris
» electuarii de gemmis scrup. j. pulveris ossis de
» corde cervi drach. j. rasuræ cornu monocerotis
» unc. ss. misce, et cum melle rosaceo fiat bolus,
» cujus porrige scrup. j. Quo facto, cor et dorsum
» inunges unguento, q. ℞. olei liliorum, et de
» semine angelicæ, ana unc. j. olei cinnamomi
» drach. ij. pulveris cariophyllorum et naphthæ,
» ana scrup. j. diambrae gr. j. pulveris florum ros-
» marini drach. j. croci scrup. j. bulliant cum odo-
» rato vino in duplici vase, et factâ expressione
» prædicti partes inunge. Ventriculo etiam pro-
» videbis unguento, q. ℞. olei nardini et nucis
» moscatæ et absynthii, ana unc. ss. cariophyllorum
» drach. j. galliæ moscatæ gr. x. ceræ q. s. ut fiat
» unguentum. Mammis verò sæminarum, et viro-
» rum testibus adhibebis quæ odorata sint, et
» calorem concilient, velut est vinum calidum cum
» aquâ melissæ, et pulvere aromatici rosati, et
» diacymini. »

SCHOLIUM III.

Difficultatem curationis demonstrat contraversia de sanguine mittendo, et de instituendâ purgatione, licet utrumque præsidium tandem auctor admittat. Neque enim hæc febris species reverà est adeò exitiosa inter reliquas, ut aliquam curationem, ut aiunt, methodicam saltèm circà initia non patiatur.

» His factis in die accessionis, studendum est

» in diebus quietis humorum copiam munuere,
 » et cruditatem et crassitiem moderari, quòd facies
 » addito *oxymelite*, vel *syrupo de corticibus citri*,
 » ac *modico syrupo de duabus radicibus cum aquis*
 » *cinnamomi, anisi, fœniculi, angelicæ vel de radice*
 » *chinæ*, ac procedente affectu non recusarem, *oxy-*
 » *melitis scillitici* modicum adjicere. Post quàm præ-
 » parationem si coctio apparentèr eluceat, plenius
 » corpus purgabis his quæ superiùs diximus, aut
 » *pilulis aggregativis*, vel *de agarico*. Verùm si
 » leniùs naturam concoquere constet, satius esse
 » duxi, per epicrasim corpus purgare *pilulis ex*
 » *mastiche, rhabarbaro, et agarico, aut pilulis ex*
 » *hierâ Galen. et agarico, vel prunis Damascenis*
 » *ex decocto sennæ conditis, aut infuso rhabarbari,*
 » *et agarici, vel carthami decocto* : Formidare
 » enim in his oportet copiosas purgationes, ne
 » humore copiosiùs in ventriculum irruente, citiùs
 » in irreparabilem syncopem concidant. Prætereà
 » sive pugent, sive opus aliquod agere velint,
 » è lecto non surgant, ne commoti humores citiùs
 » syncopem excitent. Interim tamen providendum
 » est *hæmorrhoidibus et mensibus*; tandem post
 » prædictas purgationes, *theriacâ cum modico vino*
 » *utendum est, aut aromatico rosaceo, et vino pas-*
 » *sulato, vel diacymino.* »

SCHOLIUM IV.

Circumspectionem tamen suam in purgando satis
 ostendit idem auctor verbis illis : « Formidare in his

» oportet copiosas purgationes, « *rectiusque forsàn*
dixisset etiam modicas. Sat ergò fuisset superiùs
dixisse : « Curandum est, ut die quietis laborantes
 » per alvum deiciant clysmatis et suppositoriis. »

« In hac sanè febre, et sommo et vigiliâ opus
 » habemus: quippè somnus concoquit, et vigilia
 » digerit. Itèm opus est victum instituere exte-
 » nuantem et parcum, ac sæpiùs, aut ex longis
 » intervallis, *vinum* fere his omnibus ex usu est,
 » si non dormierit laborans, noctù, sin alitèr,
 » diù. Providendum etiam est, ut laborans quàm
 » minimè turbetur, distrahaturve aliquo animi
 » pathemate, quod sic affectis summoperè no-
 » ceat. »

CAPUT VII.

De perniciosâ tertianâ ob aliquod accidens quod succrescit,
 ex eodem *Mercato*, cum iisdem scholiis.

« **E**ST itaque quinta perniciosæ tertianæ species
 » ea, quæ non ex propriâ conditione et naturâ,
 » talis efficitur, sed ex aliquo accidenti, quod illi
 » succrescit, cujus ratione ipsa periculosa efficitur
 » quantumvis suo more salubris, et signis firmata
 » securissimis exitat. Sic profectò hac lege uno è
 » duobus modis aliquam tertianam periculosam
 » fieri conspiciamus. *Primò*, quandò crescente ca-
 » lore in accessione ipsâ, pituitosus aut crassus ob
 » contractam fusionem, et tenuitatem ab ipso

» calore præstitam, instillat, decumbitque in ali-
 » quam partem, ac velut suffocativum (*ut aiunt*)
 » catarrhum, si ex capite, vel difficilem respi-
 » rationem, aut orthopneâm, si ex thorace, vel
 » articulares et gravissimos dolores concitat si in
 » articulos prædictus humor prolabatur; quippè
 » certum est, non rarò contingere his, qui caput
 » habent catarrhosum, humidum, et fluxionibus
 » obnoxium, si febre tertianâ corripiantur, tem-
 » pore accessionis ob calorem tantam defluere pi-
 » tuitæ fluxilis copiam, quod in gravissimam suffo-
 » cationem, aut lateralem dolorem, pleuritico dolori
 » persimilem ocysimè periclitari videantur, sicut
 » his qui asthmate laborant, ob crassos et viscidos
 » humores, thoracis vasa et partes obsidentes ab
 » eodem calore liquari et moveri, excitareque
 » difficillimam respirationem et gravissimam orthop-
 » neâm. Ità prorsùs his contigisse scimus, qui
 » articulare morbum pati sunt assueti, quibus
 » vi caloris fusi humoribus tenuior quædam pars
 » in articulos migravit, quâ quidem gravissimæ
 » et molestissimæ fiunt tertianæ accessiones, quæ
 » omnia finitâ accessione protinùs aliquandò ces-
 » sant, eo quòd calor, qui humores liquavit,
 » eosdem discutere valuit, aliquandò verò ejusdem
 » mali, quod excitavit, aliquid adhuc superest,
 » quòd molestam, et non rarò periculosam mina-
 » tur fore venturam accessionem, si malum malo
 » succrescat, *Secunda* quidem hujus tertianæ spe-
 » cies suboritur, cùm febrilis calor iterùm in

» consensum allicit, commovens corruptos vitio-
» sosque ibidem morantes succos, quibus motis
» accidentia succrescunt, totâ accessionis dura-
» tione æquè gravia ac periculosa, his quæ hys-
» tericis fœminis accidere assolent.

» Signis profectò in hujusmodi tertianis non plu-
» rimùm opus habemus, cùm constet prædicta
» accidentia, quæ illi succrescunt, non accidere
» ob caloris febrilis, aut humoris peccantis, vel
» membri in quo humor febrilis incumbit, vitium,
» sed accidentia longè diversa esse à naturâ præ-
» dictorum, esseque symptomata, quæ aliis humo-
» ribus ab his quæ tertianam efficiunt diversis,
» propria sunt. Quippè affici catarrho, aut diffi-
» cultè respirare, vel articulos dolere certum est,
» distinctum quid esse, et accidentale à naturâ fe-
» bris tertianæ, et ob id cùm hæc accidentia suc-
» crescunt, conjicies tertianam fieri perniciosam
» ex accidenti, et non ex navitâ sorte. »

SCHOLIUM I.

Circà universum hoc caput dico, quòd si ac-
cidentia, quæ succrescunt febribus, verè sint ta-
lia, ut nullam habeant cum febre communionem
causæ, vix potest peculiaris species febris perni-
ciosæ exindè constitui; nam hoc nomine perniciosa
etiam dici posset ephemera, si illi grave aliquod ac-
cidens superveniret. Oportet itaque diligentè ani-
madvertere, an succrescentia accidentia omninò
sequantur periodum febris, itaut cā invadente in-

vadant, et eâ cessante cessent. In tali enim casu potius censenda sunt symptomata febris, quàm alterius naturæ, etiamsi motus febrilis, tantùm datâ occasione, eas suscitare videatur: secùs, si non sequantur periodum, motumque febrilem. Sic, si mulieri semper in accessione superveniat passio aliqua hysterica dicta, quæ non alio tempore invadat, et solutâ febre semper solvatur, reputanda erit soboles fermenti febrilis (licèt tantùm per accidens) in subjecto disposito, et intrâ ejusdem fluida turbas illas suscitantis: idemque dicendum crediderim de colicâ, de vertigine, ac de ipsâ nonnunquàm affectione epilepticâ, unâ cum febrilibus paroxysmis recurrente in subjecto assueto. Fateor equidem, accidentia perniciosa hîc ab auctore enumerata, nempe *catarrhum suffocativum, dolorem pleuritico similem, asthmaticum affectum, et arthriticos dolores*, quæ cuncta illi fortè sæpiusculè videre contigit, mihi rariùs, ac ferè nunquàm in perniciosius videre contigisse, quin potius alia frequentius observâsse perniciem inferentiâ, quæ ipse nominatim non recenset, et quæ ego specialitèr recensebo *capite primo libri sequentis*.

« Verendum quidem est in his tertianis, ne ali-
» quod ex prædictis malis, quæ calore accessionis
» fiunt, vellaborantem suffocet, vel si iterùm rever-
» tatur, essentielle fiat et proprium. Quapropter
» sic affectos in die quietis præcavere oportet, ne
» iterùm revertatur malum, et in accessionibus pe-
» riclitentur.

« Curandi ratio in hac affectione , peculiare
» sibi præscribit considerationes , quas maximi esse
» momenti censeo. *Prima* sanè est , quòd in ipsâ
» accessione , ubi majus imminet periculum , id
» præcaveamus juxtâ symptomatis , quod succrescit ,
» naturam ; in die verò quietis curandum est , ne
» iterùm revertatur. Namque in curatione ipsius
» tertianæ nil novi agendum est præter id quod
» in reliquis tertianis salubribus ex usu esse dixi-
» mus ; præterquamquòd hæc paulò celerius , atque
» diligentius expostulat curari : ne si diutiùs protra-
» hantur accessiones , et frequentius repetant ,
» aliquo ex prædictis modis laborans in ipsis peri-
» clitetur. Sic profectò urgente fluxionis periculo ,
» sive ad fauces , sive ad thoracem , sive cum
» dolore aut secùs , vel cum difficili respiratione
» et orthopnœâ , omni arte curandum est fluxum
» à capite ad alias partes divertere , quod facies
» brachiis vehementer fricatis , aut ligatis , vel si
» ipsis cucurbitas apposueris , bis in singulis horis ,
» quod fluxio illuc evocetur. At si grande pericu-
» lum immineat , ipsas scarificare oportebit , post-
» modum scapulis iterùm alias affigere , quo flatus
» à thorace discutiantur , et aer partibus dilatatis
» commodius recipi possit. Quòd si lateralis elu-
» ceat dolor , brachiis sat est ipsas apponere , et
» discutientibus ac siccis præsidiis propè partem
» dolentem uti , *ut sacculis ex milio , et furfure ,*
» *chamæmelo , et sale* : Nam si inunctionibus , aut
» evaporatoriis utaris , laxiore factâ parte , copiosius

» ipsa recipiet, et fluxionem evocabis. Sic profectò
 » utero providebis juxtà affectionis quæ succrescit
 » indigentiam, ut *lib. nostro* de mulierum affec-
 » tionibus abundè dictum est. Podagricis, aut qui-
 » busvis aliis articulorum doloribus nihil adhibebis,
 » ne, si frigidum sit, ad principalius membrum
 » repellas; si verò calidius, plùs ad affectas dolore
 » partes attrahas, sed blandioribus auxiliis curan-
 » dum est, laborantem ab accessionis sævitiâ
 » eruere, quod leges fusiùs libro nostro *De arte*
 » *medendi morb. intern. proprio capite*. Cessante
 » verò accessione, providendum est, ne iterùm
 » præcedens symptoma revertatur, quod facies
 » eisdem præsidis, quibus si præsens fuisset, cu-
 » rasses : hoc uno in considerationem abhilito,
 » quòd si fieri possit uno et eodem præsidio, febri
 » et symptomati provideas, sive sanguis mittendus
 » sit, sive corpus purgandum. Verùm, si id compli-
 » cationis conditio non ferat, symptoma auferen-
 » dum est, ac si sanguinem miseris, ex eâ parte
 » et venâ facito, quæ vel capiti mandanti, vel
 » thoraci, à quo malum oritur, è directo respon-
 » deat, aut à jecore, et venis majoribus si articu-
 » losum membrorum genus pati videatur, vel ex
 » talo, si aut menses, aut hæmorrhoides defi-
 » ciant, vel uterum compati constiterit. Quod qui-
 » dem pari beneficio proderit febri et accidenti,
 » haud secùs quàm expurgans medicamentum, si
 » eâdem lege præstiteris; quippè ea adhibebis
 » primò, quæ materiam accidentis respiciant, postea
 verò

» verò quæ febrem licèt aliquandò mixta adhi-
 » bere oporteat medica menta, utrumque nimirùm
 » respicientia. Verùm si ex prædictis accidentibus
 » aliquod jam firmatum esse constet, quod liquido
 » cernes, eo quòd die etiam quietis adhuc perse-
 » verat, non omninò posthabitâ febris curatione,
 » ipsi ex toto innitendum est, quod facies juxtâ
 » naturam mali, quod supererit, idque quæres pro-
 » prio ejus capite, ut et universalialia et particularia
 » auxilia probè administrare possis.
 » Verùm si morbus præstiterit expectandi inducias,
 » majori diligentia studendum est tertianam fe-
 » brem curare, siquidem illa vicem causæ moventis
 » gerit, et eâ curatâ facilè accidentia delitescunt.

SCHOLIUM II.

Cùm ergò in hisce casibus ex mente auctoris,
sic affectos præcavere oporteat, ne iterùm revertatur
malum, et in accessionibus periclitentur, supposito
 quòd malum hujusmodi sequatur accessionem,
 velut umbra corpus, soli idcirco paroxysmorum
 præcautioni (quoniam facilè hodiè possumus) per
 usum Chinæ Chinæ insistendum esse, nullus dubito,
 omissis tot medicamentorum catervis, quæ ad tol-
 lendos hujusmodi affectus solent usurpari; pro
 quibus in tali casu submovendis unus cæteroqui
 sufficit cortex, ut constat etiam ex *historiis XI. et*
XVII. cap. x. libri primi relatis, de tussi tabem mi-
 nante, et de visûs obcæcatione, per quartanam
 inductis, et per Chinam Chinam curatis. Quoties
 enim strenuum istud febrifugum conveniat (ut in

similibus casibus, si graves sint, profectò convenit) non est cur de tot aliis remediis infirmioribus æquè ac superfluis simus solliciti. Cardo praxeos versatur non in multiplicitate, sed in electione remediorum, simulque in opportunitate noscendâ, et captandâ occasione. In iisdem proptereâ circumstantiis idem morbus remediis iisdem ab uno medico tollitur, ab alio non ità. Ordo quippè, seu tempus peculiare administrati remedii exitûs varietatem parit. Ars quævis mechanica paucis instrumentis perficitur, eademque iisdem à duplici artifice inæqualitèr exercetur, parium instrumentorum usu dispari diversitatem faciente. Haud alitèr modicus medicamentorum apparatus (quem in numero satis parco verè consistere, et nihilominùs sufficere, aliquandò forsàn ostendam) in manu periti medici. Morbis ferè quibuslibet sanabilibus sanandis par est. Octo tantummodò voces musicæ, si rhythmicè disponantur, concentibus omnibus, utut diversis, edendis sunt satis: inconcinnè verò, vel intempestivè prolatae, et dissonant, et harmoniam perturbant. In regendâ sanitate, quæ in fluidorum et solidorum harmoniâ consistit, analogismi par ratio; at de hoc satis.

» De tertianâ perniciosâ ob humoris venenositatem, quæ necessaria ad curationem et notitiam existunt, reperies libro etc. »

SCHOLIUM III.

De eo deniquè, quod innuit auctor circâ *sextam* speciem tertianæ perniciosæ tùm dignoscendam,

tum curandam, nil dico, cum eam ad commune febrium malignarum et pestilentium genus reducat; communemque cum illis diagnosim, prognosim atque medelam alibi instituat; quod hujus loci non est.

CAPUT VIII.

Prava rursus perniciosarum febrium intermittantium natura innuitur ex descriptione *Ricardi Morton*, adjunctis pariter ad claritatem fusioribus scholiis.

VARIAS perniciosæ intermittentis icones hactenus nobis exhibuit *Mercatus*; modò versicolore illius imaginem, diversos, ut ait, morbos mentientem pingat *Mortonus*, simulque vim eximiam Peruviani corticis pro tanto hoste debellando testetur. Testetur, inquam ipse, me asseverante, seu (quod dignius est) ipse doceat, me solùm testante. Æquum est enim, ut quemadmodum ille antè me insignia corticis experimenta in casibus admodum arduis, et nonnunquam in perniciosis febribus, de quibus impræsentiarum est sermo, tentavit ac feliciter absolvit (quod historiæ ab eo descriptæ satis ostendunt) ità in earumdem febrium descriptione, ipsarumque per corticem curatione tradendâ, primas teneat: ego verò ad confirmanda illius asserta tantummodò calculum addam ex propriâ et multiplici experienciâ petitum. Ingenuè tamen repeto, quod et olim lectori præfatus sum, me nempe circa hoc nihil, ne analogicè quidem, desumpsisse à *Mor-*

tono, cujus opera, quæ penès me existunt, tempore quò primum satisque notum in urbe meâ tentamen inii (permittentibus id ipsum quamvis spe nullâ aliis comprofessoribus tùm nostratibus, tùm exteris) nondùm erant cusa, nedùm mihi nota. Et licèt in ipsis admonear à bibliopolâ, tractatum pyretologicum sejunctim priùs impressum fuisse, illius profectò nullam unquàm ne per famam quidem notitiam habui; sed hoc nil interest. Si de opposito quis velit, valeatve suspicari, sciat majorem mihi fore laudem ac gloriam, si viri clarissimi potius quàm meo fretus consilio, prima experimenta (utut rationabilia) dicar tentâsse. Utcumquè ego de hac nostrâ in methodum non longè absimilem, sed tamen diversam, coincidentiâ adeò mihi complacuit tunc cùm *Mortoni* pyretologiam lustravi, antea (fateor) fermè neglectam, ut jus promeritum eidem redditurus, parùm quidem abfuerit, quin tractatum ipsum integrum reimprimi curârim (quem tamen à fronte ad calcem attentè à cunctis considerare velim) illique meas observationes, casuumque consimilium historias adnexerim. Id autem aggressus essem, ut quamplurimas veritates practicas inibi existentes, sed vel non satis patentes, vel non satis perspectas; et fortassè minimè creditas in propatulo ponerem. Iis etenim alicubi dilucidatis, et ab aliquo identidem excessu (si fas sit dicere) castigatis, melior forsitàn sors accessisset, majorque itidem perlegendibus utilitas. Sed ex aliâ parte, cùm quidquid in eo tractatu propius videtur respicere

perniciosas intermittentes, erui possit partim quidem ex capitibus, ubi de signis intermittentis febris tum diagnosticis, tum prognosticis, sed præcipuè ex capite speciali, ubi de genio intermittentium versatili, aliosque morbos etiam acutissimos simulante, sermonem habet; idcirco hoc unum saltè *caput* ad unguem transcriptum hìc inserte lubens decrevi. Ne verò cum *Mortono* alitèr agerem, ac egerim cum *Mercato*, congruum duxi illius quoque sensa perpendere, nonnullisque animadversionibus tantillum augere, propriam subindè, et apertam perniciosarum periodicarum descriptionem ac curationem promulgaturus, Peruviano cortice validè administrato feliciter absolvendam. Quod quidem intelligendum est, ut tunc dicturus sum, non modò de eàdem febre suos adhuc typos, etsi crudeliter, patentèr tamen servante; sed de ipsà etiam jam in *continuam* conversâ, et obscuratis nondum tamen planè abolitis periodis ad exitium properante, cum nempè jam frigefactus universalitèr ægrotans cum minutilis sudatiunculis ferè sine pulsu jacet, moribundo similis, dummodò usquè in alteram exacerbationem (à quâ per diem naturalem circitèr distet) valeat sufficere. Priusquàm ergò ista propiùs aggrediar, mihi interim præludat.

RICARDUS MORTON

De proteiformi intermittentis febris genio.

» **E**XEMPLA febrium intermittentium cortice *Pe-*
 » *ruviano* curatarum adjungere irritum planè atque

» inutile esset, postquàm cl. *Badus*, *Sturmius*, cæ-
 » terique remedii hujus polychresti fautores hanc
 » provinciam jamdudùm susceperint; et nemo ho-
 » diè (quod scio) de viribus hujus remedii feбри-
 » fugi dubius hæreat. Quandoquidem autem ob
 » vehementiam symptomatum, ubi natura ferè in-
 » tegra acriùs stimuletur ad luctam cum veneno
 » hostili instituendam, hæ febres haud rarè ple-
 » rosque alios morbos, eosque acutissimos simu-
 » lare soleant, *corticis* tamen viribus cedant, et si
 » *cortex* non exhibeatur, sæpiùs funestæ evadant;
 » operæ pretium duxi exempla aliquot hujusmodi
 » febrium, quas nuperrimè observavi seligere,
 » scriptis mandare, atque publici juris facere. At-
 » que equidem hoc pensum eò lubentiùs aggredior,
 » quia nemo adhuc (quantùm scio) hoc subjectum
 » tractavit, cujus cultura ad praxim medicinalem
 » promovendam maximi momenti mihi esse vide-
 » tur. Siquidem inter innumera illa symptomata
 » hasce febres comitari solita, nullum est quod
 » non aliquandò adeò vehementèr sæviat, ut vita
 » ægri indè in præsens discrimen adducatur, et
 » *typus* febris in variis suis stadiis *algoris*, *caloris*,
 » et *sudoris* abscondatur penitùs et opprimatur,
 » itaut neque ex urinâ, temperie, pulsu, vel alio
 » quoque solito modo distingui possit; verùm sub
 » larvâ *algoris* funesti, *vomitionis* indesinentis, *diar-*
 » *rhææ* torminosæ, *cholerae* morbi, *colicæ* ventri-
 » culi, *hemicranicæ* periodicæ, *apoplexiæ*, *syncopes*,
 » *rheumatismi*, *spasmi* universalis, *pleuritidis*, pe-

» *ripneumoniæ*, *doloris lateris punctorii*, vel alterius
 » morbi securè delitescens, medicum à scopo suo
 » non rarò abducat. Symptoma quidem intereà
 » remediis propriis, sed incassum, tentatur; nam
 » posthabito fermento febrili proximâ efferves-
 » centiæ periodo, priora aut deteriora symptomata
 » inexpectato recrudescent, medicus *Sysiphi saxum*
 » volvit, atque æger vitæ dulcissimæ dispendio,
 » aut saltèm magno sumptu, ignorantiae vel incu-
 » riæ medici pœnas serò luit. »

SCHOLIUM I.

Supervacaneum jure merito reputat cl. auctor, hisce temporibus scribere intermittentium vulgarium ope *Chinaë Chinaë* absolutas; sed ex adverso æquè merito necessarium censet, ac opportunum recensere curationes earum intermittentium perniciæ, quæ hominem in maximum vitæ discrimen adducentes, cortice nihilominus ritè oblato, æquè promptè curantur ac benigniores. Hanc itaque praxim illustrare maximè interest, præcipuè cum ea extendatur ad febres ipsas recentem continuitatem adeptas, dummodò fuerint intermittentes ab ortu, et post acquisitam continuitatem, consuetas adhuc incrementi, et decrementi vicissitudines atque periodos servant. Illas enim considerandas esse ut intermittentes, et ut tales cortice paritèr certò curari, nos docet præter *Mortonum* doctissimus *Sydenham* in epistolâ ad *Bradyum*, ut videbimus tum *cap. 5 libri 4*, tum *cap. 3 libri 5*.

Nos itaque in hac praxeos medicinalis parte promovendâ *Mortoni* morem secuti, post statutam methodum nostram offerendi cortice n in hujusmodi febribus, cæteroquî lethalibus, complementum ejusdem methodi ab exemplis suo loco subnectendis mutuabimur.

Non sine magnâ ratione hoc remedium hîc et alibi ab auctore *Polychrestum* dicitur, quippè verè ad multa et magna perutile in lineâ alexipyretorum. Utinàm ad alios morbos similia possideremus; sed paucis demptis, quorum virtus certa est, et utilitas evidens, ars nostra medicamentis superfluis alioquî ditissima, bonis certisque, quæ innotuerint, caret: imò forsitan ob hoc ipsum est inops, quia inutilibus, dubiisque superfluit. Obruit nempè vel ipsum medicum supervacanea pharmacorum copia: quandoquidem ægrè nimium è mille figmentis una quæ fortè vix est practica veritas potest discerni. Deme (audeo dicere) ab arte medicâ phlebotomiam, purgationem, chalybem, Chinam Chinam, ipecacuanham, opium, thermas, viperam, mercurium, diversaque antivenerea, lac, serum, aliaque non multa, et fermè nudam reddes. De chirurgiâ, quod est ad remedia quædam, non ab simile sit judicium. Perita namque manus sæpè sola, vel ferro prudentèr, vel igne cautè, vel fasciis elegantèr, et cum regimine instructa, quamplurima præstat. Contractatio vulnerum crebrior, et medicaminum multiplex appositio, vana sæpè, imò plerunquè noxia artis ostentatio est. Super hac re

satis dissertè suis temporibus *Cæsar Magatus*, illumque secutus *Septalius* (quodcunque sit quod de utroque fert iudicium *Sennertus*) nostris verò temporibus *D. Bellot* ejusdem *Magati* sectator novissimus, sive deindè hujus cum illo conformitas fortuitò tantùm contigerit, quod non repugnat, sive potiùs de industriâ, ut in peculiari epistolâ notat et in pinguiori, quod meditabatur opere, se ostensurum fore videbatur accuratissimus *Sancassanus*. Utcunquè, inventum primum raræ solutionis vulnerum, *Romanis Chirurgis*, morem verò oblegandarum turundarum, *apparitio* cuidam Vasconi, mox et *Lemosio* tribuit ingenuè *Jo. Baptista Magatus*, *Cæsaris* frater; methodum autem hujusmodi praxeos rationalem ipsi *Cæsari*, quem fusè doctèque tuetur in suis *considerationibus medicis tom. 1. partis 3*. At hoc nihil ad nos. Sicuti ergò paucà chirurgo remedia, ità et non multa sufficiunt clinico. Inter ea locum sanè non infimum tenet China China, imò ausim dicere, quod omnibus palmam præripiat. Magnorum equidem remediorum nomina sibi vindicant antonomasticè venæ sectio tantùm, atque purgatio; sed istiusmodi privilegium illis quandoquè competit, quandoquè non. Ego magna voco quæcunque sanant, et eò majora, quò meliùs.

En quomodò perniciosas febres describit auctor, quasi sub aliorum morborum acutissimorum larvâ delitescentes, nec proindè in propriâ specie cognoscibiles (adeò obscurari putat earum natu-

ram) sed exitiales interim atque funestas nisi cortice statim domentur. Ex quo potissimum effectum debellatæ jam febris essentiam, veluti à posteriori deduci, aut aliundè deductam confirmat.

Fallitur hic auctor, dum se istarum febrium primum observatorem aut relatorem credit, etsi à semetipso tantum didicerit. Vidimus jam quid scripserit de iis, et quàm luculentè *Mercatus*, qui *Vallesium*, *Zoarum* et *Averroem* quoque hujusmodi febrium non omninò ignaros censet, ut ex eorum textibus ab ipso *Mercato* allatis, et de *insanabili tertianâ* mentionem facientibus, videtur posse deduci. Vidimus paritèr, aut saltè enunciamus, quomodò lucubrationem ipsam *Mercati* per compendium denuò transcripserit *Daniel Sennertus*. Ab ullo quidem alio peculiarem institutum fuisse tractatum, peculiaremve curationem non novi; à pluribus tamen aliquam obitèr, infructuosam licèt, ac sterilem factam fuisse mentionem, facile est palàm facere. Sic *Lazarus Riverius* practicus celeberrimus tertianarum intermittentium prognosim designans: *Prognosis*, inquit, *dèsumitur ab Hippocrate, aphorismo 59., sect. 4., « Tertianâ exquisita septem circuitibus ad summum judicatur; » Et aphorismo 43. ejusdem sectionis: « Febres quocumque modo intermiserint, periculum abesse significant. » Quod tamen intelligendum est, subdit idem Riverius, de tertianis febribus omnis malignitatis expertibus. Dantur enim tertianæ malignæ, quæ quamvis evidentes habeant intermissiones, ægrotantes tamèn*

non rarè de medio tollunt. Præterea multa febrì tertianæ possunt supervenire, quæ vitæ periculum inferre possunt quamvis febris ex se periculosa non sit. Clariùs autem pravam tertianarum perniciosarum naturam exprimit, ubi de febribus pestilentialibus agens, ait tales esse quandoquæ febres intermittentes, his verbis: Quamvis dixerit Hippocrates, febres intermittentes periculo carere, quomodocumquæ intermiserint, id tantum intelligendum est de iis quæ nullius sunt malignitatis participes. Videmus enim singulis ferè annis, in hac saltèm regione, febres tertianas intermittentes, quæ summæ malignitatis sunt participes, tertid, vel quartâ accessione ægros de medio tollere; alias quæ eos in gravissimum vitæ discrimen conjiciunt, maximâ symptomatum sævitâ; cujusmodi etiam exempla refert in centuriis suarum observationum. Hieronymus Mercurialis de tertianâ intermittente verba faciens habet hæc incidentèr: Tertiana quæ fit à bile ærugineâ, non solum periculosa, verum etiam exitiosa est. Agensque postmodum de tertianâ nothâ, idem raptim confirmat ex sententiâ Avenzoar. Unius itidem casûs perniciosi hujusce generis, quasi prodigii cujusdam meminit Hercules Saxonia, hæc de tertianâ crassiculo sermone conscribens: dico, ex se esse salutarem (intellige tertianam) quia ratione motûs materiæ non admodum salutaris; si moveatur maximo cum impetu ad os ventriculi, qui habent os valdè sensibile ventriculi, fit cardialgia talis, quæ desinit in syncopem et mortem; quale exemplum

memini me vidisse, dùm essem junior. Pompejus quoque Sacchus cardialgiam considerans, ut februm symptomata, eam levitèr adumbrare videtur tertianæ perniciosæ speciem, quæ proptèr adjunctam cardialgiam fit talis, inquiens obitèr: cardialgia febricitantes, etiam ex intermittente febre, ad extremum vitæ ducit, et multoties perimit, bile morsu oris ventriculi cum summo dolore vires resolvente, cum perversione cerebri et cordis, cum quibus prædictum orificium summam habet connexionem.

Alii insuper, quos summatim præstat, quàm operosè recensere de iisdem perniciosis intermittentibus, perfunctoriè licèt, locuti sunt, inter quos *Epiphanius, Donatus, Horstius, Rhodius, Restaurandus, Sydenham, Salmut, Sylvius, Ettmullerus etc.* ut proptereà opinioni, quam de se uno *Mortonus* habuit, locus non detur. Quia verò omnes hucusquè recensiti scriptores, *Mercato* excepto, nec non, si velis, *Restaurando* etiam et *Sydenhamio*, aut infrà, praxim medicam suis luminibus vix tantillum in hac lineâ promoverunt, *Mortonus* verò nervosam certamque curationem viriliter docuit: ideò non injuria plurimum sibi tribuit, si non quod ad descriptionem morbi, saltèm quo ad curationem; quamobrèm non modò excusationem meretur, verùm et laudem. Me quoque reputabam ego methodi quondam meæ in *perniciosis* inventorem unicum, cùm tamen methodum non valdè absimilem ad easdem jam tùm quoque, et antè me, ut testantur illius scripta, in regione suâ

exerceret *Mortonus*. Immò cum in ipsâ Italiâ, senis nempè, Florentiæ, in regno Neapolis et Romæ, referente *Bado*, adhiberi cœperit, ferè statim ac innotuit cortex, miscellaneas ad febres, ut ajunt, et hemitritæos (cujus febris miram curationem ope Chinæ Chinæ à se absolutam in quodam sacerdote ex capuccinorum familiâ idem *Badus* per extensum describit) quin et ad continuas simpliciter profligandas : ulterius, cum postremis hisce temporibus, sub cælo præsertim Romano ac Hetrusco, prout indicare videntur opuscula indè profecta, in usu sit idem remedium, non secùs ac in Galliâ, ad omnes parit febres, quas humorales vocant (utinàm semper cum fructu) et signatè ad eas quæ præcipiti periculo mortem minantur, non potest quin inter illas, saltèm fortuitò, etiam intermittentes perniciosæ quoquo modo comprehendantur.

Testem expertum jam mihi se præbuit hujusce rei laudatus nupèr doctissimus *Lancisius* nitidissimâ epistolâ suâ, quam quidem, utpotè ratione elegantix suæ publicâ luce dignissimam, hîc placuisset inserere, nisi uberior ergà me auctoris humanitas et laudum minimè promeritarum copia, mihimet mecum habitanti, curtamque suspellectilem meam satis noscenti, sufflamen imposuisset, ne incautè foràs excurrerem. Paragraphum tamen unicum, rem perstringens, ex totâ liceat excerpere epistolâ : *Opus tuum* (itâ vir amplissimus) *de febribus perniciosis cortice Chinæ Chinæ potissimùm subactis,*

plura sunt, quæ mihi, cunctisque artis nostræ professoribus expectatissimum efficiunt : illud tamen maximè desiderium meum excitat, quòd Romæ observaverim in epidemicâ istiusmodi febrium constitutione, anno 1695. ex aquis stagnantibus ortâ, corticem illum specificum antidotum fuisse. Quamobrem, cùm studia nostra in solam veritatem quærendam directa sint, futurum confido, ut observationes meæ tuis animadversionibus, et commentariis accuratissimis sint plurimùm illustrandæ. Cùm autem nuperrimè tantùm, ac proinde sera hæc ad me notitia pervenerit, (profecta scilicèt nimis jam præli opera) obstiteritque angustia temporis, ne clarissimi viri observationes, siquidem illas, ut videtur innuere, typis ediderit, mihi tempestivè parare potuerim, congruum duxi, incidenti hac ejusdem assertione, id ipsum, quod paulò antè generalitèr conjeci, specialius in præsentia, validiùsque confirmare.

Ut ad Mortonum redeam se reputantem observatorem unicum intermittentium perniciosarum, minimè silentio prætereundum videtur, quòd, cùm Restaurandus, ut suprà innuebam, descripserit atque illustrârit historiis curationem febrium syn- copalium, cardiacarum, diaphoreticarum, hepaticarum, hemitritæarum etc. ope Chinæ Chinæ, etsi cespitantèr, ac methodo languidiore, satîs patet, aliquam saltèm perniciosarum quarundam curationem per usum Chinæ Chinæ innotuisse huic auctori. Immò cùm scripta sua pluries postmodùm

recusa jam olim primò evulgârit auctor iste, aliqua facile poterat, si non debuerat (neque enim teneatur nosse quilibet quod scripsit quisque) *Mortono* posterius, ut mihi videtur, scribenti præluxisse notitia, quòd non sibi soli, verùm et *Restaurando* observatæ fuerint nonnullæ exitiales intermittentes, et quòd ipse *Restaurandus* per oblationem corticis eas curaverit, aliisque eodem remedio, per vulgatam tamen tantummodò illius infusionem, curandas proposuerit, *Sydenham* paritèr in epistolâ responsoriâ ad *Bradyum* sibi scribentem anno 1670. in peculiari paragrapho mentionem facit intermittentium quarumdam (quas nos *lethargicas* appellabimus) in quarum principio, loco symptomatum consuetorum, veræ potiùs apoplexiæ symptomata apparebant, ut mox videbimus, quas tamen febres solo interim cortice sanabiles censet. Hæc quidem obiter quoque *Sydenham*. Quòd verò specialitèr, et sorte à reliquis valdè distinctâ, in arduis quibusvis, ac multifariis perniciosarum intermittentium circumstantiis ac differentiis, extremisque ægrorum angustiis usurpetur cortex (quo indiscriminatim, ut aiebam, utendum esse in omnibus febribus, haud facile assentiar) seu, quòd usurpetur modo peculiari quo opus est, dosique ac methodo determinatâ ad ritè obtinendum effectum, hoc est, quod non adeò tritum adhuc censeo, et quòd uni fortè *Mortono* mecum innotuisse crediderim.

Progreditur nunc auctor ad recensendos morbos

(meliùs dixisset gravia symptomata aliorum cæteroquì morborum potiùs quàm febris intermittens propria) sub quibus abditam latere intermittentem febrem, conatur probare ex periodico eorundem symptomatum recursu, et ex medelâ per corticem afferri aptâ ægrotantibus hujusmodi, *alioquì quasi de repente*, ut inferiùs inquit, *animam efflaturis, nullâquẽ aliâ arte sanabilibus*. Quam tamen febrem adeò absconditam statuit, et omni veræ febris characteribus destitutam, ut *neque ex urina, temperie, pulsu, vel alio quoque solito modo, aut indicio distinguì possit, aut accuratissimo observatori se prodat*. Ego verò fateor, me talem obscuritatem nunquàm observâsse, nisi cùm jam tertia vel quarta accessio ægrum ad extrema ferè deduxerit. Cæterùm primis accessibus manifestissimam semper, et non rarò blandam febrem intermittentem deprehendi; et, si fortè aliquandò serò vocatus sim, postquàm res in præceps ruerit, facillimè paritèr ex adstantium aut ægrotantis relatu, de præcedentibus paroxysmis atque periodis conscius factus, perniciosam febrem (utut algidus, ac sine pulsu appareret æger) semper dignovi, et quemlibet medicum facilè dixerim ad hujusmodi dignotionem teneri. Sic illas omnes palàm dignovit atque distinxit *Mercatus*, ut videre est apud illum, ubi de simulato dolore pleuritico, catarrho suffocativo, ashmate, rheumatismo etc. mentionem facit. Ista autem omnia, non ut morbos, sed ut accidentia febris periodicæ patentis, non verò absconditæ considerat.

considerat. Iterùm equidem fateor, enumerata nuperrimè accidentia à *Mercato*, atque *Mortono* in perniciosis observata, mihi perrarò occurrisset, quemadmodùm alia nonnulla mihi cum *Mortono* comperta fortè non observavit *Mercatus*, ut jam adnotavi in scholiis ad ipsum *Mercatum*, cap. 7. schol. 1. et ut dicturus sum de differentiis perniciosarum ex observatione meâ, libro sequenti, cap. primo.

Sed præter *Mercatum*, *Sydenham* quoque hujusmodi febrium perniciosarum accidentia alios morbos simulantia, pro meris earumdem symptomatis expressè dignovit, atque ut pro talibus tantùm haberentur, monuit his verbis in citatâ nupèr ad *Bradyum* epistolâ: *hic autem commemorare libet, quòd sub primos hujus constitutionis annos symptoma quoddam insigne febribus intermittentibus quandoquè supervenerit. Nempè earum paroxysmi non cum rigore et horrore, quos postea febris excipit, invadebant, sed æger iisdem planè symptomatis tentabatur ac si apoplexiâ verâ laborâsset, quæ tamen nihil aliud erat, utcunque hunc affectum æmularetur, quàm ipsa febris caput impetens etc. Hoc autem in casu, quantumlibet evacuationes omnes, cujuscunque demùm generis sint, indicari videntur, ad revellendos scilicèt ex cerebro humores, ut in apoplexiâ primariâ fieri solet; cædem tamen omninò omittendæ sunt, utpotè quæ originariæ hujus symptomatis causæ, febri nempè intermittenti prorsus adversentur, ac proinde mortem accersant; quod et*

ipse novi. At econtrà expectandum, donec paroxysmus sponte sud evanuerit, quo tempore cortex, modo citiùs idem ingeri non poterit, quàm primùm est exhibendus, et in intervallis ab hujusmodi accessionibus liberis idem sedulò repetendus, usquè dùm perfectè convaluerit æger.

« Sic ubi, præ gradu veneni summè deleterio,
 » spiritus adeò perculsi sunt, ut à primo ictu sese
 » iterùm nullatenùs expandere valeant, *algor*, qui
 » primum horum paroxysmorum insultum, ex insultu
 » tituto naturæ, comitari solet, eousquè protra-
 » hitur, donec æger *deliquiis* frequentèr recur-
 » rentibus confectus, tandem fati cedat. Intereà
 » remedia intùs, vel extrà ad flammam vitalem
 » resuscitandam incassùm applicantur, febris au-
 » tem nullo indicio ex urinâ, temperie, vel pulsu,
 » accuratissimo observatori sese prodit. »

SCHOLIUM II.

Quæ passim obtrudit auctor de veneno febrili spirituum expansionem plùs aut minùs impediante, ordinem habent ad illius hypothesim, quâ considerando corticem Peruvianum ut antidotum, fermentum febrile ut venenum respexit. Equidem Peruvianum corticem, sive antidotum vocites, sive absorbens specificum, febribus præsertim intermittentibus addictum, parùm refert; in quo sensu non malè quis chalybem appellaret antidotum chlorosis, sulphur antidotum scabiei, et sic de pluribus aliis remediis ad alios morbos. Paritèr causam fe-

brium, sive fermentum dicas, sive venenum, nisi aliud addas, res æquè obscura est, et tota ferè discrepantia videtur consistere in vocibus; nihilo-minùs communis acceptio utriusque termini aliquid in re valdè diversum solet importare. Quid per *fermentum febrile* soleat intelligi à plurimis auctoribus in explicandâ intermittentium causâ, et quid intelligam ipse, generalitèr saltèm, atque confuse, vidimus aliàs; statuimusque ad minimùm, illud esse succum aliquem incongruum, ac heterogeneum, cum sanguine non probè miscibilem, adeòque illum in morbosam fermentationem, seu mavis effervescentiam concitare aptum, donec ab eo secernatur et expellatur; qui succo sensibili, atque, ut aiunt scholæ, quantitativo peculiarem in corpore nostro sedem habenti, velut vero et palpabili fermento, si posset determinari, accidentalis postea sit varia, et modò minor, modò major, modò maxima, et incomprehensibilis activitas aut acrimonia, quæ proindè nonnunquàm maligna, et venenata per nostrum debilem intelligendi modum queat appellari. Cùm enim vitiosa succi hujusmodi dispositio non in universâ consistat illius quantitate, sed tantùm in salibus aliquot parvæ molis, et peculiaris naturæ, aut configurationis in ipso existentibus, quibus retusis vel solutis, aut quomodo-libèt enervatis, restituitur debita crasis eidem succo peccanti; quod omnibus universalitèr competit nostri corporis humoribus quoque modo vitiatis; hinc est, quòd sales hujusmodi, dùm talis naturæ

sunt, ut vulgarem tantum ac benigniorem excitent effervescentiam, etsi simul quoque afficiant spiritus, sintque molis, ut diximus, inconspicuæ, verum tamen veneni nomen nequaquam mereantur: mereantur verò cum talis naturæ sunt, ut verè deleterium, ac ineffabilis efferaeque pravitatis præferant characterem in ipsorum præsertim texturâ exoticâ, et sapore abominabili indè procedente repositum. Quid ergò per *venenum* generalitèr quoque, ac indistinctè debeat aut soleat intelligi, ex his ipsis, quæ modò per transennam diximus, sufficientèr potest dignosci; satisque liquet, characterem hujusmodi febrilibus succis nonnunquam quidem accedere posse, sed tamen ut plurimum non accedere.

Mortonus autem simplex, nudumque venenum deleteriâ vi præditum esse contendit id omne, quod febrem gignit, et quod dici consueverit in solis *malignis*, ac *pestilentibus* febribus de veneno ingenito, explicari solito relativè ad duo venenorum genera, quorum alterum figit, alterum dissolvit humores, ac pessundat spiritus, ipse ad omnes etiam *benigniores* intermittentes absque notabili distinctione, nisi pro diverso majoris, vel minoris intensiois gradu, traducit. Cumque ficus febriferas, quas *Pharaonis* vocant, in Sardinia nascentes, et tertianam febrem causantes (ut ex *Conciliatore*, et *Cardano* refert *Badus*, et ex *Bado* ipso *Mortonus*) iisdem manifestis qualitatibus pollere credat ac cortex eandem tertianam fugans, visum propterea.

est illi in duobus hisce quoàd affecta contrariis, et quoàd sensibiles qualitates similibus, eam statuendam esse abditam oppositionem, quæ inter venenum intercedit et antidotum. Quòd si quis ab eo quæreret, non quidem planè quid sit et quale venenum febrile, sed saltèm ubinàm, aut undè generetur, cuinam subjecto primitùs inhæreat, à quo postmodùm imprimatur in spiritus, cùm in illis immediatè gigni non possit; itèm quo pacto sit aliquandò tam mitè, cùm tamen sit semper venenum, quomodò per intervalla vel reproduc-tum, vel motum, et alia hujusmodi; etsi plurimæ ex his instantiis omnes torqueant in quocumque philosophandi systemate, vereor tamen, ne ille plusquàm cæteri, tandèm cogeretur respondere, se potius metaphoricè, et per analogismum quemdam, quàm strictè et propriè veneni nomen usur-passe, et sic in assignando hujusce veneni vehiculo quantitativo, primàve illius scaturigine, cum aliis fortassè coincideret.

Neque satis eidem suffragari videtur ingenua confessio, quam spontè profert, ad evitandam difficultatem explicationis suæ hypotheseos: se nescire scilicèt venenorum æquè ac antidotorum naturam sicuti et naturam spirituum, in quos venena primariò agunt, et antidota, *satiùsque esse, philosophum modestam philosophiam professum, sanà mente quædam ignorare, quàm insanè nugari et delirare.* Ad nihilum, inquam, videtur valere hujusmodi confessio, quia quemadmodùm ineffabilis virulen-

tia cicutaë, arsenici, cantharidum etc. ipso notante *Mortono*, reapse latet sub determinato et palpabili vehiculo substantiæ quantitativæ talium plantarum, mineralium, animalium etc. (rectius forsitan sub determinatâ combinatione salium essentialium, seu particularum illas componentium talem determinatam figuram habentium) quæ plantæ, animalia etc. possunt à nobis indigitari, tanquàm subjecta illius virulentiaë nostris spiritibus communicabilis; ità cum proportionem dicendum foret de veneno febrili, ac propterea munus auctoris esse fluidum aliquod, seu solidum designare, cui, tanquàm subjecto inhæreat, seu in cuius salium particularumque figurâ atque texturâ consistat ipsa cæteroquì inexplicabilis virulentia fermenti febrilis. Sanè secundùm generalem et indeterminatam illius appellationem morbos omnes à peculiari veneno oriri possumus asserere, omniaque eorum remedia, quæ specifica vulgò appellantur, antidota nuncupare.

Autorem tamen nonnihil juvat ejusdem tractatûs, in quo conatur ostendere quàm similia sint plûs minûs febrium ac venenorum accidentia; quomodo in diversis febribus diversorum paritèr nominatim venenorum abservetur character, et similia, quæ in praxi prorsûs contemnenda non sunt, sed imò quæ perpendantur digna. Et, ut verùm fatear, cùm in febribus saltèm perniciosis, adeoque malignis, accidentia quandoquè talia contingant qualia à toxico propinato solent suborri, nullus dubito, quin tunc saltèm venenatum dici queat, sterili qui-

dem nomenclaturâ, illarum fermentum. Id propterea à *Mortono* unicè peroptassem, ut loco talis veneni vehiculum potius aliquod sensibile quemadmodum suprâ innuebam venenositatem nonnunquàm suscipiendi capax, pro causâ febrium ordinariâ attulisset, seu succum aliquem, sæpius quidem, vel semper incongruum, non verò semper venenatum; sed aliquandò talem, et aliquandò non: hoc est succum vitiosâ quidem, sed benigniore dyscrasiâ ut plurimum præditum, nonnunquàm verò etiam sylvestri ac exoticâ, sive (quemadmodum loqui mos est) venenatâ, ut nonnihil fusiùs suo loco videbimus. Ast vehementi, quam præconceperat, tenacitèr adhærens ideæ, quòd cortex intermittentes benignas æquè ac malignas vincens, esset ubiquè vera antidotus secundùm rigorosam obscuramque per consequens hujusce termini significationem, omnes indiscriminatim febres ab ipso devictas, veri quoque veneni obscuri paritèr ac ignoti, sobolem esse, sibi haud difficultèr persuasit, quod tamen in hisce terminis nonnisi difficultèr poterit aliis forsàn suadere.

Ad modulum autem suæ hypotheseos cuncta per affectionem spirituum à veneno variè perculsorum explicare conatur per totum caput, ubi semper nomine diversorum morborum gravissima perniciosarum symptomata designat, iisdem febribus, secundùm ipsum, omnimodè absconditis. Utilis nihilominùs est ad praxim illius descriptio, quam idèò ad calcem usquè capitis légenti considerare

expediet : quamvis in eâ non modò perniciosas febres à *Mercato* descriptas, verùm et alias antiquas ac confirmatas affectiones, aliosque morbos quoddam fortè periodum præseferentes, sub specie febris quodammodò latentis identidem pingat. Quâ in re, cùm *morbos* essentielles cum *symptomatis* febriùm videatur quasi confundere, possitque idcirco auctor noster vel in præscribendo cortice notari de excessu, vel de defectu in describendâ febre, hinc fortassè est, quòd minor quàm par fuisset, illi à plurimis sit adhibita fides, dùm tamen in iis, quæ ad perniciosas intermittentes reverà trahi possunt (quæ ubiquè in toto capite sunt permulta) fidem omnimodam mereatur.

« Parili modo, ubi in primo stadio paroxysmi,
 » fomes venenatus spiritus tantùm opprimat, ut
 » non ultrà solitam sphæram sese possint expan-
 » dere absque indiciis *febris* præsentis, *de nausea*,
 » *ægritudine*, et *vomitione* æger unicè conqueritur,
 » donec veneno à *cortice Peruviano*, vel aliâ an-
 » tidoto subacto, spiritus in nativum statum res-
 » tituantur.

» Nonnunquàm venenum febrile sub initium pa-
 » roxysmi glandulas intestinorum petit, et *fluxum*
 » *alvi* torminosum, vel dysenteriam excitat. At,
 » cùm spiritus diù uno tenore opprimuntur, hæc
 » symptomata utut continua statis periodis exacer-
 » bantur, et periodica evadunt sine febris indiciis
 » manifestis, et vires *opiatorum*, et *adstringentium*
 » longè superant, donec à *cortice Peruviano* cum

» *laudano* commixto, causa, scilicèt *fermentum fe-*
» *brile*, massam colliquans, æquè ac symptomata
» indè orta auferantur.

» Ubi venenum *emetica* simul ac *cathartica*
» naturam participat, æger frequenti vomitione et
» dejectione detinetur, et nisi spiritus in primo
» paroxysmi stadio expansione legitimâ virulentiam
» excutiant, formatur indè *cholera* morbus, febre
» neque per pulsum, urinam vel temperiem se
» manifestante. Ventriculo intereà, aut intestinis,
» aut utrisque simul ab acrimoniâ humorum in-
» tensissimè venenatâ sphacèlatis, æger brevî satis
» cedere cogitur, aut saltèm post inducias infidas
» datas, à veneno, proximo paroxysmo recrudes-
» cente, symptomata eadem crudelia et funesta
» revirescunt, nisi à tempestivâ *antidoti* febrifugæ
» exhibitione antevertantur.

» A parili gradu veneni non rarò observavi ægros,
» præsertim antiquâ et confirmatâ hujusmodi febre
» laccessitos, denuò (typo febris legitimæ amisso)
» perpetuâ *nausæ*, *ægritudine*, *vomitione*, *sudore*
» *colliquativo*, *suffocationibus hystericis*, cæteris-
» que id genus symptomatis in genere nervoso
» penè confectos, atque animam quasi derepentè
» effluros, quos debitâ dosi *corticis* (nullâ aliâ
» arte sanabiles) illicò restitui. »

SCHOLIUM III.

Quod de antiquis et confirmatis febribus hîc
inquit auctor, locum magis habere videtur in re-

centibus perniciosis tunc, cùm (ut videbimus in descriptione et in historiis specialibus earumdem) æger post tertiam vel quartam accessionem algidus factus, et sine pulsu, *typo jam legitimæ febris amisso, confectus jacet, quasi de repente animam efflaturus, quem tamen nullâ aliâ arte sanabilem debita dosis corticis illicò restituit*. Profectò verba ista sunt aurea; complectuntur siquidem descriptionem ægrotantis verè ad extrema redacti, nec febrem amplius suam tactui medico exhibere potentis, deficiente scilicèt calore et pulsu, quod quidem pluribus perniciosis familiare est, ut videbimus suo loco. Complectuntur paritèr mirandam virtutem corticis, ægro-
tantes hujusmodi *illicò* restituendi, quod verissimum est, si *debitâ*, ut inquit, *dosi* administretur. Quænam autem sit dosis debita, suo loco dicemus, et quidem regulâ certiore, dispositioneque elegantiore et magis ordinatâ, ac doceat ipse *Mortonus*. Tandem complectuntur prognosim (heu nimis certam?) de morte hujusmodi ægrorum, si corticis auxilio sint destituti. Funestum hunc eventum satis ostendit crebra experientia, satisque illum patefecêre lethalia prognostica diligentissimi *Mercati*, incassum à veteri medicinâ præsidia quærentis; ut proindè nullus sit locus invidæ malignæve assertioni, quòd hujusmodi febres in tali statu cortice statim, intrâ unum videlicèt, aut alterum diem jugulatæ, sine ipso etiam et tutius sanatæ fuissent, vel quòd sponte simpliciter suâ sanatæ sint. Loquamur apertè, et vel invitâ, ac refractariâ ore tenus, intimè tamen,

et in corde suo assentiatur fremens pervicacia. Obeunt non oblato cortice ferè omnes in eo statu, et si quis inter centum servatur, nonnisi longâ et difficili judicatione convalescit. Contrâ oblato congruè cortice servantur ferè omnes, et (quod illi uni inter remedia naturalia competit) servantur *illicò*. Hujusce asserti veritatem meliùs patefaciet methodus nostra, et evincent exempla curationum satis numerosa et insignia.

» Unicuique etiam in medicinâ versato notum
» est, horrendos dolores, (et iis qui à toxico pro-
» pinato proveniunt non minores) lumbos et crura
» spasmodicè lancinantes, non rarò primos in-
» sultus *febrium intermittentium* legitimarum, præ-
» sertim *quartanarum* comitari solere, durante
» *algore* et *rigore*, donec spiritus multo nisu ex-
» pansi ac agitati pares sint veneno activo elimi-
» nando. Flammâ autem indè accensâ, *spasmi*
» dolorifici sensim cessant : verùm, ubi spiritus
» vi veneni non tantùm deprimantur, sed etiam
» in statum explosivum universim adigantur, non-
» nunquâm deprehendi totum corporis systema
» indè perpetuò algens, idque diù ac sine ullâ
» febris notâ; totam autem machinam intereâ spas-
» mis universalibus, iisque horrendis et versatilibus
» hinc indè vellicatam et lancinatam. Nec mirum
» est, si æger perpetuâ ægritudine, vomitione,
» atque deliquiis indè confectus (ut fieri solet)
» brevi mortem oppetat, nisi ars tempestivè na-
» turæ languenti succurrat.

» Haud rarò etiam spiritus à nativâ suâ debili-
 » tate vel obstructione, atque præsertim à frigore
 » percepto, vel aliâ quâvis causâ evidenti ansam
 » præbente, in statum explosivum adiguntur; undè
 » partes aliquæ singulares, præsertim *thoracicæ*,
 » *pulmones* scilicèt, *pleura*, *diaphragma*, aut *ventri-*
 » *culus* ac *intestina* vellicantur, et spasmis lanci-
 » nantur. Æger præ atroci dolore perpetuò alget,
 » atque *deliquiis* frequentibus *suffocationibus* et
 » *vomitionibus* fatigatur, sine aliquâ notâ febris
 » evidenti; urinam claram reddit, et sine pulsu
 » moribundus jacet, quousquè spiritus veneno icti,
 » arte vel naturâ expansi flammam in massâ denuò
 » excitârint: morbus autem à *cholerâ* morbo,
 » *pleuritide* seu *peripneumoniâ*, duntaxât ex tussis
 » et *pulsûs* defectu, *vomitionis* et *doloris* excessu,
 » *deliquiis*, et extremorum *frigidityte* dignoscen-
 » dus est.

» Sæpè etiam ægros de dolore lateris unius aut
 » alterius punctorio conquerentes novi, in quibus
 » tamen febris *κρίσις* deprehendere non potui per
 » plures dies, nisi quòd pulsus paulò justo celerior
 » erat. Postquàm autem *venæ sectione* et usu *lau-*
 » *dani* cum *alexipharmacis* commixti, isti *spasmi*
 » mitigabantur, atque indè vis spirituum elastica
 » nativa aucta fuit, signa flammæ in massâ accensæ,
 » quàm citissimè sese prodiderunt, *urina* tincta est
 » et turbata, *pulsui* fortitudo ac celeritas pari passu
 » accessit; *temperies* universim incaluit, sitis cla-
 » mosa evasit, *aphthæ* linguam, atque os coope-

» ruerunt. At ad flammæ et doloris exacerbationem
 » statis periodis recurrentem semper, quasi ad
 » cynosuram, auspicatò cursum meum dirigens,
 » copiâ *corticis Peruviani* cum *laudano* commixti,
 » et intervallis paroxysmorum exhibiti, venenum
 » subegi et ægrotantes à febris ac dolore penitus
 » liberavi.

» Præter cætera omnia mihi pluries mirari contigit,
 » post subactionem veneni febrilis ab expansione
 » spirituum quadantenus effectam, cum ex *pulsu*
 » forti ac celeri, *urinâ* intensè rubrâ ac turbatâ,
 » *temperie* calidâ cæterisque indiciis, febris sese
 » palàm ostendat, artus hisce doloribus spasmodi-
 » cis statis periodis recurrentibus, et more rheu-
 » matismi versatilibus esse affectos cum tumore
 » et ardore partium laborantium à nisu spirituum
 » in his partibus sese expandere satagentium. At
 » hosce *dolores*, adhibitâ *venæ sectione* debitâ, usu
 » *corticis Peruviani* copioso extrâ paroxysmum
 » ministrato, feliciter semper profligavi.

» Denique cerebrum, primo insultu febris legi-
 » timæ affici non tantùm *vertigine*, à spiritibus ve-
 » neno activo oppressis ac turbatis, verùm etiam do-
 » lore *acuto*, vel *gravativo*, à nisu spirituum in mem-
 » branis sese expandere satagentium, cuivis medico
 » notum est. Nonnunquàm autem spiritus hoc tem-
 » pore febris adeò opprimuntur et turbantur, ut
 » ægrotans more apoplecticorum, durante toto
 » paroxysmo, sine febris indiciis mortuo similis
 » jaceat, et eadem symptomata simul cum pa-

» roxysmo subsequenti sæpè recrudescent; quibus
 » symptomatis utut *venæ sectione*, *vesicatoriis* cæ-
 » terisque ejusmodi *apoplexiæ* veræ remediis jure
 » merito succurrendum sit, revirescentia tamen
 » eorum sine *cortice* præcaveri nequit. »

SCHOLIUM IV.

Notandum hic est, quod de gravibus sympto-
 matis repetit (pluries enim idem superius dixerat)
 illa scilicèt propriis remediis esse curanda. Circà
 hoc constanter assero, non improbanda quidem
 esse remedia, quæ possunt vel minuere, vel tollere
 gravia illa symptomata, quæ mortem videntur
 minari. Dico tamen, eadem remedia, præcipuè si
 ægrotanti onerosa sint vel dolorifica, post Chinam
 Chinam validè oblatam adhibenda non esse, quoties-
 cumquè adsit moralis certitudo, ipsum ægrotan-
 tem ab illà saltèm accessione esse evasurum, eâ
 enim superatâ et alterâ per corticem impeditâ,
 cessant spontè symtomata. Hanc verò moralem
 certitudinem habebimus, si jam paroxysmus cœ-
 perit de suo vigore, et symptomata illius de suâ
 intensione remitti; asperiora enim remedia, quæ
 tollendis nunnunquàm hujusmodi symptomatis apta
 creduntur, officere potius quàm proficere ipsi
 feбри, nupèr vidimus ex *Sydenhamio schol. 1.* Pari-
 tèr dico, nulla esse adhibenda conquisita remedia
 ad præcautionem, sed solùm sufficere purum cor-
 ticem offerre, illumque omnium aliorum remedio-
 rum jure meritò exulantium loco (clysteribus, si sit

opus, exceptis) justâ et assiduâ dosi repetere assertioni meâ de successivâ symptomatum quorumlibet evanescentiâ, post depulsas ope corticis febres, prout etiam tetigimus *cap. 8. libri. primi*, plenè adstipulatur *Monginotius* inquiens: *Observandum venit, quòd crebrâ experientiâ edoctus, dico, id præterea illi (videlicet Chinæ Chinæ) peculiari inesse ut plerumquè extinguat maximam partem symptomatum febres comitantium, ut imi ventris inflationes et dolorificas tensiones, jecoris, et lienis, aliarumque partium infarctus, ciborum fastidium, concoctionem læsam, diarrhœam, aliaque accidentia, quæ, cessante febre, unâ ut plurimum desinunt.*

Atque eò libentiùs inculco, omittenda esse alia remedia ad correctionem symptomatum, et ad eorundem præcautionem, quoniam non parùm asperam in curatione, quam rationalem vocat, video ab auctore usurpari methodum, dùm passim ab eo afferuntur in medium, quasi forent artis blanditiæ, vesicatora, cathartica, emetica et hujusmodi, mirum sanè à viro commenta veterum theoretica palàm reprobante, et notiones per consequens postremo hoc seculo satis obvias possidente, veterem tamen praxim minimè castigatam adhuc retineri. Et tamen, si attendamus illationes, quæ ex recentiorum inventis cohærenter traduntur, longè humaniorem, saltèm ut plurimum (neque enim remedia nonnunquam regidiora ab usu planè medico, ubi ea verè indicentur, ausim proscribere) simpliciorrem, ac utiliore esse minus magnificam me-

dendi methodum, etiam præciso cortice, profitebimur. Sed hanc veritatem, quam præjudiciis forsàn consuetudinis præoccupatus haud sat̃s videtur dignoscere in curatione symptomatum, sat̃s luculentè fatetur in curationem febrium, ubi de methodo rationali verba faciens: *quantum dedecet, inquit, probum ac misericordem medicum adedò in corio humano ludere, artem nostram in lanienam frequenti epispasticorum applicatione convertere, atque tandem ægrotantis vitam incertis atque hallucinantibus ratiocinationibus nostris temerè subjicere, quarum panas æger crumenæ ac vitæ suæ dispendio non rarò luit.*

« *Hemicraniam* per̃iodicam etiam observavi à
 » nisu spirituum in membranis cerebri sese ex-
 » pandere conantium, quam spatio bidui *venæ*
 » *sectione* et usu *corticis* penit̃s sustuli, licet in
 » hujus symptomatis curatione, *venæ sectio, ve-*
 » *sicatoria, emetica, cathartica, errhina, masti-*
 » *catoria* ad hebdomadas aliquot spem meam de-
 » ceperant. »

SCHOLIUM V.

Casus iste, quem historiâ 27. de se ipso conscriptâ confirmat auctor, sat̃s ostendit (quod et in aliis ejusdem historiis videre est) illum non modò febribus intermittentibus, gravi aliquo symptomate alium morbum velut̃ simulante comitatis, mederi cortice, sed et aliis verè morbis, periodicè quodammodò recurrentibus, in quibus, sicut̃ nulla omninò febris indicia adesse constantè affirmat, ita

ita illam nihilominus latentèr foveri, gratis omninò videtur asserere, quasi sub tali prætectu affectet usum Peruvianæ antidoti; pro quâ tamen in hisce quoque casibus rationabiliter adhibendâ, quotiescumquè eventus feliciter responderet, supervacaneum foret ad reddendum legitimum illius usum, præsentiam febris mendicare, ubi ea non est. Sed reverà de constanti eventu, et Chinæ Chinæ constantèr adscribendo in hujusmodi casibus, plurimum dubito; neque proindè tantum virium Peruviano cortici inesse reputârim, neque tantumdem beneficii ab ipso ausim exigere.

« Quo genius versatilis morbi hujus Proteiformis
 » ad vivum depictus dignoscatur, et ut indè sciatur,
 » quo pacto naturæ hisce symptomatis laboranti
 » tempestivè succurri possit, *historias* huc spec-
 » tantes hîc subnectam, quibus unam historiam
 » admodum raram subjicere non pigebit *febris à*
 » dolore *nephritico* ortæ, symptomatis horrendis
 » spasmodicis stipatæ, et cortice curatæ, uti et
 » efficacîæ nostri *febrifugi* priùs memorati, ubi vires
 » corticis ob diutinam assuefactionem, vel pecu-
 » liarem ægri dispositionem defecerant. »

SCHOLIUM VI.

Historias tandem, quas hîc recenset auctor, utile erit apud eundem videre. Ex illis, fateor, non omne id quod expectabam, accepi. Perniciosas febres haud satis expressas video, sed tamen aliquas earum ibidem describi atque curari extrâ dubium

est, alias quoque, ut modò retuli, nostrum negotium minimè tangentes identidem afferri, est æquè certum, idque ordine relativo ad ea, quæ in hoc capite (quod propterea est velut illius historiarum elenchus) firmat de variis morbis, latentem intermittentem velantibus. Cùm ergò hujusmodi historiarum ac dogmata, curationem febrium per usum Chinæ Chinæ nonnihil tumultuariam exhibeant, et fortè remedium transferant, ut diximus, non nihil extrà limites suæ activitatis (ità abundamus omnes in sensu nostro) propterea minutiori aliquantulum, distinctâque indagine opportunum erit in decursu hujusce tractatûs quærere, quænam sint febres, præter intermittentes benignas, de quibus jam *lib. primo*, in quibus cortex conveniat, et in quibus non; itèmq; quomodò ubi conveniat sit usurpandus, quâ nempè fortiore methodo, seu quâ dosi, quo tempore, et ordine, ad hoc, ut cum insigni ægrotantium cæteroquè summoperè periclitantium utilitate, et cum non tenui medici præscribentis laude, queat administrari. Quòd juxtà experientiam meam qualemcumque, sequenti libro sum proximè præstiturus, ubi ad perniciosas protinùs febres, hucusquè ex aliorum tantummodò descriptione relatas, sèrmonem meum specialitèr convertam.

THERAPEUTICS

SPECIALIS

LIBER TERTIUS.

Continens febrium omnium perniciosarum, tum planè intermittentium, tum etiam subcontinuarum descriptionem ex propriâ observatione, illarumque curationem, mediâ peculiari methodo Chinam Chinam in iisdem administrandi.

CAPUT PRIMUM.

Febrium omnium perniciosarum periodicarum natura, differentiae, diagnosis, atque prognosis singillatim exponuntur.

ABSUMPTO jam toto libro antecedente in transcribendis et dilucidandis aliorum placitis circa perniciosas intermittentes, æquum est in præsentî, ut secundum observationes nostras earum descriptionem, divisionem, ac dignotionem, ipsamque tandem, mediâ Peruviani corticis oblatione, curationem prosequamur, *nostram* videlicet *methodum* exponendo, defendendo, et curationum historiis, ut par est, confirmando.

Febris ergò periodica perniciosa (præ cæteris autem tertiana cùm simplex, tum duplex) ea est,

ut vidimus ex *Mercato* : *Quæ, simulatâ circuitûs effigie, lethalis et mille accidentibus periculosissimis implicata existit.* Haud equidem, propriè loquendo, *simulatam* ispe dixerim *effigiem circuitûs*, cum hunc et verum præseferat, et manifestum; sed potiùs *simulatam* dixerim, *ex vi circuitûs, effigiem benignitatis*, atque ideò illius malitia *ex mille accidentibus periculosissimis, quibus implicata existit*, nobis principalitèr depromenda videtur, et secundùm illorum præcipuam diversitatem in varias classes distinguenda. Porro generalitèr febris hæc periodica pernicialis vel talis est, ut perseverantèr intermittat, efferamque naturam suam tantùm prodatur immani quopiam et peculiari symptomate febrilem paroxysmum comitante, cujus ferociam exitialem minimè tollit intermedia quies, quæ cæteroquì securitatem ex *Hippocrate* pollicetur; vel talis est, ut, intermissione paulatim deperditâ, ad continuam et acutam, sæpiùs quidem lentè, nonnunquam et festinantèr tendat, cum extensione gravium quorundam variorumque symptomatum ad tempus ipsum turbulentæ quietis. Utroque modo perniciosum characterem induit, diversimodè adhuc in utrâque lineâ sese prodentem.

In primâ itaque lineâ, ubi febris periodum etiamnum suam cum intermediâ apyrexia regularitèr servat (saltèm usquequò, rebus omnibus in præceptis actis, cuncta, ut mos est, obscurentur ac confundantur) septem utplurimùm modis præcipuis solet interimere, quorum quilibet à funesto quopiam,

et peculiari symptomate febrem comitante, cæterisque ferociæ palmam præripiente, dependet; unde à diversitate primarii lethalisque symptomatis diversæ febris hujusmodi intermittentis emergunt differentiæ, potius à sensibilibus accidentibus, ut nuperrimè diximus, quàm ab ignotâ illarum intimâ essentiâ, vel ab obscuris earumdem causis petitæ; illa autem symptomata sunt I. vomitus, et alvi fluxus vehemens, *cholericus* ut plurimum, nonnunquàm et *dysentericus* similis; II. alter ventris fluor similis fluxui, sæpius (ut aiunt) *hepaticus*, quandoquè etiam *atrabilari*; III. cardialgia; IV. sudor frigidus, ac *diaphoreticus*; V. syncope; VI. algor indesinens, quem nec calor ullus, nec sudor excipit; VII. soporosus affectus gravis, et ab apoplexiâ parùm distans. Et hæ sunt differentiæ febris periodicæ perniciosæ in primâ lineâ constitutæ, nempe veram adhuc intermissionem servantis. In secundâ verò lineâ, ubi febris intermittens semetipsam mutare affectat, et continuitatem acquirere, unam tantum, quæ in ordine *octava* est, differentiam sortitur, hanc ipsam videlicet, quòd ad continuam et acutam vergat, licet pluribus modis, varioque symptomatum præeunte et comitante apparatu, in hunc unum scopum collimet.

Quòd si lubeat melioris ordinis gratiâ hasce varias perniciosarum febrium differentias ad terminos scholarum, et ad peculiarem cathegoriam reducere, in promptu erit, suppositâ generali intermittentium omnium tum simplicium, tum duplicium, tum

triplicium divisione in benignas et malignas, istas iterum subdividere in *comitatas* ferali aliquo symptomate verum morbum simulante, immò et æquante, adhuc tamen intermittentes, et in *solitarias*, seu nullo peculiari symptomate, sed potius multiplici, et vario comitatas, et ex dispositione intimâ in continuitatem, atque, ut vocant, acutiem quàm maximè proclives. Comitatas adhuc intermittentes rursus subdividemus, habito respectu ad conjunctum symptoma, in colliquativas et coagulativas (1), ut continuarum etiam malignarum mos est. Ad colliquativas erunt referendæ quatuor priores species enumeratæ, quas mutuato nomine ab ipso symptomate vocabimus I. *cholericam*, vel *dysentericam*; II. *subcruentam*, vel *atrabilarem*; III. *cardiacam*; IV. *diaphoreticam*: siquidem hanc ad colliquativas referre velimus, cum forte etiam ad coagulativas possit quandoquè pertinere, ad easdem verò coagulativas revocabimus tres posteriores species, vi-

(1) Hæc *Torti* febrium in duo genera, scilicet colliquativum et coagulativum, divisio, in eo humoristarum systemate versatur, qui humorum colliquationi debilitatem eorumque plasticitati vim tribuebant. Enimverò illa divisio reipsâ in naturâ reperitur, et ad omnibus ferè sectis adoptata fuit; nempe ad *Hippocratis calidum* et *frigidum*, ad *methodistarum strictum*, et *laxum*, ad *Brown stheniam* et *astheniam*, ad recentiarum scholarum *auctas* vel *minutas* proprietates vitales, certè refertur. Hæ varix doctrinæ ex eodem principio, diversè tantummodò enarrato dependent, et huic animum summoperè intendere debent practici, namque exindè varius curationis modus deducitur.

delicèt I. *syncopalem*; II. *algidam*; III. *lethargicam*; et sic primum membrum propositæ divisionis exhibimus. Quo ad aliud verò membrum ejusdem divisionis in quo collocavimus intermittentem nullo peculiari, distinctoque symptomate comitatam (quam idcirco *solitariam* diximus) sed ex naturâ suâ in continuitatem, atque acutiem valdè proclivem, hanc sub unâ tantùm specie reponemus, cujus tota ratio erit hæc ipsa, quòd ad continuam essentialitèr, et acutam tendat, licèt indè in innumeras differentias accidentales (quotquot scilicèt sunt accidentales omnes febrium continuarum differentiæ) possit subdividi, et *subcontinuum* simpliciter nuncupabimus; eamque, utpotè differentiarum omnium, etiam inter se oppositarum, facilè susceptibilem, ad nullum determinatum genus sive *colliquationis*, sive *concretionis* alligabimus, cùm modò ad unum, modò ad alterum, frequentius tamen ad coagulativum soleant pertinere.

Omnes ergò istas differentias, quæ sunt potiores à me observatæ, et sub quibus alias congeneres lubuit complecti, fas est exponere, si non quantum exigit pondus materiæ, saltèm quantum sat est, ut eædem valeant probè dignosci, lectorem plura cupientem relegando ad descriptionem, quam ex *mercato* transcripsimus libro præcedenti, ut idèd frustraneum sit omninò alibi actum rursùs agere. Exordiendo itaque à differentiis prioris ordinis, et specialitèr ab iis quæ spectant ad genus colliquativum, hæc earum sit series :

Primò necat hominem pernicioſa intermittens, potiffimùm tertiana (quartana etenim, aliave intermittens rariusculè in primo membro noſtræ diviſionis locum habere ſolet, ſæpiùs verò in ſecundo, ubi ad continuitatem vergat, et ad acquirendam acutiem) necat, inquam, tertiana pernicioſa, quandò circà paroxyſmi initium, cui de more vomitus bilioſus, ſæpè etiam nonnihil copioſus, ſimiliſque dejectio ſolet associari, vehemens contingit, violentaque, ac ſimultanea excretio ſurſum atque deorſum humorum vitioſorum, pravâ inſimul qualitate, atque immodicâ quantitate peccantium, ſive ſinceri illi ſint, ſive variegati, et bile ut plurimùm præſinâ, vel æruginosâ referti; quibus nonnunquàm vomitibus, ac dejectionibus copioſis et crebris, ſingultus adjungitur, vox (ut aiunt) clangosa aut rauca, oculorum concavitas, angor ſtomachi, ſudatiuncula minuta circà frontem, pulſus exilis, extremorum perfrigeratio aut livor; uno verbo, omnia accidentia, quæ choleram morbum comitari ſolent, à quo tamen diſtinguenda eſt hæc affectio quaſi cholERICA, inquantùm eſt merum ſymptoma febris ſuprà conſuetam intensionem adauctum, et febris ipſius periodum, ac motum ſubſequens velut umbra corpus. Hæc quocumque tempore appareant, etiamſi non omnia, imò etiamſi extremæ ſemper non ſint intensionis modò deſcriptæ, hanc tamen ſequenti periodo certò minantur, ac mortem, intermediâ quiete ad nihilum ſuffragante, præſertim ſi morbus adhuc fuerit, ut plerumquè aſſolet, in augmento.

Contingit alias ut affectio ferè dixerim, semi-dysenterica potius quàm cholericæ invadentem paroxysmum concomitetur, quatenus humores in primis biliosi, et alius etiam naturæ, tam acres ac erodentes excernuntur, ut post ipsos mucus cruentus exeat tam sursùm quàm deorsùm cum tenesmo et torminibus, stomachique dolore, perindè ac si illius membranæ divellerentur et excoriarentur, ut reverà œsophagum excoriari intuemur in humoris excreti transitu et vomendi conatu. Hujusmodi excretionem cruentam, et dolorificam minùs periculi secum trahere sæpiùs observavi, quàm suprà descriptam. Et licèt febris in hoc casu videatur intensior, est tamen magis expansa, nec secum fert funestam illam perfrigerationem, angorem ac sudatiunculam, etsi singultum admittat, jactationem irrequietam, urinarum croceam rubedinem, linguæ scabritiem etc. undè facilè in continuam migrat, aut inflammationem aliquam minatur, ac proindè non parùm et ipsa portendit periculi.

Secundum peculiare symptoma funestum, peculiarem paritèr perniciosæ intermittentis differentiam constituens, est quidam alvi fluxus loturæ carniū similis, qualem veteres fluxum dictum hepaticum descripsêre. Istud autem symptoma, licèt aliquandò ab hominibus obesis præcipuè viderim tolerari, nec illis mortem inferre, sed potius, superatâ procellâ, morbi diuturnitatem, ut plurimùm tamen funestum observavi, atque exitiale, priùs-quàm nossem modum prohibendi febrem cum an-

nexo symptomate. Solet ergò nonnunquàm vel invadente, vel etiam declinante accessione suboriri placida quædam, frequensque ac copiosa dejectio, quæ intrà paucas horas nullo ferè sensibili ægro-tantis incommodo, ad magnam molem et pondus excrescit. Materia ista planè serosa videtur, sed subcruenta, ægrumque primò nil tale timentem brevì deducit ad summam virium imbecillitatem cum pulsu minuto ac exili, et extremorum notabili perfrigeratione; vox attenuatur nonnihil, oculique concamerationem contrahunt. Cæterùm sitis non molestat, mens est vegeta, nec de aliâ re conqueritur patiens, nisi de summâ virium prostratione ac proclivitate in lipothymiam, quæ facilè quoque, si è lecto sugere velit, solet succedere. Evanescente febre, sensim sedatur tumultus, qui rarò diem intermissionis occupat, si verò occupet, veh die sequenti! Cùm autem recurrente accessione idem recurrat alvi fluxus, augeaturque et ipse circà morbi statum (incrementum tunc suscipientibus accessionibus) vix fieri potest, quin intrà duos, vel tres ab invasione symptomatis paroxysmos æger succumbat.

Hoc idem certiùs etiam, ac citiùs evenit, si alia quædam fiat excretio non materiæ loturæ carniū similis, sed sanguinis atrii ac nigricantis modò concreti, modò dissoluti, modò ex utroque mixti; quæ dejectio (cujus sæpè mentionem facit *Hippocrates*, et quam fortè antiqui atrabilem vocitârunt) si copiosa sit, et ad libras ascendat, ut assolet, suprâ memorata symptomata facilè infert, et successivam

sub specie placidæ cujusdam defectionis celeritèr mortem.

Tertium symptoma, quod mortem haud rarò solet accersere est cardialgia. Contingit hæc quoties invadente paroxysmo febris tertianæ, dùm adhuc rigor et horror ægrum infestat, sive etiam dùm idem æger incipit incalescere, illum simul corripit acerrimus morsus oris ventriculi (cujus orificium superius antiqui cor vocavêre, illiusque morsum symptoma malignum appellavit *Hippocrates*) cum paucâ ut plurimùm, vel inani vomituritione. Si ergò in febre intermittente, præcipuè verò ac forsàn unicè in tertianâ, contingat hujusmodi morsus, comitemque habeat, ut assolet, frequentem animi defectionem, ratione cujus hæc affectio à nonnullis syncope stomachica nuncupatur, cum pulsu exili, facie Hippocraticâ, luctuosis suspiriis etc., sitque dolor ille seu mordicatio tam ferox, ut quandoquè pro expiratione reddantur clangores et ululatus (non enim quilibet stomachi dolor, etsi sensibilis, utpotè in tertianâ familiaris, pro verâ cardialgiâ habendus est, atque ut lethalis metuendus) sive brevia deindè sint hujusmodi accidentia, et tantummodò torqueant ægrum in principio accessionis, sive usquè ad statum ejusdem protrahantur (quò tamen diutiùs, eò pejus) vita est in discrimine, et quocumque paroxysmo, sive secundo, sive tertio (rarò enim in primâ invasione id accidit) appareant, metuendum est, ne uno adhuc vel altero ingruente paroxysmo, de vitâ sit actum; quandoquidem vix

quintam accessionem morbus iste cum tali circumstantia solet transcendere.

Quarto fraudulentior est ea febris, quæ nullo præcedente pravitatis indicio ægrum invadit more solito cum horrore, rigore et frigore, cui succedit calor, et statim sudor aliquantulum præcox, qui equidem febrem videtur primo aspectu allevare, sed reverà post illum potius intenditur febris, quàm remittitur, immò eò fortior videtur fieri, quò copiosior est sudor. At iste non est terminus occultæ fraudis, hinc enim potius longitudo morbi significatur, quàm mors. Quod pejus est, frigit paulatim sudor, et in diaphoreticum sensim degenerat. Sudat perpetuò ægrotans, et defluit undequaque frigido sudore perfusus; sicque perpetuò algens et sudans, sicut cera liquatur, dissolvitur et deficit. Pulsus celer est, minutus ac debilis, respiratio fit anhelosa et frequens, dissipantur spiritus, et virtus universaliter languet. Mens sola lucidissima est, et sentit homo se paulatim mori. Nisi autem hoc illâ ipsâ accessione succedat, in proximè futuram tantum protrahitur.

Aliâ etiam viâ nonnihil diversâ algidum sudando fieri, et occumbere ægrotantem aliquandò novi, quem cæteroquè in similibus circumstantiis jure quis diceret cum suspitione tantum longitudinis evasurum. Occumbit ille tamen inopinatò, inquantum transactâ feliciter totâ ferè accessione solummodò circa tempus declinationi proximum incipit minuto frigidoque sudore perfundi, frigidusque et ipse

feri, ut marmor; licet sudor paucus sit et viscidus, ac propè declinationem tantum apparere incipiens, adeò ut in tali casu (rariore quidem) videatur loco declinationis succedere mors, quam facies Hippocratica illicò facta, et paulò antè præmonstrat, et paulò post secum trahit. Atque istæ sunt quatuor priores perniciosarum intermittentium differentiae de genere colliquativo, videlicet *cholericæ* vel *dysentericæ subcruentæ*, vel *atrabilaris*, *cardiaca*, et *diaphoretica*. De coagulativo autem genere sunt tres, quæ sequuntur, *syncopalis* nempè, *algida*, et *lethargica*. Continuando itaque ordine successivo seriem assumptam.

Quintò funestos reddit quos comitatur nonnunquam tertianæ intermittentis paroxysmos syncope verâ, non solum cum ea fuerit cardialgiæ, ut crebrò assolet, succedanea, verum etiam cum primaria fuerit simplex et solitaria; vi nempè cujus æger nullo licet dolore percussus frequentèr, gravitèr, et absque causâ manifestâ languet, exolvitur, et animo deficit, sive de latere in latus se velit convertere, sive solummodò brachium, aut manum tentet loco movere. Concurrit et hìc pulsus depressio, et vicissitudinaria ejusdem defectio cum parvitate et celeritate, sudores minuti circa collum et frontem, oculorum cavitas, caligatio et languor, ac deniquè universalis virium collapsus, ut continuis odoribus, et irrorationibus æger recreari indigeat, ne deliquium, quod nihilominus patitur, crebrius patiatur. Si hæc sint durante augmento,

vel statu accessionis accidentia, quantumvis tranquilla subsequatur intermissio, res ægrotantis malè agitur, nisi provida medici cautela futuras accessiones maturè præcaveat; si etenim sibimetipsi blandiatur medicus, vel quia minùs gravem reputaverit prægressam afflictionem, vel quia transactæ procellæ memoriam infida oblitteret malacia, facile est, quod brevè pereunte ægro impingat in turpe illud: *non putâram*, eique postmodum exprobetur illud aliud *Hippocratis* de Leonidæ filiâ, *medicus non intellexit: puella mortua est*.

Sexto modo tertiana perniciosa hominem jugulat, cùm frigus quoddam mortiferum incipienti paroxysmo jungitur, quod non, ut assolet in benignis, paulatim evanescit, ut illud sensim calor excipiat; sed protrahitur, et protrahitur, maximamque partem paroxysmi occupat, itaut nec pulsus resurgat, nec calor ad tactum conspicuus erumpat; quamobrem post horas et horas ægrotantem adhuc in principio accessionis diceres. Siticulosus est propterea, gemebundus, anxius, cadaverosus. Si in ipsâ accessione, quâ primò se prodit symptoma istud ferox, æger satis non cedat, ægrè saltè, et nonnisi post longum tempus incipit tantillum incalescere, et pulsus antea absconditus sese nonnihil exerere, itaut tamen parùm frequentia aut celeritatis supra statum naturalem ostendat, sitque adhuc non parùm depressus, cum miti ad tactum calore, voce tamen paululum clangosâ, et linguâ nonnunquam scabrâ, urinâ verò vel co-

piosâ simul ac tenui, vel paucâ ac impensè rubrâ. In hoc statu durat æger per totum tempus intermissionis, quoâd alia satis benè se habens, sed subsequente accessione ut plurimùm moriturus. Sin autem symptoma istud algoris protracti sit mitius, subsequens reviviscentia pulsûs tantillùm vegetior, calorque aliquantulùm vaporosus, diuturnioris potiùs morbi, quàm mortis erit præsagium. Sed ista vix aliud quam usus potest sufficientèr docere.

Septimum deniquè lethale symptoma perniciosæ cuilibet intermittenti, non uni tertianæ familiare, est gravis affectus soporosus seu profundus lethargus, qui paroxysmos febriles sæpesæpiùs comitari consuevit. Contingit iste quandoquè in principio accessionis, quandoquè in augmento, et crescente febre, servatâ proportionè, cum eâdem crescit, quemadmodùm eâ declinante paulatim declinare solet, restitante tamen ut plurimùm aliquâ in soporem propensione, etiam tempore intermissionis, quæ affectum paulatim radicari, et ad idiopathicum tendere satis admonet. Proindè si negligatur, nec inhibeatur progressus, lethargum unâ, vel alterâ accessione mortiferum, ac omni arte invicibilem, fortis apoplexiæ instâr, ferè dixerim certò portendit. Cùm hujusmodi affectus incipit, æger primò est in soporem pronus, à quo excitatus, statim in somnum relabitur; paulò post fit immemor rerum immediatè antegestarum, undè non rarò matulam poscit, deindè mingere obliviscitur, atque interim dormitat; nunquàm obloquitur, nec suos conceptus valet ex

primere, et licèt sui erroris sit compos, se tamen nequit corrigere, aut continere : imò quandoquè balbutiens, vel verba mutilat, vel unum pro alio profert, non secùs ac si levi apoplexiâ in linguæ paralytim degenerante foret detentus. Ingravescente tandem sopore omninò jacet, ac stertit naribus, neque ullâ voce, ullâ vi, frictione, ligaturâ, cucurbitularum aut vesicantium appositione, immò nec igne quandoquè actuali valet excuti; et siquidem excutiatur aliquantispèr, statim in eundem soporem, imò in profundiozem recidit, nec nisi declinante accessione incipit expergisci. Quòd si unâ, vel alterâ vice recipiscat quidem, sed semper paulò difficiliùs, aut si soporosæ affectioni adjungatur singultus, tertiâ ad summum, vel quartâ accessione, inevitabili fato succumbit (1).

Sunt

(1) Auctores nonnulli qui iis febribus studia applicârunt, varietates quamplurimas observaverunt; *doct. Alibert* (Traité des fièvres pernicieuses intermittentes) eas retulit; sunt

1°. *Febris intermittens perniciosa delirio stipata* : hujusce varietatis characterem constituit intellectûs inversio, quæ accessûs invasionem, augmentum, decrescentiamque regularitèr sequitur; illam observaverunt *celeberrimi Pinel, Landré-Beauvais Alibert*. Per accessûs decursum contingunt sudores, sitis, urinarum emissio involuntaria, pulsûs debilitas; cutis ardentèr incalescit.

2°. *Febris perniciosa intermittens peripneumonica vel pleuritica*. *Lautter* et *Morton* exempla nonnulla transcripserunt, per accessûs decursum peripneumonice vel pleuritidis sympto-

Sunt istæ septem differentiæ magis conspicuæ perniciosarum intermittentium *comitatarum*, quæ na-

mata gravissima invadunt . familiaris noster, doctor *Calès* hujus varietatis exemplum nobis tradidit in quâ observatione, præter peripneumoniam signa, æger magnam sanguinis copiam expuebat : exhibitus fuit cortex Peruvianus post secundum accessum, nec in posterum ullus apparuit.

3°. *Febris perniciosa intermittens nephritica*. *Morton* hujus varietatis exemplum retulit. Doct *Coutanceau* enarravit etiam observationem; per accessum dolores nephriticos experiebatur æger, uti dysuriam pervicacem, et ferè intolerabilem.

4°. *Febris perniciosa intermittens epileptica* *Lutter* juvenculæ sex annis natæ hac varietate laborantis observationem delineavit.

5°. *Febris perniciosa intermittens convulsiva*. Hanc observavit *Morton* apud juvenculam tredecim mensibus natam, cujus convulsionibus adjungebantur respirationis difficultas, pulsusque exiguitas : Doct. *Coutanceau* hujus varietatis, comate stiratæ exemplum refert.

6°. *Febris intermittens perniciosa cephalgica*. Celeberrimi *Comparetti* et *Alibert* hanc speciem observaverunt.

7°. *Febris perniciosa intermittens dyspnœica*. (*Asthmatica* Doct. *Galeazzi*.) *Barthez* (*Traité des maladies gouteuses*) istius exemplum descripsit; cel. *Alibert* aliud exemplum, ex Doctore *Boullon* refert.

8°. *Febris perniciosa intermittens hydrophobica*. Illustris *Dumas* hujus varietatis observationem societati medicæ *Mons-peliensi* communicavit, quam Doct. *Boullon* etiam observavit.

9°. *Febris perniciosa intermittens aphonica*. Doct. *Double* hominis 27 annis nati hac varietate afflicti, omninòque voce orbatum historiam enarravit.

10°. *Febris intermittens perniciosa catarrhalis*. Hanc varie-

turam etiamnùm suam perfectè, vel quasi perfectè, intermittentem servantes, in aliquo accessu valent, atque consuescunt inopinatò hominem de medio tollere. Harum plurimas complexus est *Mercatus* sub primâ tantùm tertianæ perniciosæ differentiâ; reliquas verò saltèm implicitè sub titulo *De eâdem perniciosâ ob aliquod accidens, quod succrescit*, ubi nihilominùs (ut quod est fatear) diversas potius alias

tatem observavit *Comparetti*; *Alibert* hujus exemplum refert; æger, accessionis decursu, dolores ad frontem, angores ad regionem præcordialem, laboriosam respirationem, pectorisque lacerationes experiebatur.

11°. *Febris perniciosa intermittens icterica*. Doct. *Gilbert* de hac varietate observationem tradidit.

12°. *Febris perniciosa intermittens exanthematica*. Doct. *Comparetti* mulierem 25 annis natam hac varietate afflictam curavit.

13°. *Febris perniciosa intermittens rheumatica*, à *Morton* observata fuit.

Doct. *Alibert* aliquot varietates à nonnullis autoribus ad hoc febrium genus relatas novis observationibus delucidandas esse arbitratur; *Molitor paraliticam* retulit; *Vacca Balinghieri* aliam observavit, cujus accessus amaurose concomitati erant; aliam, cujus accessus contractione spasmodicâ ventriculi, cuique jungebatur hemorrhagia copiosa, descripsit Doct. *Gaillard*; aliam deniquè, quâ cordis motus pervertebantur, quæque omnia hujusce visceris affectionum organicarum phænomena mentiebatur, pluries *Jonquet* observavit. Duo hujusce varietatis à Doct. *Coutanceau* referuntur; nos autem hoc febrium genus omnes formas cuique lesioni organicæ proprias induere posse censemus.

recenset explicitè, quas quoque *Mortonus* indicat, quàm istas. Cùm tamen quas recenset ille, rariùs ac ferè nunquàm mihi observare contigerit, quemadmodùm ipsi *Mercato* fortè non contigit observare nonnullas ex iis quas recensui ego, ideò datâ operâ easdem subticui, frequentioribus tantùm mihi compertis contentus. Non est tamen ideò, quòd ab aliis allatas excludam, cùm mille sint viæ, quibus ad Stygem itur, sed eas inter infrequentiores tantùm connumero. Omnes nihilominùs, quotquot sunt, quæ vitæ periculum inferunt ex quovis adjuncto symptomate, sive de genere colliquativo illud sit, sive de coagulativo, tacitè comprehensas volo, eâdemque simul methodo dico curandas.

Licèt autem in enunciatis intermittentibus perniciosus nonnunquàm accidat, ut ægrotans lethalem alioquì accessionem, ægrè licèt ac difficillimè sustineat, vitamque protrahat usquè ad tempus subsequents accessûs, totoque hoc tempore intermedio verè febricitet, esto sit algidus, sine pulsu, ac moribundo similis; attamen adhuc febrem hujusmodi intermittentem appello, vel saltèm ad intermittentes refero cum *Sydenhamio*. Cujus rei ratio mihi est, tùm quia febris hæc orta est intermittens, et talis conservata usquè ad extremum exitium, in cujus latitudine confusis omnibus, mirum non est quòd ipsa obscuretur periodus, tùm quia etiam in extremâ illâ rerum angustia eadem febris, utut recentem continuitatem referens per violentam extensionem sui, (citò tamen et infaustè finiendam)

cortici nihilominus ritè, et celeritè administrato ferè æquè facilè cedere consuevit, ac si primis accessibus manifestè intermittentibus ille fuisset exhibitus. Cæterùm propriè ac strictè loquendo, quandò intermittens perniciosa hominem non interimit repentè in eo accessu, in quo manifestè tentat interimere, sed eum constituit in eo statu deplorabili, quem suprà retulimus, tunc non ampliùs verè intermittens dici potest, cùm jam sit continua; uti paritèr talis est, quandò octavam differentiam infrà describendam nanciscitur, retentâ tantùm in utroque casu obscurâ quâdam specie primævi circuitûs, vi cujus adhuc intermittentem placuit appellare, habito respectu ad originariam illius dispositionem. Et hoc est quidpiam peculiare, quod suprà communem existimationem tradere intendo de actione corticis adversùs febres hasce, tandem verè continuas, malignas, et exitiales, sed intermittentes ab ortu, vel intermittentibus saltèm analogas.

Omnes ergò in primâ lineâ recensitæ febrium perniciosarum differentiæ suam denominationem, ut patet, desumunt principalitèr, ac ferè unicè ab insigni aliquo, feralique symptomate, quod se solo perniciem videtur inferre; sive aliud ab humorum violentâ dissolutione ac colliquatione, sive ab eorumdem concretione ac coagulatione procedat. Hoc autem præceptum symptoma nonnunquàm tam inexpectatum supervenit, ut velut totum simul, unoque ictu minimè præmonstrato erumpat; et tunc

non priùs se prodit, ac hominem interimat. Sed hoc rarum est, neque potest accidens hujusmodi cadere sub dignotione, aut curatione medicâ. Imò neque solet tale symptoma in primâ suâ invasione tantæ intensiōis esse, quantam illi in singulari uniuscujusque descriptione suprâ assignavimus, neque universo aliorum accidentium inibi expositorum satellitio stipari; cùm enim res eo devenit, jam clara est, et unicuique nota. Quamobrèm superiùs relata totam tragœdiam serè exactam ostendunt, non imminuentem tantùm, aut incipientem.

Pro magis tempestivâ itaque dignotione ac præcautione periculi animadvertentum est, magnum illud, feroxque symptomata (qualecumque sit ex recensitis) quod feбри intermittenti perniciosum imprimit characterem, in primo suâ exortu, ordinariâ naturæ lege esse nonnihil mite, tolerabile, ac ut ità dicam, in parvo contractum, ità tamen, ut pravum esse non desinat; quemadmodùm fœtus tigridis suâ non caret ferociâ, etsi recens editus; cujus pravitatem sufficienter demonstrant alia signa enumerata insimul apparentia, etsi nec semper omnia, nec ab initio tam sæva. Progrediente verò parumpèr morbo, cuncta citò intensiōem acquirunt, et grandiora fiunt, adeò ut altero ab invasione primarii symptomatis paroxysmo haud difficile sit certò de malitiâ morbi decernere, et de ingruente periculo. Quapropter cautus sit oportet oculatus, et expertus medicus in omnibus simul conferendis, considerandis, ac ponderandis, quæ

tiescumquè perniciosi symptomatis præsentia appareat, aut saltèm illius suspicio non levis. Etenim in negligendo, aut temerè contemnendo quæ contemnenda non sunt, sicut et in formidando quæ non sunt formidanda, expertos quandoquè medicos hallucinari certum est. Utrumque equidem malum, sed primum pejus.

Ut verò monitum istud illustretur ex praxi, sit hoc exemplum : in aliquo febris intermittentis paroxysmo symptoma quodpiam grave ex suprà relatis se prodatur, sed non adeò clarè, quin medicum relinquat adhuc ancipitem, an verè perniciosum sit, an benignæ quoque febris, sed intensioris proprium, ut oris ventriculi mordax dolor, vel vomitus simul et alvi fluxus sat validus in principio febris tertianæ, vel importuna in somnum proclivitas etc. quæ singula postmodum mitescant declinante febre, et evanescente evanescant. Cum ergò omnia hæc signa sint nonnihil æquivoca, ac inter benignum et malignum quodammodò media, solumque pro ratione minoris vel majoris intensioris suæ, aut diversæ impressionis in subjectum patiens, modò pro trivialibus, modò pro perniciosioribus habenda, quippè modò cum salutari, modò cum intermittente febre conjuncta, necesse erit recurrere ad alia signa concomitantia, quæ suprà enumeravimus, ex quorum variâ syndrome ac collectione, et præcipuè ex illorum incohærentiâ cum morbo, faciliè occultam malitiam licebit suspicari. Sic si absoluto paroxysmo quodam ob grave aliquod

symptoma, et ob alia etiam signa suspecto, quædam remaneat die intermissionis linguæ siccitas, nedùm scabrities sive insolita ægri nec febricitantis, nec de quopiam certo dolentis jactatio, inquietudo, vel suspiriorum ad quoddam levamen emissorum frequens eruptio, vel inanis identidem, nullâque occasione concita vomituritio, vel alvi dejectio sincera, vel intempestiva in somnum propensio, vel alia hujusmodi à perito medico facilè observabilia, in tali casu (nisi ab affectione hypocondriacâ, aliâve causâ manifestâ procedant) metuendum est, ne subsequente accessu vera cardialgia, aut affectio quasi cholericæ, aut lethargus ferè inexpugnabilis palàm fiat, undè constitutur æger in summo discrimine. Cavere etiam oportet, ne illa eadem exceptio, quam in parenthesi apposui, nobis imponat, ne scilicèt nomine affectûs hypochondriaci perniciosos symptomatum characteres donemus, eo quòd patiens hypochondriacus esse soleat, vel credatur talis; ideòque minutâ et delicatissimâ, prudenti tamen, non nugatoriâ opus est disquisitione, atque animadversione in hisce casibus, in quibus

Sapè exiguus mus

Augurium tibi triste dabit.

Præ cæteris autem id quod certius perniciosum characterem nî suspecto primario symptomate patefacit, inter signa concomitantia est pulsus, loquendo tamen de primis sex perniciosarum intermittentium differentiis; septima enim differentia

non à pulsu, sed potius à respiratione, immò à simplici et solitario symptomate soporis (cujus intensiōis gradus ex se facillè est mensurabilis) solet dignosci. In illis itaque hoc perpetuum est, ut semper pulsus toto afflictionis tempore, atque illo etiam elapso, notabiliter deprimatur plùs minùs, pro ratione majoris, vel minoris intensiōis perniciosi symptomatis; cùm ex adverso, ubi symptoma vulgare est, etsi alioquì onerosum, pulsus consuescat resistere, oppressusve statim resurgere. Ut ergò certam quamdam regulam habeant tyrones, pro distinguendo symptomate pernicioso ab eo quod, licèt simile sit, perniciosum non est, tanquàm ad Lydium lapidem (nisi illud se solo se prodat) recurrant ad pulsum, sciantque in febribus intermittentibus, quæ vel I. affectione quasi *cholericâ* aut *dysentericâ*, vel II. fluxu *subcruento hepatico* dicto aut *atrabilari*, vel III. *cardialgiâ*, vel IV. sudore *diaphoretico*, vel V. *syncope*, vel VI. *algore* funesto adjunctis necare solent, summum extremumque gradum talium accidentium esse, quandò omnimodam pulsûs abolitionem inferunt tactu judice. Ubi enim ad hunc statum deventum est, universalis subsequitur, nisi priùs apparuerit, totius corporis, præcipuè verò extremorum frigiditas, aut livor, facies Hippocratica, indèque mors. Et licèt nonnunquàm ad duos, vel tres dies etiam in eo statu protrahatur vita, certum tamen ferè semper subsequitur exitium, nisi illud tempestivè reparet ritè oblatus Peruvianus cortex. Atque

propter hanc asphyxiam et algorem funestum, ægrotantes hujusmodi non alio titulo pro febricitantibus habendos, aut dignoscendos esse autumat *Mortonus*, ut vidimus, *typo jam* (ut inquit) *legitimæ febris amisso*, nisi quia cortice Peruviano sanantur: febre videlicet intermittente sub larvâ aliorum morborum delitescente et occultâ, seu mavis secundum *Mercatum* et secundum nos, manifestâ variisque illiusmodi perniciosi symptomatis comitatâ. Cum itaque gradus extremæ intensiōis symptomatis perniciosi pulsûs abolitionem, in sex speciebus nupèr expositis, soleat inferre, mensura congrua illius erit exactè observare quantum afficiatur, deprimatur ac langueat pulsus, præsentē symptomate, quantum illo superato desiscat à validitate sibi debitâ, quantum singulis certaminibus deperdat vigoris, uno verbo, quantum distet ab extremo gradu suæ concentrationis. Quæ sanè omnia in justâ lance posita, et cum aliis quoque signis collata non minimum diligenti et experto observatori suppebitabunt indicium crescentis periculi, simulque argumentum tempestivæ præcautionis.

Dixi, pulsus rationem primam tenere in examine perniciosorum symptomatum, relativè tantum ad sex priores febrium differentias primi membri nostræ divisionis, non verò relativè ad *septimam*, quæ capitis affectionem soporosam unicè respicit; in eâ siquidem non parvitas aut imbecillitas pulsûs, sed potius turgentia quædam, ictûsque validitas, qualis in essentiali apoplexiâ solet percipi, persen-

tiscitur, cum aliquâ nonnunquàm raritate potius, quàm cum insigni frequentia conjunctâ. Nascentem tamen, atque paulatim crescentem in pernicioso comatosum affectum, quantum opus est, ut opportunè valeat dignosci, jam satis exactè, ordinatimque paulò suprâ descripsimus.

Superest aliud membrum divisionis nupèr statutæ, juxtâ quod *octava* emergit perniciosarum periodicarum species, quatenus illæ intermissionem suam paulatim amittentes, ad omnimodam continuitatem, et simul acutiem latentè ac malignantè tendunt. Non ergò hîc loquor de placidâ illâ benignâque continuitate accidentali, quam nonnunquàm intermittens febris acquirit, cùm primò de simplici fit duplex, aut triplex, mox tandem subintrans, adeoque, pressè loquendo, continua per hoc præcisè, quòd protrahatur nonnihil duratio levior paroxysmorum, suapte naturâ (si tempus sineret) perfectè solvendorum, quo sanè casu unus paroxysmus, sæpiusculè etiam anticipans, supervenit alteri, priusquàm integrè solvatur præcedens, sed his non obstantibus sub istâ etiam accidentali et benignâ continuitate, adhuc eadem servatur periodus, idem propè invasionis modus, cum sensibili etiamnùm rigore, horrore, aut frigore, eademque solutionis saltem dispositio, si non totalis solutio. Ad hæc patiens febrem hujusmodi per paroxysmos sese lenitèr excipientes, et subintrantes dictos continuam redditam, fert facillimè, fermè ac si ea esset adhuc intermittens, nullumque grave symptoma patitur.

præter vulgaria, nisi paulò majorem imbécillitatem virium, à frequentiori luctamine citrà consueta intervalla repetito-fatigatarum. De his, inquam, febribus, hujusmodi continuitatem sibi prorsùs accidentalem, simulque benignam acquirentibus modò sermo mihi non est, nullum etenim ex seminantur periculum, nec alitèr exigunt tractari à perito medico, ac tractentur veræ intermittentes, aliquâ tantùm adjectâ circumspectione; adeòque viribus etiam corticis, ubi illum adhibere velimus, æquè facilè cedunt ac intermittentes omninò, ut suo loco repetemus. Non per hoc tamen fit, ut asseram, febres à primordio intermittentes simplices, mox duplices, aut triplices, demùm continuas per subingressum factas nequire ad continuitatem essentialem, atque periculosam, quin et ad summam pravitatem et malignitatem progredi; hoc enim esset negare quod experienciâ constat, et cuncta ferè destruere, quæ proximè ac etiam alibi sum prolaturus; sed velim intelligi, quòd quotiescumquè intermittens febris fit continua per subingressum eo, quo dictum est, et quo sæpè assolet modo, omni-que proindè caret gravi malignoque symptomate, de illâ, quippè minimè perniciosâ, impræsentiarum mihi non est sermo, sed de illâ tantùm, quæ continuitatem acquirit simul et acutiem, ac pravitatem, et tunc tantummodò, quandò illam acquirit, sive deindè hoc fiat per viam paroxysmorum subingredientium, sive aliâ quâcumque viâ, siquidem aliâ (quod non crediderim) viâ id possit contingere.

Octava igitur, et ultima perniciosarum periodicarum differentia, seu species est, cùm febris nullo licèt præcipiti stipata symptomate, pluribus tamen aliis gravibus, sibi que impropriis paulatim afficitur accidentibus, qualibus febris acutæ, malignæque solent ut plurimum insigniri, ac propterea et ipsa de intermittente sensim in continuam, acutam, et malignam migrat. Per hoc autem quòd plura et varia sortiatur accidentia, ut continuarum mos est; non fit, quòd habere quandoquè possit aliqua etiam ex iis, quæ exposumus in perniciosis suprâ descriptis, ut lethargum, cardialgiam, syncopem etc.; sed ea solet habere in gradu remissiore, ut eadem habere solent nonnunquam continuæ ipsæ primariæ, non verò in immani, tamque conspicuâ intensione, ut inter cætera quammaximè superemineat, valeantque idcirco se solis huic feбри et exitium summè præceps, et peculiarem denominationem tribuere, quemadmodum eandem illi primariò tribuit acquisita continuitas. Hæc autem perniciosarum febrium differentia postrema, quam *subcontinuæ* nomine lubet appellare, absque aliis signis ex eâ, quæ paulatim fit, periodorum obscuratione, et successivè acquisitâ continuitate est cognitu facilis; sed quoniam expedit nosse à principio naturam huiusmodi febris, ut illi, priusquàm nos fallat, possimus obviam ire, eaque opportunè præmittere, quæ tempestivo, scilicèt neque præcoci, neque nimium dilato usui corticis viam planiorem atque methodicam sternere valent; illius ided mo-

rem, atque progressum operæ pretium est fusiùs explicare, et verisimiliora, frequentioraque ejusdem signa describere. Hæc verò, licèt nec omnia, nec semper concurrant, nec eorum quodlibet perniciosæ febris semper sit index, plurimam tamen lucem perito artifice, eadem pro re natâ consideranti, pensitanti, combinanti, et conferenti poterunt afferre: et eo majorem, si illis immisceatur symptoma aliquod nonnihil conspicuum ex iis, quæ perniciosarum constantè intermittentium sunt peculiariora.

Priusquàm tamen hujusmodi descriptionem aggrediamur, opportunum erit præmittere et adnotare, quòd octava hæc species (quam unicam constituimus, quia à solâ continuitate præter ordinem acquisita omnem perniciosæ naturæ suæ occasionem nanciscitur) hæc inquam una plures differentias accidentales potest suscipere, eas scilicèt omnes, quas passim auctores continuis febribus, præsertim proportionatis, solent tribuere, quales sunt horridica helodes, assodes, hepiala etc. ut proinde *Mortonus* ipse hanc nostram octavam speciem tot differentiarum sæcundam, unoque nihilominùs cortice curabilem, peculiari capite consideraverit, quemadmodùm videre est apud ipsum *De Proteiformi febris continentis genio*, quamvis à pluribus sub hoc nomine febrem quoque essentialitèr continuam atque primariam credatur (et reverà aliquibì videatur) velle comprehendere, dummodò *remittentem*, seu *periodum servantem*. Sed cum minu-

tiores hujusmodi differentiæ parùm, aut nihil immutent curationem ope corticis absolvendam, ideò ab hac multiplici subdivisione ad rem nostram inutili hìc lubens abstineo. Quiâ verò ad eamdem curationem medio cortice instituendam facit aliquid varia ipsius continuitatis habitudo, hoc est diversa celeritas, modus, et tempus, quo febris ex naturâ suâ intermittens continuitatem acquirit, ideò hanc ipsam diversam habitudinem in octavâ hac specie placet considerare, atque distinguere.

Degenerat ergò intermittens febris in continuam vel in morbi progressu, vel in ipso statim principio. Rursùs si in progressu, vel hoc fit celeritèr, adeò ut etiamsi post quartum vel quintum tantummodò paroxysmum continguat, fiat tamen intrà unum aut alterum circuitum evidentèr, ac sensibilitèr; vel contigit paulatim, itaut si post quartum itèm, vel quintum paroxysmum incipiat febris aliquam continuitatem affectare, non tamen sensibilitèr eam sit assecutura, nisi sensim, et post plures adhuc circuitus. Si ergò continua fiat febris intermittens in aliquo sui progressu, sive deindè id celeritèr, sive paulatim fiat, curanda est cortice in ipso actu suæ metamorphoseos, in quo perniciosum incipit induere characterem; idque agendum methodo ordinatim describendâ infrà *cap. III. hujusce libri*, regulisque in hunc eumdem finem ibidem apponendis. Si verò febris orta intermittens fiat continua in ipso ferè statim exortu suo, ut non infrequentèr accidit, in hoc casu, licèt sub octavâ hac specie

perniciosa illa contineatur, de eâ tamen absolute intelligi non debent, quæ intra dicturi sumus de cortice in perniciosis incunctantèr offerendo, cùm de oblatione illius in hujusmodi circumstantiâ maturam considerationem exigente peculiare examen simus instituturi *cap. v. libri sequentis*.

Hoc præmisso, transeo jam ad exponenda signa remotiora febris intermittentis modò celerius, modò lentiùs in continuam acutam, malignamque migraturæ, suspecta itaque ab exordio suâ erit, ne in continuam acutam degeneret ea intermittens, quæ cum pauco, aut nullo rigore solet invadere, sed potiùs cum sensu caloris; itèr quæ primâ die leviusculam (dummodò tamen verè febrilem) infert accessionem, alterâ verò die (non alterâ periodo) fortiozem, et sic progrediendo motum servat graviozem per dies pares, loquendo per modum exempli de tertianâ duplici ab ortu. Quòd si eadem sic orta in simplicem statim mutetur, etsi hoc laudabile sit, non desinit tamen esse suspectum, si primam accessionem validam debilis, ut suprâ, immediatè præcessit; potest enim faciliè typus ille mutari, qui ordine inverso potuit incipere. Proximum paritèr imminentis continuitatis indicium est, si in tertianâ, præsertim simplici (idem, servatâ proportione, intellige de quartanâ, quæ, si continua essentialitèr fiat, suapte naturâ ut plurimùm lethalis est, ut nôrunt practici) indicium, inquam, continuitatis est, si quidam appareat intermissionis die mordax ad tactum calor, qui aliquam etiam secum trahat

pulsûs perturbationem, sitim aut linguæ siccitatem; quæ omnia incendium universale jamjam disponi præmonstrant. Urina quoque notabiliter pauca et simul rubra vel crocea, sicut in omnibus febribus est semper symptoma summè considerabile, quantum novi, ita in intermittentibus non parvum facessit negotium, periculumque saltèm continuitatis portendit. Assolet etiam in iisdem ad suscipiendam continuitatem dispositis apparere faucium et gutturis inflammatio quædam ulcerosa cum crustâ albâ summi tædii, præ impeditæ deglutitionis incommodo, quam *aphtas albas* nonnulli, *alcoholam* alii vocitant. Symptoma istud, utut nonnunquam quasi criticè appareat circâ finem morbi, quemadmodum etiam (et quidem frequentius) pustulæ circâ labia erumpentes, nihilominus ut plurimum mali ominis esse consuevit, vel saltèm signum difficilis judicationis, et peculiaris pravitatis succorum, mediis glandulis illis à sanguine secretorum, aut consuetorum secerni. Quamobrèm quotiescumquè visitur hujusmodi crusta, de febre ad continuam essentialiter tendente suspicari fas est, immò de eventu sinistro, si præsertim parvitas pulsûs, vocis clangor et singultus (qui tamen hîc minùs, quàm alibi timendus, utpotè soboles inflammationis hujusmodi) simul concurrant. Deniquè omnia accidentia quæ in continuis malignitatem subesse, quæcumque sit illius indoles, solent ostendere, illa eadem si in intermittentibus observentur, idem, si non statim, saltèm progressu temporis,

temporis, prænunciant, excepto delirio temporaneo, quod aliquandò in statu paroxysmi fervidioris solet accidere, et statim evanescere citrà periculum, secùs si in febriculâ mitiore contingat, vel eâ etiam declinante perseveret. Facta verò jam continua essentialitèr, ac perniciosa febris suo pte se ingenio patefacit. Et licèt lentiùs procedat, interimatque, ac cæteræ perniciosæ, maximo tamen, et diutiùs metuendo non caret periculo, quamvis ab origine fuerit intermittens. Etenim trahit illa nonnunquàm secum sæva quævis symptomata, quæ secum paritèr deferunt malignæ ipsæ primariæ v. gr. parotides, quas non semel in hujusmodi febribus contingit observare, perpetua deliria, convulsiones, aversiones à cibo et maximè à quocumque potu, non secùs ac si hydrophobiâ detinerentur ægri, et similia febrium summè malignarum ac pestilentium propria, modò ex colliquativo genere, modò et forsàn frequentius ex coagulativo : quæ omnia unicuique proxim exercenti se produnt sæpissimè. Enim verò tam frequens est hæc una species febris perniciosæ, quæ singula febrium ab ortu continuarum acutarumque sensim sibi asciscit symptomata, licèt incæperit intermittens, vel quasi, ut se sola membrum alterum generalioris nostræ divisionis meritò impleat, quippè quæ plures differentias perniciosarum à *Mercato*, sub diversis titulis recensitas unà comprehendit. Atque idcirco non inutile erit relegare iterùm, ut ab initio etiam hujusce capitis, lectorem ulterioris instructionis avidum, ad com-

pletam descriptionem, quam prodidit idem *Mer-
catus*, cujus ideò aureum de hisce febribus tractatum
recusum volumus, et antecedenti libro integrè
insertum.

CAPUT II.

Periodicarum febrium perniciosus character generalitèr expen-
ditur in suâ causâ, varia illarum pravitas, et actio diversa
in triplicem nostri corporis regionem, earundem *Chinâ Chinâ*
curandarum idea quædam practica generalis.

DISTINCTIS penès præcipua symptomata et pro-
grediendi modum, frequentioribus magisque ob-
servabilibus perniciosarum intermittentium diffe-
rentiis, è re videtur easdem ultrò distinguere penès
ipsarum causas internas, si non ultimas, quod dif-
ficillimum, saltèm generaliores ad normam eorum,
quæ *libro I. cap. VI. et VIII.* protulimas: quod equi-
dem lubet non asseverantèr, sed dubitativè tantùm,
et superficie tenùs tentare. Cùm enim theoremata,
quæ fundamentorum adinstàr ibidem jeci, quan-
tumvis probabilia, et ratione suæ universalitatis non
facilè falsa, incerta tamen in plurimis agnoscam
et ipse, non est cur fidentèr admodùm explica-
tionem causarum, utut generalium, hujusce rei
illis superstruam. Dicam tamen quæ cùm praxi et
curatione cohærent, adeòque si quis notionibus
istis, saltèm pro quopiam veritatis modulo sibi
propositis, utatur, non multùm, ut reor, à recto

curationis scopo aberrabit; non quia idea hujusmodi indubitanter vera sit, sed quia ad illius exemplar æquè benè curatio succedit, ac si vera esset. Ità ad modulum suæ hypotheseos, quantumvis obscuræ, certissimam istarum febrium depulsionem per usum Peruviani corticis fassus est se excogitasse *Mortonus*, quod illi profectò in praxi non malè cessit. Ità paritèr mundi systema, licèt sacrarum litterarum testimoniis et decretis Ecclesiæ minùs, ut videtur, consonum, ad regulas tamen praxeos astronomicæ, et ad cœlestia salvanda phænomena sufficientèr dispositum condidit *Copernicus*. Ità quoque materialia suæ physices principia, non ut vera et certò talia, qualia depinxit, sed ad explicandos naturales effectus æquè apta, ac si vera forent, protulit *Cartesius*, ob ingenuam saltèm confessionem suam commendabilis, secundùm quam cogitata sua, suamque methodum, etsi explorandis naturæ arcanis satis accommodatam, non magis tamen pro *historiâ*, quàm pro *fabulâ* venditat. Utinàm verò magnus vir, cùm de Pallade suâ tam moderatè senserit, vel conatus suos ad purioris doctrinæ amussim magis adhuc castigasset, vel nullum pravis præoccupatum affectibus lectorum nactus esset, quem transversum agere aut egisse crederetur. Ità multò magis ego de ratiunculis meis theoreticis sentio, sive fabulæ sint, sive historiæ; quod citrà contentionem sanioribus omnibus dijudicandum relinquo, *refelli à cunctis, ut aiebat Cicero, si opus sit, sine iracundiâ paratus*.

Ratum itaque hîc habendo, quod jam alibi statuimus, nempe sanguinem in febribus intermittentibus se habere merè passivè, principii verò activi rationem habere succum quempiam heterogeneum, per intervalla eidem sanguini affusum, et febrilem in eo fermentationem sive effervescentiam concitantem, cohærenter sequitur, quòd in perniciosâ tota ratio et tota vis, secundum quam illæ tam immanitèr sæviunt vel omninò, vel saltèm principalitèr pendeat à tali succo, quicumque ille sit, peculiarem diathesim, pravam tamen suprâ consuetudinem suam atque sylvestrem, et septicam adepto, per quam tam gravia, tam ferocia et varia producat symptomata. Sed cùm ignorato hujusmodi succo ejusdem paritèr ignoretur natura et qualitas omnis tùm nativa, tùm præternaturalis, cùmque de eo vix quicquam fuerimus ausi statuere præter motum, viam, atque successivum progressum illius in sanguinem; ideò posito quòd talis liquor fermenti febrilis ordinariam rationem obtinens, in perniciosâ intermittentibus nescio quid majoris suprâ consuetam pravitatis habeat, seu nescio quid ascititiæ venenositatis, atque malignitatis (proût diximus libro antecedenti in animadversionibus ad textum *Mortoni schol.* II. et ut fusiùs infrâ sumus dicturi) præmissâ inquam hujusmodi positione, nil aliud superest à causæ morbificæ consideratione petendum ad distinguendas earumdem perniciosarum differentias, nisi motus, actio et distributio ipsius materiæ febrilis in triplicem

nostri corporis regionem, nempe *primò* in primas vias sic dictas, *secundò* in massam sanguineam, *tertiò* deniquè in principium nervosi generis; penès quem motum, actionem, et successivam propagationem febrilis fermenti à varias hasce provincias, si illud peculiaritèr prævum ac efferum fuerit, illæ eædem, quas suprà exposuimus, emergere possunt, et nonnihil dilucidari intermittentium perniciosarum differentiæ.

Itaque prout in primam regionem, ventriculum nempe, si lubet, intestina, ductusque omnes chylicos repit fermentum istud vehementi quâdam, venenatâ ac propè arsenicali, erodente videlicet, ac colliquante acrimoniâ sive ingenitâ, sive aliundè acquisitâ imbutum, eosdem fermè producit effectus, ac chylus quidam ex esculentis venenatis confectus, seu ex eodem veneno plûs, minûs infectus, perindè ac si ephemerum cholchicum quis assumpisset. Proindè orificium sensile stomachi acriter mordens et vellicans *cardialgiâ* infert, et per consensum comitem lypothymiam. Eundem verò ventriculum, intestina et annexos ductus immanitèr pungens, et in spasmos ac contractiones excretorias provocans, affectionem *cholericæ* similem gignit. Quòd si ferociâ nonnihil minore sæviat, quatenûs succis viscidioribus sit irretitum, adeòque contactum illius etiamnùm ferre possint, etsi non sine magnâ molestiâ affectæ membranæ, tunc ea sequitur irritatio, quæ priûs lentam abrasionem, mox excoriationem illarum partium, deniquè suc-

corum omnium, illuc confluentium, ipsiusque sanguinis illas intimè perluentis excretionem inducit; undè vomitus mucosus, simulque cruentus cum conatu dolorifico, alviq̃ue fluxûs consimilis ac *dysenterico* analogus, aut *dejectio* copiosa *loturæ carniū similis*, aut alia quædam *sanguinem atrum referens*, solet emergere. Reseratis quippè, et abrasis à succo illo sive arsenicali, sive alius corrodentis naturæ, etsi succis quoque mitioribus, ut dictum est, non nihil implicito, reseratis, inquam, et abrasis articularum gastricarum, et intestinalium osculis, immò vel erosio, vel laceratio excretoriis glandulis ad extrema vasorum appensis, non potest non egredi, quâ datâ portâ contentus cruor, aut serosior saltè illius portio. Et sic ferè statim ac excidit è minerâ suâ, et in cavitationem ventriculi (datâ suppositione) deindè in intestina, et chylicos ductus sese insinuat fermentum istud non modò vitiosum ab ortu, sed indolem insuper emetico-cathartica in itinere suo, utut brevi, proptèr aliorum succorum miscellam hinc indè mutuatum, potest haud difficultè intelligi quo pacto nonnullas constituat perniciosarum differentias, illas videlicèt, quæ vel à *cardialgia*, vel ab affectu quasi *cholero*, vel ab alvi fluxu *hepatico* dicto, *dysenterico*, *atrabiliari*, aut quomodolibet cruento, perniciosam naturam suam sortiuntur, simulque secundùm nos denominationem *cardiacæ*, *cholericæ* aut *dysentericæ*, et *subcruentæ*, aut *atrabiliaris*. Undè est (ut et hoc obiter repetam) quòd facilè hallucinentur ii, qui suppo-

sità in locis omnibus antedictis fermenti febrilis præexistentiâ, plurimùm fidunt emeticis, atque catharticis pro febrium intermittentium curatione; cùm tamen ostendat experientia, cui astipulatur et ratio, quàm facile sit remediis hujusmodi cum fermento febrili maximam symboleitatem habentibus, ut constat ab effectu utrimque pari, quàm facile, inquam, sit, idem fermentum potius acuere et roborare, quàm vincere et debellare. At de hoc jam fortè nimium.

Quòd si à ventriculo, intestinis, lacteisque primi ordinis (ut *libro primo cap. VI.* tetigimus) lubeat fermentum febrile proscribere, illudque tantùm agnoscere in lacteis secundi ordinis, non idèò minùs facilis erit explicatio singularum perniciosarum in primam regionem sævientium, feraliumque symptomatum earundem. Malignum siquidem fermentum in secundarios ductus chylicos irruens, quasi è suis compedibus excarceratum, tantam in ipsis ductibus irritationem, molestiam atque sævitiam exerere potis est, quantam exerit venenatus chylus è lacteis primi ordinis illuc delatus. Excitatâ etenim luctâ acerrimâ cum succis quibuslibet ibidem præexistentibus, simulque mordicatis immanitèr tunicis lactearum, et sensibilibus earum febrilis, eam necesse est sequi spasmodicam omnium partium infimi ventris connexarum contractionem ac convulsionem, quæ succos acerbos, et nondùm excretioni maturos, eosque proptereâ summè mordaces, et efferos (ut qui etiam ex naturâ suâ,

æstivo præsertim, et autumnali tempore in quibusdam signatè corporibus, sunt tales) quæ, inquam, succos acerbos ex glandulis omnibus intestinalibus, et ex canalibus illuc confluentibus, pancreatico scilicèt, atque choledoco per vim valeat exprimere. Qui equidem succi sic expressi, præterquàm quòd ex se ipsis summam vellicationem in stomacho, et intestinis gignere apti sunt, et illa in violentas excretiones cogere, abradere, exco-riare, et indè cruorem ipsum elicere, ulteriorem etiam noxam inferre valent, quatenùs lacteas ipsas tùm primi, tùm secundi generis permeando, fermento quoque febrili suppetias ferunt, illudque deterius adhuc, et ferocius reddunt adventu et societate suâ. Addamùs fibrarum nervosarum undequaquè divulsarum consensum multiplicem, potentem inducere cardialgiam, lypothymiam, aliaque hujusmodi gravia symptomata. Addamus tandèm, si liceat, ex tam violento tumultu, et ex diversis vasorum lacteorum, mesenterii, intestinorumque cantractionibus secundùm varias fibrarum directiones excitatis fortè fieri posse retrogradum à chy-liferis ductibus in ipsâ usquè intestina tenuia fermentum febrile, superato vi convulsionum valvularum obstaculo. Ex quo qualis ibidem fieret succorum intestinalium cum fermento febrili miscella, qualisque confusio et qualis paritèr fluxus atque refluxus in ipsis ductibus chyliferis, eosdem succos, idemque fermentum suapte naturâ, saltèm per alia ostiola, iterùm admittentibus (siquidem

non planè impossibilis, ut reor, sit talis positio) nemo non videt. His et similibus modis posse hujusmodi malignum fermentum solas lacteas secundi generis occupans, ventriculo, intestinis, lacteisque primi generis antecedentèr intactis, symptomata omnia perniciosarum in primam regionem sævientium producere probabiliter autumo. Indiscriminatim nihilominus et hìc, ut jam loco citato, omnes, quotquot sunt, primas vias, velut primum limen ipsius maligni fermenti in sanguinem ingressuri, lubet adhuc considerare, et eadem universali suppositione retentâ, ut cœptum est, deinceps prosecui.

Haud equidem diffiteor, arduum esse definire in quonam consistat intrinsecè peculiaris illa et determinata virulentia, quam identidem suprâ consuetam suam solet acquirere febrile fermentum, sive hinc, sive indè illud derivetur, dùm singulas producit perniciosarum species; quam pravam diathesim ascititiam intantum malignam et venenatam voco, inquantum eam dilucidè nequeo explicare. Pro usu tamen practico sat sit dicere eam esse in casibus nuperrimè recensitis ubi primarum statim viarum tumultuaria subversio suboritur, eam, inquam, tunc esse febrilis fermenti naturam, qualis plùs minùs est, ut modò dicebamus, indoles vehementiorum emeticorum atque catharticorum, seu qualis est natura, ut rem propiùs designem, ipsorum succorum nostri corporis choleram morbum producentium. Sanè morbus iste, quantum ex acci-

dentibus patet, causam agnoscit veneno simillimam; tertianæ itèrn perniciosæ modò memoratæ saltèrn earum aliquæ, maximam habent similitudinèrn cum cholerâ. Itaque quâ ratione lethalis esse consuevit cholera morbus, eâdem quoque ratione lethales sunt ut plurimùm hujusmodi febres; eamque similitudinèrn, quam cum veneno extrinseco habent humores et succi choleram efficientes, illam eamdem habet cum eodem veneno succus febrilis, pro talium febrium causâ receptus. An verò tùm illi, tùm iste habeant acrimoniam quamdam veneficam prorsùs ineffabilem, an talis conditionis, quæ semoto etiam obscuro hoc nomine queat sensibiliùs explicari, præcisè non quæro, istamque litem, quæ ad purum nomen fermè reducitur, nec ad praxim conducit, theoreticis subtilioribus ad extremum usquè apicem discutiendam relinquo.

Si tamen liceat super hac re per analogismum quemdam crassiusculè ratiocinari, quoniam exactiùs non possumus absque sophismatum periculo, dicam illud esse datâ proportionè discriminèrn inter succum febrilem, cùm tertianas benignas, et eundem cùm perniciosas modò descriptas excitat, illud, inquam, quod intercedit inter antimonium uno modo, idemque alio modo præparatum, secundùm quas diversas præparationes in lineâ emetici atque cathartici, modò benigniùs modò violentiùs præstat utrumque, aut alterutrum, variè videlicet alteratâ, vel immutatâ heterogenearum illius particularum texturâ. Sed, ne longè admodùm per remotiores com-

parationes à fluidis humani corporis recedamus, nonne videmus quantum discrepet à flavâ bile quo ad acrimoniam et pravitatem bilis æruginosa et glastea, sive utraque sit idem humor variè alteratus, sive tertium quid ex diversorum succorum commixtione resultans? Nonne paritèr plures succi suâpte naturâ, si seorsim sumantur, planè innocentes evadere possunt naturæ nostræ infesti, acerrimi et erodentes, si simul misceantur? Quid, si vitiiati jam sint seorsim singuli, et à crasi suâ desciscentes, ut in casu nostro, atque insuper insimul mixti. In hoc fortè uno consistit tota ratio formalis, ut scholasticè loquar, emetici atque cathartici, quæ reperitur in fermento febrili relatè ad illius actionem in primas vias, ratio coagulantis aut dissolventis relatè ad actionem in massam sanguineam et ratio stupefacientis, aut alitèr lædentis respectivè ad actionem quam exerit in principia nervosi generis, concurrente videlicèt insimul cum eo dispositione *medii et termini ad quem*. Hinc tota malignitas, venenositas tota quarumlibet pernicioarum intantum solummodò occulta, inquantum occultus latex ipse febrilis, aliique confluentes succi, eorumque varia commixtio, necnon commixtionis eorundem varia proportio. Sic videmus, unam et eandem thermalem aquam (quancumque velis) statim ac è primâ scaturigine simplex prodit, talem determinatam vim, suæ fœdinæ, vel, ut aiunt, mineræ correspondentem, sive bonam, sive malam secum deferre; si verò diversas in progressu, et deteriores mineras perluat, diversam paritèr ac

deteriorem pro diversitate mineralium, sive fossilium, quorum salibus adventitiis imprægnatur, subindè naturam nancisci, undè indoles primigenia notabiliter alteratur ac deterior evadit, necnon quandoquè venefica. Idem cum proportionem dicendum de fermento febrili in casu nostro. Est enim, ni fallor, intrà confinia maximæ probabilitatis credere, quòd febrium intermittentium fermentum seu latex extraneus, qui primò, et principaliter sanguinem in periodicam excandescentiam aut affervescentiam concitat, sit quidem ex se ipso, statim ac è minerâ suâ purus egreditur, indole quâdam peregrinâ præditus, quæ cum naturâ cruoris minimè conveniat, sitque adhuc deterior cum perniciosas, quàm cum benignas intermittentes gignit; sed neque extrà rem est ulteriùs suspicari, quòd ille idem latex febrilis fiat adhuc deterior ratione pravæ et variæ dispositionis, quam invenit in diversis locis atque regionibus, per quas transit, vel in quibus hospitatur. Atque ideò, quatenus à termino suæ scaturiginis ad terminum sui confluxûs in sanguinem progreditur, et in varios succos morbosos impingit, cum quibus confunditur, ac commiscetur tum intrà primas vias, tum intrà ipsam cruoris massam, talem probabiliter ex huiusmodi commixtione acquirit dyscrasiam, quin et virulentiam atque malignitatem, quæ febris cæteroquè benignæ, perniciosam naturam, eamque variam pro varietate succorum quibus diversimodè inficitur, valet imprimere. De pravitate illius violentèr eme-

ticâ atque catharticâ, intrâ primas vias acquisitâ, et intrâ easdem immanitèr exercitâ, variasque idcirco perniciosarum species constituyente, jam satis hactenùs. Ad reliqua nunc pergendum.

Prout igitur idemmet febrilis latex succis non quidem vehementèr emeticis aut catharticiis, ut in primo casu, pravis tamen et incongruis secum raptis, in secundam regionem, seu in sanguineam massam delabitur, venenositatem alius generis, primæque regioni (quam ideò vel innocuè transigit, vel magnâ ex parte declinat) non admodum infensam solet exerere. Hæc in duas utplurimùm species potest subdividi, quatenùs duplex insigne sanguini damnum solet inferre, ipsum videlicèt vel coagulando, vel nimium solvendo, concurrente insimul vitiosâ dispositione, aut labe intrâ eundem sanguinem præexistente (1) ipsamque pravi fermenti dia-

(1) *Grimaud* his *Torti* ideis nixus, aliam protulit hypothesim; ideò symptomata, uti à statu permanente condensationis et spasmi alia, altera verò ab atoniæ et expansionis statu pendentia consideravit.

Baldinger malignitatis in febribus symptomata intuitus est, ut læsiones functionum primariarum virium vitalium plùs vel minùs graves.

Doctor *Alibert* hanc methodum febribus intermittentibus perniciosis accommodare satagens, divisiones physiologicas à professore cel. *Chaussier* editas ad hunc scopum amplectitur, indè 1°. spasmos, convulsiones, subsultus, tremores, singultus, pulsus frequentiam, tensionem vel contractionem, mollitiem vel elevationem, respirationem præcipitatam, vel raram et ster-

thesim ad hanc vel illam noxam specialius determinante. Proinde talis nonnunquam ex hujusmodi commixtione resultat indoles fermenti febrilis, ut venenorum fixantium adinstar (quorum prostat ex vegetabilibus, animalibus, et mineralibus numerosa seges) in sanguineas particulas, et spiritus torporem quemdam inducat, cui primum fermentativi, mox et et circularis quoque motus retardatio succedit. Hinc vel *syncope cardiaca* (constipato potius quam rarefacto, cum primum appellit ex cavâ ad dexterum cordis sinum, cruore) vel universalis quasi coagulatio, ejusdem cruoris, *algor* partium indesinens, et abolitio pulsus absque restitutione ullâ, vel saltém paucâ et exili subsequi solent. Idque fortassè, ut clariùs me explicem, duplici potest ratione contingere: vel enim succus febrilis diathesim modò enunciatam sortitus statim ac sanguini affunditur, illum planè

torosam, palpebrarum occlusionem, decubitus supinum, cutis maculas nigras, gangrænam etc., membrorum, præsertimque sphincterum paralysim, etc., uti *motilitatis imminutionem* aut *augmentum*: 2°. insomniæ, delirium, mentis stuporem, memoriæ debilitationem, animi deliquia, dolores cardialgicos, visus, auditus, olfactusque obliterationem, uti *graves sensibilitatis affectiones*; 3°. frigus deniquè febris algidæ perniciosæ socium, ardorem ventriculi, caloremque acrem et mordacem, quæquæ omnia in aliis varietatibus perniciosarum observantur, uti *varias caloricitatis animalis alterationes* considerat.

Hæc febres perniciosas intermittentes ratio ordinandi, sanè maximè videtur methodica, sed potius effectus aperit quàm causas, quæ quidem diù ignotæ remanebunt.

constipat omninò citrà cor et citrà pulmones, vel in pulmonibus, vel intra cor ipsum. Et in hisce casibus, in quibus vel mortiferam syncopem, vel suffocationem repentinam inducit in ipso accessionis principio, cor ipsum non prætergreditur, neque per aortam ultrà cor distribuitur ad inficiendam reliquam cruoris massam, cùm statim interimat; vel pravitatem suam minùs immanitèr exerit succus ille in ipsum sanguinem, itaut totum iter à lacteis ad aortam possit complere, et accessionem febrilem ad augmentum usquè, statumque perducere. Et in hoc casu illam specialitèr potest in universo cruore producere effervescentiam quam *frigidam* vocant, quæque ex puris acidis cum puro sale volatili commixtis solet emergere, ut in plurium liquorum citrà manifestum caloris sensum effervescentium commixtione observamus. Quâ cum suis limitationibus positâ paritate, non adeò captu difficile redditur, quomodò talis esse possit indoles fermenti febrilis, talisque salium illius cum salibus cruoris inexistentibus proportio, ut consimilis excitari possit effervescentia febrium *algidarum*, *syncopalium* vel similium, si quæ sint aliæ, productiva, quod satùs potest succedere, cùm fermenti febrilis indoles tùm nativa, tùm ascititia, acida peculiaritèr est, et coagulativa.

Contrà, quandoquè ex succrescente mixturâ quam diximus, talis resultat indoles ejusdem fermenti, ut venenorum potius dissolventium adinstàr (quorum paritèr plurimæ sunt, notæque species) ipsiusmet sanguinis compagem discindat citâ, ac

velut explosivâ divulsione partium illius fibrosarum, necnon serosiorum fusione præcipiti, undè sudores statim colliquativi, frigidi ac *diaphoretici* emergunt, quamquàm hoc etiam à concretione partium sanguinis fibrosarum, ut suprâ, et indè succedente serosiorum effluxu possit procedere. Atque omnibus hisce pravis conditionibus stipatum febrile fermentum, si activum sit valdè, imbecillemque inveniat atque dispositam ad suscipiendam celeritèr aliquam ex prædictis impressionibus sanguinis crasim, eas statim (modò unam, modò aliam) febrium differentias gignit, quas vel *syncope*, vel *algor* funestus, vel frigidus ac *diaphoreticus sudor* perniciosas et lethales reddit, quasque ideò *synco-pales*, *algidas*, et *diaphoreticas* dicimus.

Quòd si alterutram, ut suprâ, sortitum sit fermentum febrile veneficam diathesim, et præcipuè coagulantem, quippè frequentiorè, dissolvente tamen etiam quandoquè minimè exclusâ, eam verò segniùs ac lentiùs in usum deducat, sive quia illam in remissione gradu possideat, sive quia minùs dispositam inveniat sanguinis compagem, ut impressionem hujusmodi valeat suscipere, tunc ea lento progressu introducitur dispositio quæ febrem ab ortu intermittentem sensim in *continuam*, *acutam* atque *malignam* convertit. Cùm enim veneficum hujusmodi fermentum coagulans (idem ratione in oppositum versâ intellige de colliquante) non ità facilè intrâ unum paroxysmum integrè subigatur, quin aliquas intrâ cruorem suapte etiam naturâ

naturâ malè dispositum relinquat; cùmque in dies renovatis accessibus recens semper febrilis hujusce succi renovetur influxus, novâque per consequens crasi sanguinis semper imbecilliore redditâ, restitet illius portio non ritè subacta, non potest quin ex congestis repetito cumulo portionibus, talis tandem fiat earum acervus, qualis febrem essentialitèr continuam, acutam, malignam, ex vitiosâ sanguinis stagnatione, aut nimiâ etiam fusione gigni consuetam, solet producere. Et hinc ea emergit perniciosæ febris natura, quæ *octavam* secundùm nos speciem passim obviam, cæterisque omnibus ampliolem constituit, *subcontinuum* nobis dictam, cujus indoles multiformis tunc cùm suum complementum est assecuta, tot et tantis solet sociari symptomatis, quot et quanta sunt ea, quæ febrem à *primordio* continuam atque malignam comitari consuevère; cùm hac insuper deteriore additione, ut ultrâ continuitatem hinc succrescat nova periodus, non quæ obscuram exacerbationem pluribus continuis ex naturâ suâ familiarem imitetur, sed quæ æmulatur, licèt remissius, pravam perniciosarum intermittentium accessionem, adeòque fatigatas jam vires ultrò prosternens, et ob id febrem hujusmodi reddens suprâ malignas essentialitèr, et ab ortu tales, metuendam.

Deniquè, prout ad prima tertiæ regionis confinia pertingit, eademve occupat fermentum febrile, licèt pluribus modis cerebrum, ac principia nervosi generis possit afficere, et verè multifariè nonnun-

quàm afficiat inferendo deliria, motus convulsivos etc., unico tamen graviore modo, cùm citiorem infert perniciem solet obesse, *soporosum* videlicet affectum profundissimum inducendo. Id autem videtur contingere, quatenus idem fermentum extraneis, ut dictum est, salibus, aliundè quoque derivatis imbutum, talis naturæ et gradûs venenositatem acquirit, ut mandragoræ aliisve soporiferis venenis analogicè respondeat, suamque exerat virtutem non tantùm intrà massam sanguineam, verùm etiam, et quidem principalitèr, in nervosum laticem, seu, quod idem est, in spiritus animales, quibus ab infecto sanguine vel subministratur materia narcotica assiduo appulsu ad glandulas corticales cerebri pertingens, et indè in nervosum genus diffusa, vel consueta denegatur; nec influit, uti fas esset, pro restaurandis iisdem spiritibus ad obeunda sensûs et motûs munia; sanguis enim narcosi infectus forsitan stagnare cogitur in extremis arteriolis pro eorundem spirituum instauratione ad cerebri corticem desinentibus. Hinc fit, quòd exacto citrà omnem tumultum primarum viarum itinere, quin blandè et subdolè fascinati cruoris spiritibus specie tranquillitatis cujusdam torpentibus, sensim ab accessionis initio altiùs sese insinuet fermentum febrile. Cùm verò plurimam sanguinei torrentis congelationem nequeat producere, ut in febribus *algidis* suprà descriptis, particularem saltèm in cerebro stagnationem, et fibrillarum ejus nervosarum relaxationem ob spiritus vel

interceptos, vel ex narcoticâ materiâ confectos, inducit. Talis autem, tamquàm vehemens nonnunquàm est hujusmodi dispositio à fermento sanguini confuso introducta, ut eâ durante per totam extensionem augmenti et statûs accessionis febrilis æger lethargicus jaceat, ac fermè apoplecticus, donec subacto propè declinationem eodem fermento (ni priùs æger occumbat) dissolutoque sanguinis torpentis vinculo, et superato ejusdem stagnantis obice, spiritibusque primævæ volutilitati, fibrisque cerebri primævæ tensioni restitutis, paroxysmus solvatur, et cum paroxysmo ipsum ferale symptoma soporosi vehementè affectus. Et hinc deniquè illam perniciosæ intermittentis differentiam, quæ à comatoso lethali affectu denominationem capit, et *lethargicam* dicimus, videmus expositam.

Quòd autem unum, idemque fermentum in diversis subjectis, ætatibus, tempestatibus, aliisque circumstantiis possit varias venenositatis tùm colliquativæ, tùm coagulativæ species suscipere tam ob multiplicem plùsque vel minùs activam pravitatem suam, quàm ob diversam dispositionum habitudinem subjecti in quod agit, quales requiruntur ad diversarum perniciosarum differentias constituendas, facile sibi suadere poterit quicumque ab uno eodemque veneno, æqualem in se ipso semper acrimoniam servante, prout altiora sensim corporis penetralia pervadit, diversisque ejusdem corporis succis sese immiscet, ea omnia, etsi varia et inter

se nonnunquàm opposita animadvertat successivè produci symptomata, qualia in enarratis febrium speciebus suprà descripsimus; indicio satis conspicuo, longè majorem esse, ac esse videatur, symboleitatem causarum accidentia hujusmodi, dissimilia licèt, producentium, eamque proindè à nostris humoribus accedente præsertim aliorum mixturâ esse facilè susceptibilem.

Hisce universis generalitèr, et superficie tenùs libatis circà variam indolem fermenti perniciosas intermittentes producentis, obvium est conjicere, quòd etsi in diversas species aut differentias distinximus, *Mercato* præeunte, easdem perniciosas febres, ut quæ tantùm distant à benignis intermittentibus, quantum distat morbus salutaris à morbo lethali, et tantùm differunt inter se ipsa, quantum ferè differunt v. gr. cholera morbus et apoplexia: nihilominùs si spectemus fermentum illas et istas producens, unum ab alio non plùs quàm accidentalitèr videtur differre, quatenùs accidentale est uni, quod habeat acrimoniam intensioris gradûs, ac habeat aliud, et quod commixtionem salium peregrinorum et exoticorum aliundè mutuatorum admittat. Quòd si alicui rixas logicas effectanti aliqua in terminis *generis*, *speciei* et *differentiæ* confusio aut discrepantia subesse videatur, litem hanc agat cum ipso *Galeno*, et illam componat pro libito, meque in quamcumque partem trahat, annuentem habebit. Dico igitur, fermentum intermittentium tàm salutarium, quàm perniciosarum

idem esse quo ad rem ipsam, sive, ut loquuntur scholæ, *substantialitèr*, habito respectu ad intermissionem, et ad periodum; *accidentalitèr* verò differre, habito respectu ad malignitatem uni adjunctam, et alteri non, quemadmodùm accidentalitèr differunt boleti venenati à non venenatis, flava bilis à bile glasteâ etc. Sic antimonium crudum, vel diaphoreticum (ut prosequar comparisonem quâ usus sum aliàs) quo ad substantiam differt à vitro, aut flore antimonii, quia reverà semper antimonium est, saltèm ex radice, differt tamen accidentalitèr secundùm diversam præparationem, juxtà quam in primo casu innocens est, in secundo verò sæpissimè noxium, nec carens omni suspicionem veneni.

Uniformem istam utriusque fermenti naturam (quod est ad principia essentialia) satis patefacit Peruvianus cortex, et illius actio febrifuga utrimque æqualis, experientiâ teste; neque enim virtuti illius cedit minùs perniciosarum quàm benignarum intermittentium fermentum, auctâ tantummodò ubi opus sit juxtà exigentiam dosi remedii, ut aucta est in maligno fermento energia fortior nocendi. Quòd si illud cæteris succis nocentibus mixtum dicatur aliam à consuetâ naturam acquirere, et in tertium quid veneficum converti, cui non amplius competat ratio indolis primigeniæ, dico adhuc experientiâ fretus, quòd cùm venenum istud tertium ex plurium succorum combinatione, seu potius confusione resultans, habeat pro basi fer-

mentum febrile intermittentium proprium, ut ostendit adhuc intermissio ipsa, atque periodus; cumque fermentum illud suapte naturâ consuescat cedere actioni corticis, cedit eidem cortici etiam tunc, quando evadit pars integralis talis veneni; adeoque ex solâ simplicis hujusce fermenti retensione totius veneni (si modò loqui sic liceat) perniciosas producentis infringitur activitas. Sic in præparatione venenorum usui medico deservientium, ex solâ unius partis activioris refractione integrâ totius veneni habetur correctio, etsi illud non sit aggregatum per accidens, ut in casu nostro, sed mixtum verum ex mineralium aut vegetabilium genere. An verò simili ratione, ut cōjeci, et non aliâ dometur à cortice fermentum, quod perniciosas gignit, ignoro: quòd dometur æquè certò, ac benignarum fermentum, ferè usquè ad extremas angustias, indubitanter assevero.

Hoc autem, quod diutinâ fretus experientiâ quæ in dubium revocari nequit, affirmo, aliâ etiam planiore spectatâ ratione, videtur ità debere contingere. Itaque cōsiderare est, quòd, cum diversæ benignarum intermittentium species, quotidianæ scilicet, tertianæ et quartanæ ab uno Peruviano cortice æqualiter expugnentur, necesse est earum causas, in aliquâ ratione præcipuâ univocè convenire, propter quam earum extinctio uniformiter sequatur, licet specie dicantur differre, spectatâ dissimili earum naturâ, periodo, et symptomatum societate. Hæc autem communis causa, si variam

periodum respiciamus, videtur esse posse stagnatio temporanea alicujus succi in sanguinem ingressuri, eaque modò longior, modò brevior quo ad durationem, et fortè modò in remotiore, modò in propinquiore loco succedens, quâ solâ per corticem sublatâ, omnis æqualitèr tollitur diversarum febrium periodus. Et cùm in ratione periodi intermittens perniciosa, *v. gr.* tertiana, minimè differat ab intermittente tertianâ salutarî, hinc est quòd utraque, quantum ex hoc capite, per corticem æqualitèr expugnetur.

Si verò respiciamus succum ipsum hìc, et nunc variè, seu per diversa intervalla stagnantem, adeòque diversimodè etiam nonnihil se habentem, et constituentem fermenta ipsa diversas salutarium intermittentium, putà quartanarum, tertianarum, etc. species producentia, etsi ista ob hoc ipsum, et propter diversitatem symptomatum, quæ pariunt, diversam quoque inter se dyscrasiam habere minimè dubitem, adhuc tamen in illis radicalem quamdam symboleitatem et uniformitatem semper servari crediderim, ratione cujus non obstante aliquâ difformitate conveniant univocè in præcipuâ quâdam vitiosâ dispositione suprâ quam cæteroquò fundatur, vel cui accedit diversa nonnihil hic, et nunc ipsorum fermentorum habitudo. Suadet hoc vulgaris experientia, quâ constat, tam tertianæ, quàm quartanæ fermentum ab uno, ut diximus, et eodem Peruviano cortice æqualitèr retundi. Suadet hoc succus ipse febrilis, qui probabilitèr, ut aiebam,

semper est idem latex, vel saltèm de eodem genere, conclusus et stagnans, et ob longiorem solum, vel breviorè stagnationem modò hac vel illâ tempestate, modò in hoc vel in illo loco contingentem, nonnihil diversimodè vitiatus. Suadet deniquè alia experientia, quâ notum est, quàm facilis sit, et crebra metamorphosis unius speciei intermittentis in aliam, quod nonnisi à symboleitate fermentorum potest procedere. Si enim toto cælo diversa, et ferè ad invicem contraria supponantur tertianarum *v. gr.* et quartanarum fermenta, arduum erit intelligere non solùm quomodò contingat hujusmodi transmutatio, verùm etiam quo pacto unus et idem cortex possit in illa opposita agere ut agit, nisi velimus totum opus refundere in diversos corticis sapes, ut opinatur *Thomas Donzellus*, vel nisi clariùs talem supponamus proptèr hujusmodi sapes Chinæ Chinæ constitutionem, ut salium hermaphroditorum adinstar oppositas etiam inter se acrimonias æqualitèr temperet, eo pacto, quo datâ proportionè unâ, et eadem simplex aqua acidam *v. gr.* æqualitèr, ac salsam sui additione acrimoniam diluit.

Cum itaque minùs, quàm differant ad invicem tertiana et quartana benignæ, differant inter se tertiana perniciosa, et tertiana benigna, (istæ enim sunt ejusdem speciei, teste eâdem periodo, secùs ac illæ) hinc est, quòd utriusque fermentum æqualitèr dometur à cortice, ut ab eodem domatur æqualitèr fermentum tertianæ et quartanæ benignioris. Cùm enim tota diversitas tertianæ benignæ,

ac malignæ nobis elucescat ex solo symptomate pernicioso huic adjuncto, et cùm tale symptoma non differat ab alio simili non pernicioso in tertianâ benignâ apparente, ut vomitus *v. gr.* in istâ moderatus, in alterâ immanis, cùm, inquam, non differat nisi ratione majoris intensiois, itâ fortè nonnisi ratione majoris intensiois consuetæ dyscrasiæ, aut acrimoniæ suæ, quæcumque illa sit, differt fermentum tertianæ perniciosæ à fermento tertianæ non perniciosæ, adeoque tota illius malignitas ac venenositas, quæ ineffabilis dicitur, non alius est nisi major intensio activitatis ejusdem fermenti febrilis, cujus indoles solita cùm ignoretur, æquè ideò ignoratur intensior insolita. Sed quo pacto per corticem ritè administratum illa corrigitur, eodem quoque corrigitur et ista, fermento scilicèt istius æqualitèr retuso, licèt in hoc casu nocentior, quàm in alio ejusdem sit vis. Sic idem telum æquali nisu vibratum in eandem corporis partem, prout magis vel minùs acutum est, modò leve, modò lethale vulnus infligit, si verò omni acie suâ tam quantò acutius est, quàm quandò est obtusius, per eandem limam æquè spoliatur, ab infligendo tam lethali, quàm leviori vulnere æqualitèr prohibetur. At istiusmodi ratiocinationes nodis quamplurimis inextricabilibus implexas, nonnisi ut nutantes velim accipi caligantis intellectûs mei cæspitationes.

Firmiore talo deberet posse per hanc arenam incedere, si materia sineret, medicinæ practicæ benè jugata mathesis, quæ utinàm æquè feliciter

applicari posset morbis, ut loquebantur antiqui, similaribus, sive in intemperie constitutis, adeòque febribus tam simplicibus, quàm putridis, ut paritèr aiebant, atque malignis, ac applicatur morbis organicis. In his certè quoniam solidorum affectio vel solitaria est, vel saltèm prævalet fluidorum læsioni, locum satis amplum potest habere mechanice, anatomicis, chirurgicis, clinicisque simul observationibus juncta, id quod in rebus ab optice pertinentibus quàm maximè elucessit. Immò et eandem ingeniosè usurpatam ad plures alias extendi posse nequaquàm negaverim medicinæ provincias, ut luculentè testantur tot practica non minùs quàm subtilia et docta clarissimi in dies *Hecqueti*, aliorumque nostri ævi scriptorum tùm alibi memoratorum, tùm etiam non memoratorum opera medicomechanica, in quibus etsi solidorum systema probasi sternatur, sua tamen quoque vis non planè denegatur fluidis insito quaquaversùm turgentibus spiritu.

Haud æquè facilè forsàn procedit res in explicandis morbis inorganicis vulgò appellatis, seu similaribus, et specialitèr febribus, quarum abs trusa et implicata natura mechanicum utrumque systema non parùm fatigat. Quia verò ætiologia earumdem febrium, in quibus, ut reor, fluida per se exorbitant, atque orgasmo suo solida ipsa consecutivè afficiunt ac lædunt, meliùs concordare videtur cum observationibus naturæ, si fluidorum systemati superstruatur, quàm si superstruatur sys-

temati solidorum; optandum idcirco superest, ut iidem celebres viri, vel iis jam emeritis, alii posthac mechanicis itidem principiis innixi, post sedulam praxim medicam à diutino tempore exercitam, conatus suos ultrò urgeant, ut hanc Spartam adornent per mathesin fluidis quoque humani corporis, eorumque tùm peculiari texturæ, tùm motibus intestinalis, quoàd usquè licet, applicitam, etiamsi res ardua hæc sit ac perdifficilis, maximè cùm nondùm satis compertam habeamus omnium sigillatim succorum naturam, vim, et secretionis modum, immò nec circulos satis calleamus eorundem particulares, aut varias velocitates, quâ singuli circumaguntur, ut ad circulum universalem concursu redeant inæqualitèr æquali. Allaborandum nihilo minus æquè dixerim hac etiam viâ, neque tamen ubi sic exigat rerum ordo, pigeat quemquam petere principium motûs, non immediatè quidem à solidis in primâ sui creatione sic ineffabiliter constitutis, sed potius à fluidis spiritu suo insito, et elasticâ vi, quantum par est, abundè pollentibus, illamque jugitèr in solida transferre valentibus.

Hæc rursùs si fortè teratur universalitèr semita, quam antehac calcavêre tot alii præclari viri universâ mathesi præstantes, quamvis, ut fatear, theoriâ febrium, præsertim periodicarum, ut et omnium quas malignas vocitamus aut pestilentes, nondùm satis extricârint, nullus tamen dubito, quin improbo, ut dici solet, labore adhibito, plurimus saltèm sit emersurus tyronibus præsertim instituen-

dis profectus; esto quòd ob peculiarem conditionem materiæ nimium inæqualis et variæ, nimiumque irregularitèr mobilis, non omnis circà hoc ab arte suapte naturâ conjecturali demi queat incertitudo. At de his iterùm satis, universalia namque isthæc innuere si fortè licet, inculcare ampliùs non decet, ne iis, qui longè suprà nos eminent, philosophandi leges temerè videamur velle præscribere. Resumptis ergò grassioribus nostris sermocinationibus, ad methodum curandi febres perniciosas pro scopo unico nostræ specialis therapeutices assumptas, quo cœpimus gradu pergamus.

Munus ergò solertis medici, qui perniciosam intermittentem dignoverit, erit statim paucis præmissis quæ indicationibus universalibus, prout è re videbitur, respondeant, vel iis omissis, si occasio sit præceps, erit inquam munus illius statim ipsi fermento directè occurrere, ut imminens paroxysmum periculo sæpiùs, atque terrore plenum antevertat, vel saltèm imminuat ac leniat. Consideratâ itaque gradatâ omnium prægressarum, præcipuè verò postremæ accessionis intensione, et indè elicita conjecturâ futuri accessûs, necnon habitâ mensurâ distantiae illius, eam plùs aut minùs, citiùs aut lentiùs præmittat remedii febrifugi quantitatem, quæ enervando plùs aut minùs, citiùs aut tardiùs, prout opus esse videbitur, fermento adventuro sit satis; adeòut vel omninò præcaveatur paroxysmus, vel, si planè id non liceat, vel fortè non libeat, saltèm leniatur, ut vires ægrotantis ferendo sint,

usquè ad integram paroxysmorum sublationem, quæ omninò est in arbitrio experti medici etiam quo ad tempus et modum.

Hac in re ritè gerendâ expediet præ oculis habere theoremata illa generalia febrium intermittentium proprietates nonnullas respicientia, quæ *capite vi. et viii. primi libri* protulimus. Nobis ideò congruum est, ut saltèm fingamus pro crassiore quâdam sed utili curationis ideâ, quòd illarum fermentum, etsi in loco peculiari adeò repositum, ut viribus cathartorum atque emeticorum sit ut plurimùm inaccessibile et radicitus inexpugnabile, habeat nihilominus cum primis viis, et specialitèr cum ductibus chyliiferis sive propinquiorem, sive remotiorem aliquam communicationem, ad hoc ut possit, quandocumquè è suis loculis proruperit, easdem vias subire. Quod equidem fieri poterit vel per eadem ostiola, per quæ chylus primùm ingreditur, vel etiam mediis aliis communicationibus, quæ per totum lectearum tractum à primo illarum exortu usquè ad locum insertionis earum in sanguinem plurimæ sunt, ut ostendit lymphæ chylum ubiquè diluens, et lacteis potissimùm mesentericis (chylo jam per eas in sanguinem advecto) recentèr adveniens, ex observatione *Malpighii, Nuck, Municks* aliorumque recentiorum anatomicorum. Ponamus insuper, Chinam Chinam in tenuissimum pollinem redactam, et quomodolibèt deglutitam, si non ipsam fermenti fodinam directè et immediatè petere, saltèm in intestinis ipsis, et ductibus chyliiferis ad

longiusculum tempus morari, illisque ad modicum intervallum adhærere; quod non planè negabit qui animadvertet res plurimas nutritioni ineptas, etsi ob molem, figuram, et pondus ad secedendum ab intestinis magis dispositas, ad longum tamen tempus in iisdem de more delitescere, antequàm cum chyli recrementis crassioribus foràs eman- dentur. Id ipsum autem eidem Chinæ Chinæ non modò potest accidere, sed verè accidit, ut ramenta illius excreta, et fæces alvinæ tincturâ ejusdem infectæ longè satis ab illius assumptione palàm testantur. Atque ità actionem Chinæ Chinæ adversùs fermentum febrile per immediatum etiam utriusque contactum facile erit intelligere, et eò facilius, si præter iter corticis per intestina consideremus insuper necessarium progressum particularum illius in lacteas, necnon longiusculam earum moram in iisdem lacteis, in quas saltèm, et per quas aliquandò vehi debet fermentum febrile ad sanguinem tendens, quicumque sit terminus, à quo in easdem illud delabatur. Deniquè ponamus, eamdem Chinam Chinam si non crassiore, tenuiore saltèm substantiâ suâ, succis intrà intestina hospitantibus intimè immixtâ, quod idem est ac dicere, virtute suâ iisdem communicatâ et impressâ, fermenti adinstâr massam aliquam imprægnantis, eosdem succos ità alterare, et suis viribus roborare, ut continuato assiduè illius usu evadant apti ad præstandam medelam fermento febrili, cum quo alicubi sunt commiscendi, et ad illud retundendum,

quoties eidem commiscebuntur. Quemadmodum enim, si pravi sint, possunt illud deterius reddere, ità si virtute polleant febrifugâ sibi à Peruviano cortice communicatâ, non modò illud non acuent, sed balsamicam, quam quodammodò acquisierunt naturam ipsi demùm fermento impriment, pro residendo eodem ad nocendum inertì, etiamsi non statim ac retusum est, præcipitetur, sed in ipsam massam sanguineam se insinuet, dummodò tamen assidua sit et valida per novam febrifugi ingestionem illius retusio.

Quòd si etiam velimus nobis suadere eandem Chinam Chinam vel sanguinem munire adversus fermentum adventurum, vel depurare illum, ac abstergere ab eodem fermento intrà eundem, velut in suâ minerâ degente (quod aliàs cæteroquì non sumus lubentèr amplexi) immò si velimus, eam altiùs penetrare ad lustranda remotiora quæque ejusdem fermenti seminaria, non ideò sub hac hypothesisi pro correctione ipsiusmet fermenti febrilis minùs feliciter curationem instituemus. Atque hoc dictum volo, etiamsi metuamus, quòd China China nudum fermentum adorta vel in suo foco, vel tantùm in suo itinere, *causam* ejusdem fermenti *productricem* nequaquàm tollat. Neque enim de hoc quod pro dubio ad summum, ac incerto haberi potest, adeò solliciti esse debemus in casu ocissimè extremo, ut ob id præsens et certum exitum velimus negligere, maximè cum impetratis induciis, tractu temporis vel natura ipsa, vel ars, vel ætas,

vel corporis exercitatio, vel anni tempus integram medelam consuescant subministrare. Certè in cancro seriùs exitium minitante mos est adhibere curationem, ut vocant, *palliativam*, quæ mortem tantummodò protrahit, nec unquàm sanat. Quidni ergò in casu præcipiti febris perniciosæ liceat, imminente morte, uti (cùm præsto sit) curatione verâ et satis firmâ, ubi potiore jure, quàm in cancro, ipsa optabilis esset simplex palliativa? Deniquè, si ex *Cornelio Celso multa in præcipiti periculo rectè fiunt, quæ aliàs essent omittenda, meliusque est anceps experiri remedium, quàm ægros certo exitio relinquere*, cur in eodem præcipiti certoque exitio, omittendum erit remedium suapte naturâ tutissimum et minimè anceps, quod vel in morbis periculo carentibus communiter solet administrari? His ergò pro fundamento, aliis verò quæ præmisimus, pro modulo agendi nobis propositis, facile est, ut juxtà exigentiam casuum diversorum in arduâ quâlibet febrium perniciosarum circumstantiâ, et temporis angustiâ, Peruvianum corticem ritè et cum fructu valeamus offerre; nihilominùs, ut firmiore talo in hoc possimus incedere, methodum ipsam specialem, certis regulis constitutam, et variis casibus, quæ in praxi contingunt accommodam, vel saltèm haud difficultè aptabilem, pro medici videlicèt curantis judicio, et pro diversâ idèntidem eorundem casuum exigentiâ, jamjam aggredior luculentè exponere.

CAPUT III.

Methodus exhibendi validè, atque feliciter *Peruvianum corticem* adversus singulas recensitas febrium perniciosarum species, etiam in casibus fermè deploratis.

PER hoc, quòd febres perniciosas anteaà descriptas Peruviano cortice curandas velim, non ideò cætera remedia rejicio, quæ, priusquàm ingruat ferox perniciës solo cortice domabilis, locum habere solent, et vel universalem humorum sensibilitèr peccantium alterationem, vel etiam peculiarem (quantum conjectare valemus) fermenti febrilis correctionem, aut mitigationem respiciunt. Rideo equidem, seu potius doleo, quòd iis solis adeò fidamus, ut in eorum usu enervi et imbecillo, teramus assiduè ac inutilitèr tempus, et verum validumque febrifugum illis posthabeamus; magisque rideo, dùm in eâ curandi ratione, quam *scrupulosam et superstitiosam* festivè appellat *Baconus*, rixas pueriles identidem audio inter... *tenaces propositi viros...*, sive circà numerum foliorum herbæ cujusciam domesticæ, putà lactucæ jusculo incoquendæ, vel amygdalarum emulsioni addendarum, an scilicet quinque sint plures, quatuor verò pauciores quàm par sit, vel circà usum endiviæ potius quàm cichorii, eo quòd nonnulla certè sit talium vegetabilium (etsi succedaneorum ad invicem) ut et salium eorundem diversitas: quasi in stomacho,

et corpore nostro mille cibariis longè diversis assueto citrà sensibilem humorum, aut sanitatis alterationem, quicquam insignitè diversum mediante usu jusculi medicati per quatuor, vel quinque dies assumpti possit efficere endivia suprà cichorium. Proh quanta est delicatulorum aliquandò medicorum discordia circà delectum herbarum aliquot convivalium, in quarum tamen usu promiscuo tantus est coquorum non modò, sed et botanicorum consensus!

Rideo paritèr, sed risu Sardonio, cùm à nonnullis non ob credulitatem (quod condonandum foret) sed ob garrulitatem et vanam quamdam ostentationem artis, ne dicam sui, pretiosa potiùs sæpè inutilia, quàm vulgaria et minùs conquisita remedia, meliora tamen (quæ scilicèt ex mente *Plinii: pauperrimus quisque cænat*) præscribi video, vel vulgaribus ab alio medico proptèr eandem indicationem præscriptis substitui, ad captandum popellum; quasi concharum vel cornu cervi pulvere, quoàd affectum longè præstaret pulvis margaritarum, aut effætum magisterium earundem, magisque excelleret, ubi indicetur potus ferratus, extinctio (debilior licèt) auri quàm chalybis candentis, quemadmodùm pretio suprà chalybem excellit aurum. Ostentationes sanè ridiculæ, simulque nauseosæ, esto quòd ad illarum fulcimentum haud difficile sit nugatorias comminisci ratiunculas, ab ingenuis cordatisque viris despiciendas et minimè audiendas. Medicis hujusmodi optimâ suprà cæteros

memoriâ est opus, ne scilicèt quod semel ab alio propositum repudiârunt, ut noxium in tali morbo et subjecto, in eo ipso post annum tanquàm utile proponant, affectatæ olim reprobationis obliti: quod aliquandò contigisse memini.

Non ergò pro curatione febrium perniciosarum de remediis inutilibus loquor, vel de utilium æquipollentium inutili, nimiumque religioso delectu; sed loquor de congruis omnibus rectâ et ingenuâ methodo administratis, eaque, quoadusquè possunt prodesse, suis loco et tempore esse usurpanda, ultrò concedo. Cùm tamen vita hominis est in discrimine, nec nisi per promptam inhibitionem paroxysmi febrilis possumus declinare exitium imminens, tunc saltèm, nisi priùs, aliis remediis posthabitis ad Peruvianum corticem debemus confugere; nec, nisi cum nostræ conscientiæ detrimento, perspectis jam illius viribus, possumus, ut reor, hujusmodi auxilium certum æquè ac innocuum omittere. Nimiùm suadet hoc ipsius certitudo mortis, et certitudo remedii illam impredientis; si quod enim est in medicinâ certum de morte præsagium, illud est unicè in casibus perniciosarum septem præsertim priorum specierum, cùm illæ jam pulsûs abolitionem, algorem universalem, lethargum mortiferum etc. intulerunt. Quæ sanè certitudo funesti præsagii tanta nunquàm est in moribundis vel in agone constitutis ex quâlibet febre ab ortu malignâ, ut ipsa evincit experientia. Qui enim ad statum jam memoratum devenit æger,

etsi non statim expiret, sed per diem adhuc tantillum resurgat, accessione tamen correspondente certò perit, ni servetur ope corticis, de cujus presentaneo auxilio non minor est ac esset antea de imminente morte certitudo. Liceat exemplo rem explicare satis, ut puto, appositè. Si quispiam natandi nescius mergatur in vasto gurgite, nec illi quidquam circumprostet, quod possitprehendere ut emergat, is profectò, licèt semel aut bis conatu suo naturali, et vi subeuntis aquæ, sursùm trusus efferatur nonnihil, citò tamen, et certò suffocabitur, ni illi baculus vel quid simile porrigatur ab adjutrice manu. In gurgite mergitur æger ex perniciosâ febre algidus factus, et sine pulsu, utut paululùm relevari semel, ac iterùm videatur. Lignum extrahens è gurgite est Peruvianus cortex ritè porrectus; manus adjutrix est manus medici, illum methodicè ac opportunè porrigentis.

Non una tamen præcisè est methodus in omnibus hisce casibus adhibenda, sed potiùs duplex, habito respectu ad duplicem ordinem febrium perniciosarum. Rursus utraque adhuc varia evadit nonnihil pro diversitate motùs, seu velocitatis ipsius febris modò magis, modò minùs celeritèr in præceps ruentis; itèmq; pro diversitate temporis quo vocatur medicus, seu pro longiore aut breviori intervallo, quod illi superest ad agendum, postquàm vocatus fuerit pro inhibitione imminentis exitii. Juxtà varias igitur hujusmodi circumstantias varia quoque aliquantulùm est, nempe modò lenior,

modò fortior methodus exhibendi corticem, ut mox apparebit.

Et quidem generalitèr loquendo, methodus fortior convenit magis septem prioribus perniciosarum speciebus, quas in primo membro latioris nostræ divisionis sumus complexi; et sunt, quandò febris quantumvis exitialis suam intermissionem, suumque circuitum etiamnùm servat. Atque eò validior ea esse debet, quò celerior est motus ipsius febris ad exitium properantis, et quò brevius est intervallum temporis, quo distat accessio, quodque ad illam inhibendam medico superest. Methodus verò lentior magis convenit octavæ et ultimæ speciei, quam in postremo membro ejusdem primæ divisionis solitariè collocavimus; et est, quandò febris intermittens ab ortu ad continuam essentialitèr acutam et malignam tendit. Atque hæc ipsa quoque methodus, levior licèt respectivè ad methodum supradictarum, nonnihil fortis aliquandò (et quidem magis vel minùs) debet evadere, prout velocior aut lentior est motus ipsius febris ad continuam essentialitèr tendentis, proutque majus vel minus est spatium temporis, quod superest medico vocato ad impediendam continuitatem.

Exordium itaque ducendo à validiore, et quoàd effectum celerem mirabiliore methodo, septem priores perniciosarum intermittentium differentias respiciente, vel eam, ut dictum est, adhibere contingit, quandò febris minùs præceps in suo motu ob gravissimum symptoma maximum quidem pe-

riculum portendit, sed non immediatè, verùm probabiliter post duos circiter (anteactorum respectu habito) paroxysmos; et tunc etiamsi minùs validè usurpetur cortex, nempè more ferè vulgari, adhuc sat est; vel eandem methodum contingit adhibere (quod frequentius accidit) cùm jam febris ferali symptomate, quodcumque fuerit ex recensitis suo loco, ægrum in tali statu repentè constituit, ut vix illam, quam actu patitur, accessionem videatur posse transigere, cum morali certitudine quòd alteri non sit futurus superstes, et in tali casu validissimâ opus est corticis oblatione.

In quocumque autem ex duobus casibus modò recensitis reperiatur æger, perniciosam intermittentem quamlibet passus ex prioribus septem speciebus, statim ità curandus est, ut quò citiùs possibile sit, viæ omnes per quas fermentum futuræ accessionis transire debet, ut indè elutrietur in sanguinem, Peruviano cortice abundè conspergantur, omnesque quotquot sunt, succi in primis viis cum fermento alteram accessionem producturo commiscibiles, omnes, inquam, eodem pulvere inebriantur; adeoque ventriculus, intestina, vasa chyli-fera omnesque succi per eadem vasa reptare soliti, hoc pulvere febrifugo copiosè scateant necesse est, ut hospitem efferum sive in illis latentem, sive illis accessurum, excipiant ut par est, illum videlicet enervando, debellando, ac mansuefaciendo, ne ultrà pergens, ultrà lædat.

Ad hoc opus citò absolvendum de more non

minus requiritur quàm quantitas *sex drachmarum* pulveris, nec plus quàm *uncia una* ad impediendum scilicèt futurum accessum, et *tantumdem* circitèr postea ad firmandam valetudinem, et inhibendam recidivam. Quæ quantitas modò celerius, modò lentius debet absumi, prout magis vel minus distat imminens paroxysmus, et prout majus vel minus est imminentis paroxysmi periculum. Sciendum est enim, ut dicebamus *cap. I. et VIII. libri primi*, ad sistendam febrem quamlibet intermittentem sufficere quidem *drachmas duas* pulveris, si uno haustu assumantur longè satis ab accessione futurâ, nempe vel in principio vel saltèm in fine accessionis antecedentis, (loquor de correlativâ ad eam quam intendimus inhibere) sed si talis distantia non adsit, ità ut paroxysmus qui debet impediri, distet *v. g.* per *XXIV. horas* tantummodò, vel etiam minus, et tamen opus sit illum impedire ratione periculi, quod secum laturus est (non loquor de paroxysmo vel jam invadente, vel quàm proximè imminente, sive lethalis, sive mitior ille futurus sit, quoniam ad eum curandum pertingere tempestivè nequit actio corticis) in tali casu necesse est, quòd copia pulveris suppleat defectum temporis, et quòd ipsa quantitas adaucta absumatur eâ proportionem et ordine, ut primus haustus, si offeratur in formâ liquidâ, vel prima oblatio, quomodocumquè fiat, constet tali quantitate pulveris, ut potis sit probabiliter ipsum paroxysmum vel sistere, vel ut plurimùm enervare, quod facilius assequemur per primam oblationem

validam à paroxysmo inhibendo magis distantem, quàm per reliquas, quarum actio seriùs in actum deducitur. Et hinc est, quòd si primò offeratur in paucâ dosi, etiamsi postmodùm, vel frequentè exhibeatur, ut mos erat *Talbotii* et aliorum, vel copiosè etiam, sed propè accessionem, facilè fraudemur fine nostro; secùs si longè ab accessione fortius, propè verò accessionem debiliùs agamus. Utrumque autem eâ proportionem faciendum, quæ securitati effectûs, et casuum exigentiæ modò majori, modò minori aptè respondeat.

Hanc autem regulam, et consonâ proportionem dispositam distributionem remedii paulò infrà melius determinabimus, atque exemplo illustrabimus, ut vim remedii cum brevitate temporis, quod superest ad impediendum futurum accessum, commensurare possimus, et cum præviâ cognitione, ac quasi ex certâ scientiâ id assequi in casibus arduis, quod in vulgaribus quasi fortuitò nonnunquàm contingere observavit *Monginotius* inquiens: *notandum venit, si infusio* (intellige corticis) *admodum valida fuerit, aut si crebriùs fuerit exhibita, nonnullos à primo etiam paroxysmo liberationem obtinere; undè medicamento plurimum laudis accedit.* Et licèt hanc citam curationem in casibus minimè urgentibus, in quibus tantummodò illam observavit, minùs firmam censeat, illique propterea anteponat (nec forsitan malè) nonnihil lentiolem, in casibus tamen præcipitis exitii, eadem utpotè coacta, hanc exceptionem pati non potest; satiùs est quippè recidere

segniùs in febrem, quàm citò mori. Sed et de rarâ in hisce ipsis casibus recidivâ aliquid infrâ sumus dicturi.

Si itaque æger in talibus circumstantiis sit constitutus, ut p̃robabilitèr duos adhùc *ex. gr.* ferre possit, etiamsi intensiores futuri sint, paroxysmos, quatenùs scilicèt febris sit motùs non adeò præcipitis, et perniciosum symptoma habeat adhùc quamdam mediocritatem, in hoc casu (siquidem fidendum sit morbo, qui nullam sæpè servat proportionem, adeò ut non rarò post accessum levem sequatur immediatè lethalis alter) in hoc inquam casu declinante accessione, vel eà integrè solutâ sufficiet exhibere *drachmas duas* corticis, prout de more in intermittentibus benignis. Quia tamen febris perniciosa habet nescio quid pravitatis et pertinaciæ suprâ benignam, ideò ad majorem cautelam, si febris præsertim duplex fuerit (loquor de tertianâ per modum exempli, et de hac semper intelligi velim, quippè magis obvia et pernicioso characteri magis obnoxia) ad majorem, inquam, cautelam utile erit sequenti die minoris scilicèt afflictionis, *unam* adhùc *drachmam* præscribere, ipsoque futuri paroxysmi fortioris die pluribus horis antè accessionem adhùc *alteram*; sic enim dubio procul paroxysmus ille majoris afflictionis non succedet, sicut nec subsequens levior. Quòd si, ut dicebam, suspicio de symptomate pernicioso sit minor, et periculum magis distans, febrisque tantùm simplex, possumus etiam solis *drachmis duabus* antecedente paroxysmo exhibitis contenti esse:

et observare quid indè sequatur, priusquàm corticem repetamus cum morali certitudine, quòd, etiamsi correspondens paroxysmus adveniat, levior is erit, et longè minoris periculi; adeòque poterimus, si velimus, etiam per *semidrachmas* pulveris vel semel, vel bis in die exhibitas, paulatim accessiones imminuere, et intrà paucos dies in totum extinguere. Mihi tamen semper magis probabitur methodus validiuscula, ubi suspicio pernicipiei justum fundamentum habeat; tùm quia infidus est ordo et inæquale incrementum accessionum, quæ quandoquè nos fallunt; tùm quia, cùm innocuum semper repererim in quâcumque dosi remedium istud, non est cur ubi decernitur necessarium, hæreamus in parvâ, maximè cùm fortius operetur, quò fortius exhibetur; et quò fortius operatur, eò minus sit semper periculum, quod repullulet febris recisa.

Si verò ob neglectas febres, nondùmque ab ullo medico curatas, vel ob easdem non satis à curante medico observatas, aut observabiles propter occultam illarum malitiam, repentinamve ac præcipitem mutationem, si, inquam, ob has vel similes causas æger (quod sæpè contingit) jam ruerit in exitium, sitque ideò in tali statu, ut jam frigidus, anhelosus, ac ferè cadaverosus appareat, et quod pejus est, in eodem statu diutiùs perseveret destitutus auxilio corticis, medico videlicèt illius restitutionem tentante per sola alexipharmaca atque cardiaca vulgaria: in tali casu, dummodò vita in futuram salutem accessionem protrahi debeat (quæ conditio

omninò requiritur ad evitandam calumniam, non verò quia China China obsit cum nequit prodesse, ut fusiùs explicabimus sequenti *capite*; neque enim hominem intrà illam ipsam accessionem expiraturum vel cortex vel aliud quidquam sanare valet) in tali, inquam, casu, licet res in angusto sit posita, et insuper postridiè *v gr.* adventura sit nova accessio procul dubio cæteroquè lethalis, nihilominus omni conatu statim tentanda est viriliter introductio liberalis quantitatis Peruviani febrifugi, posito quòd æger possit illud deglutire; hæc enim difficultas, quæ in lethargicis præsertim faciliè occurrit, non semel in causâ fuit, ut quispiam remedio destitutus occubuerit, qui serè certò convaluisset si potuisset assumere.

Ponamus itaque per modum exempli, quòd ægro-
tans aliquis post duos paroxysmos *v. gr.* tertianæ
simplicis intermittentis, quorum prior levissimus
fuerit cum nullo vel paucò stomachi angore in prin-
cipio accessionis, et alter nonnihil fortior cum do-
lore mordaci oris ipsius ventriculi, tertium patiatur
fortissimum cum tali tantoque morsu ejusdem sto-
machi, ut primò ejulans ac ululans, dein clamandi
impotens, jactabundus, nauseabundus, animo defi-
ciens, cum pulsu pertinaciter abscondito, oculis
concavis, suspiriis luctuosis, sudatiunculâ frigidâ et
hujusmodi, videatur animam efflaturus. Ponamus
pariter, quòd à naturâ atque à remediis adjutus et
recreatus, post plures et plures horas tandem inci-
piat reviviscere cum levî aliquo ad tactum calore,

pulsûs utut minutuli elevatione, morsûsque ventriculi imminutione, adeò ut medicus moralem certitudinem habeat de vitâ in futuram accessionem protrahendâ, sed simul æqualem de morte tunc temporis adventurâ unâ cum paroxysmo febrili, qui, quartus cùm sit cæterisque de more ferocior, quippè cum morbi statu coincidens, et die septimâ in hoc certè casu lethalis omninò futurus erit. Ponamus adhuc, quòd statim ac appareat ea symptomatum remissio, quæ sinit ægrotantem loqui, ille tùm animæ primùm, tùm rebus deinceps suis successivè consulat, ad quæ peragenda non parùm temporis necessariò requiritur. Omnibus hisce tandem peractis, manè sequenti (quæ dies est ab accessione vacua) ponamus deniquè alterum medicum in consilium vocari, ægro aliquantulùm quidem, sed parùm respectivè ad dies antecedentèr correspondentes allevato, et quo ad actus externos aliquantulùm vegeto, ad motum non segni, et ad respondendum, licèt languidiusculè, prompto, sed ex aliâ parte, remanente pulsu adhuc exili, et non-nihil celeri, sudatiunculâ quâdam viscidâ cum splendore faciei, nausæâ, aut aepsiâ cum quâdam sensatione molestâ in regione stomachi, oculis cavernosis, voce sepultâ, suspiriis identidem anhelosis et nonnunquàm singultuosis, itaut de futurâ accessione sequentis diei, ac per consequens de futurâ morte inter medicos curantes facilè conveniat, nisi impediatur paroxysmus (quod primo loco requiritur) ad impetrandas saltèm inducias pro iis, quæ supersunt,

symptomatis ex arte corrigendis, et pro tollendâ pulsûs celeritate et frequentîâ febrili, etiam extrâ paroxysmum novitèr introductâ, quæ tamen nullo negotio etiam sponte post inhibitum paroxysmum cum reliquis symptomatis solet evanescere; cùm verò nullum in medicinâ remedium sit, à quo possimus promptam inhibitionem paroxysmi sperare, nisi à cortice Peruviano ritè administrato, iste propterea in hoc statu, quin et in pejore (in quo ne ipsi quidem medici cæteroquè cortice utentes, illum posse proficere quondâm credidissent) nullâ morâ vel cunctatione interpositâ, proponendus est à medico recentèr vocato, et nervosè exhibendus.

Obstat equidem in hoc casu brevitâs temporis (quæ aliquandò etiam major est in aliis casibus) obstat inquam brevitâs temporis, quod superest usquè ad futurum accessum. Et certè in tali temporis augustiâ *duæ drachmæ* corticis, quæ requirunt pro actione suâ totum saltèm spatium, quod intercedit inter unam et alteram accessionem, non sufficiunt ad impediendum, quin immò neque ad minuendum quantùm opus est proximum paroxysmum, qui quoque, etiamsi levior foret, et cardialgiâ minùs feroci comitatus, adhuc tamen hominem viribus jam destitutum, qualem suprâ descripsimus, dubio procul jugularet. Igitur in hoc casu necesse est, ut æger, quò citiùs fieri poterit, saltèm *drachmas sex* corticis deglutiat, primo quidem haustu *semunciam*, circitèr, et reliquum partitis vicibus, *ex. gr. drachmam unam* post horas sex vel

octo, et post simile intervallum alteram, habitâ cautione, ut ultima oblatio, si proficua futura est pro paroxysmo proximo, distet ab eodem paroxysmo per horas circiter duodecim; quæ enim China China exhibetur paucis admodum antè accessionem horis, ea pro inhibendâ accessione hujusmodi nihil valet, nisi fortè inquantum præcesserit horis congruis alia quantitas roborari capax ad hoc adjuncto. Quo nomine etiam expediet in casibus brevissimæ à paroxysmo distantiae, oblata dosi amplâ tempore remotiore, aliam portionem repetere etiam non longè à paroxysmo, licèt cæteroquì hujusmodi oblatio propè febrem magis influat ad impediendos subsequentes paroxysmos quàm ad avertendum imminensem, tali oblationi nimis immediatum. Quod dictum est de *sex drachmis*, intelligi potest de *unciâ integrâ* in casibus summè urgentibus antè paroxysmi adventum assumendâ, et prudenti partitione distribuendâ.

Sin autem imminensis paroxysmi propinquitas sit talis, ut reddatur dubia quoad effectum etiam prompta oblatio *trium* vel *quatuor drachmarum* corticis ob temporis brevitatem et ægrotantis instans exitium, ut *v. gr.* si paroxysmus lethalis per duodecim circiter horas tantummodò distet, tunc ad *sex usquè drachmas* simul unicâ vice (quod pluries feliciter à me, et ab aliis me suadente factum est) licebit transcendere, *duabus* quæ supersunt *drachmis*, in duo sequentes dies reservatis, si æger tamdiù supervivat; quemadmodum, si distantia à

paroxysmo sit plurima ut in quartanis, vel etiam tertianis, medicusque sit præsens postremo accessui perniciem apertè præmonstranti, habeatque ideò totum tempus tùm declinationis paroxysmi, tùm subsequenter intermissionis, pro præscribendo citrà tumultum cortice, sufficiet primâ vice exhibere *drachmas tres*, vel etiam *duas*, ut paulò antè dicebamus, dein *drachmam unam* identidem, et frequentèr repetere, singulis, v. gr. sex horis antè adventum paroxysmi, aliisve modis suprâ expositis, donec quantitas *sex drachmarum* circitèr sit assumpta.

Brevi hac facili et validâ servatâ methodo per totum tempus, quod accessionem antecedit, (supposito quòd illud sit horarum plùs minùs viginti quatuor, ab incepto usu remedii usquè ad horam futuri paroxysmi) idem paroxysmus vel inhiberi solet omninò vel levissimus apparere, vel saltèm procul dubio non lethalis esse; quæ sors non contingit ullâ aliâ methodo in usum ductâ, ut, si solam infusionem Chinæ Chinæ more *Talbotii*, *Helvetii*, aliorumve quantumvis frequentèr usurpemus, vel si alio quocumque modo procedamus, nisi *unciam* circitèr, si affectus sit præceps, ejusdem Chinæ Chinæ in purâ substantiâ assumpserit æger, vel tantùm saltèm extracti recentis, aut validæ tincturæ corticis, quantum potest æquare virtute *unciam unam* ejusdem substantiæ antè adventum futuri paroxysmi; cum animadversione etiam, quòd dimidium integræ dosis æger jam uno tantùm vel

duplici haustu habeat assumptum duodecim circitèr horis, si fieri possit, longè ab ipso paroxysmo, siquidem necesse est, bonam quantitatem intrà breve tempus hausisse, et hausisse longè antè horam quantum fieri potest, futuri paroxysmi.

Proptereà qui infusionem *trium*, vel *quatuor unciarum* Chinæ Chinæ præscribunt factam in magnâ liquoris mole, et plurium dierum spatio potandam, in casibus perniciosarum intermittentium moram non admittentibus, invalidè utuntur cortice; cùm talis methodus vix valeat in benignis, atque diuturnis febribus, minùs agente quantitate *quatuor unciarum* parvis dosibus usurpatâ, ac agat quantitas *unciæ unius* largâ dosi, brevique temporis spatio administratæ, ut diximus *capite VII. libri I.* Addo insuper, tantùm interesse non solùm corticem præscribi in quantitate liberali intrà breve tempus absumendâ, verùm etiam talem quantitatem distribui eâ, quam diximus, proportionè, ut datâ pari quantitate, *v. gr. unciâ unâ* Chinæ Chinæ, eâque intrà æquale tempus, *ex. g.* intrà viginti quatuor horas absumptâ, in casu pari febris perniciosæ, adhuc tamen potest sanari Plato *v. gr.* et non sanari Socrates, præcisè ob inæqualem administrationem remedii, quatenùs Platoni oblata fuerit primo haustu *semuncia* febrifugi, et reliquum ad *drachmam*, et *drachmam*; Socrati verò oblata fuerit *drachma una* singulo trihorio *v. gr.* juxtâ *Mortoni* methodum, vel alitèr. Cùm enim sic, et nimis imbecillitèr agatur primis horis, à paroxysmo futuro

futuro magis distantibus, in quibus incidit occasio præceps, ac tota agendi opportunitas, et ferè incassum agatur secundum dimidiam circiter portionem remedii, postremis horis inutilibus administrati, hinc est, quòd in casu præcipiti nullus sequatur effectus, qui ex adverso sequeretur per oblationem *semunciæ* primis horis, cui quidquid distributivè, et parcè postmodum suppeditatur, satis est. Et hoc necesse est, quòd sciant atque intelligant ii, si qui fortè sunt, qui, ut usui Chinæ Chinæ plaudere videantur tanquàm rei sibi notissimæ, Psittacorum more, quod minùs perspicuè hinc indè excerpserunt, confusè repetunt per vicos et per compita, scilicèt audendum esse, et Chinam Chinam in febribus quibuscumque crebrò et liberalitèr esse propinandam: hoc enim jactare sine experienciâ, et tradere sine lege, est remedium contemptui exponere, et semetipsos censuræ ob asserti nimium latè patentis animositatem, et ob frequentem carentiam successûs.

Positis autem in tuto hac strictâ methodo ægri rebus, ad ulteriorem expugnationem fermenti febrilis, et ad præcautionem recidivæ, morbo, ut ità dicam, in medio sui vigoris suffocato, necesse est insistere in usu remedii per plures dies, illudque postquàm ad dies aliquot omissum est, ad plures alios denuò repetere; alterna siquidem reciprocatio temporanei usûs et omissionis illius mirificè conducit ad intentum, præstatque ipsi usui non interrupto. Expediet idcirco non semel opus aggredi modis, et

formis luculentè expressis *lib. I. cap.* præsertim VII, ut ideò hùc idem repetere non sit opus. Illud addam tantummodò, quòd in casibus perniciosarum, qualis est, quem attuli paulò suprà per modum exempli, satius est primis diebus post fugatum paroxysmum, et præcipuè si aliqua febrilis incaléscentia ab ultimo paroxysmo relictà, constantèr nonnihil perseveret (quod tamen per duos tantùm vel tres dies solet observari) satius inquam, est primis diebus, quibus cortex ad prophylaxim exhiberi solet, illum præscribere nonnihil liberaliùs ac in benignis, *ex. gr.* ad *drachmam unam* quotidie per tres circitèr dies, dein ad *semi-drachmam* bis in die per alios tres dies; undè quemadmodùm *sex drachmæ* absumptæ fuerunt paulò antè adventum paroxysmi pro eo impediendo, ità *sex* aliæ postea absumantur pro eodem longiùs pellendo. Interposità verò quiete sex dierum circitèr, *se-munciam* adhùc ad *semidrachman* quotidie sufficiet præscribere pro eodem paroxysmo, si possibile sit, penitùs arcendo. Atque ità *duabus unciiis* ad summum Chinæ Chinæ in totum absumptis, sed dosi providè inæquali, et quidem intrà spatium trium hebdomadarum (comprehendendo quietem intermediam unius hebdomadæ). Perniciosa febris jugulatur, hominem cæteroquì statim jugulatura, cùm ex adverso apud alios, *unciiis quatuor*, vel *quinque* enervi methodo exhibitis vix pellatur benigna.

Quòd si adhùc radix aliqua febrilis repullulascere

videatur, illâ vel paulispèr sibi sinatur suâ sponte cessatura, vel postquàm cursus aliquis illi permissus est, præmissâ, si lubeat, leni aliquâ corporis expiatione vel sanguinis missione, iterùm repetatur usus benignior ejusdem corticis, *v. gr.* ad *semidrachmam*, vel ad *scrupulum unum* quotidie manè per dies duodecim circitèr ad impediendam omnem febris revirescentiam sive in formâ potûs, sive in formâ boli, sive in extracto, aut tincturâ, sive cum syrupis, aut conservis, sive alio quovis modo, quod parùm refert, ut fusiùs citato *cap. VII. lib. I.*, ad quod etiam in hoc casu lectorem remitto. Atque hæc est methodus valida pro curandis illis febribus intermittentibus perniciosis, quas in primo membro divisionis genericæ collocavimus, quæ videlicèt etiam in suâ pravitate nativam adhuc servant intermissionem.

Exponenda superest alia methodus temperatior pro curandis illis quas collocavimus in secundo membro, et octavam perniciosarum speciem constituunt, scilicèt *subcontinuarum*, earum nempè quæ ex intermittentibus ad continuas et acutas tendunt. Ista autem methodus, quam lentiozem voco, respectu habito ad suprâ descriptam, non semper adeò lenta est, ut aliquam non exigat celeritatem, neque tam levis, ut validum quandoquè non admittat operandi robur et dosim corticis liberaliorem. Ab hoc ut citò me expediam, sat erit generalitèr dicere, quòd pro medici curantis judicio varianda est dosis Chinæ Chinæ, et repetenda

illius oblatio eâ proportionē quæ sensim valeat ita enervare paroxysmos ad continuitatem vergentes, ut priusquàm adveniat tempus probabile futuræ continuitatis, atque (ut aiunt) acutiei, iidem paroxysmi omninò sublatis sint, absumptis scilicet intrâ tale tempus aptâ distributione *drachmis sex* Peruvianis corticis. Paroxysmis etenim sic inhibitis, seu, non recurrente novâ accessione, mirum est quàm facilè ipsa evanescant semina et rudimenta succrescentis cæteroquè continuitatis.

Ponamus itaque et in hoc casu, quòd transactis quatuor vel quinque paroxysmis tertianæ intermittentis, quos inter aliquis calor atque siticula mediârit ipsâ intermissionis die, et quibus invadentibus minor semper quâlibet accessione facta fuerit sensatio frigoris, aded ut levis tantùm et brevissima evaserit extremorum perfrigeratio, ponamus, inquam, quòd post huiusmodi paroxysmos, longiorem etiam extensionem, majorem semper intensionem, et breviorē ac obscuriorem intermissionem habentes, subsequatur alter, cui loco intermissionis succedat tantùm notabilis remissio, perseverante cum siti etiam linguæ siccitate, inquietudine, jactatione, calore ad tactum acriore, dolore capitis, urinis paucis, rubris, ac crassis, et aliis huiusmodi, aded ut febris de intermittente jam facta sit subcontinua, seu continua per subingressum, non quidem per simplicem mitiorum paroxysmorum extensionem, sed propter violentam intensionem, et validiorem simul extensionem eorundem; undè

sub hac proportionē palàm fiat, quòd continuitas ista, quæ per subingressum paroxysmorum initium sumpsit, minimè velit in hac lineâ subsistere, sed ultrà pergere ad acutiem atque malignitatem, simulque ad continuitatem essentialē, post duos circitèr paroxysmos acquirendam, nullâque amplius periodo, vel nonnisi obscurissimâ distigendam; in quo statu vel inutilis omninò, vel saltē imbecillus admodum semper est cortex, ut *lib. v.* dicemus.

In hoc ergò casu acutiem proximè et perniciem longiusculè præmonstrante, præmissis suo tempore quæ debebant præmitti, et repetitâ etiam, si opus sit, paulò antè usum febrifugi, ut casus quidem ferre videtur, venæ sectione, vel omissâ tali repetitione, si jam antecedentè plenitudini et exigentiæ sit satisfactum, aut si novâ accessio jam propè immineat, vel non admodum distet, danda statim est opera, ut paroxysmus imminens continuitatem majorem allaturus enervetur insignitèr, non autem inhibeat omninò; quoniam cum effervescentia febrilis admodum valida sit in hoc casu, in quo intermissio jam evanuit, fortassè minùs conveniens est illius repentina et violenta suppressio, maximè cum nec unus, nec alter paroxysmus mortem sit allaturus, sed solam acutiem. Enervato siquidem imminente paroxysmo, per repetitum usum corticis magis enervatur et alter, donec sensim tertius omninò tollatur, et paulò post etiam ipsa cæteroquì invalescens continuitas. Hoc

autem citius vel lentiùs agendum est, prout magis vel minùs distat primus accessus, et prout magis vel minùs celer est motus, quo febris ad continuam vergit, majorve aut minor ad succumbendum oneri dispositio ægrotantis.

Redeundo itaque ad casum jam positum, in quo medicus post elapsam quintum paroxysmum cogitet sequenti die de impediendâ continuitate sexto accessu validiùs adventurâ, dico quòd præmissis antea præmittendis, statim poterit exhibere manè *v. gr. scrupulos quatuor*, vel *drachmam j. ss.* corticis, vespere verò *drachmam ss.* vel *scrupulos duos*. Die autem ipsius accessûs, manè *drachmam unam* solam, vel *duos* tantum pariter *scrupulos*, totidemque serò declinante febre, offerre sufficiet, et sic per duos vel tres dies continuare, insumendo scilicet quotidie partitis vicibus *scrupulos* tantum *quatuor* vel circiter pulveris; posito quòd primo die, primoque haustu liberalior aliquantulum fuerit, ut suprâ, dosis assumpta. Et quia, ubi agitur de febre ad continuitatem atque acutiem properante, suspectus cuiquam videri poterit vini usus, propterea ad majorem cautelam in hac febris specie expediet corticem offerre in aliquâ aquâ stillatitiâ, putâ cardui benedicti, scorzonerae etc., vel eandem aquam loco vini ipsi cortici assumpto in formâ boli superbibendam præscribere; quamquam (ut fatear) neque in his circumstantiis vini præsertim tenuioris usum unquam noxium sim expertus.

Sublatâ in hunc modum periodo, et successive

evanescente quæ supererat febre, ne facillè eadem repullulascat, utile erit post quietem unius vel alterius diei, immò etiam trium, vel quatuor, corticem rursùs offerre ad *drachmam ss.* modò semel, modò bis in die juxtà majorem vel minorem ægri dispositionem ad recidivam, quod oculato medico haud difficultè constabit. Atque ità pro variâ istà ægro-tantis dispositione, et febris indole, brevior aut diuturnior esse debet, et citiùs aut tardiùs, crebriùs aut rariùs, ac per breviora aut longiora dierum intervalla resumì usus ejusdem corticis; hac tamen cautelà generali semper adhibità, ne scilicèt usus crebrior transeat in abusum. Absumpsisse siquidem satis est *duas*, plùs minùs, *unicias* Chinæ Chinæ in substantià, quomodolibèt id fiat, pro unà ægritudine integrà, quod enim non præstat hæc quantitas, nec præstat major. Immò non semel observavi pendente ipso corticis usu liberaliore (qui pertinacitè à nonnullis in benignis intermittentibus perperàm instituitur) febrem insimul rediisse; illà videlicèt cum remedio sibi familiari reddito aliquod tandem societatis fœdus ineunte.

Quòd si celerrimo gradu febris ad acutiem et continuitatem properet, itaut statim ac incipit obscurari intermissio præter indicia superiùs exposita, aut illis similia, appareant etiam, ut quandoquè assolent, alia fortiora, qualia sunt motus artuum tremuli aut convulsivi, subdelirium non planè intermittens, vox tremula, urina subjugalis, singultus aut alia hujusmodi, tunc gradu paritèr velociore debet

incedere medicus in exhibendo cortice fermè ad regulam methodi in perniciosis comitatis constanter intermittentibus usurpandæ. Ut enim se habet respectu illarum imminens exitium, ità se habet respectu istarum imminens aculies; utrumque magnâ quidem celeritate impediendum, non tamen omninò pari, quoniam dispar quo ad tempus est extrémum utriusque periculum. In casu itaque perniciosæ post aliquot intermittentes accessus motu celerrimo in continuam degenerantis, expediet primâ oblatione (quæ semper, ut aliàs diximus, cæteris longè validior esse debet, ut cum fructu efficaces esse possint leviores, quæ debent subsequi) expediet, inquam, primâ oblatione *duas* saltèm vel etiam *tres drachmas* corticis exhibere, dein alterâ die *drachmam unam* manè et serò, postea ad *drachmam semis* transcendere modò semel, modò bis in die, prout opus erit, donec absumatur *prima uncia* circitèr corticis, reservatâ aliâ *uncia* vel integrâ vel dimidiâ, distribuendâ pro prophylaxi eo modo et eâ proportionem quæ medico curanti videbitur opportuna, ut satîs superque jam diximus.

Nec est, quod quispiam meticulosus liberaliorem dosim, diuturnamve repetitionem corticis eo, quo diximus, modo reformidet; præterquàm enim quòd major quantitas, et diuturnior oblatio ob leviolem causam in usu jam fuit et est quotidie, diversâ quidem methodo apud alios, et præsertim in Galliâ, nec tamen quidquam detrimenti à tantâ et supervacaneâ corticis ingurgitatione ad plures videlicèt,

ac plures illius uncias, suboriri intelligimus; addere insuper possum et ego experientiam meam, quæ respectivè ad usum innocuum Chinæ Chinæ generalitèr est annorum circiter L., præter experientiam præviam præceptoris mei, ad ipso corticis in Italiam adventu initia sua sortitam; respectivè verò ad usum largiorem in perniciosis febribus est annorum XL., quod potest sufficere ad firmandam ancipitem pusillorum fidem. Et quoniam virorum omnium honestorum experientiæ agentium de corio humano, acquiescendum est, lubet adjicere quoque experientiam *Mortoni* ab annis xxv. petitam, et *Sydenhami*: nunquàm, inquit *Mortonus*, *me pœnituisse memini, quòd corticem frequentèr et copiosè exhibuerim; indè enim sæpè appetitum magis firmatum, coctionem alimentorum in ventriculo restitutam, generi nervoso robur adjectum, et habitum corporis à flatu tabido in athleticum mutatum observavi.* Quæ quidem omnia sæpissimè mihi quoque observare contigit. Immò copiosæ ac repetitæ corticis oblationi tantùm tribuit citatus auctor, ut incommoda quæ aliquandò febres fugatas sequuntur in aliquibus, qui cortice solùm usi sunt quantum par fuit ab pellendam febrem, et non ultrà, adscribat nimis parco corticis usui, fermentum febrile ob idipsum supprimentis potius quàm subigentis, adeòque subdit, hujusmodi incommoda restitantiæ, quæcumque sint, *à repetito et justo corticis usu absque quâcumque aliâ methodo spontè cessare*: tandemque concludit: *culpantur ergò medici, qui ipsum*

satls copiosè non exhibuerunt, aut ægri, qui ejus repetitionem respuebant, non verò pharmacum, quod insons est. Sydenham paritèr in febribus præsertim continuitatem affectantibus, in quibus cæteroquì magis suspecta videtur esse debere copiosa corticis quantitas, illum liberalitèr exhibet in substantiâ præcisè ob hoc ipsum, quòd febris ad continuam disponitur. Observandum est, inquit ille, quòd quò magis febris sive sponte sua, sive regimine calidiori ad continuitatem accedat, eò major corticis quantitas exhibenda; itaut nonnunquàm viderim morbum hunc nonnisi sesquiunciæ, vel unciiis ejusdem duabus cessisse. Sed de hoc fusiùs adhùc sequenti capite.

Deniquè pro coronide monendum superest, quòd cum in casibus perniciosarum quarumlibet, et præsertim postremarum, quæ octavam differentiam constituunt, earum suppressio contingat ut plurimum circa statum morbi universalem (si enim periculum continuitatis in ipso statim se prodat principio, suo loco quæremus, an tunc quoque expediat corticem administrare) cum, inquam, morbi mutilatio, ut ità dicam, contingat in medio illius cursu, ideòque tunc faciliùs recurrere posse videantur recidivæ, reciso quidem, sed non ab omni forsàn radice penitùs evulso febrili fermento ob remotam scilicèt productricem causam quæcumque fuerit, fortassis adhùc vigentem: proptereà in hujusmodi casibus utile erit recidivam, si contigerit, non statim iterùm reprimere, sed aliquantulùm sinere, quoniam semper debilior est ac fuerit invasio prima,

suamque febris faciliùs ac diutiùs quàm tunc servat intermissionem; atque ideò satis est efficacitèr egisseà primordio periculi. Cæterùm quæ subsequitur levior invasio vulgaribus tantùm, congruisque et cautis remediis erit tractanda, donec vel sponte, vel consuetâ artis methodo perfectè curetur. Quòd si his non obstantibus vel diutiùs quàm par sit protrahatur, vel iterùm cum periculo recrudescat febris, vel ad continuitatem essentialem tendat, tunc promptè, et sine ullâ cunctatione repetendus est cortex sive fortiùs, sive temperantiùs, juxtà exigentiam casuum diversorum, et secundùm regulam in *historiis sequenti libro* subdendis servatam; quod omne paritèr faciendum est eodem modo, quoties sive bis, sive ter, sive etiam pluries pervicax et indomitæ ferè cervicis febris validè recruderit.

De diætâ servandâ eo tempore, quo juxtà methodum utramque remedium in usum ducitur, nihil habeo, quod addam suprâ id, quod obitèr dixi de hoc *cap. viii. libri primi*; maximè cùm facile sit cuilibet medico vel mediocritèr versato, alimentum in debitâ qualitate, quantitate, et temporis distantia præscribere, præfertim ubi vel methodus curativa lenior, vel mera prophylaxis sit instituta. Ubi verò præ manibus sit methodus validior, in quâ copiosè et frequentius exhibetur cortex, attentè magis quoàd partitionem, et cautè magis quoàd quantitatem victus est offerendus, ne cum eo confundatur intempestivè remedium. Sed hæc ipsa cautela citò desinit, cùm brevitæ unius diei naturalis, quâ negotium

magnâ ex parte solet absolvi, difficultatem ullam vix possit admittere.

Circâ hoc tamen illius non sum sententiæ, ut cum nonnullis credam crebrum et pleniorẽ ciborum usum conferre cortice utentibus; imò cum permixtio medicamenti cum cibis apud me sit semper suspecta, quò enim purior et simplicior permeat chyli vias substantia remedii, eò activior est, et validior satius duco, quòd ea servetur victûs ratio quæ congruit naturæ morbi in datâ positione acuti jam facti; ut proptereâ solliciti admodum esse non debeamus, saltẽ in regione nostrâ (ut *libro* etiam *primo* innuebamur) de cibo offerendo, quasi in adjumentum remedii. Atque ideò præter vinum, in quo frequentius propinatur febrifugum (esto quòd et in aquis stillatitiis, et in formâ solidâ cum fructu æquẽ offeratur) præter vinum, inquam, quod portionem aliquam alimenti supplere potest, convenient juscula carniũ, ova sorbilia, fercula ex illis confecta, panatellæ, emulsiones ex seminibus peporum, ex amygdalis recentibus, et hujusmodi.

Quoad intervallum verò inter cibum et corticem, ego hanc regulam generalem teneo, ut quando remedium offertur, ventriculus sit à cibo, si fieri potest, vacuus, vel saltẽ sit peracta digestio, et quando cibus offertur, remedium paritẽ, majore saltẽ sui portione, sit è ventriculo ad chyli vias propulsum. Idcirco quatuor saltẽ horis antè cibum exhibeatur cortex, elapsis verò quatuor itidem, vel quinque horis ab assumpto tenuiore cibo ite-

rùm repetatur, et sic deinceps toto tempore, quo durat frequentior oblatio ejusdem corticis. Hanc tamen regulam quandoquē variare expedit, ubi urgeat necessitas tūm nutriendi, tūm febrifugum exhibendi; quo casu, partito singulis sex horis cibo dilutiore ac tenui, horis demū intermediis (videlicet tribus elapsis ab assumpto jusculo) potest exhiberi cortex, immò etiam paulò post, vel paulò antè assumptum jusculum, si sit opus; quandoquidem aliquam alimentorum, præsertim liquidorum fortè et solidorum societatem non prorsus excludit remedium istud, facilè fermentorum nostrorum objectis, ut fermentis ipsis nostris accommodabile. Quæ itaque pro regulâ generali circa hoc sunt prolata, non adeo religiosè intelligenda sunt, quin variam pro diversitate casuum, et methodi adhibitæ, ampliationem aut limitationem juxtâ medicî curantis judicium identidem patiantur.

Hæc ergò est methodus completa curandi febres periodicas perniciosas per usum Chinæ Chinæ. Superest, ut methodum eandem hucusquē expositam, quæ omnem fortè legentis cujuspîam expectationem (tām facilis illa est et obvia) nondūm implevit, licet suprâ plurium expectationem mea sæpius, et ægrotantium impleverit vota, *sequenti capite* dilucidemus, examinemus, et à præcipuis quæ obtrudi facilè possent, objectionibus vindicemus. Jam enim mihi videor audire non paucos dictis meis succensentes, et palàm clamantes:

Quid dignum tanto tulit hic promissor hiatu?

Docuit, inquiet aliquis, curare febres suapte naturâ intermittentes, mediante *unciâ undâ* vel *alterâ Chinæ Chinæ*, quod lippis jam, atque tonsoribus notum. Docuit, inquiet alter, experimentum periculosum, fermè deploratos curare tentans, temerariâ affatim, exuberante corticis oblatione. Docuit deniquè, concludent alii, sive recoxit, quod antè illum docuit præter alios etiam *Mortonus*, ob idipsum à sanioribus universalitèr reprobatur. Hæc jam, et similia meis scriptis ominor. Etsi verò vel ob inania hujusmodi præjudicia, vel ob alienam incuriam, vel ob denegatam fidem, vel ob pervicaciam (neque enim unquàm crediderim, quod ob nequitiam) in contemptum cadant hæc mea, nullus dubito, quin ipsi contemptores, vel obtrectatores mei, si qui futuri sint, methodum istam, quam palàm fortassè spernent, clanculum tandèm usurpent, vel siquidem eam apertè profiteantur, confidentèr apud ignaros jactitent, velut sibi jamdudùm compertam, antequàm mihi. At hoc parùm refert; nullam enim hinc famam quaerito, sed proximi utilitatem; nec me vana tangit prurigo garriendi, per quem vivat hac arte servatus homo, dummodò vivat. Cùm longior autem dies, et diuturnus usus, isque dubio procul felix, universalem approbationem, ut juvat sperare, huic methodo conciliaverit, tunc justitiam, quam mihi fortè nasuti complures denegabunt viventi, reddent extincto. *Tempori, judici æquissimo* (itâ monere videtur exemplo celeberrimi *Harveï*, hisque

fermè verbis innuere *cl. Ramazzinus*) *causa committenda, et despiciendi obtrectatorum latratus, neque responso dignandi, donec tandèm ferietur livor, qui ut plurimùm in vivis pascitur, ac cineribus parcit.* Sed et istud perindè mihi erit ac illud; quippè qui reprobantes audire vivens nolo, approbantes extinctus nequibo.

CAPUT IV.

Dilucidatur methodus exposita, examinatur et defenditur à malè feriatorum dicteriis, porrò circumstantiæ, in quibus ea locum habet et in quibus non indicantur.

NE quæso existimet quispiam, eo quia plurimùm tribuerim methodo expositæ pro curandis perniciosis febribus suprâ descriptis, in arduâ ferè quâlibet earumdem circumstantiâ, extremâque propè ægrotantium angustîâ, velle me methodum eandem jactantèr venditare pro peregrino quodam cogitato aut invento, quod menti hominum unquàm nec occurrerit, nec potuerit occurrere; cùm tamen admodùm similem antè me excogitârît (me quidem inscio, cùm antequàm excogitâssem, et in usum duxissem, non promulgarit) *Mortonus*, aliique forsitàn privatim suo Marte tentârînt aut excoluerint absque eo quòd illam peculiari dignam reputârînt historiâ. Non ea sanè mihi mens est, nec me latet quàm parùm distet à communi usu inventum istud, quippè quod habet pro basi remedium vulgatis-

simum, et pro scopo febres febribus eidem remedio communiter addictis analogas. Non ergò methodum hanc propono, ut rem abstrusæ atque sublimis indaginis, sed ut rem summæ, atque admirandæ utilitatis, à cunctis quidem facile excogitabilem, sed à paucis excogitatam, et à perpaucis excultam, quâ mediante servantur quamplurimi, cæteroquæ perituri, et sine quâ plurimi pereunt, qui certò servarentur; pereuntque præcisè per hoc, quòd methodus ista sive obvia, sive recondita, sive vulgaris, sive peculiaris, sive aliena, sive mea, communiter non noscitur, nec in usum ducitur. Quòd si quis illam antè nos se novisse jactitet, etsi pudeat pro hac gloriolâ decertare, adducat in exemplum curationes nostras quas sumus allaturi, æquales pondere, ac priores tempore, et manus vinctas dabimus. Sed aliud est decantare quod pluribus jam libris nimium liberaliter evulgatum est, ex ideali quâdam conjecturâ, Chinam Chinæ omnibus generaliter febribus, et quolibet earum tempore posse convenire, in casibus autem arduis, ubi verè convenit, nescire præscribere pro exigentiâ affectûs curandi: aliud per praxim methodicam, propriâ observatione sibi comparatam, certisque regulis constitutam, pronunciato contrà communem expectationem successu, utilissimè administrare, seque vadem eventûs præbere in agone rei.

Invento huic qualicumque, (siquidem inventi nomine velimus illud dignari) incipit jam propè contingere, quod contigit olim jocosò invento

satîs

satis noto de ovo stante, quod postquàm viderunt, sciebant omnes, et priusquàm videret, sciebat nemo. Sciunt autem ex nostratibus medicis ingenui non pauci, qui me præeuntem in hoc saltèm uno secuti sunt, et imitati; digni tamen, ut illos in longè pluribus sequar ipse, sciunt, inquam, et experiuntur, quot modò sanantur hac viâ, qui priùs inevitabili sorte interibant. Sed jam malè sonat (nosco) delicatis auribus repetita pluries hæc cantilena, quam nihilominùs vel invito sæpiùs extorquet sinceræ veritatis studium, non inanis jactantia.

Quidquid autem singulare habet hæc methodus, si quidquam habet, à duobus pendet. Unum se tenet ex parte morbi, alterum ex parte methodi ipsius. Ex parte morbi mirabile est prorsùs, non præcisè quòd febris intermittens, etsi violenta, per Chinam Chinam depellatur, sed quòd depellatur febris, quæ licèt fuerit intermittens, jam continua facta est, maligna, et exitialis, et quidem in eo statu, in quo æger lethalibus undiquè stipatus symptomatis videtur jam morti proximus cum algore universali, frigidove sudore, pulsusque ipse nullam ferè amplius febris habitudinem prodit, cum vix prodat se ipsum. In quo equidem statu de nullo ferè remedio cogitare consueverant medici, nisi de cardiacis, ut vocant, et restaurantibus vires, quorum tamen pretioso apparatu instructi, ne dicam infarcti, ægrotantes ditissimè moriebantur. Ex parte verò methodi peculiare quidpiam est, quòd China China eo modo et eâ proportionè exhibeatur, ut

consuetam activitatem suam valeat transcendere non modò curando morbum qui à nullo ampliùs remedio videtur curabilis, quippè fermè *deploratus*, et quem proptereà *non oporteat attingere*; verùm etiam illum curando intrà breve temporis intervallum, intrà quod benignam intermittentem, si vulgaris quælibet usurpetur methodus, non valet curare, et intrà quod, etsi angustum, si curaret, non curaret ampliùs, si videlicèt seriùs actio illius esset protrahenda, et priusquàm talis actio se posset exerere, novus se exereret paroxysmus.

Hæc sunt quæ methodum hanc *peculiarem* reddunt atque spectabilem, cùm cæteroquì summa illius in hoc tantùm consistat, ut augeatur suprà vulgatiorem dosis Chinæ Chinæ videlicèt *ad drach. ʒj.* vel *ad unc. j.*, quòd distribuatur determinatâ quâdam proportionè, ut prima oblatio sit potis febrem non longè distantem valido istu plectere atque mulctare, et quòd hæc dosis sic adaucta et sic distributa intrà breve spatium temporis absumentur integrè, ac etiam, si opus sit, tota simul. Quæ omnes circumstantiæ, si singillatim considerentur, sunt leves quidem, et quasi fortuitò inventæ, sicut ferè fortuitò olim applicitæ (ratione tamen duce) casibus quibusdam, quibus parùm vel nihil profuturæ reputabantur; sed si considerentur conjunctæ, ubi agitur de servandâ pereuntis hominis vitâ, præstant effectum (atque frequens equidem est occasio præstandi) præstant, inquam, effectum et citum, et certum, et tutum, et admirabilem, uno

verbo talem, qualem reverà assequi nullus antea medicinæ liber, sive ex Hippocraticâ, sive ex Galenicâ, sive ex chymicâ scholâ unquàm nos docuit.

Ut magis elucescat peculiaris hæc novitas cordationum oculis, ponamus exemplum. Notum est omnibus, pleuritidem copiosâ non modò ac repetitâ pluries, quantùm sinit virium status, phlebotomiâ curari, verùm etiam id fieri per specifica, ut aiunt, propinata, putâ dentem apri in pulverem redactum, mandibulum lucii piscis, et hujusmodi. Hac nihilominùs apud omnes vigente notitiâ, quot pereunt quotidie pleuritici, quibus jam ad extrema redactis inutilia sunt, nec proindè ampliùs administrantur prædicta præsidia? Si ergò medicus aliquis ratione et multiplici experienciâ fretus doceret modum certum sanandi eos, etiam cùm jam stertor bronchia pulmonum obsidet, suppresso sputo cùm pulsus exilissimus, facies Hippocratica, et anhelitus sublimis mortem præ foribus esse, et postridiè cubiculum ingressuram prænunciant, doceret autem id assequi per oblationem *copiosiore*, et intrâ *breve* statutum tempus *crebrò repetitam* dentis apri *v. g.*, itaut loco scrupuli unius vel semidrachmæ, quæ est dosis usitatio, semunciam *v. gr.* affatim offerret, ac subindè statis brevibus intervallis oblationem parciolem renovaret, donec uncia una quamprimùm esset absumpta, is profectò *peculiarem* et novam methodum prodidisse, meritò diceretur curandi pleuritidem jam ferè desperatam, licèt remediis pro morbo illo curando notissimis

id præstaret. Sic *Lazarus Riverius*, eo quia febrem malignam epidemicam intra biduum ab exortu parotidum ægros ferè omnes, quos corripiebat, necantem curare et sanare cœperit, iteratâ solùm phlebotomiâ et purgatione in eo gravi statu administratâ, methodum suam nomine *insignis experimenti*, quod silentio præterire sit nefas, donare minimè dubitavit *cap. de febre pestilenti*. Sicque paritèr, qui modo prædicto provectam ut suprâ, pleuritidem sæpiùs sanaret, *insigne experimentum* se peregissee, et *specialem methodum* curandi pleuritidem in eo statu se reperissee, haud immeritò gloriatur, etsi vulgaribus tantùm id ageret, notisque remediis; quia videlicèt, quos alii sanare nequeunt, ipse sanaret, præcisè ob *peculiarem* notorum medicamentorum administrationem, in quo uno tota sita esset prærogativa talis actionis. Ob id jure maximo aiebat magnus *Verulamius* hanc materiam egregiè suo more pertractans: *sciant pro certo medici posse plura medicamenta ad morbum aliquem gravem curandum rectè præscribi, quæ debito ordine et debito intervallo sumpta curationem præstent; quorum singula si per se tantùm sumerentur, aut si ordo inverteretur, aut si intervallum non servaretur, fuerint prorsùs nocitura*: etenim (liceat hìc ex eodem auctore alibi dictum repetere), *Quæ in naturâ eximiè possunt et pollent, sunt ordo, prosecutio, series, et vicissitudo artificiosa*. Perfectio rerum consistit in parvo. Excellentem picturam non reddit præcisè congrua colorum elec-

tio, sed et consona dispositio. Crassiora quæque lineamenta efformant effigiem : pauca et tenuia efficiunt similem.

Sed neque in auctâ dosi, et proportionatâ distributione Chinæ Chinæ merè consistit vis et utilitas methodi expositæ. Aliud namque requiritur, quod designari quidem potest aliquo modo, ut jam pro viribus factum est, sed nequit planè communicari. Tria sunt circà methodi usum scitu necessaria; *ubi* nempè usurpanda sit, *quandò*, et *quomodò*. *Ubi* respicit febres omnes in quibus potest aut debet administrari; *quandò* respicit tempus opportunum, et *quomodò* quantitatem medicaminis, et proportionatam celeremque distributionem illius. Contrà *ubi* peccatur, quandò non dignoscitur natura febrium in quibus conveniat ac prosit, et in quibus non exhibendo *v. gr.* ubi nequit agere, vel omittendo ubi miranda quandoquè præstare posset. Circà hoc autem plura jam hucusquè protulimus, et non pauca posthàc, præsertim *lib. v.* sumus prolaturi, ut nempè istud *ubi*, quod plurimùm refert, perspicuè dignoscatur. Contrà *quandò* peccatur, cùm tempore inopportuno exhibetur cortex, nempè vel procrastinando in occasione præcipiti, et offerendo nimis serò, cùm lapsa est occasio morsque jam proximè imminet, vel exhibendo nimis celeritè ob timorem panicum, cùm cæteroquì satius esset, febrem vel nonnihil, vel omninò, sinere. Et de hoc paritèr actum est et deinceps agetur. Deniquè contrà *quomodò* delinquitur, cùm quan-

titatem medicamenti, et illius distributionem non aptamus debitâ proportionem febri modò majorem affatim, modò minorem corticis copiam, modò lentiores, modò citiores repetitionem et modò æqualem, modò inquam illius partitionem intrâ congruum tempus exigenti. Et circa hoc quoque, ut reor, quantum sat est, quid sentiam aperui, speciales cautiones, observationes meas experimentales candidè aperiens.

Haud equidem inficior, hanc ipsam dosim largiorem, atque etiam nonnihil celeritèr absumptam in usu esse apud *Mortonum* (idem quodammodò dici posset de *Sydenhamio*, aliisque compluribus exteris) atque ab eo nonnunquam applicari, seu applicitam fuisse febribus perniciosis suprâ descriptis; ut paritèr fuit ab eodem applicita (fortè nimis quàm par fuerit, sed tamen minùs quàm fuerit hactenùs creditum, ut videbimus) aliis quibusdam febribus, ne dicam morbis omnibus aliquid periodici redolentibus. Et proptereà fassus sum alibi, atque hìc iterùm fateor, methodum meæ consimilem uni fortè *Mortono* antè me innotuisse, ut testantur illius historiæ annum sæpiùs 1690. quandòque et 1680, connotantes, licèt opera ejusdem seriùs impressa illam nobis non aperuerint, nisi post cœptum à me meæ methodi usum, ut historia peculiaris *capite VI*, hujusce *libri* exponenda, et aliæ deinceps *libro sequenti* manifestè patefacient. Si tamen aliquis chronologiæ hujusmodi fidere nolit, meque velit à *Mortono*, vel aliis auctoribus

instructum, parùm refert; hinc enim, ut alibi dixi, plus mihi gloriæ quàm pudoris emerget; emerget siquidem gloria saltèm imitationis in melius evectæ, si gloriola qualiscumque inventionis denegetur.

Illud tamen mihi fidentèr tribuo, aliisque compertum volo non ob contentionem quidem præminentia sed ob utilio rem tantùm ægrorum curationem; nempè aliquam nec prorsus levem esse discrepantiam inter meam et *Mortoni* methodum. Ille enim, cùm dosim non augeat, nisi ob suspicionem, quòd cortex sit adulterinus, ut videlicèt *drachmæ sex* hujus adulterini sortiantur effectum *drachmarum duarum* genuini pulveris, uti vidimus jam *capite VII, libri primi*, eandem dosim non distribuit proportionem satis validâ, ut quandoquè opus est in casu præcipiti, ideòque in talibus casibus fortè fallax erit *Mortoni* methodus *sex illas drachmas* præscribentis, et dividētis in sex partes æquales, singulis quatuor horis assumendas, quæ est methodus illi magis familiaris, nimis languidè incipiens, et nimis propè accessionem inhibendam desinens. Inquit itaque ille disserens de præparatione, electione et exhibitione largiore corticis: *nonnunquàm vix decimam illius partem in capsis mercatorum genuinam deprehendi*: et paulò post subdit: *corticem qui prostat in officinis venalis, reapse maximâ ex parte esse spurium, effectum, ac putidum, testes appello medicos etc. Quin et res ipsa idem clamat*; quare enim dosim solemnem *drachmarum duarum* adultis olim præscriptam, hodiè in

febris curandis ad tot uncias augere coacti sumus? En ergò quâ ratione dosim adaugeat. Deniquè (quod et alibi retulimus) clariùs inquit : *dosis drach. ij, præcisè adultis præscripta erat, jam autem quia cortex adulterinus est, coacti sumus saltèm unc. j. nonnunquàm duas vel tres ingerere, priusquàm scopum attingere possimus etc.* Hoc posito, cùm finis adauctæ dosis sit solùm, ut intrâ illam totam quantitatem includantur saltèm *drach. ij.* germani corticis, illa paritèr distribuitur lento et æquali progressu, nullâ habitâ febrium benignarum vel malignarum, lentiorum aut velociorum, casuumve magis vel minùs urgentium ratione; ac proindè curationes insignes, quas nonnunquàm videtur absolvisse *Morton*, absolvit ferè fortuitò per dosim liberalem in validas quidem, sed non quantùm aliquandò par esset portiones distributam genuini probabilitèr corticis, pro adulterino habiti. En illius generalior præscriptio : *Adultis præscribendus est cortex, prout plùs vel minùs genuinus sit, ab unc. ss. ad drach. vj. unc. j. ss. unc. ij. infantibus ac pueris pro ratione ætatis à drach. j. ad ij, iij, iv. Neque tantam molem unicâ vice ingerere necessarium est, cùm satius sit partitis vicibus, drach. j. scilicèt, drach. ss. scrup. j. quartâ quâque horâ, respectu ad ætatem habito, ministrare.* Hæc ille.

Ego verò, cùm fraudem ac fucum hujusmodi in cortice à nostris pharmacopolis electo et dispensato, rarò vel nunquàm deprehenderim, solisque *drachmis duabus* in ordinario intermitten-

tium cursu optatum effectum semper sortiri consueverim, idcirco *sex drachmas*, quas in casibus arduis céleritè præscribo, præscribo ut bonas, neque ut æquivalentes duabus tantum, sed ut triplo fortiores quàm duæ, imò etiam plùs: cùm sex conjunctæ, quas aliquandò mihi contigit et assumere et exhibere, longè plùs agant ac sex sejunctim et per intervalla absumptæ, ut jam diximus per extensum *cap. VII. libri primi*. Cùm itaque plurimùm intersit, ut prima, nonnunquàm etiam altera oblatio sit valida, ubi videlicèt præceps imminet periculum, ideò methodus *Mortoni*, in quibusvis casibus non plùs quàm *drachmam unam* corticis singulis tribus vel quatuor horis præscribens, etsi præter auctoris existimationem genuinus ille fuerit, si versemur in præcipiti casu, erit infirma. Et hæc est ratio propter quam curationes, quas adducit in suis historiis, licèt insignes profectò sint, universalitèr tamen non sunt admirabiles: imò propter hanc ipsam rationem censeo ægros aliquot graviùs affectos, quos refert, quibusque cortex opitulari nequivit methodo fortè nostrâ sanari potuisse, cùm plurimos haud absinili modo laborantes hac eadem methodo sanatos noverim. Cæterùm nunquàm satis in hoc laudari potest idem auctor, omnesque propterea, quotquot sunt medicos efficacitèr hortor, ut scripta illius circa febrium curationem Peruviano cortice absolutam, ac præsertim experimenta et historias curationum attentè legant, nec neglegant aut contemnant; plurimùm enim veritatis hu-

jusmodi historiis inesse, nullus dubito, in illis etiam iisdem casibus, in quibus videtur esse nimius, ut nonnunquàm est, in præscribendo cortice citatus auctor nempe in ipsis continuis. In his enim consideratis et sumptis in eo statu, in quo ille easdem sumit, atque considerat, nempe in statu manifestæ et periodicæ remissionis, benè potuit, potestque nonnunquàm, si non semper, esse proficiuus cortex, quatenùs febres hujusmodi aliquem tunc characterem intermittentium præseferunt, licèt illas sub tali etiam circumstantiâ nomine febrium *continentium* designet, præter morem in scholis usitatiorum. Quod hìc obitèr monuisse sufficiat; cùm hoc idem, quod communi forsàn æquivocationi circà illius asserta ansam dedit, exactiùs ad trutinam revocandum sit, *libro V.*

Haud sum nescius quod et nupèr innuì, scrupulosis quibusdam et in praxi parùm versatis, largam nimis videri posse tùm quantitatem corticis universalem, tùm dosim particularem à me in perniciosis præscribi solitam. Sed de nihilo est cavillatio respiciens generalem quantitatem, ut de hac priùs loquar: cùm enim ea in uno ægro non soleat transcendere *unc. j. ss* vel *unc jii.*, aut saltèm cùm paulò ultrà extendatur pro curandâ simul *febre*, et impediendâ *recidivâ*, nullo modo culpari potest hodiè: hæc etenim minor est quantitas, quæ impendi consuescat. Gallia universa Chinam Chinam usurpat ad *unc. tres*, quatuor, et ultrà, ut vidimus *cap. vii. libri I. Sydenham* in observationibus ad *unc. quatuor* in

substantiâ *longo* et repetito usu per modum alterantis ascendit : immò illum in epistolis seriùs impressis, in quibus cum *Mortono* fermè concordat, *duas uncias brevi* temporis spatio assumendas sæpiùs præscribere consuevisse adnotavimus jam *cap. antecedenti*. *Monginotius* vir cautissimus, et in usu Chinæ Chinæ versatissimus hanc regulam generalem tradit agens de præparatione remèdii in *Zod. med. Gall. august. 1681.*, nimirum : *in curationem unius individui impendendam esse sesquiunciam vel unc. ij. Quinquinæ, immò aliquandò superandam illam quantitatem pro varietate occasionum*. Quid multis ? Prostat experientia *Mortoni* de usu corticis in substantiâ usquè ad libras duas tractu temporis exhibiti *Exercit. 1. hist. 29.* cui dosi liberali adscribit ille vegetiorem contractum ab assumente vetulâ corporis habitum; quod et ipse nonnunquàm observavi, ac in historiis retuli *cap. x. lib. 1.*; adeòque balsamicas huic remèdio vires inesse, videtur exindè deducere idem *Mortonus*, qui dosin idcirco illius uberiores semper anteponit parciori.

Quo verò ad dosim particularem, primis præsertim cyathis liberaliorem (in quo consistit major efficacia methodi nostræ) nullum circa eam video cunctationi locum, quandoquidem æquè innoxie ægris exhibentur, quantum centies expertus sum, *tres vel quatuor simul drachmæ* tenuissimi pulveris, ac exhibeantur *duæ* more vetustiori; extractâ namque à fermento ventriculi corticis tincturâ febrifugâ et utili, intrusisque per lacteas particulis tenuiori-

bus, crassior et lignea substantia per alvum sensibilibiter amandatur, quemadmodum solemne est, oblatâ etiam cæterorum omnium lignorum substantiâ, putâ santalorum, salsæ, guajaci, et similium. De innocentâ remedii intrinsecâ jam satis *capite prim. lib. 1.*; de eâdem verò etiam in auctâ dosi egregiè subdit idem *Monginotius* in contextu supracitato, post arbitrariam, et indeterminatam suprâ unicâ duas dosis taxationem : *cùm nihil mihi in animo obversetur, quàm ut optimum quodque, et usu probatum adferam, dosim eo usquè extuli, ratione et experientiâ testibus. Cùm ab hujus remedii usu omne omninò absit periculum, satius est ad majorem quantitatem ascendisse, quàm in minori hæsisse, ut curationis τὸ ἀσφαλὲς sequatur.* Idem planè asserit *Charas* loquendo de dosi extracti sui in hunc modum : *Mais il n'est pas nécessaire d'être scrupuleux sur la dose de ce remède, car il a cet avantage, que l'augmentation de la dose un peu au delà de l'ordinaire, ni la répétition des prises ne laissent aucune mauvaise impression, et ne peuvent faire mal à personne.* Ità sentiunt auctores omnes in præscribendâ et adhibendâ Chinâ Chinâ exercitati. (1) Et hæc

(1) Consentiant omnes practici de *Chinæ Chinæ* efficacitate in febribus perniciosis, illamque ministrandam statim ac morbo us patet; fatentur itaque hoc medicamen in pulverem redactum satius cæteris præparationibus conducere, dosique longè copiosiore quàm in cæteris casibus esse ministrandum; sed cùm sit impossibile de justâ adamussim statuere quantitate, symp-

quo ad dosim adultis administrandam, quam ut frequentiore pro modulo plùs minùs adduxi; ex eâ namque facile est perito medico, proportionem elicere dosis pueris et infantibus præscribendæ pro ratione ætatis eorum; jacto semper fundamento quòd, etsi liberalior nonnihil sit ipsa dosis, agitur

tomatum verò intensitate, ægrique viribus accommodandâ, nunquàm minùs sex dragmarum propinandum est.

Ut remedium tutò afferat effectus, propinetur, paroxysmo immediatè terminato.

Dosis integra in plures minores dividi potest, quarum tamen copiosior, integræ *v. gr.* dimidium, prima ministretur, cæteræ verò successivè minuantur.

Dumas, in dissertatione de febribus remittentibus quæ larga vulnera sæpè comitantur, quæque perniciosarum intermittentium evidentè naturam participant, *Chinæ Chinæ* rubræ unciam unam in quatuor partes inæquales dividebat; primam dosim trium dragmarum quàm remotissimè ab accessu propugnando ministrabat, secundam et tertiam unius tantùm dragmæ, interposito sex horarum intervallo offerebat, quartam deniquè trium etiam dragmarum, paulò antè accessionem. Hæc methodus non videtur utilior præcedente, sed cùm vir illustris felici cum successu hac uteretur, his tantùm casibus applicari potest.

Cùm febris perniciosa subintrans evadit, exhibendus est cortex accessu declinante.

In perniciosarum febrium epidemiis circà tertium aut quartum accessum quandoquè perit æger; tunc si medicus accersitur, nullâ interpositâ morâ, *Chinam Chinam* exhibere debet opio unitam: hoc narcotico per accessionis decursum fausto cum eventu *Barthéz* usus est.

de remedio suapte naturâ innocuo, et de absorbente æquè inculpabili, ac cætera quibus assidue utimur, sed magis specifico.

Neque paritèr negaverim tam meæ, quàm *Mortoni* methodo objici posse, quòd suppressis in ipso morbi vigore febrium paroxysmis aliquandò recidant ægri. Sed hoc excellentiæ ipsius methodi nihil videtur detrahere, nam præterquamquòd æpissimè non recidunt, et præsertim quò magis ad extremum fuerint redacti, et præterquamquòd recidiva vel inhibetur continuato remedio, vel, si prorsus inhiberi non possit, saltèm debilior solet esse radice suâ, ut diximus agendo de oblatione corticis in benignis intermittentibus, adhuc tamen, etiamsi recidiva certò recurreret, et si gravis æquè foret ac antè (quod profectò non accidit) adhuc, inquam, hoc nihil officeret in nostris casibus, ubi agitur vel de exitio certo ac imminente, vel de periculo quàm maximè impediendo, aut saltèm suspendendo. Sicuti enim, si quispiam ex gravi febre delirans se præcipitem daret in puteum, esset extrahendus è puteo, etiamsi recens emersum eadem febris certò esset interemptura; ità in hisce casibus æger est subtrahendus naufragio suo per corticem, qui unicum certumque remedium est, etiamsi contendatur esse palliativum, ut sic dicam, aut foret narcoticum (quorum nempè pro leviori occasione frequens est usus) causam febris consopiens, ac ad tempus figens, ad impetrandas scilicèt saltèm inducias adversus mortem. Eâ enim tunc temporis propulsatâ,

potest deindè Medicus, qui cortici satis non fidat, aliam pro libito methodum, si quam se putat habere meliorem, eligere pro eradicatione integræ causæ morbificæ. Caveat tamen ne remedia, quæ cortici putat ad prophylaxim substituenda, mortem iterùm, quam cortex propulsavit, accersant. Interim sat sit, si usu illius nostrâ methodo administrati protinùs vivat æger, qui cæteroquì proximè moriturus erat, præsertim cùm vivat non moriturus paulò seriùs; quod tamen quis flocci pendat? sed victurus diutiùs, suosque dies naturalitèr impleturus. Si tamen, postquàm intrà duos vel tres dies ab orci faucibus evidentèr ereptus est, atque ad infebrecitationem omnimodam redactus, obnoxius remaneat uni vel alteri recidivæ leviori, post duas circitèr hebdomadas contingentì, id æquo ferat animo. Feret autem, si memor fuerit periculi recentèr elapsi, et si animadvertat, difficultèr à remedio naturali restitui posse sanitatem ferè in instanti, uti restituitur à cortice, absque ullâ recidivæ suspicionè; hujusmodi enim modus agendi miraculosus foret solique Deo reservatus. Sed reverà nonnunquàm transactæ procellæ obliti ægrotantes, et ab hominibus malè feriatis, cùm recidunt, seducti facilè exclamant quandoquè, satius fuisse febrem sinere, à quâ fortassis evasissent absque tædio tot recidivarum, quàm illâ violentèr suppressâ diuturniore incommodo præcocis sanationis pœnas tandem luere. Profectò receptum beneficium non exprobrarent si febri illos jugulanti relictì fuissent;

sed probi viri est cunctos servare, quos potest, et serere beneficium, etiamsi sit messurus calumniam. Non sic aiunt postea cùm alios cernunt, in similibus circumstantiis hoc remedio, hacque methodo destitutos perire.

Fateor equidem quòd, quandò febris acuta jam facta ferri potest, nec hominem propterea interimit, sed suum cursum integrè ac feliciter absolvit cum universali tandem et criticâ fluidorum depuratione circa finem (dico *integrè* atque, *feliciter* : sæpiùs enim hoc fit imperfectè, et tunc quoque ex imperfectâ judicatione plures recidivæ contingunt) meliùs ac tutiùs quo ad suspicionem recidivæ judicatur morbus, ipso etiam latente *Mortono*, quàm si per corticem impedito febrilis effervescentiæ progressu, etiamsi retusum simul sit, correctumque ipsum febrile fermentum, integra impediatur per consequens eorundem fluidorum, et præcipuè sanguinis despumatio; quod circa citam nimis, validamque, ubi opus urgens non sit, corticis oblationem observavit et *Monginotius*, à nobis super hoc ipso citatus *cap. antecedenti*. At non proinde coercetur intùs morbi fomes, totis suis viribus iterùm resumptis æquè revicturus ac antea, sed longè debiliùs resurrecturus, siquidem aliquâ sui parte possit resurgere, reviviscere aut reproduci. Illud namque discrimen mihi videtur intercedere inter febrem solutam primo, et resectam secundo modo, quod intercedit inter arborem radicatus evulsam, et eandem ab imo trunco securi recisam.

recisam. In primo casu ità extirpata est arbor, ut nullum ampliùs possit emittere surculum ; in secundo quoque certè integrè resecta est, nihil tamen obstat quominùs tenuius aliquod à detruncatâ radice pullulet germen, minimâ quâlibet sirpiculâ facilè averruncandum. Ità est profectò in casu febris per Chinam Chinam curatæ. Non modò obtruncatus est paroxysmus, sed propè radicem resectus, absorpto videlicèt, correcto, enervato, ac retuso fermento febrili ; remotiores tamen et universalliores causæ, quæ ipsum genuêre fermentum, etsi hac ipsâ viâ enervatæ sint, non tamen sunt adeò domitæ ac radicitùs evulsæ, quin novum adhuc fermentum licèt infirmius, aliquamve iterùm illius portionem valeant progignere : quâ de re fusiùs infrà *lib. iv. cap. v.* Sed quorsùm hæc ? objectioni siquidem de periculo recidivæ, ubi agitur de impendente morte, nullus est locus, ni velimus in re seriâ fabellam renovare, quâ fertur sitientem quemdam proximè suspendendum patibulo, vinum montanum potare renuisse, quippè quòd saxoso loco genitum tractu temporis calculum vesicæ gignere poterat. Ne tamen festivâ hac tantummodò, validâ licèt responsione velle satisfacere videar, ingenuè repeto quod pluries observavi, vel saltèm quod mihi observâsse sum visus (quod quidem ex historiis suo loco afferendis poterit quisque meliùs conjicere) per raram nempè contingere consuevisse recidivam in iis, quibus methodo validâ oblatus est cortex in extremo prorsùs eorum periculo ;

contrà verò faciliorem, quandò periculum aliquantispèr ab extremo distabat, ut cùm æger duas adhuc accessiones, vel unam saltèm poterat probabiliter sustinere.

Est et alia ægrorum non querimonia, sed potius despicientia adversùs hanc methodum, et est hujusmodi. Tam cita est, et tam facilis illarum sanatio, nullâ scilicèt concurrente famosâ operatione, nullo ferè labore, dolore nullo, ut vix noscant aut credant, etsi videant se ab insigni liberatos periculo, quasi pretiosa illis non videatur acquisita sanitas, quæ non empta fuerit vel ingenti auri pretio, vel ingenti ipsorum cruciatu. Non ità foret, si copiam lapidis bezoartici nil agentis deglutissent, si torminosa et nauseosa potâssent pharmaca, vel si cucurbitulis aut vesicantibus excarnificati ægrè convaluissent. Proh magna innocui et benigni remedii calamitas! Eo quòd facile est, mansuetum et minimè dolorificum, vilescit. Sed et alia adhuc est ratio, propter quam vilescit sanitas per corticem adeò mirabiliter acquisita. Ea est, quia ægri assueti sunt credere, quoties evadunt à morbis, semper evasisse propter illa remedia, quibus sunt usi, licèt nullum fuerit sive certum, sive sensibile illorum juvamen: ideòque etiam per corticem sanati non illi, vel medico præscribenti plùs tribuunt, ac tribuant aliis remediis quorum pendente usu alias convaluère, licèt sæpiùs non propter illa convaluerint, sed beneficio naturæ. Hæc autem exceptio verè cortici nullatenùs competit, quippè

quì statim sensibilitèr, et semper suum munus absolvit in arduâ serè quâcumque circumstantiâ, ei namque uni in totâ medicinâ datum est privilegium hocce, ut medicus antè oblationem illius possit spondere subitam, certamque saltèm moralitèr salutem, et restituto ægro possit intrâ se modestè gloriari, exulare, et sibimetipsi dicere: *hunc hominem certò pereuntem hoc uno remedio verè servavi*. Sed hoc quod probè dignoscitur à medicis, minimè dignoscitur ab ægrotantibus; adeòque illis minùs conspicua redditur singularis excellentia remedii, medicique illud aptè et opportunè præscribentis industria. Verùm hoc quoque parùm refert; et quoniam in aliis quandoquè casibus laudatur à sanato ægrotante medicus, cùm illius saluti nil serè præstitit, haud ægrè ferat, si aliquandò non laudetur, cùm præstitit plurimùm.

Deniquè illud quod maximè exponit calumniæ methodum istam, est necessitas illam quandoquè adhibendi in talibus circumstantiis, ut fortè homini intrâ tres vel quatuor horas animam efflaturo, illam contingat inutilitèr administrare, et *subire speciem ejus, ut occisi, quem sors ipsius peremit*. Circà hoc oculatus valdè sit oportet, cautus ac peritus medicus in dignoscendis casibus, ubi sit vel non sit locus congruens actioni remedii, præsertim *in splendidâ personâ, ne, si non servet, occidisse videatur*. Et, ut repetam quod *capite* antecedenti obitèr monui (est enim hæc magni momenti circumstantia) scire oportet, quòd sicuti ad

hoc, ut virtus corticis etiam copiosè administrati in actum possit perfectè deduci, requiritur debitum temporis intervallum, XXIV. circitèr horis circumscriptum, ità ne inutilitèr exhibeatur necesse est, per XXIV. circitèr horas victurus sit homo cui debet exhiberi : adeòque oportet ut ultrà paroxysmum atrocem quem actu patitur, vita illius sit protrahenda' saltèm in alterum, seu quòd in illâ accessione occumbere non debeat, sed ad minimùm in proximè sequenti. Caveat idcirco sibi medicus ne calumniam subeat, videatque ac attentè perspiciat, si vigente aliquo terribili paroxysmo vocetur, an à tali accessione evasurus sit æger (quod haud difficultèr dignoscet, si expertus et peritus sit) priusquàm corticem propinet. Neque enim statim ac vocatur, semper opus est illum immediatè præscribere, sed satius est declinationem aliquam etiam hoc nomine expectare. Si enim aliqua symptomatum appareat remissio, et quædam ægri jam ferè morientis reviviscentia, utut fermè sine pulsu et cum aliis lethalibus signis idem perseveret, alacritèr exhibendus est cortex cum spe probabili, ne dicam certâ de salvando homine propter moralem certitudinem, quam habet medicus de impediendo futuro accessu.

Quòd si res ægrotantis eò devenerit ut vita illius etiam intrà paucas horas sit in discrimine, sive quia paroxysmus jam inchoatus videatur non posse ad declinationem pertingere, quin priùs æger deficiat, sive quia idem paroxysmus non inchoatus

quidem, sed quàm proximè instans, nec proinde per corticem ampliùs inhiberi capax, ultimus absolute, lethalisque futurus esse videatur, tunc, licèt meliùs cautum foret famæ medici non exhibendo corticem, qui neque paroxysmos ipsos benignarum intermittentium vel inchoatos, vel proximè instantes valet coercere, adhùc tamen ne caritati ergà proximum suum ullo modo desit, ut quodammodò videtur deesse, si ob metum calumniæ negligat, vel omittat auxilium in talibus circumstantiis incertum quidem ac probabiliter inutile, sed nihilominùs innocuum et fortè juvandi capax, adhùc, inquam, crediderim eundem corticem à medico misericordi offerri posse, plano tamen priùs et aperto præmisso prognostico, incunctantique protestatione de futurâ probabiliter inutilitate innocui cæteroquì tentaminis. Id eò magis licet aggredi (si non titulo curandi, saltèm titulo indulgendi atque tentandi, ut dictum est) si tale auxilium ab assidentibus, vel ab ipso ægrotante expressè expetatur, quandoquidem fama remedii paucis ab hinc annis satis perspecta est, et vulgata cuique, dummodò æger ipse jam ferè non agat animam, febrisque ex naturâ suâ sit capax remedii, et non alitèr. Aliud est enim illud tentare in febre, cui cæteroquì conveniret, ni mors proximè instaret, aliud tentare in eâ, cui nunquàm, ne antecedentèr quidem, convenerat. Illud, quamvis successu careat, condonandum, istud non ità.

Etsi tamen omnes quotquot excogitari possunt

cautelæ, frustraneæ quandoquæ futuræ sint, itaut à malè feriatis hominibus nihilominus malè audiat medicus, qui homini paulò post vitâ functo corticem præscripserit, qualiscumque tunc fuerit ægri status, qualiscumque illius, vel adstantium efflagitatio, et qualiscumque propria protestatio antè remedii oblationem, non ob id christianum medicum decet abstinere prorsus ab usu talis remedii, ubi aliqua congruens ratio id exigat, vel tenuissima quævis non planè irrationabilis spes salutis in longinquo etiam affulgere, aut transpici posse videatur, ut si ægrotus sit juvenis, et cæteroquì validus. Mihi etenim non semel contigit, licèt non semper contigerit, hominem non modò à lethali paroxysmo futuro parùm distantem, sed etiam in eo quem patiebatur expiraturum creditum, quin et propè expirantem, ope corticis Peruviani copiosè et celeritèr ministrati servare, ut ex historiis posthàc afferendis patebit; etsi etiam post restitutam sanitatem, et calumnias detractarum, et querelas convalescentium, et beneficii minimè cogniti contemptum, et mala cuncta, quæ suprà recensui, sim pluries expertus. Quid, si cortice inutilitèr ministrato ægrotantes hujusmodi occubuissent? idcirco desperatis omninò nunquàm offerendus est, ne sine spe juvaminis infametur. Atque eò magis ab illo abstinendum, vel eò saltèm cautissimè utendum, si cum circumstantiâ statûs ægri planè deplorati concurrat altera circumstantia temporis, de invadente jam, vel istante quamproximè paroxysmo:

quo casu duabus, vel tribus horis ab assumpto cortice, debet probabiliter æger proxima jam fata sua subire. Satiùs ergò semper est, si fieri possit, remissionem febris ut suprà diximus expectare, ne orta ex morbo calamitas in remedium refundatur: uti non modò propter horam oblationis intempestivam, paulò videlicèt antè paroxysmum, sed forsàn (crediderim ego) ob hanc ipsam morbi dispositionem, in perniciosis præsertim facilem, aliquandò in Angliâ quid simile contigisse refert *Sydenham*, subortæ indè cunctationis nebulas dissipans, usumque corticis, quodammodò tunc fatiscentem nervosè restituens.

Quod dictum est de cortice non exhibendo deploratis omninò, et citissimè morituris, intelligendum est etiam de casibus (rarioribus quidem) in quibus perniciosa febris conjunctam habeat insignem aliquam læsionem organicam viscerum, suprà quam nullam habet ditionem cortex; quare si à tali potius vitio, quàm à consueto fermento producat febris, hæc tolli nequibit à cortice, qui nil potest adversùs hujusmodi causam. Si verò eadem febris periodi rationem habeat à fermento ordinario, læsio verò organica visceris alicujus, putà gangræna, ulcus, abscessus etc. sit vel quid adjunctum per simultaneam coincidentiam, vel symptoma productum ab ipsâ febre, tanquàm effectus à suâ causâ, in tali quoque casu, etiamsi per Chinam Chinam removeatur periodus, non tamen removebitur gangræna, ulcus, abscessus etc.,

sicut neque febris illa continua, quæ hujusmodi affectiones comitari solet, aut subsequi, et quæ vel citam mortem, vel diuturnitatem morbi ut plurimum inexpugnabilem, consuevit inferre. Hæc quidem coincidentia in perniciosis nostris non est admodum frequens; ubi tamen ea contigerit, frustrâ est præscribere corticem, quemadmodum in ipsis diuturnis intermittentibus, quas ulcus aliquod internum, externumve profundum foveat, plurimi experti sunt et fassi ingenui scriptores, utque ego ipse possum testari, maximè si labes aliqua insignis thoracem præ cæteris occupaverit; sed de his fusiùs alibi.

Addamus pro coronide aliam nec levem nec infrequentem ferè dixerim calumniam, quam subire solet hæc methodus, eam videlicèt quam aliæ methodi curandarum febrium, seu potius non curandarum, ut suam collabescentem sustineant existimationem, necessitate quâdam titulæ *culpabilis*, huic affigunt. Primo itaque loco nonnulli Chinæ Chinæ infensissimi, soloque illius nomine exhorrescentes, qui scilicèt eam nullo examine prævio ab usu jam medico proscripsère, mirum est dictu quot nugas, quot ineptias, quot blaterationes, quot jurgia in illam effutiant. Illorum interim methodus in curandis febribus nostrâ rejectâ et exsibilatâ, ea ipsa est quam lepidè describendo deludit celeberrimus *Lucas Tozzi* peculiari capite, *De methodo, quâ reguntur nostris temporibus, qui se Galenicos jactant*, ad quod curiosum lectorem

relego. Alii sunt, qui Chinâ Chinâ vix audent uti in febribus intermittentibus benignioribus atque diuturnis, postquàm videlicèt omnes pharmaco-
pæorum alveolos incassùm exinanierunt. Apud istos methodus nostra malè audit; temeraria quippè, empirica et phantastica, semel per accidens utilis, pluries verò noxia, reclamantibus licèt experientiâ et ratione reputatur. Præter hos nolim facilè credere alios quoque reperiri posse, qui methodo hac quomodolibet excerptâ vel intellectâ, neque inutili in praxi repertâ, quasi tamen eos pigeat ipsam aliamve parùm absimilem palàm profiteri, pudeatve alienum quodammodò morem sequi, eâ clanculùm, ut ità dicam, utantur, etsi cæspitantèr atque casu tantùm nonnunquàm utilitèr. Isti, si qui sint, illam identidem ut opinor, subfrigidè ac quibusdam tantummodò additis limitationibus laudabunt, sive laudabunt quantùm sat est, ut eâ possint uti sine exprobratione, si deprehendantur in facto, sed simul quantùm sat est, ut possint opponere et cavillationes adducere, eamve nonnihil (parùm licet experti) reformare vel castigare tunc, cùm eadem sibi proponitur, vel mussitare saltèm, cùm ab aliis exercetur. Quod tamen ex his omnibus nemo ex pravâ intentione peccet, sicuti me certum reddit ipsorum integritas, ità æquum est ut lectores reddat æquè certos integritas mea, me quoque in decursu totius operis semper respicere, atque corripere opinionem tantummodò adversantium, non mores; etsi præter intentionem alicubi forsàn, ut

et hîc, mihi exciderint verba, quæ aliud sonare videantur. Cùm itaque ex opponentibus istis nemo, ut aiebam, peccet ex pravâ intentione, sed *primi* ex præoccupatione quâdam vetustâ, *secundi* ex terrore panico, et stipticâ quâdam circumspectione, *postremi* verò ex mutilâ experientia, sophisticis ut plurimum ratiociniis coinquinatâ; ideò pandere hujusmodi methodum apertè decrevi, ut sublatâ dubitandi murmurandive occasione, omnibus indiscriminatim prosim pro viribus, nominique deinceps meo hac spontaneâ qualicumque oblatione et consulam et caveam.

CAPUT V.

Evitare censuram vulgi difficile, si aliquandò æger hac methodo curatus occumbat. Recensentur ideò fidelitèr casus omnes lethales, in quibus culpatus est insons *cortex*, etsi non oblatus, ut et ii in quibus verè oblatus non profuit, iique insimul in quibus nec profuit, nec poterat prodesse.

CAVEAT tamen sibi quantum velit, et quantum lubeat prudens medicus, nunquàm censoriam adversantium virgam declinabit, et quoadusquè vivet ignavorum blateratio, eousquè culpabitur cortex, et qui corticem præscripsit, si quandò unus tantum inter centum, suapte naturâ patentèr jam moriturus, moriatur assumpto cortice. Sed, bone Deus! aliud est mori sumpto cortice, aliud est mori propter assumptum corticem; nihilominus apud homines hujusmodi idem est mori aliquandò post

eum assumptum, ac propter eum assumptum; cùm tamen non propter assumptum pharmacum, nec propter assumptum cardiacum, bezoarticum, aut alia sexcenta dicantur unquàm mori tot, qui istis assumptis quotidie moriuntur. Anne soli cortici adjuncta est necessitas vel sanandi etiam deploratos, vel necandi quos sanare non valuerit? An quisquam illum venditavit pro pharmaco immortalitatis, ut præstet primum? An aliquam habet, ut habent tot alia, quæ passim præscribuntur, noxiam, aut deleteriam qualitatem, ut præstet secundum? Cùm verò tam præstans non sit, ut omnes sanet, præsertim in agone constitutos (licet fortè sanet ex iis etiam nonnullos) nùm propterea ut venenum audiet? Hic sanè adamussim quadraret, quod ratione longè minore protulit olim *Botallus*, et ex Botallo nostris temporibus *Sydenham*, quorum uterque cùm liberaliorem sanguinis missionem in febribus pestilentialibus usurparet, seque culpari resciret, si quandò aliquis tali adhibitâ methodo occumbebat, *verùm*, inquit, *nebulones nequissimi et ignavissimi in id semper culpam convertere satagunt, non quòd nocuit, sed quòd per nefas à cunctis vituperari exoptant. Aut si id nequitia non faciant, ignorantia tamen efficiunt: utraque certè perniciosa, sed illa magis.*

Non equidem ego in hanc querelam effundor; eo quia mihi quòd memor sim, unquàm contigerit casus aliquis qui alicui etiam in dicacitatem prono potuerit ansam præbere similia effutiendi;

sed potius conqueror quòd hæc aliquandò ab ignaro vulgo, vel deliris hominibus promulgata sint in casibus quandoquè illustrium personarum quæ obierunt, quibus verè cortex non fuit oblatus, quibusque utinàm oblatus fuisset. Cæterùm denuò possum testari coràm Deo, et hominibus, ut aliàs paritèr testatus sum, me nunquàm ulli corticem exhibuisse, cui ille obfuerit vel potuerit mihi seriò meditantì suspicionem ullam incutere de damno illato; excipiendo semper hìc, et ubiquè suspiciones in historiis secundæ huic editioni additis adumbratas, usumque minùs tempestivum pharmaci cæteroquè innocui respicientes. Ne verò alicui intrà urbem nostram conscio de casibus quibusdam lethali-
bus, in quibus aliquandò famâ mendaci culpatus est cortex, minùs candida videatur assertio mea, placet hìc casus ipsos obitèr recensere, et ab iniquâ calumniâ insontem corticem vindicare.

Sed priùs circà hoc generalitèr velim notari, quòd, quandò æger, qui in extremâ angustîâ corticem potavit, vitâ fungitur antè adventum futuri paroxysmi, scilicèt correspondentis ei, quo pendente oblatus est cortex, non potest tunc idem cortex culpari non modò de damno ut patet, sed neque de inefficiâ : quandoquidem in tali casu perit æger in ipso paroxysmo, quo oblatus est cortex, diutiùs protracto. Effectus autem corticis est inhibere correspondentem, ut diximus, adeòque quotiescumquè vivente ægro usquè ad tale tempus correspondens paroxysmus inhibeatur, cortex jam

suum munus absolvit, sive deindè æger successivè sanetur, ut verè assolet, sive etiam inhibito licèt paroxysmo, adhuc occumbat ob aliquam *v. gr.* labem adjunctam, quæ febriculam continuam foveat, sublatâ etiam periodo, lethalem, ut in nonnullis casibus contingit, immediatè infrâ subdendis.

Primo igitur loco fama tulit apud nonnullos clarissimum olim virum *D. Nicolaum de Sanctis*, à secretis, et statûs consiliarium serenissimi Ducis nostri, in postremâ ægritudine suâ (quâ fato cessit) assumpto juxtâ hanc methodum cortice obiisse; sed falsum est. Sumpsit quidem alia remedia vulgaria, et obiit; corticem autem verè non sumpsit, nec obiisset fortasse, si verè sumpsisset. Torquet adhuc animum meum memoria de cortice non oblato tunc, cùm tempus aderat de non tentato saltèm etiam tunc, cùm præteriit. Quatuor eramus curantes medici, *D. Dandrinus*, *D. Ferrarius*, *D. Davinius*, et ego, qui propter levem quamdam invaletudinem, quâ paulò antè correptus fueram, postremus accessit, nec primis, ut aliàs consueveram, morbi diebus interfui curationi. In aliâ difficillimâ ægritudine ejusdem patientis non sine fructu tale remedium vix vix indicatum, cum aliis tamen quamplurimis longo temporis tractu præscripsimus, et ab eo morbo contrâ ipsam expectationem nostram evasit. An cortex simul cum aliis remediis, an sola naturæ actio opus illud absolverit, ignoro. Eâdem fiduciâ propositus fuit unanimiter cortex per modum alterantis in novissimâ ægritudine, tempore congruo,

cùm videlicèt febris tertiana duplex sat valida, et per subingressum paroxysmorum continua, suas adhuc servabat periodos; sed et unanimiter (postquàm paratus fuit in pyxide, et secundùm tenuem portiunculam ab eodem libatus) ab ulteriori illius oblatione supersedimus victoriam à solâ naturâ sudatiunculas quasdam tentante per viam vel crisis vel lentioris coctionis, concordi voto sperantes. Sed quid? Non multò post intenditur morbus, tandemque irritis cardiacis et bezoarticis ruit in præceps. De tentando cortice remanet anceps iudicium. Creditur inutilis futurus, timetur calumnia, nec offertur; eoque intentato occumbit æger, superstite intrà pyxidem cortice; medici verò subeunt calumniam de eodem perperàm oblato, dùm eos pœnitent non tentâsse ob calumniæ metum.

Secundo loco nobilissima matrona Domna Gertrudis de Sanvitalibus, eminent. Cardinalis soror, *Marchionissa Rangona*, anno 1707. post paucos paroxysmos duplicis tertianæ in soporem incidit tam gravem, tamque profundum tempore accessionis cujusdam, ut de illius vitâ maximoperè à curantibus medicis dubitaretur. Duo erant hi, unus quidem junior (talem quippè respectu alterius licebit illum appellare) alter verò senior, nempè *cl. Ramazzinus*, qui durante Patavinorum studiorum interstitutione Mutinæ agens, amplissimæ huic matronæ operam suam, ut quondam consueverat, in hac quoque ægritudine præstitit. Applicita sunt statim, gravi hoc ingruente symptomate, ex eorum-

dem curantium medicorum præscripto vesicantia, aliaque peculiaria remedia; jam enim universalia præcesserant. Tandem advocor et ego tempore, quo sopor nonnihil incipiebat unà cum accessione remitti; ipsa namque patiens paulò post me nosciens est allocuta. Statim corticem validè administrandum propono ad impediendum paroxysmum correspondentem. Annuit meis motus rationibus, meisque, si fas sit dicere, sibi sat notis experimentis *D. Ramazzinus* in curatione præcipuus (quidquid olim minùs favorabiliter in suis *constitutionibus epidemicis Mutinensibus* scripserit ille de cortice in hisce præsertim circumstantiis, aliud scilicèt sentiens antè annum 1695. et aliud post) cunctante tamen, nec nisi præ auctoritate ipsius *D. Ramazzini*, pluribus nominibus sibi æstimabili, consentiente altero medico; quamobrèm parata est illicò *semuncia* Chinæ Chinæ è vestigio potanda, saltèm pro medietate; sed inculcante rursùs eodem juniore medico adesse tempus commodum pro expectandâ majori remissione, prima oblatio quæ à me illicò proponebatur, seriùs (me quoque officiosè consentiente) protracta est. Sumsit itaque nobilissima ægrotans tantummodò *drach. j. ss.* circitèr pulveris uno haustu circà noctem. Manè diluculò alia similis saltèm dosis debebat exhiberi, et repeti post aliquod breve temporis intervallum, prout fert methodus mea; sed quia constantèr asseverabat antedictus junior, qui permanentiùs adstabat, accessionem illius diei conuevisse esse parvi ponderis, quod tamen non faciliè

admittebant domestici, nec proinde opus esse tam festinâ corticis oblatione, nescio an ipsius, an assidentium deliberatione loco Chinæ Chinæ cibus fuit exhibitus. Cùmque paulò post ipse supervenissem, sub fiduciâ rerum mihi narratarum (maximè cùm statim à cibo remedium opportunè ampliùs exhiberi non posset) circa meridiem tantùm illud propinari posse censui. Ast inopinatò ante tale tempus nova accessio, quæ debuerat esse minor ex relatu, violentè ægram corripuit cum tantâ mentis hebetudine, ut Chinam Chinam oblatam non valuerit assumere, actum deglutitionis edere nescia; illam enim, postquàm ore diutiùs agitaverat, deglutire credens, expuebat, nec indè potuit ullo modo eam per œsophagum dimittere, sed facta omninò lethargica, manè sequenti obiit, annum implens ætatis suæ LIII. Fortè tamen, ne dicam certò, non obiisset, si primo haustu *quatuor*, vel *sex drachmas* pulveris, ut faciliè poterat, assumpsisset.

Tertio D. Candrinus Medicus, qui post receptam methodum meam (recepit autem statim ac vidit) plures eâ mediante perfecerat curationes eximias, in ultimâ ægritudine suâ, cui medebatur, me per accidens absente, *D. Davinius*, paulòque post simultaneo officio medebar paritèr superveniens et ipse, sæpiùs mihi inculcabat, ut memor essem de propinando cortice more meo quotiescumquè se offerret occasio; noscebat enim febrem continuam cum exacerbationibus obscuris et irregularibus, qualis erat ea, quâ detinebatur, corticem nondùm planè admittere.

admittere. Levis aliqua remissio circa decimam-quartam diem, et sudores indè erumpentes cum facili tolerantiâ bonum omen tractu temporis videbantur spondere : adeòque etiamsi aliquis fortè tunc locus esse posset usui corticis, non tamen opportunus admodùm, necessariusque videbatur. Interim transactâ die xxi. labuntur vires. Circà xxiv. morbus in pejus ruit, *D. Davinio* plura incassùm meditante et agente, mihiq̃ue post duorum dierum absentiam in urbem recentèr redeunti proponente, antequàm ægrum inviserem, an novam venæ sectionem, an potiùs corticis usum seligerem in hoc casu, in quo nonnisi censuram prævidebat ex utroque remedio, quodcumque eorum inutilitèr administraretur. Rectà ideò conferimur ad invisendum ægrum, ut alterutrum seligamus; sed eum jam properantem ad interitum, cum gravi anhelitu et pulsu deficiente reperimus. Et quoniam nullus phlebotomiæ, vel ulli remedio, virium robur exigenti, locus erat, corticem potiùs tentari posse credidimus, licèt probabilitèr sine fructu, ut pleno palàm ore protestati sumus. Assumptis ergò priùs Ecclesiæ sacramentis, meliore quo potuit modo, levem corticis portionem potavit; sed crescente jugitèr gravi anhelitu, et pulsu ruente, impotens factus est ullam ampliùs portionem assumere : immò, etiamsi potuisset, abstinendum præcepimus ab ulteriore oblatione in statu jam evidentèr lethali, quo in sequens tantùm mane protracto, intrâ diem xxvii. expiravit, et intrâ annum ævi sui LI.

Quarto tandem vir patricius *D. Joseph Gallianus de Coccapanis* annum agens 64. quem quondam laborantem tertianâ perniciosâ cholericâ sanaverat cortex, ut suo loco dicemus, æstate anni 1708. post superatam in principio veris gravem ægritudinem tertianâ simplici corripitur, cujus prior accessus accidentalis creditur ab ægrotante, atque à crudâ repletionem pendens ob vomitum adjunctum materiæ inconcoctæ. Accitus ego secundâ morbi die, infebriçantem omninò deprehendi, et in omnibus vegetum, tertianam nihilominus febrem sequenti die se prodituram, eidem pronuncians. Tertiâ die manè illudit ille mihi de inani prognostico; adeò sibi fidebat, nil incommodi percipiens. Redit tamen post meridiem accessio comitata dolore stomachi satis sensibili, et vomitu laborioso, quæ duo symptomata illi semper fuere in febribus omnibus familiaria. Duravit per quatuor horas vexatio, quæ, me vesperi accedente, blandaque remedia præscribente evanescebat. Mane sequenti potat oleum amygdalarum dulcium, quo materia biliosa placidè per alvum educitur. Optimè tolerat, totâque die immunis à febre amicos admittit, et cum iisdem amœnè confabulatur. Alterâ die, quæ erat morbi quinta, assumit bolum confectum ex crystallo mont. præp., conf. de hyacintho, ac tantillo theriaces recentis, et tranquillè se habet totum mane. Accedo horâ suspectâ, quæ erat tertia pomeridiana, et invenio illum recentè expergefactum à somno cum vi et impetu, ratione insomnia cuiusdam, in quo sibi visus est ex-

pellere Diabolum sub aspectu mulieris ad se accedentem. Narrat somnium istud, aliudque insuper planè festivum; de utroque ridet, et interim præterlabitur hora tertiæ accessionis. Moror adhuc ibi per aliquod tempus, dumque discessum meditor, inquit ille: *modò non admodùm benè me habeo*. Hoc dicto, statim turbatur pulsus, insurgitque angor stomachi et proclivitas in vomitum. Præscribo jusculum tenue, identidem potandum ad demulcendam humoris acrimoniam, misturam anodynam ex absorbentibus, incrassantibus et cardiacis, cochleatim sumendam, lotus externos, aliaque hujusmodi, et ab eo quò me trahit statutâ horâ consultatio quædam gravis. Post horas quinque circitè redeo (versabamur autem circa secundam noctis horam) et ab assistentibus, priusquàm ægrum invisam, intelligo, immanem fuisse irritis auxiliis omnibus illius accessionis cardialgiam, adeò ut æger vix loqui valeret interciso sermone, et irrequietus huc illuc assiduè jactaretur. Intrà memetipsum statim cogitavi de cortice propinando, metuens exitium in quarto accessu, sed ægrum subindè inspiciens, inveniensque in eo statu, ut potius metuendum esset de morte in illâ eadem accessione, quàm in alterâ, mutato consilio abstinui, alia tantùm cardiaca remedia substituens: factoque interim funesto prognostico, et præscriptis Ecclesiæ sacramentis, discessi subdens, quòd si fortè accessio illa perveniret ad declinationem, itaut spes esset vitam posse protrahi in alterum accessum, manè corticem exhibe-

rem. Manè igitur quamdam sensuum promptitudinem, quam etiam maximam habuit in assumendis sacramentis, observans, etsi febris adhuc vigeret, et protraheretur potius intensa quam ad remissionem vergeret, cæteraque omnia mortem proximam minarentur, unum haustum corticis satis moderatum (hærebam enim non parum) exhibui, post tres dein horas alterum oblaturus. Sed accedens rursus, ut hunc exhiberem, novi ægrum semper in deterius labi, nec illam accessionem, quippè nondum declinantem, prætergressurum esse; ideòque ab ulteriori corticis oblatione supersedi, illum pro deplorato omninò reputans, ut nimium circa secundam noctis horam confirmavit eventus. Atque ita periit amicus, qui fortè non periisset vel saltèm non periisset tunc, si illi post secundum statim paroxysmum integram corticis dosim propinàssem. Sed quis quantumvis oculatus tam præceps exitium in tantâ tranquillitate prænovisset?

Hæc sunt de quibus medicos moneo in curatione perniciosarum, indigus præ aliis, ut admonear ipse, esto quòd mea nonnunquam præsagia fortunet eventus; quo demùm capti popellus atque plebecula

Me quoque dicunt

Vatem..... sed non ego credulus illis
ab inopinato identidem successu doctus oppositum. Mihi tamen in casu tam repentino, et minimè præmonstrato (præmonstraverat tamen aliquid accessio secunda, licèt tam præceps non indicavit exitium) mihi, inquam, in hoc casu nulla per urbem objecta

est omissio, quæ verè à nemine mihi poterat obijci nisi à me ipso, ut qui forsàn in personâ minùs splendidâ statim corticem obtulissem, fortè tamen etiam non. Sed si obtulissem in hac post secundum tantùm paroxysmum, qui fuit primus quem inspexerim, pluresque postea, ut suspicari fas est, contigissent recidivæ, vel si in earum aliquâ obiisset æger, quid quæso dictum foret de cortice, quid dictum, immò quid non dictum de me? Evitavi tamen censuram, quia obiit vulgari curâtus methodo; non evitâssem, si curâssem feliciter cortice. Utinàm ità egissem tunc, ut modò censuram paterer. Videant ergò, quàm crassè hallucinentur ii qui censent (si qui sunt qui censeant) in enarratis casibus propinatum fuisse toto cōnatu corticem, eùm verè propinatus non fuerit, vel saltèm pro non propinato habendus sit; cujus rei veritatem ac seriem assidentes, et consanguinei defunctorum possunt testari. Quia verò ingenuitati meæ vel publicæ fidei nunquàm deero, fateor (quod latet obtrectatores corticis) in nonnullis casibus præter recensitos fuisse à me exhibitum corticem, et nihilominùs ægrotantes illos æquè obiisse, ac obiissent eo non assumpto: adeòque minimè inficior illum aliquandò, rarò licèt, inutilem esse, ut sæpiùs sunt quævis remedia, sed absolutè nego esse noxium, præsertim si methodicè adhibeatur.

I. Ità contigit, ne quicquam reticeam, alteri viro patricio *D. Antonio de Quatrinis*, cui medebar ego adjuncto mihi in societate *D. Davinio*. Illi itaque

pendente cursu simplicis tertianæ addita est dysenteria ferox et essentialis, quæ tunc ferè epidemicè vagabatur per urbem. Utròque æger vexatus morbo, brevì frigidus factus est, singultuosus, et ferè sine pulsu. *D. Davinius* tunc me sciscitatur cur corticem non proponam, ut mihi mos est in tali angustiâ. Respondeo, dysenteriam esse essentialem, nec sequi motum febris, adeòque illam cortici febres cum suis tantùm symptomatis tollenti non simul cessuram. Desperatis tamen rebus tentandum censuimus. Itaque oblato validè remedio, nulla ampliùs observatur febrilis recrudescencia horis periodicis, sed perseverante pertinacitèr dysenteriâ cum indiciis sphacelatæ partis, intrâ paucos dies æger vitâ fungitur. Fortè in hoc casu majorem quàm China China contulisset opem ipecacuanha tempestivè oblata, et si præstò fuisset, etsi nec æquè certum, nec forsàn semper æquè tutum, innocensve remedium sit ipecacuanha in lineâ antidysentericorum, ac China China in lineâ alexipyretorum.

II. *P. Felix de Tagliazucchis* ex ordine fratrum Minimorum S. Francisci de Paulâ, quem curabat *D. Riccius*, in quodam tertianæ, non sum memor an simplicis an duplicis, paroxysmo, sudoribus diaphoreticis frigidissimis abundè diffluens cum totali asphyxiâ, sensibus licèt vegetus, jam moriebatur. Absente ab urbe curante medico advocor ipse, ut quĩ tunc felicissimam curationem in illâ viciniâ absolveram in casu valdè consimili. Anceps ego

an suffecturus sit æger usquè ad declinationem accessionis, quippè inscius de morbi cursu et de rebus gestis, ut nihilominùs amicorum adstantium petitionibus morem geram, præmisso priùs prognostico de infausto exitu, adducor, ut corticem ad *unc. ss.* ni fallor, statim præscribam, sed incassum, nam perseverantibus iisdem sudoribus intrà illam eandem accessionem post paucas horas è viventium numero deletus est.

III. *D. Francisco de Favalottis* quem *D. Davinius* curabat, detento duplici tertianâ ob gravissimum comatosum affectum perniciosâ, corticem more meo propinandum esse, consultus credidi; erat enim meo iudicio morbus eo remedio sanabilis, et opportunum tempus oblationis illius. Sed nescio quo fato, quâve infaustâ pharmacopolæ aut assidentium diligentîâ, illi percolata tantum infusio, seu potius decoctio *unciæ unius* Chinæ Chinæ exhibetur per statuta intervalla loco ejusdem Chinæ Chinæ in substantiâ, liquori, ut proposueram, conjungendæ. In hoc æquivoco moramur per duos fermè dies, dùmque aliam pyxidem sîmilem paratam video, eidem semper innixus credulitati indico, satiùs esse pro tunc sufficientem jam assumpti remedii reputans quantitatem pro impediendâ accessione proximè futurâ. Redit tamen illa eodem forti lethargicoque comitata symptomate. Miror novitatem rei, et meliùs inspectâ pyxide, errorem deprehendo. Cogitavi statim de præscribendo validius remedio (non enim tunc cum collegâ curante

illuc conveneram) sed renui facere solus, et tantummodò superaccitus, nec mihi metipsi amplius satis fidens in eo rerum statu. Interim æger fit summè lethargicus, et deglutiendi nescius. Die sequenti habitus est pro expirante; aliquot nihilominus tenues cyathos illius percolatæ decoctionis cochleatim hausit, vitamque præter multorum expectationem ad tres vel quatuor dies, frigidus et sine pulsu, simulque sine exacerbatione protraxit, donec pari passu deficiens tandem expirârit, qui forsàn remedio nervosius oblato sanari potuisset.

IV. *D. Ludovicus Cæsar de Carandinis* valetudinarius perpetuò, et in tabem pronus, diuturnâ quartanâ ruri detentus, quæ tractu temporis pertinacem diarrhœam, mox et vomitum cum summâ virium dejectione, et corporis extenuatione secum traxit, urbem transfertur, et *D. Riccio* medico suo ordinario curandus committitur. Invenit is, ut retulit, quartanam non amplius intermittentem, suos tamen circuitus etiamnum manifestè servantem, et comitatam prædictis symptomatis, maximè verò vomitu ferè assiduo. Cùmque accessio quælibet ægrum fatigaret tali proportionem, ut paucis in posterum suffecturus videretur, cogitavit ille de præscribendâ Chinâ Chinâ ad *drach. ij.* more vulgari. Quia tamen continuas introducta, quæ si essentialis fiat, de more lethalis esse consuevit (ut nôrunt practici) rationalem aliquam illi suspicionem incutiebat de infructuosâ oblatione, me idèò in consilium vocavit. Annui ego, atque animum

adjeci, eo quia adhuc manifesta mihi narrabantur signa periodi, inter quæ frigus in accessione invadens, naturamque febris intermittentis etiamnum designans in ipsa accidentali, ut ita dicam, et recenti continuitate. Quoniam verò non longè distabat paroxysmus, hunc prius observari debere censui, antequàm planè statueretur oblatio corticis. Advenit febris quæ ægrum ferè sustulit, remansitque ille cum pulsu vix perceptibili, etiam in majore febris et symptomatum remissione. Tunc statim ad *drach. ij.* præscriptus est cortex, et sequentibus duobus diebus ad *drach. j.* manè et serò; sicque accessio die correspondente non rediit. Continuata est ad aliquot alios dies eadem China China, non quidem ampliùs in substantiâ, quia eam nauseabat æger quomodolibet offerretur, sed in extracto ad *scrup. j.* bis in die. Jamque nullum omninò periodi indicium ampliùs visebatur; sed nihilominus nec resurgebat pulsus, nec tollebatur lenta febricula, nec removebantur licet paululùm remitterentur symptomata. Interim æger languidior fiebat, tandemque diarrhœa sensim colliquante, vomituque vix cibum admittente, statimque rejecto confectus expirabat. In hoc casu, quin vitium aliquod grave latuerit in partibus solidis, nempe in visceribus, minimè dubito; præstitit tamen cortex quod potuit, et vitam, ut reor, ad aliquot dies protraxit.

V. Alium casum addam de pictore quodam, nomine *Dominico de Villanis* à *D. Candrino* curato,

qui cum quartanâ longissimâ hydropem simul confirmatum patiebatur. Venter illi immanitè turgebat; sonabat percussus, et repercutiebatur aquâ. Facies similiter turgebat, et intrâ palpebras inflatas, ac diaphanas adeò condebantur, ut vix apparerent oculi. Pedes æquè insignitè intumescebant; brachia verò, tibiæ, et crura summè gracilia extenuataque apparebant. Sed mirum! ipse marasmus erat tumor; casu namque compressæ digito partes istæ foveam profundam nil tale cogitanti exhibuerunt; quarè subducto calculo nonnisi ossa, et pellis arida, sero subcutaneo flaccidè turgida, tactui se offerebant. Erat insuper totus ad sensum frigidus, identidem siugultuosus cum pulsu summoperè exili, et ægrè cibum capiebat. Solùm mente constabat, languidè loquebatur, et noscebat se paulatim mori. Ad hæc paroxysmum quartanæ suæ periodicè patiebatur, quo durante semper profundè somnolentus jacebat, ut mortuus videretur, donec declinante paroxysmo aliquantulum, semper tamen imperfectiùs revivisceret. In consilium vocatus, immò expressè accitus, ut tantùm inspicerem, non ut curarem, renuebam ipse quidquam proponere homini chronicis jam morbis insanabilibus fermè confecto, ætatemque insuper sexagenariam agente; sed ab amicis illius, atque domesticis postmodum rogatus, ut quidquid etiam inutiliter tentari posset, vellem tentare, et curanti medico promptè cuncta executuro indicare, ausus sum corticem proponere. Uno verbo, cortex oblatus est, et repetitus pluries

suis temporibus, statimque sublata est periodus, et comatosa affectio conjuncta. In eum deindè statum devenit, ut per mensem jusculum viperinum, aliaque remedia reliquas affectiones respicientia potuerit assumere, corticis quoque usum imminutâ et continuatâ dosi per intervalla repetens. Usquè tamen durabat hydrops cum extremitatibus maximè excarnibus, et nihilominùs maximè tumidis. Revixit singultus summumque simul cibi fastidium, sensimque æger post tres circitèr, ni fallor, menses ab oblato cortice (quos omnes dubio procul ope corticis vixit) decessit è vivis. Atque hanc historiam, quam jure merito inter triumphos corticis numerare possem, quia mortem ægrotantis inevitabilem, et imminentem longè seriùs, quàm par erat, protraxit, inter eventus nihilominùs infaustos lubet collocare.

VI. Obiit quoque *D. Flaminia de Ingonis* matrona spectabilis, de cujus ægritudine vix, quantum sat est, sum memor; memini tamen quæ præcipua sunt. Ab initio tertianâ simplici laboravit ex gravi animi pathemate, et faciliè remediis ordinariis liberata est. Recidit illa, atque iterùm similiter sanata. Recruduit denuò morbus, febrisque non intermittens, ut antea, sed continua apparuit cum periodicis obscurissimis exacerbationibus. Ingravescente morbo *D. Davinius* fit mihi curationis socius. Administrantur quæ sunt ex arte, sed irritò semper successu. Tandem erumpunt duæ parotides, unaque earum satis insignis. Evanescit tamen utraque

citrà suppurationem, ac subindè paulò manifestiores videntur fieri exacerbationes, et remissiones febris; verùm in ipsis exacerbationibus gravis sopor se prodit cum summo virium languore, pulsuque minimè consistente. Re in pejus ruente, ambo cupidi prohibendi exacerbationes febriles, soporosi symptomatis mortem portendentis productrices, decernimus de tentando usu corticis. Auctor sum ipse, consentit collega. Primâ vice assumit illa, sed difficulter, profundo quippè sopore oppressa: quâ de causâ potis non est remedium repetere, sicque incepto inauspicatò opere, dein imperfecto remanente, ægra paulò post lethargica prorsùs è vivis sublata est.

VII. VIII. Decessère deniquè mihi, absque eo quòd historias per extensum referam, nil proficiente usu corticis etiam tempestivè administrati, duo religiosi viri ex Carmelitarum excalceatorum familiâ, quorum unus septuagenarius, debilis, et valetudinarius erat, obiitque correptus tertianâ duplici perniciosâ et exitiali factâ, ob continuitatem et acutiem irritò cortice progredientem. Alter verò juvenis erat, qui à febre primùm acutâ et continuâ proportionatâ, mox et ab intermittente, inquam recidit, fuerat sanatus, et quidem semper sine cortice. Recidit ille tertio, febriculas iterùm intermittentes longiusculas passus, et cortice levitèr per modum alterantis assumpto, denuò sanatus est. Recidit quartâ vice, et quia febres videntur ad acutiem vergere cum tendentiâ ad soporem, præ-

missis ex arte in tali casu præmittendis, offertur iterùm cortex validiusculè in formam opiatae; sed incassum. Omittitur idcirco illius usus nondum planè completus, aliaque remedia volatili et dissolvente virtute prædita substituuntur, sed frustrà: juvenis namque cum pulsu raro, et quodammodò, ut videbatur, laudabili, profundum in soporem labitur, vix potis cibum capere; tandemque singultuosus, et anhelosus cum pulsu minuto et celeri, Deo suo piam animam reddit.

Sunt hi fidelitèr casus omnes ægrotantium tractu annorum fermè XL. defunctorum, quorum sim memor; eorum videlicèt, quibus cortex incassum à me propinatus fuerit in febribus perniciosis antea descriptis, quas cæteroquì idem cortex eadem methodo, sed opportuniori tempore, et in circumstantiis magis propitiis administratus curare potuisset. Nonnullos equidem alios præter hos paucosque casus, in quibus irritò paritèr successu oblatum est remedium istud, referam *lib. v.* Ast id contigit in febribus tantum quibusdam essentialitèr continuis, vixque paululùm, ac ne vix quidem remittentibus, pro quarum medelâ cum suapte naturâ anceps sit actio et effectus corticis, ipsa quæ subsecuta quandoquè est, carentia successus, nobis eo loco supeditabit fundamentum suspicandi de ipsius inefficiâ in febribus illiusmodi, in quibus ideò nonnisi certâ quâdam adhibitâ distinctione ut verè proficius admittetur. Sed hæc hujusce loci non sunt.

Ut verò ad recensitos nuperrimè casus, in quibus

inanitèr ministratus est cortex, fugaci saltèm intuitu convertamur, statim animadvertere est eundem corticem prioribus quatuor ægrotis propriè non fuisse propinatum, vel saltèm nostrâ non servatâ, aut non completâ, methodo. Iis etenim serè contigit, quod contigit (ne vel minimum quidquam supprimam) patricio viro, serenissimæ ducalis, cameræ generalis procuratori, *D. Gaspari de Quattrofratris*, qui anno 1697, ex tertianâ perniciosâ diaphoreticâ irritis omnibus curantis medici conatibus jam planè confectus, Chinam Chinam potare cœpit quatuor circitèr antè obitum horis, unoque tantùm, vel altero assumpto haustu spiritum edidit, remanente domi remedio, pauperi cuiquam leviùs febricitanti dispensando. Idem etiam contigit, et quidem patientiùs, uni ex ejusdem nepotibus, qui vix unicâ antè obitum horâ, dùm scilicèt illi suffocans stertor jam in bronchiis inflammatorum pulmonum obstreperet (occumbebat enim peripneumonicus) tam enixè Chinam Chinam expetiit, eamque sibi denegari tam ægrè tulit, ut ad solamen morientis liquorem aliquem amaricantem sub specie Chinæ Chinæ eidem offerre decretum fuerit. Cùm verò casu præstò esset ibi ipsum remedium, paucula statim illius portio exhibita est, quam summis vix attigit labiis, cùmque id abundè sufficere, præsens ipse subjunxerim, substitit ille; et sic expletâ imaginatione suâ post horam circitèr expiravit.

Hujusmodi ergò, atque similibus ægrotantibus nemo profectò jure dixerit, oblatum fuisse corti-

rem. Aliis autem pluribus ex iis, quos recensui, licet verè oblatum fuerit, id tamen actum fuit desperatis jam æquè rebus, morte quamvis paulò plùs distante, tentandi scilicet solùm vel indulgendi causâ, paucisque tantùm, ut ex relatu patet, fuit oblatum in circumstantiis, quæ valeant ostendere (quod à me non negatur perpetuò) invalidum nonnunquàm, incertumve in difficillimis quibusdam casibus esse posse robur remedii, cæteroquì saluberrimi et admirabilis, cui par non est, nec unquàm fuit in lineâ alexipyretorum. Ex opposito namque plùs centum illustres historias hominum ab imminente morte servatorum possem adducere, quarum non paucas sequenti potissimùm libro sum allaturus: relictâ unicuique qui sibi os strenuè perfricuerit, libertate blaterandi, me donâsse nomine non potentium servari, quotquot China China necavit; nomine verò sanatorum, quotquot ea nequivit occidere.

Quòd si aliquibus cortice perperàm vel languidiusculè, dosique irregulari, aut priusquàm plusquàmve deceat imminutâ utentibus vel præscribentibus ubi non conveniat, ut in febribus essentialitèr continuis, et in extremo earum periculo, ille non videatur proficere, non id in medicaminis vel methodi meæ vitium vertant, sed in culpam methodi suæ, si quam habent, aut habere credunt; si enim huic (quam protuli in eum finem, ut qui eam non satis callent, callere possint) fidem velint adhibere, eamque integrè non renuant amplecti,

feliciores procul dubio posthàc curationes absolvent.

Sed eheu! nimium fortassis methodum hanc amplectentur nonnulli, et indiscriminatim in usum ducent, nimiumque forsitan intemperanter tractu temporis illam medicis suggerent importunæ mulierculæ, adeoque in abusum et tandem in contemptum, culpâ scilicet utentium promiscuè et sine delectu, cadet remedium eximium, fietque tandem de cortice quod jam perperam factum est ac quotidie fit de cardiacis et bezoarticis. Neque enim legitime mortuus vulgò crederetur homo, cui non sit propè mortem oblatus cortex, quæcumque sit febris, aut quæcumque affectio quæ illum jugulet, quemadmodum legitime mortuus vulgò non creditur, qui ventre pretiosis lapidibus, eorumve confectionibus turgido lethem non tranat. Cùmque hoc pacto remedium alioqui saluberrimum sæpissimè inutilitèr exhibitum fuerit, ac indè fundamentum aliquod acquisierit obtrectatorum dicacitas, à communi etiam saniorum æstimatione fortassè decidet, ac in legitimis quoque casibus, in quibus verè proficeret, rejicietur. Verùm quid angor sollicitus de futuro, cùm satis prostet undè conquerar de præsentì? Sat sit huic occurrere;

..... *maneant seras ea cura nepotes.*

CAPUT VI.

Historia peculiaris, quæ primam occasionem inventioni methodi traditæ auspiciatissimè præbuit.

PRÆMISSIS casibus omnibus quos mihi memoria suggessit infaustum eventum sortitis, licèt semper sine crimine corticis, et sæpiùs etiam sine assumptione illius, saltèm ad leges methodi expositæ, jam tempus est, ut plurimum inter quamplurimos faustorum, et, si fas sit dicere, admirabilium, seriem subnectam. Priusquàm tamen illos certo ordine ad peculiaria redigam capita libro sequenti, unum à cæteris lubet secernere, et seorsim exponere, quippè qui huic methodo primam dedit originem, mox incrementum et famam. Fuit autem hujusmodi.

Vir generosus *D. Comes Bailardinus Nogarola*, tunc præfectus Aulæ serenissimi Ducis nostri, annum agens LIII., sanguineo temperamento habituque corporis carnosio præditus, et podagricis insultibus, fluxuique sanguinis hæmorrhoidalis periodicè obnoxius, sub finem mensis augusti 1695. fluente adhuc, nec diminuto quidem hæmorrhoidali stillicidio, corripitur febre quartanâ simplici intermittente. Accitus ego, inveniensque, *malum benè compositum*, sanguinisque excretionem modum naturæ servantem, nil insignitè agendum, vel movendum duxi: quaproptèr, præscriptâ tantummodò victûs ratione, juscule matutino paucis

herbis alterato, nec non emulsione sem. melon. cum tantillo pul. cornu cervi in vigore accessionis potandâ, clysteribusque blandis ad alvum lubricam servandam identidem injiciendis, suasor fui ut febrē, suapte naturâ, eâque præsertim tempestate diuturnam futuram, æquo ferret animo absque majore remediorum apparatu, dummodò intrâ consuetos limites illa subsisteret; me postea paratum offerens ad eam Peruviano cortice fugandam, postquam cursum suum nonnihil exegisset, et postquam ego æquinocitii non longè distantis phænomena observâsem, ne scilicet ea diutiùs in autumnum protracta auctaque insimul, quæ jam supervenerat, lenis obstructione, radices ageret non faciliè per totam hyemem extirpandas.

Transactis sex circuitibus, die 18. septembris (erat autem dies septimam periodum immediate antecedens) febris extrâ ordinem ægrum invadit, repetitque die 19. ut consueverat. Mane sequentis diei, nempe die mensis xx. cum protraherentur nonnihil reliquæ antecedentis accessionis, et sanguinis hæmorrhoidalis fluxus esset notabiliter imminutus, ac insuper ægrotans assereret, se persentiscere remota quædam indicia, vi quorum horis pomeridianis novam accessionem præstolabatur, statim præmisso clystere ex lacte et saccharo, venam brachii secari jussi, et sanguinem detrahi ad *uncias decem*. Post meridiem circa horam xx. rediit accessio, ut sibi prænunciaverat æger, atque eundem servavit motum diebus pariter XXI et XXII.

subsequentibus ut de triplici quartanâ nulla posset esse dubitatio. Quia tamen nativam ea servabat intermissionem, esto quod paroxysmi majorem extensionem cum aliquâ postpositione acquirerent, ideo iisdem remediis inhæsi, addendo tantummodò paululùm salis prunellæ jusculo matutino, propter aliquam subortam urinarum imminutionem, ut nempè blandioribus istis remediis hostem demulcere datum esset, abstinendo à fortioribus illum exasperare aptis, donec saltèm æquinoctialis anomalïæ præterlaberetur influxus.

Die mensis XXIII., quæ sexta erat à triplicatione quartanæ, *D. Davinio* urbana fortè quædam officia ægrotanti præstante, occasionem arripui illum mihi adjungendi socium in curatione. Habitâ consultatione, statuitur methodus ferè eadem ac antea, febrisque circa horam XXII. suum renovat accessum sub oculis medicorum consuetum, minore tamen cum frigore invadens. In hoc paroxysmo, scilicèt in vigore ipsius (ut manè retulit uxor vigilantissima) æger passus est levem aliquam oblocutionem, quod symptoma in nullo alio unquàm morbo toto vitæ suæ tempore passus fuerat, ut et notabilem quemdam capitis et membrorum tremorem cum aliquâ etiam rerum ab ipso paulò antè expetitarum oblivione. Symptoma istud magnum mihi timorem incussit; quare iterùm convocato collegâ, nova inita est consultatio, novaque sunt præscripta remedia, aliaque proposita vicissim et vicissim rejecta, ut in opinabilibus mos est.

His non obstantibus die XXIV. vespere circà horam 24. rediit accessio, in quâ nullum quidem subdelirium observatum est, sed loco illius altus sopor, à quo difficultè admodùm excutebatur vocatus æger, atque concussus. Obliviscebatur bibere et mingere, postquàm scyphum, et matulam postulâset; immò utrumque vas facilè illi manibus excidebat, postquàmprehendisset.

Die XXV. confessus est peccata sua, et post meridiem, longè etiam antè accessionem (erat enim dies quartanæ primariæ juxtà vetus morbi stadium) adaucti sunt notabiliter motus tremuli membrorum, ipsi ægrotanti sensibiles, quin et illis socium se adjunxit singultus; quæ symptomata ansam dedere disquirendi, an vesicantia aut emplastrum sinapismum apponi possent partibus arthritidi obnoxiiis; factoque rei examine, statuta fuit sinapismi emplastris appositio, et vespere in usum deducta. Ingruente postmodùm circà tertiam noctis horam paroxysmo cum frigore semper minore (usquè tamen sensibili) in profundum adeò soporem demersus est æger, ut quibusvis planè functionibus edendis impar esset, perinde ac si fuisset cadaver; nec nullâ quâlibet dolorificâ artis industriâ excuti potuit per multas horas. Non loquebatur, non movebatur, nec oculos aperiebat; sed tantummodò involuntariè mingebat, nil tale sentiens. In hoc statu permansit ad plures et plures horas, tandemque ligaturis et frictionibus summè dolorificis, cucurbitulis tractis et evulsis, vesicantibus statim incunctanter apposis,

spirituque salis ammoniaci naribus admoto, et sale volatili cornu cervi in os intruso, Deo dante, in eum statum sensim devenit (appropinquante scilicet jam febris declinatione) ut propè auroram venerabile Eucharistiæ sacramentum voluerit assumere.

Mane verò jam facto, die nempè mensis xxvi., cùm conspicua nonnihil esset remissio febris atque symptomatum (omnia tamen, etsi paululùm remissiora usquè perseverabant, sopor videlicet gravis, singultus, et febris ipsa quæ jam de intermittente, continua facta per paroxysmos se mutuò excipientes ad continuam essentialitèr celerrimè properabat) cùm, inquam, nonnihil conspicua esset ejusdem febris symptomatumque remissio, statuta est nova sanguinis missio sat liberalis, videlicet ad libram, partitis tamen vicibus; quâ celebratâ, et ab ægro benè toleratâ, supervenit jussu serenissimi Ducis (cui summoperè cordi erat viri tam egregii vita) Bononiâ accitus clarissimus, et in patrio Archilycæo professor quondam eximius *D. Jo. Galeatius Manzius*. Is intellectâ facti serie, et approbatâ methodo in usum ductâ, saltèm insuper viperæ, spiritumque fuliginis, et similia remedia proposuit ad precautionem præcipuè, et sublationem soporosi symptomatis. Sed et hæc, ut et alia præmissia incassum usurpata fuère; siquidem paulò post, videlicet longè priùs, et longè magis ac consuevisset antea, cœpit gravari caput, obmutescere nempè ægrotante, qui paulò antè haud difficultèr loquebatur, et in profun-

dum assiduumque soporem jamjam labente, nullumque motum edente, exceptâ eâ violentâ universi corporis concussione, quam identidem suscitabat, absque eo quòd illum à somno excuteret, importunus frequensque singultus. Sic perseveravit usquè ad horem 23., quo tempore cùm nonnihil magis frigeri visus esset, de invasione novæ accessionis incidit suspicio, præscriptumque fuit spe ferè nullâ, cochlear julapii gemmati cum pauxillo lapidis bezoartici, exhibendum tantummodò circà v. noctis horam, sequidem æger quidquam deglutire valuisset. Reverà tamen non 23. horâ diei, ut creditum est, sed solùm circà quartam noctis advenit accessio; id præmonstrante non tantùm levi extremorum perfrigeratione, verùm et aliquâ pulsûs concentratione, majoreque symptomatum omnium, et præcipuè soporis atque singultûs intensione. Tunc sanè talia fuère tam gravia tamque funesta cuncta accidentia, tantaque et tam patentia proximæ mortis signa, ut Parochus sacramentum extremæ unctionis illi ministrans anxie festinaverit pro complendâ functione, metuens scilicèt ne expiraret æger priusquàm ille sacrum opus absolveret. Remansit itaque patiens usquè ultrà nonam noctis horam quasi in vero mortis agone, quo postmodùm tempore perexigua quædam dare cœpit motûs et sensûs specimina, ac proindè in sequens mane vitam adhuc, ægrè licèt, protraxit.

Itaque mane diei XXVII. circà horam 14. à nobis inspectus, vix capax inventus est degultiendi plu-

rimâ quoque adhibitâ industriâ cochlear illud julapii gemmati, quod assumpsisse debuerat nocte præcedente, si potis fuisset. Quapropter consideratâ proportionē quâ celeritèr atque vehementèr augebatur febris, et cum febre lethargus, motus convulsivi et singultus; itèr clarè inspiciendo hæc omnia jam ad novum incrementum non longè disponi (quod satis præmonstrabant singultus frequentior, subsultus membrorum crebriores et nictatio assidua, involuntataria ac pertinax, cum intermixto narium stertore) unanimi omnium nostrum voto sancitum est nil ampliùs superesse spei, futuramque accessionem, quâcumque horâ invaluisset, fore ultimam vitæ, etsi juxtâ calculum quartanæ simplicis accessio hæc non incideret in diem majoris afflictionis, sed in antecedentem, hoc est in correspondentem diei primæ metamorphoseos. Etenim absque ullo dierum calculo reverà impossibile videatur posse ægotantem ab imminente accessione evadere, etiam ut mortem tantum differret in subsequentem; maximè cum adeò invalescerent quotidie paroxysmi eorumque symptomata, ut nulla ampliùs observaretur in illis quartanaria proportio, nec ampliùs distingui posset accessio gravior, nisi inquantum semper gravior erat novissima. Commissâ ergò tantummodò assidentibus curâ ægrum cochleatim per jacula refocillandi, si fuerit opportunitas, discedebamus concordēs in funesto prognostico, quin et in horâ circâ circûm futuri interitûs; quæ hora cum ad summum circâ ad mediam noctem desig-

naretur, imò cùm eam *D. Manzius* propiorem adhuc metueret, institit ille deferri statim serenissimo Duci ferale præsagium, sibi que Mutinæ (ut ajebat) inutili quamprimùm parari quadrigam, quâ vectus posset eâdem die Bononiæ restitui. Fuit autem ille de instante certâque morte ægrotantis adeò persuasus, ut, cùm in medio itinere à quodam Equite sibi obvio interrogaretur de statu *D. Co. Nogarolæ*, absque ullâ hæsitatione responderit (etsi conscius mei tentaminis, quod mox subdam) eum jam probabiliter mortuum esse, vel, sequidem adhuc viveret eo momento, tandiù non esse victurum, ut ille Mutinam petens vivum ampliùs posset invenire.

Interim dùm quadrigam præstolaremur simulque ubi conveneramus moraremur paulispèr, *D. Manzio* discessuro urbanitatis officia præstituri *D. Davinius* et ego; ego, inquam (quem præ familiaritate mutuoque amore summè pigebat tantum virum, et amicissimum perire) plurima volutabam mente, plurima meditabar pro eo salvando, quem febris à primordio quartana jamjam jugulabat, et quem dosis duarum drachmarum Peruviani corticis antè paucos dies oblata, ut tunc in usu erat, à tali excidio citrà dubitationem præservâset. Præ cæteris autem meæ menti obversabatur casus *D. Octavii Maselli lib. I. cap. X. hist. 18.* recensitus, dicebamque intrà me: quantumvis lethalis et esse videatur, et reapsè sit status istius ægrotantis, certè vel viveret, ut vixit *Masellus* (etsi tunc minùs graviter affectus, sed in hunc eundem statum tendens) vel,

inquam, viveret, vel saltè seriùs occumberet, si posset aut inhiberi omninò, aut enervari imminens paroxysmus; quo enervato, tantillùm temporis lucraremur pro magis semper enervandis, ac paulò post debellandis subsequentibus paroxysmis, ut et symptomatis prababiliter concomitantibus, quemadmodùm videram in præcitato casu antè annos 17. circitè mihi fortè observato.

Pro hoc autem opere perficiendo (me secretò alloquens prosequer) : etiam in casu febris recentem quidem continuitatem adeptæ, quin et acutæ, malignæ, atque exitialis jam factæ, sed nativum adhuc periodi characterem servantis, pro hoc, inquam, opere absolvendo potis esset China China, quantum est ex intrinsecâ virtute illius, ut vidi in recensito casu, si *tempus* sufficiens adesset, requisitumque ad opus hujusmodi, et si in ægro tante adesset *capacitas* ad deglutiendam tantam molem remedii. Quoàd *tempus*, non minùs tunc requiri censebam, aut noveram in quartanis sive simplicibus, sive duplicibus, sive triplicibus, quàm totum intervallum, quod est inter unam et alteram accessionem quartanariâ proportionem sibi respondentem, idemque datâ proportionem credideram de tertianis, sive simplices illæ fuerint, sive duplices, quod perindè putâram, nec malè; sic namque me docuerat experientia, quoties *duas* tantùm *drachmas* corticis uno haustu in principio accessionis obtuleram, quibus correspondentem solùm accessionem, non intermedias, inhiberi observâram. Quoàd

impotentiam verò ægrotantis, hanc evidentèr agnoscebam in difficili oblatione materiæ cujuscumque fluidæ, etiam gustui non ingratae, cochleatim factâ; quid fierit ergò (dicebam contrà paritèr intrà me) si offerrem pulverem copiosum, nauseosum, et ægrè deglutiri aptum in plurimo liquore? primæ antem difficultati occurrebam ipse mihi met subdens: forsitan insignis quædam quantitas corticis celeritèr, si fieri posset, in ventriculum illius intrusa efficeret intrà breve tempus, quod solet efficere intrà longiusculum quantitas modica. Secundæ verò difficultati, quæ auctâ remedii mole simul crescebat, sic reponebam: fortassè si ab insigni, quam meditor, et insolitâ corticis quantitate tantùm tincturæ recentis valido vehiculo extractæ (non quidem nudæ, sed tenuiore insimul, optimèque trituratâ ejusdem substantiâ imprægnatæ) posset educi, quantum posset in paucâ mole æquare virtute *sex* vel *octo drachmas* puri pulveris, fortassis, inquam, et deglutiri intrà breve tempus cochleatim posset, et intrà breve tempus accessionem instantem licèt, saltèm infringere, vitamque pròrogare in crastinam diem. Sed si ab hodiernâ in crastinam, cur non et à crastinâ in alteram, et sic deinceps, continuato congruentèr, magisque postea temperantèr usu remedii?

Statuto intrà me, quoties consensissent collegæ mei, tentamine, statim hæc omnia, qualia cogitâram, combinarâm, et seriatim deduxeram palàm feci, amplâ protestatione præmissâ, me nullâ om-

ninò spe ductum ea proponere, sed tantummodò ne mihi sollicitudo ulla superesset, extincto amico, de non communicato consilio, frustraneo quidem forsitàn ac inutili, sed simul innocuo, quod mihi non ars, quæ ibi locum habere nequibat, sed cæcus quidam, et inutilia quoque tentaturus amor suggesserat. Cùm autem interrogarer à collegis, quo pacto hæc omnia generalia, et dictu speciosa in praxim demùm, usumque peculiarem ducere cogitarem, itèm qualis futura esset hæc tinctura corticis, nùm ab aliis in hisce casibus hæc acta viderim aut legerim, et similia respondebam, me nondùm specialitèr cogitasse de modo tenendo, aliquem tamen mente revolvere, neque idcirco vidisse me, aut legisse exempla hujusmodi, vidisse tamen unum aliquo modo simile, cùm junior essem, in ægroto solâ *drachmarum duarum* corticis oblatione sanato; sed præsentem casum esse longè magis præcipitèr, et planè desperatum, neque me proindè quidquam sperare, sed votum tantùm permissivum exquirere, dummodò id rationale, et tutum in talibus circumstantiis iisdem videretur, et non alitèr. Quotiescumquè enim non solùm pro inutili, verùm et pro temerario, aut damni suspecto ab illis reputaretur tentamen meum, summâ animi tranquillitate, atque internâ quiete abstinere ab eodem eram paratus, ut qui ab infausto qui præ foribus erat eventu, si non calumniam, de-
risionem saltèm me reportaturum noscebam.

Annuit illicò qui primus interpellatur *D. Manzius*,

admisso mecum supposito, quòd verè quævis diligentia inutilis futura esset, invalidumque ac irritum quodlibet, utut conquisitum artis tentamen. Atque hoc seriò tenens, quòd res ipsa clamare videbatur, statim discessit. Annuit paritèr eadem confirmans de re planè deploratâ *D. Davinius*, mihiq; uni rei totius agendæ pensum denuò concessit; suotamen æquè ac antea continuato, ut spopondit usquequò viveret æger ad eundem accessu.

Nultâ itaquè morâ interpositâ abii, atque ad pharmacopolam ingressus jussi extrahi celeritèr strictam tincturam ab *unc. ss.* *Chinae Chinae* cum vino Malvatico in B. M., quæ tinctura cum forti expressione substantiæ corticis elicitâ, et ab pauca cochlearia redacta, non sine difficultate ipso mane diei xxvij. circâ meridiem propinata fuit ægrotanti, cui ab initio vi adhibitâ os apertum est, et aperto injectus liquor. Unâ plùs minùs elapsâ horâ (sive id contigerit ope vini, sive ope remedii) cœpit ille loqui, interciso tamen sermone, quod mihi animum addidit ultrâ pergendi ad paroxysmum imminens validiùs antevertendum. Assumptâ itaque *unc. j.* novæ *Chinae Chinae* et eâ vini spiritu irroratâ, mox additâ aliquâ vini Malvatici portione, novam tincturam extrahi jussi per simplicem infusionem cum expressione validissimâ, cui admodum saturatæ, et turbidæ adjici curavi modicam quantitatem vini tenuis; indè evaporato vini spiritu in B. M., liquorem restringi iterum jussi, cujus majorem portionem per clysterem injectam volui (quod factum ab alio quoque non-

dùm noveram) minorem verò per os exhibui circa horam 24.; quæ omnia sine difficultate acta sunt, ægro facilem se præbente, somnolento licèt, obtuso, suisque motibus convulsivis et importuno singultu indesinentèr vexato. Nocte autem ipsâ, quâ expectabatur funestus paroxysmus circa horam sextam, levis tantummodò. vixque observabilis facta est accessio cum omnium admiratione: quarè mane subsequente, nempè xxviii. septembris potis fuit me ad lectum illius appropinquantem amabiliter amplecti et osculari, ut et consanguineos, ac amicos intimos, eosque alloqui, et cum iisdem de rebus omnibus alacritèr disserere cum integro mentis, nec non modico corporis vigore; quod omne ipse jam cernens, vix oculis meis fidebam, mirabarque (quod mirabantur et aliis omnes) mei felicitatem tentaminis, cui simile nemo in hac urbe, ne per somnium quidem, antea peregerat, aut viderat. Atque ità post cursum decem dierum ab inchoatâ triplicitate quartanæ intrà 24. horas, quin etiam citiùs in hunc statum devenit, qui mane antecedente derelictus planè fuerat ut conclamatus, et pro tali à cunctis inevitabili fato habitus, ut et rationabilèr habendus.

Eodem nihilominùs mane repetita est oblatio corticis ad *drach. ij.*, ad arcendum certiùs paroxysmum illius quoque diei, eò quia in eam diem incidebat accessio præcipua juxtà periodum antiquam quartanæ simplicis. Cùm tamen ea minimè apparuerit, statuta deinceps fuit à me pro pluribus

diebus sequentibus continuatio corticis dosi tantummodò diminutâ, per modum scilicèt levioris alterantis, priùs ad *drach. ss.*, postmodùm ad *scrup. j.*, donec penitùs abolita fuerit quælibet, utut levis umbra periodi.

Sublatâ in hunc modum quâvis periodo, et reductâ ad summam exilitatem febriculâ permanente, sive continuâ, quæ postremis angustiae diebus irrepperat, expugnato lethargo, sedatisque motibus membrorum tremulis ac convulsivis, unus supererat singultus, qui pertinacitèr perseveravit per undecim dies irritis antè hunc terminum omnibus remediis : erat enim tam vehemens, ut facilè audiri posset etiam in aliquâ distantia transeuntibus per viam. Exacto nihilominùs, ut dictum est, undecim dierum curriculo, cessit tandem; nescio an cortici, an pluribus aliis remediis tam internis, quàm externis constantèr adhibitis et applicitis. Inter hæc mirabilis fuit, quantumvis aspera vesicantium, et sinapismi emplastri tempore procellæ appositorum operatio, quibus remediis perrarò cæteroquè, et in quibusdam tantùm, quæ non facilè simul coeunt, circumstantiis uti consuevi. Ab illorum autem appositione in casu enarrato excitatis vesiculis, et excoriatis genubus, effluxit per mensem et ultrà quantitas incredibilis materiæ putridæ, quæ ipsa sæpiùs strata et pulvinaria penetrabat. non sine meâ admiratione; quâ demùm evacuatione completâ, easdem, aliasque etiam articulationes corripuit arthritis, quæ eousquè vagata est

Huc et illuc, donèc illi supervenerit justo modamine et stillicidio fluxus hæmorrhoidalis, ultimum tandem universæ ægritudini finem imponens intra 40. dies ab enunciata triplicitate quartanæ. Circà brumale equidem solstitium ejusdem anni 1695. (ut nihil subdiceam) cùm Tridentum usquè profecisset, serenissimi Ducis sponsam serenissimam gloriosæ etiamnum recordationis excepturus, eique famulaturus in itinere Mutinam usquè, leviores aliquot febriculas passus est, quas facilè tulit per totum iter, consueta nunquàm munia intermittens; ab iisque, priusquàm Mutinam pertingeret, nullâ ope medicâ perfectè liber evasit.

Atque hæc est ingenua narratio historię morbi et curationis illius; de cujus narrationis veritate in omnibus, et singulis ejus partibus absque ullo addito fucò non est quòd quisquam dubitet; nam præterquamquòd non desunt de hac re testes oculati omni exceptione majores, ipse insuper apud me servo universam et exactam descriptionem casûs, singularumque circumstantiarum illius Italico conscriptam idiomate, firmatamque ac roboratam propriâ manu et caractere generosi paritèr viri *D. Comitis Aloysii Nogarolæ* filii ægrotantis, quam huc non transtuli, eo quia plura continet ad rem nostram minimè facientia, variasque sermocinationes singulis consultationibus habitas, quæ molem historię inutilitèr augerent. Quæ tamen hic inserta visuntur, ab ipsâ descriptione sunt excerpta, ut cuique curioso non pigeat ostendere.

Alios equidem casus quos libro sequenti sum
 relaturus, etsi non minùs insignes sint nupèr ex-
 posito, imò ipsorum nonnulli sint eodem adhùc
 mirabiliores, non tamen, ut hunc, ex peculiari
 quâdam descriptione penès me asservata possum
 colligere; pendente siquidem ægritudine memorati
 nobilis viri, otium aliquod mihi suppetebat, quod
 indè non ità suppetiit; quippè tunc solutus eram
 recentèr nodo aulico per obitum serenissimì Fran-
 cisci II., necdùm obstrictus eo, quo nunc teneor
 immeritus. Quamobrèm cùm ferè cuncta fidere
 memoriæ labili fuerim subindè coactus, quotidia-
 nam omnium expositionem modò persequi est im-
 possibile; et quandocumquè etiam facile id foret,
 esset tamen nimis prolixum, etsi ex aliquâ parte
 majoris foret utilitatis. Aliud est enim describere
 morbum lethalibus jam symptomatis stipatum, aliud
 est videre gradatim progressum ipsius morbi in
 talem statum pervenientis, ad hoc ut possimus
 rectè noscere, quantùm præstiterit remedium in
 eodem verè ad exilium tendente, non verò propter
 imminentem fortassè crisim, vel ob judicantis im-
 peritiam, aut præoccupationem tali apparente, ac
 perperàm credito. Id tamen fidentèr exigam à
 lectoribus meis, ut scilicèt pro certo habeant, quod
 licèt compendiosius, quæ supersunt historias sim
 relaturus, et licèt minutas illarum circumstantias,
 ac seriem ordinatam nequeam exprimere, (quod
 tamen ubi poterit fieri pro modo fiet) attamen,
 nonnisi quæ certò mihi comperta sunt scribam,
 quæ

quæ nempè vel ex schedulis impolitis, sed veridicis, apud me loco adversariorum aut historiarum servatis, vel ex ipsâ meâ indubitatâ reminiscentiâ deprompta sunt. Neque enim histrionum more quidquam attollere, sed castigatissimè, prout virum candidum decet, cuncta referre mihi lex est. Quod tamen si non planè quispiam admittat, hunc ad sanatorum, assidentium, consanguineorum, et amicorum eorundem tribunal appello.

Etsi verò (ut pro coronide repetam quod aliàs protuli) etsi, inquam, has et cæteras hujusce ordinis protestationes sparsim habitas, tam bundè hactenùs edidisse contigerit, ut eas, ferè dixerim, videar jactasse; absit tamen, ut alio id egerim, agamve studio, nisi ut mearum, quotquot sunt, assertionum veritatem ac ingenuitatem (de utrâque enim æquè sum nec parùm sollicitus) coner in propatulo ponere, atque hac tandem viâ, prævio scilicèt multiplicis et indubitabilis experientiæ lumine, cunctis pateat, me *pro ingenii modulo* (si *Sydenhami* verbis uti liceat) me, inquam, *pro ingenii modulo omnes animi nervos in hoc intendisse, ut, si quo modo fieri possit, morborum* (dicam ego, *februm perniciosarum, saltèm, periodicarum*) *medela post cineres meos majori cum certitudine administretur.*

E L E N C H U S
LIBRORUM ET CAPITUM
TOMI PRIMI.

LIBER PRIMUS.

Præstantiam, ac vim Peruviani corticis adversus febres intermittentes, et earum causas, illius pariter tutelam, usumque methodicum in iisdem intermittentibus, saltèm vulgatoribus, aliaque hujusmodi comprehendens.

- CAPUT PRIMUM. Historia primùm invecti apud Mutinenses *Chinæ Chinæ* usûs. Innocuum illa, præstansque febrifugum. Recursus febrium post eam parcius assumptam contingens, ex adverso perperam allegatus. Pro usu illius, præter experientiam, et rationem, auctoritas multiplex Pag. 1
- CAP. II. Pervicax antipathia, quâ nonnulli abhorrent ab usu *Peruviani corticis*, illumque proscribunt; ratio recursui febrium tempestivè occurrendi 28
- CAP. III. Princeps oppositio in *Chinæ Chinæ* usum ex carentiâ sensibilis evacuationis post eandem assumptam petita, diluitur : experimenta quædam, tentata ad explorandam illius vim febrifugam exponuntur. 47
- CAP. IV. Ad placita Humoristarum, et Galenicorum accommodata evacuationum prædictarum sensibilium carentia 77
- CAP. V. Perpensis circâ febrium intermittentium causas placitis neotericorum profitentium fluidorum systema, decernitur, ab assumptâ *Chinâ Chinâ* nullam sensibi-

- lem evacuationem fieri debere. Idem multò magis asseritur in solidorum systemate, de quo, et de nonnullis eidem coherentibus pauca obiter. 96
- CAP. VI. Theoremata ex diversarum opinionum examine, aliaque cogitata circa intermittantium originem, indè usus *Chinæ Chinæ* stabilitur, absque ullâ necessitate insignis evacuationis. 126
- CAP. VII. Usus methodicus *Chinæ Chinæ* in vulgaribus intermittentibus diuturnioribus, variæque illam præscribendi formulæ. 169
- CAP. VIII. Diligentior investigatio, an liceat in principio quoque earundem vulgarium intermittantium *Chinam Chinam* exhibere. 190
- CAP. IX. An *Chinæ Chinæ* oblationem præcedere debeat purgatio, aut venæ sectio. 213
- CAP. X. Doctrina præcedens de *cortice* modò propinando, et modò non, in principiis intermittantium, variis confirmatur curationum historiis. 226

LIBER SECUNDUS.

Februm perniciosarum intermittantium (saltèm ab ortu) descriptionem, et curationem continens, ex aliorum auctorum observatione, additis scholiis materiam hanc magis illustrantibus.

- CAPUT PRIMUM. Malignus mos, et prava in univ-
sum februm hujusmodi perniciosarum natura indicatur.
Accurati circà hanc materiam auctores perpauci. Vis
Peruviani corticis adversùs eas eximia. 266
- CAP. II. De tertianâ perniciosâ, ex *Ludovico Mercato*,
scholiis aliquot insuper adjectis. 273
- CAP. III. Prima tertianæ perniciosæ differentia, ex eo-
dem *Mercato*, additis ut suprâ, scholiis. 283

- CAP. IV. De tertianâ perniciosâ ob tenuis humoris putredinem, ex *Ludovico Mercato*, cum iisdem paritèr scholiis 296
- CAP. V. De tertianâ perniciosâ ex pravâ humorum naturâ, ex eodem *Mercato*, cum scholiis, ut suprâ 309
- CAP. VI. De tertianâ perniciosâ ex miscellâ crassorum humorum cum serosis et tenuibus, ex *Ludovico Mercato*, adjunctis itidem scholiis 318
- CAP. VII. De perniciosâ tertianâ ob aliquod accidens quod succrescit, ex eodem *Mercato*, cum iisdem scholiis. 331
- CAP. VIII. Prava rursùs perniciosarum febrium intermittentium natura innuitur, ex descriptione *Ricardi Morton*, adjunctis paritèr ad claritatem fusioribus scholiis. 339

LIBER TERTIUS.

Continens febrium omnium perniciosarum, tùm planè intermittentium tùm etiam subcontinuarum descriptionem ex propriâ observatione, illarumque curationem, mediâ peculiari methodo Chinam Chinam in iisdem administrandi.

- CAPUT PRIMUM. Febrium omnium perniciosarum periodicarum natura, differentiae, diagnosis, atque prognosis, singillatim exponuntur 371
- CAP. II. Periodicarum febrium perniciosus character generalitèr expenditur in suâ causâ, varia illarum prae-vitas, et actio diversa in triplicem nostri corporis regionem, earundem *Chinâ Chinâ* curandarum idea quaedam practica generalis. 402
- CAP. III. Methodus exhibendi validè atque feliciter *Peruvianum corticem*, adversùs singulas recensitas febrium perniciosarum species, etiam in casibus fermè deploratis. 433

534 ELENCHUS LIBRORUM ET CAPITUM.

CAP. IV. Dilucidatur methodus exposita, examinatur, et defenditur à malè feriatorum dicteriis. Porro circumstantiæ, in quibus ea locum habet, et in quibus non, indicantur. 463

CAP. V. Evitare censuram vulgi difficile, si aliquandò æger hac methodo curatus occumbat. Recensentur idèò fidelitèr casus omnes lethales, in quibus culpatus est insons *cortex*, etsi non oblatus, ut et ii, in quibus verè oblatus non profuit, iique insimul, in quibus nec profuit, nec poterat prodesse 490

CAP. VI. Historia peculiaris, quæ primam occasionem inventioni methodi traditæ auspicatissimè præbuit. . . . 513

FINIS TOMI PRIMI.
